

妙法蓮華經要解

溫陵開元蓮寺比丘 戒環 解

大乘妙法蓮華經弘傳序科文

廣一

將釋此序科文分三

初序分八

二正宗分九

三流通分十

初略釋序題妙

曠一

二明製述人號終

三標示由致妙

四明經傳兩土蘊

五譯有三翻西

六文旨各異三

二花被藉緣通

三顯機差別所

四示教有異金

五推過在機豈

六退席當益是

十二明此經弥盛自

十三顯機教冥符再

十四示持者敬信聞

十五流通分二

十六述製序源由頤

十七連頤流通無

十八初無學衆與

十九二有學衆復

二十初諸天衆爾

二二諸龍衆有

三三緊那羅衆有

四四乾闢邊衆有

清刻龍藏佛說法變相圖

妙法蓮華經要解科文 第一卷

初標叙科義此

二依科列衆三

三初聲聞衆二

四二菩薩衆一

五三人天衆二

六初通釋經題寶


七將釋大經科文分三

八初所述號題妙

九二能述號人溫

十三開題正釋五












三喻明所示四	一答音密闡於	二頌喻密闡慧
四以法合喻四	三答真知實化如	三頌喻冥化山
五結歎迦葉如	四合作成不同是	四頌喻不同其
六以偈重伸七	初頌述成前我破	四廣度遺餘我
○四中根得記于	二頌示所未及如	五結會終實諸
初略敘科義大	三頌喻明四	六受請開漸爾
四頌法合四	四頌合密闡既	七正引喻譬
五明隨機增進我	初善吉得記尔	八因小請大此
六明諸佛道同迦	二旂延得記尔	九受請說頓爾
七結前開後今	三目連得記尔	三善知方宜有
○三因緣周被下根子	初讚滿願成道大	初微昔會今佛
初略敘科義化	二王子隨佛其	二歷陳名迹諸
二依科釋文三	三王子讚佛三	三例餘方梵至西
初正說因緣大	三慶已值遇今	四請轉法輪時
二領悟得記○	四請轉法輪爾	五且約上方五百四
初標本始佛	五瑞動諸天佛	六初立壁言之本此
二敘昔因士	二尋光詣佛爾	七頌沙彌演妙彼
三示今緣五	三禮佛獻供即	八頌數昔會今彼
東南方五百梵王四	四請佛轉法爾	九頌歷陳名迹是
初佛光感動叔	四頌合顯權寶四	十頌成就所化尔
初頌譬本我	初頌昔因八	四衆心解退而
廣	二頌今緣四	五設化權濟導
四頌合顯權寶五	六以偈重宣五	六以偈重宣五
八頌沙彌演妙彼	初頌諸天請法東	七頌沙彌演妙是
六頌愛請開漸無	五頌愛請開漸無	八頌愛請開漸無
七受請說頓佛	六頌因小請大時	九頌結會終實以
八頌沙彌演妙彼	七受請說頓佛	十頌結會終實以
六頌述成二	二重頌三	初正記過
述護法今	初頌述成二	初述權應諸

















妙法蓮華經要解序

曠二

前住福州上生禪院嗣祖沙門及南撰

諸佛出興唯爲一事千經所演無有餘乘直以妙萬法而明一心即幻華而示實相則妙法蓮華經者諸佛之本宗千經之輜輶一心之元鑑實相之妙門也秦譯已還垂八百載訓辭釋義代有哲人而責備求全互有得失信曰滿世間之鶩子如恒沙之菩薩盡思度量莫知少分故雖多歷講解有所未盡而潤色評論不拒來者溫陵蓮寺環師深究一乘博探衆說研幾撫要爲之科解宣和己亥初辱不鄙命予校證既又遍質宗匠務契佛心越丙午復會于南山討疏尋經參詳再四點名相芟繁蔓使入佛知見者無摘葉尋枝之厭有析薪秉燭之觀是真能發明祕要之藏

也或者扣師七軸文中何處爲正說妙法曰千經萬論唯爲此事豈茲一席輒有異談世尊以是而開示羣迷以是而悟入火宅以是而出離寶所以是而前進若等多劫以半日現大千於一身龍女之成佛不輕之遍記藥王之然身觀音之隨應淨藏之轉邪普賢之勸發凡以是也不明此事則滿目陳言開佛知見則孰非妙法竊觀一期之間答見全經之述作矣儻訛披味深造而自得遂可跏趺無量義處反照白毫相光開方便門示真實相直拋糞器長御白牛則一乘妙法備在我而不在佛備在心而不在經矣譬如琴瑟箜篌雖有妙音若無妙指終不能發則夫欲發明是事當以斯解爲妙指也

靖康丁未暮春中瀚日謹序

妙法蓮華經弘傳序

道者山如意野老 祥邁 註

妙法

注曰梵云薩達磨此云妙法或云正法蓋

薩字之中含攝二義故秦本妙法晉本正

曉二

二

法皆無失也具十妙義獨勝餘經故云妙
也一乘真宗中道了義故云正也住持真
理爲物軌範故云法也天台玄義慈恩玄
曉二
贊廣陳義門此不具錄

蓮華

注曰梵云奔荼利迦此云白蓮華白爲衆

色之本一乘爲餘乘之宗故取喻之如下
經中初放白毫之光終賜白牛之駕是此
義也蓮華者居泥不染因果齊彰喻前妙
法開權顯實會三歸一明佛知見不同餘

經序

經法喻雙題故云妙法蓮華

注曰梵云素咀纜此云契經契謂契理契
機經謂貫攝常法即契理合機之教故云
契經今略契字務從簡也述經與旨敘列

源由名爲序也故天台曰發祕密之奧藏
稱之爲妙示權實之正軌故號爲法指久
遠之本果喻之以蓮會不二之圓道譬之
以華聲爲佛事稱之爲經圓詮之初目之
爲序此經蕩化城之執教廢草菴之滯情

曉二

三

開方便之權門示真實之妙理會衆善之
小行歸廣大之一乘文博義深餘經莫及
若廣說者妙有十妙法有三軌蓮華六義
經有六釋具如玄義中說更有光宅疏文
慈恩玄贊學者知之

終南山釋道宣述

注曰終南山名在長安城南與秦嶺太白
太一皆連接也在扶風武功縣關中記云
終南一名中南在天之中居都之南故曰
中南三秦記云終南一名地肺可避洪水
道宣律師名也姓錢氏彭祖之後湖州長
城縣人隋吏部尚書錢申之子生於隋開
皇之間大作佛事於唐太宗高宗之代丈
采昭灼戒德不羣製四分律鈔弘贊毘尼
又述弘明僧傳等百有餘卷有時行道失
蹤感韋將軍捧足錯裁座具致張瓊天人
指授借得天舍利流布人間別有感通
傳具詳異事謚號澄照大師○法華要覽
云師述序時韋天以法華尊上未易冠言
遂稟報十方諸佛佛皆許肯即今法華經

之序也故慈照頌云南山大士最幽玄撮
成樞要在經前章駄天將親垂報十方諸
佛許師言

妙法蓮華經者統諸佛降靈之本致也

注曰致意也諸佛出世本說此經開方便
門示真實相誘火宅之癡子指衣下之明
珠悟諸法空入佛知見故下經云諸佛世
尊唯以一大事因緣故出現於世所謂欲
令衆生開佛知見使得清淨故出現於世
欲示衆生佛知見故出現於世欲令衆生
悟佛知見故出現於世欲令衆生入佛知
見道故出現於世是爲諸佛以一大事因
緣故出現於世○天台師云一即法身大
即般若事即解脫此之三法衆生本具爲
因諸佛顯示爲緣出現元意祇爲此矣此

釋一大事因緣四種知見以四義釋一約

四位二約四智三約四門四約觀心皆言
佛知見者謂分真之初三智五眼一時開
發同入一乘諸佛實相也○天長釋云非
三非五故云一廣博包含故稱大說此化
生故曰事機能感佛爲因佛隨彼應名緣
有此一大事之因緣所以出現於世也開
示悟入者上二即能化謂大開而曲示下
二即所化謂始悟而終入知即根本智見
即後得智亦名一切智智○南嶽思大師
云開佛知見是十住位示佛知見是十行
位悟佛知見是十向位入佛知見是十
地位及等覺位皆言佛知者得一切種智
也皆言佛見者悉得佛眼也此約位釋谷
響鈔云三智圓觀名佛知五眼圓覺名佛

見

蘊結大夏出彼千齡東傳震旦三百餘載
注曰蘊結積聚也大夏西域也震旦東國
也佛滅度後千年之外教流東方故積聚
西域出於千年也自西晉法護創傳此經
至於唐國三百餘年也

西晉惠帝永康年中長安青門熾煌菩薩竺
法護者初翻此經名正法華

注曰晉司馬氏都於洛陽望於東晉故云
西晉惠帝世祖之子永康惠帝年號青門
長安東門本長安霸城門俗呼爲青門竺
法護本月氏國人後移居燉煌故又爲燉
煌郡人也少出家傳道爲懷以西晉之代
來化洛陽立寺於長安青門外設像行道
助誘後徒譯出衆經光揚像法人美其德

號爲菩薩初翻此經名正法華經勒成十卷其真言字句皆作晉言

東晉安帝隆安年中後秦弘始龜茲沙門鳩摩羅什次翻此經名妙法蓮華

注曰西晉遭亂元帝渡江建都江東故云

東晉安帝孝武之子隆安安帝年號後秦

姚興也弘始姚興年號晉居正位秦爲旁

僭故先舉晉而後秦也鳩摩羅什龜茲國人傳教秦邦大弘佛法譯出般若維摩等

經智度中百等論再翻前經名妙法蓮華

經丈成七卷今所行者

隋氏仁壽大興善寺北天竺沙門闍那笈多

後所翻者同名妙法

注曰隋氏謂隋文帝也仁壽文帝年號闍

那笈多三藏法師名也笈多與師那連提

梨耶舍同來此土文帝禮重安置於大興
善寺官給所須譯出衆經後翻此經名添
品妙法蓮華經八卷但於藥草喻後加千
餘字外者皆與羅什本同

三經重沓文旨互陳時所宗尚皆弘秦本

注曰上之三譯本是一經故文詞意旨重

沓互有世人傳讀皆弘什譯

自餘支品別偈不無其流具如序歷故所非
述

注曰宣公作大唐內典錄十卷備括衆經
該論本末今言三本之外更有支流別行
品偈具如所撰內典錄中事多冗雜故此
不述也已上序翻譯源流已下述本經旨
趣

夫以靈嶽降靈非大聖無由開化

注曰靈嶽降靈謂山嶽蘊英靈之秀生此靈明之大聖開化世間意借詩中惟岳降神生甫及申之文也靈神也彼美賢至降生此嘆聖人現化降神也

適化所及非昔緣無以導心

曉

注曰佛雖大聖不化無緣之人故適化所及皆有昔緣開導其心故聞今所說方能

信受也

所以仙苑告成機分小大之別

注曰仙苑即波羅柰國鹿野苑也是昔五

通仙人聞宮女音墮落之處故又號仙人苑也

如來世尊初成佛後向此苑中三轉法輪諸聞法者有登大乘位者有證小乘果者從此世間有大小乘益隨機器分也

金河顧命道殊半滿之科

注曰金河即拘尸那城北阿利羅跋提河此譯爲有金河河畔有婆羅林如來於此婆羅林中入於涅槃顧命謂命將欲終而垂言教謂之顧命昔成王將終作顧命之書今佛將終說涅槃之經殊分也如來於彼涅槃經中說半滿二字分大小二乘豈非教被乘時無足覈其高會

注曰仙苑初唱金河終談道分大小者豈非教被隨根乘時設化但愧無足得預考覈於高會也

是知五千退席爲進增慢之儔

注曰如來將說法華一乘五千比丘禮佛而退者欲顯今經甚深令增上慢人進求大乘爾

五百授記俱崇密化之迹

注曰富樓那等五百聲聞於古佛所久修梵行皆蒙釋迦往生勸化內蘊菩薩外現聲聞今於法華會上俱得授記作佛所以放光現瑞開發請之教源

注曰放光現瑞發起教之因緣也如來初

卷三

八

放白毫相光照於東方萬八千界於是彌勒覩七事以騰疑文殊擬十因而領答此起教之因緣也

出定揚德暢佛慧之宏略

注曰佛從定起明二種甚深演暢佛慧之

大略也二甚深者一證甚深經云諸佛智慧甚深無量二阿含甚深經云其智慧門難解難入此序意也

朽宅通入大之文軌

注曰此火宅喻也火宅喻於三界諸子喻

於衆生火宅門外而設三車喻昔權說三乘也末後等賜大白牛車喻今實說一乘也破三顯一誘入大乘此如來之本致也光宅疏主立四乘教義准於此化城引昔緣之不墮

注曰此化城喻也化城喻二乘寶所喻於大乘勸進二乘令歸一極勿滯權宗而爲究竟昔爲王子已化汝等今說法華再引令入此上三句明三周之旨也

繫珠明理性之常在

卷三

注曰繫珠喻也珠喻一乘佛性醉人衣下

而繫寶珠昏沉不知枉受辛苦喻諸聲聞佛於往昔大通佛所爲王子時以大乘法而令發心多劫廢忘不知不覺既得羅漢以少爲足今蒙佛說昔事方憶授無上記

喻如親友指珠示之令離貧苦

鑿井顯示悟之多方

之性自非如來大慈遠濟至極慈心誰能如此

注曰鑿井喻也水喻法華一乘穿鑿求之喻聞解思修若見濕泥知水必近若聞法華成佛不遠開示多方令人悟入又乾土

喻如衆生濕土喻如二乘泥喻菩薩水喻諸佛

詞義宛然喻陳惟遠

注曰佛說此經言詞義理明白宛然譬喻鋪陳其致惟遠非佛智深悲厚孰肯如是自非大哀曠濟拔滯溺之沉流一極悲心拯昏迷之失性

注曰哀悲也曠遠也一極至極也言三周七譬顯示一乘四行六記攝諸含識文喻巧妙勸進諄諄拔出生死之流援拯昏迷

自漢至唐六百餘載總歷群籍四千餘軸受持盛者無出此經

注曰大教東傳自漢至唐中間經籍四千餘卷受持轉誦斯經獨盛將非機教相扣並智勝之遺塵聞而深敬俱

威王之餘勣

注曰勣功也扣投也言根教相投間而便敬之人皆大通智勝佛之遺塵威音王佛之餘功也

輒於經首叙而綜之庶得早淨六根仰慈尊之嘉會速成四德趣樂土之玄猷

注曰庶冀欲也此經殊勝隨喜者獲五福書持者淨六根仰攀也慈尊嘉會謂慈氏

如來龍華之會也四德謂涅槃具常樂我淨之四德也樂土謂法性常寂光土玄妙也猷道也

弘贊莫窮永貽諸後云爾

注曰貽遺也言弘贊此經永遺後代真流通之無盡也

妙法蓮華經弘傳序終

妙法蓮華經要解卷第一

溫陵開元蓮寺比丘 戒環 解

實相妙法巧喻蓮華內則直指乎一心外
一則該通乎萬境方華即果處染常淨此蓮
之實相也生佛本有渝變靡殊此心之實

相也其狀虛假其精甚真此境之實相也

心境萬類通謂之法精粗一致凡聖同源
即諸世事觸事而真言詞不可示分別不
能解故以妙稱也六趣之所迷淪蓋迷此
也諸佛之所修證蓋證此也洎夫廣演言

教無數方便蓋爲此也但以衆生垢重根
器未純先說三乘假名引導故權而未實
麗而未妙及乎諸冀既除心相體信乃示
實相會歸一乘則妙而無麗矣諸佛能事
終畢於是也然所謂妙法非去麗而取妙

蓋即麗以顯妙也所謂一乘非離三而說
一蓋會三而歸一也即麗顯妙猶蓮之即
染而淨會三歸一猶蓮之自華而實法喻
雙彰名實並顯故號妙法蓮華夫證是法
者必以大智爲體妙行爲用智譬則蓮行
譬則華智行兩全乃盡其妙故經文始於
一光東照智境全彰終於四法成就行門
悉備正宗之初三周開示皆所以明體也
囑累之後六品敷揚皆所以明用也中間
轍迹無非智行旁顯體用兼明彰實相之
大全列開悟之真範發明種智成就果德
故若有聞者無不成佛凡能領悟即得受
記一事一相無非妙法也由是而徃山河
大地明暗色空擴而充之則物物燈明智
體推而行之則步步普賢行門直下即法

以明心不復離物以觀妙則所謂大事因緣一題盡之矣

欽惟斯典盛行於世人莫不願洛誦深造而每見其難能者非經之難特傳記難之也夫傳以通經爲義辭達則已類且繁分

名相虛尚多駢煙颺細科塵飛雜辯滔滔

謾謾杳莫可究所以難能也竊觀近世明經之體一於經旨不泥陳言欲約而盡深而明釋義不出科目立言必求綸貫煥乎有文釋然易解今輒效爲斯解然有其志

無其才深媿其不逮也妄意之初竊謂法

華爲三乘驥栝大事指南與華嚴實相終始於是兩載覃思華嚴經論深考吾佛降靈之本致復咨謀宗匠探臘講肆歷窮智者慈恩廣疏古今作者注解摭其所聞叅

諸圓覺楞嚴維摩諸經稽覈宗趣證正事法然後命筆雖立科釋義有異舊說而綜文會意稍合華嚴削繁錄實務在疏明一大事佛知見而未敢自許達者苟不是古非今以人廢言試詳覽之一校其當否

釋經有科判教有宗如禾有科以容其苞本如水有宗以會其支派嘗謂華嚴法華蓋一宗也何以明之夫法王應運出真兆聖唯爲一事無有餘乘是以首唱華嚴特明頓法雖知根鈍且稱本懷及乎怖大昏惑乃權設方宜至於衆志貞純則還示實

法然則二經一始一終實相資發故今宗華嚴而科釋也或謂華嚴純談實性獨被大機法華引權入實三根齊被二經旨趣迥不相及引彼釋此殆不知宗而愚竊觀

信解品其父先來求子不得中止一城其家大富窮子遙見恐怖疾走正喻初說華嚴也臨終命子委付財物窮子歡喜得大寶藏正喻終說法華也述此觀之始而驚怖終而親附者無異父窮之所棄達之所獲者無異寶既無以異何爲而不應宗之耶又况二經以智立體以行成德放光現瑞全法界之真機融因會果開修證之捷逕凡所設法意緒並同二經相宗亦足見聖人說法始終一貫果惟一事無有餘乘旨趣稍馴幸無深誚也今科判此經二十八品分三初序分一品二正宗分十九品三流通分八品正宗二初三周開示十品自方便至學記八品說三周法授三根記自法師至寶塔二品授廣記以圓該前記

會諸佛以圓證前法二顯妙勸持九品自提婆至安樂行三品顯功行之妙也自湧出至壽量二品顯本迹之妙也自分別至不輕四品顯聞持之妙也使由前開悟依此弘持乃不失宗圓契妙法流通八品自神力品發起囑累品付授其餘六品全體前法示現行境流通是道名以行契智常然大用之門今初序分者開發正宗之端緒也其法有三自人天衆集無量義畢佛跋大定天雨四華六震撼無明之障緣一
廣二
光現智境之實相此釋尊標本圓發其緒也其次彌勒示問文殊決疑引燈明之本光證今佛之瑞相此大士承流助發其緒也自餘廣引意皆懸叙一經本末欲達正宗必先明序分則於深經猶繹絲之得緒

無所不盡猶陞堂之得序必臻其奧矣

妙法蓮華經要解卷第一

音釋

借子念云支易肺乾切也也也也也也

取 直 段 切

說也

事革隸除所

也切括於草巖

考也謹也切

馴切馬

也似臍切部

詩序解注四

也切雞革肺

從見切肺側

里有也出澤

石以撫骨切

妙法蓮華經要解卷第二

曠三

溫陵開元蓮寺比丘 戒環 解

姚秦三藏法師鳩摩羅什奉 詔譯

姚秦東晉僞王也姓姚名興爲秦國王梵

語鳩摩羅什此云童壽謂童年而有耆德

也奉秦王詔翻譯此經

序品第一

如是我聞一時佛住王舍城耆闍崛山中

如是之法我從佛聞此阿難結集時陞座

最初之唱以證法有所授而已不必玄說

一時之語乃佛遺言諸經通用故不定指

也王舍城即靈山所附之城摩竭陀國之

屬境也即西域人間耆闍崛山此云鷲頭

山從形得名即古佛住處以古佛所住故

稱靈鷲夫說法所依各隨宗趣華嚴展轉

十處爲圓彰法界圓覺依大光明藏爲直示本起此依人間之城者同染淨以明蓮華之義據古佛之處者示祖述以繼燈明之道耳

此經會權歸實聲聞當機所以初列菩薩即主伴衆也人天外護衆也

與大比丘衆萬二千人俱皆是阿羅漢諸漏

已盡無復煩惱逮得已利盡諸有結心得自

在

佛常隨衆止千二百五十人今言萬二千

者兼他方所集也阿羅漢義翻殺賊亦曰應供亦曰不生也善淵之心不能全一粘湛發識流逸奔境名漏諸漏者謂欲漏有漏無明漏皆以粘湛妄識爲體爲三界煩惱之本煩惱即貪嗔癡等十使爲諸漏之

緣戕害法身偏惱正性名煩惱賊言漏盡
無惱者以本盡故緣無是謂殺賊也已利
即證智斷惑之事文句謂三界因果皆爲
他事智斷功德乃名已利逮得已利乃堪
爲人天福田故號應供律文凡於應供須
標三
付已德行全缺者使付已利也蓋夫苦身
而作端坐而食擎跪而拜逆立而受苟無
已利之德其害非細行人識之諸有結者
即感習之業爲二十五有之生因以因盡
則果亡是謂不生也小乘有定無慧爲偏
縛未得自在今云心得自在乃是定慧兩
足俱解脫人以明大阿羅漢影響衆爾
其名曰阿若憍陳如摩訶迦葉優樓頻螺迦
葉伽耶迦葉那提迦葉舍利弗大目犍連摩
訶迦旃延阿毘樓駁劫賓那橋梵波提離婆

多畢凌伽婆蹉薄拘羅摩訶俱緋羅難陀孫
陁羅難陁富樓那彌多羅尼子須菩提阿難
羅睺羅如是衆所知識大阿羅漢等

此舉萬二千人領袖上德即十大弟子之
列也佛有十大弟子爲法王法臣各備衆
德權示專門輔弼大化故大迦葉頭陁第
一身子智慧第一目連神通旃延論議阿
鞞天眼富那說法善吉解空阿難多聞波
離持律羅云密行各居第一如孔門十哲
之列是其常數今從憍陳至羅云有二十
標三

人者旁兼衆德圓彰法化也亦各有第一
之德增一阿含云憍陳初悟解優樓供養
衆伽耶伏諸結那提善教化劫賓知星宿
憍梵受天供離婆不倒亂畢凌能苦坐薄
拘壽不天俱繕善答難孫陁容捉特各第

一也衆所知識者其德顯著故諸名緣義非經要旨不必繁講復有學無學二千人摩訶波闍波提比丘尼與眷屬六千人俱羅睺羅母耶輸陀羅比丘尼亦與眷屬俱

此小聲聞衆尚在學地學於無學者也摩訶波闍此云大愛道爲尼衆首與耶輸皆示迹同塵影響衆也

菩薩摩訶薩八萬人皆於阿耨多羅三藐三菩提不退轉皆得陀羅尼樂說辨才轉不退轉法輪供養無量百千諸佛於諸佛所植眾德本常爲諸佛之所稱歎以慈修身善入佛慧通達大智到於彼岸名稱普聞無量世界能度無數百千衆生

菩薩摩訶薩者謂菩薩中之大菩薩即地

上等覺之列據非地前也阿耨菩提此云無上正遍正道陀羅尼此云總持謂得一切智總持萬法也樂說辨即四辨之總八地已上名不退位五地七地得陀羅尼說決定法名不退輪諸皆歎德也住不退位者得是道以處已轉不退輪者運是道以利人此自覺覺他之德也以慈修身者意在洪濟善入佛慧謂能運漚和通達大智則所證者明到於彼岸則所造者實此內德也由是充實著現故名稱普聞此外德也內德通達則有見而化者外德普聞則有聞而化者故其所度至於無數百千皆大菩薩之德地前所無矣

其名曰文殊師利菩薩觀世音菩薩得大勢菩薩常精進菩薩不休息菩薩寶掌菩薩藥

王菩薩勇施菩薩寶月菩薩月光菩薩滿月
菩薩大力菩薩無量力菩薩越三界菩薩跋
陁婆羅菩薩彌勒菩薩寶積菩薩導師菩薩
如是等菩薩摩訶薩八萬人俱

此經以智立體故文殊居首蓋文殊具大

智妙德爲法身體爲諸佛師爲世間眼開
佛知見莫先於此餘各表此經之一德也
觀音助智行悲大勢具大德用精進念不
退轉不息億劫勤修寶掌掌握法寶藥王
應機發藥勇施一切能捨寶月覺體明淨

月光能除癡闇滿月兼上二德大力負荷
大法無量力對境不動越三界不現身意
跋陁羅善護正見彌勒以慈續佛寶積能
聚能利導師導邪入正此八萬之上首一
經之表法也蓋由大智開佛知見而助智

以悲歷備衆德乃至尊邪入正則一乘之
體具萬行之用全矣不列普賢者自觀音
已下皆普賢之行但初且以智立體開佛
知見終至以行成德乃見普賢各專表也
爾時釋提桓因與其眷屬二萬天子俱復有

明月天子普香天子寶光天子四大天王與
其眷屬萬天子俱自在天子大自在天子與
其眷屬三萬天子俱娑婆世界主梵天王尸
棄大梵光明大梵等與其眷屬萬二千天子
俱

釋提桓因即帝釋也明月月天子普香星
天子寶光日天子也欲界六天曰四天王
天忉利夜摩兜率化樂他化自在帝釋即
忉利天主化樂天主號自在天主號
大自在不言夜摩兜率者舉上下以該中

也色界三禪十八天初禪三梵天其王爲
娑婆界主號尸棄大梵二禪三光天王號
光明大梵不舉餘天者言等以該之

有八龍王難陀龍王跋難陀龍王婆伽羅龍
王和修吉龍王德義迦龍王阿那婆達多龍
王摩那斯龍王優鉢羅龍王等各與若干百
千眷屬俱

難陀此云喜跋云賢以時雨喜物有賢德
故二龍乃目連所降者婆伽羅云海和修
言云多頭德义迦云現毒阿耨達池名摩
那斯云大身優鉢羅云青蓮池若干即不
定數謂不勝數也

有四緊那羅王法緊那羅王妙法緊那羅王
大法緊那羅王持法緊那羅王各與若干百
千眷屬俱

有四阿修羅王婆稚阿修羅王怯羅騫馱阿
修羅王毘摩質多羅阿修羅王羅睺阿修羅
王各與若干百千眷屬俱

修羅此云非天多嗔無天行故婆稚云有
縛好鬪戰故怯羅云廣肩涌海水者毘摩

緊那此云疑神似人而有角可疑亦云歌
神隨佛說法皆能歌之故皆名法也法緊
歌四諦妙緊歌十二緣大緊歌六度持緊
歌一乘

有四乾闥婆王樂乾闥婆王樂音乾闥婆王
美乾闥婆王美音乾闥婆王各與若干百千

眷屬俱

乾闥婆此云嗅香能尋香奏樂也樂謂歌
舞等伎樂音謂鼓節絃歌美即伎中勝者

美音音中勝者

質多云海水波音擊海波者羅睺云障蔽能障日月

有四迦樓羅王大威德迦樓羅王大身迦樓

羅王大漢迦樓羅王如意迦樓羅王各與若

千百千眷屬俱

廣三

迦樓羅此云金翅鳥常散龍大威攝龍大

身勝群大滿龍常滿意如意領有此珠八部皆神衆能變形預會不列夜叉摩睺羅

畧之也

常提希子阿闍世王與若干百千眷屬俱各

禮佛足退坐一面

摩竭陁國頻婆羅王夫人號常提希子

號阿闍世不舉人民者王出而民從可知

各禮佛足退坐一面言雖多不逼肅然有序

爾時世尊四衆圍繞供養恭敬尊重讚歎爲諸菩薩說大乘經名無量義教菩薩法佛所護念

身心不動

佛說此經已結跏趺坐入於無量義處三昧無量義經云無量義者從一實相生無量法衆集先說無量義經經畢復入無量義定者所以發妙法端緒也示於一事一理一動一寂之間莫不具無量義然後可入妙法

是時天雨曼陀羅華摩訶曼陀羅華曼殊沙華摩訶曼殊沙華而散佛上及諸大衆

摩訶云大曼陀羅云適意曼殊沙云柔軟皆天妙華也華表正因以因必趣果故散佛上而又及大衆者示此會當得正因也

普佛世界六種震動

六震者動起漏震吼擊六種也東漏西沒動遍等遍之說皆不離此所以六震者表依六識翻破無明楞嚴說山河大地皆無明感結本唯一真故云普佛世界

廣三

爾時會中比丘比丘尼優婆塞優婆夷天龍

夜叉乾闥婆阿修羅迦樓羅緊那羅摩睺羅

伽人非人及諸小王轉輪聖王是諸大衆得未曾有歡喜合掌一心觀佛

喜觀前瑞翹趺嘉應

爾時佛放眉間白毫相光照東方萬八千世

界靡不周遍

一光周亘全彰妙體也白毫即本覺妙明

東方爲不動智境萬八千界依根塵識十八界言也衆生迷此本明本智成十八界

自爲限礙難造妙體故將說法華先現此瑞使行人直下自發本明照了本智則根塵識界通爲智境無復限礙廓達圓融故言萬八千界

下至阿鼻地獄上至阿迦膩吒天於此世界

盡見彼土六趣衆生又見彼土現在諸佛及聞諸佛所說經法

阿鼻此云無間即地獄最下阿迦膩吒云質礙究竟即色界極頂不言無色者無色非可見故上極諸天下窮地獄於此世界

廣三九
盡見彼土所謂圓現

并見彼諸比丘比丘尼優婆塞優婆夷諸修行得道者復見諸菩薩摩訶薩種種因緣種種信解種種相貌行菩薩道復見諸佛般涅槃者復見諸佛般涅槃後以佛舍利起七寶

塔

始自比丘四衆修行得道次見菩薩諸佛行相終至涅槃起塔是現衆生諸佛之始終也一光東照周亘圓現如此詳悉者直依智境示諸法實相也世間萬法自識境觀之悉皆幻惑莫得其實自智境觀之如是性相因緣如是果報本末咸一妙明無非實相若諸衆生本明洞發本智現前則廓然圓現與佛不殊妙體實相昭昭心目後經文全顯斯旨故先發緒如此

爾時彌勒菩薩作是念今者世尊現神變相以何因緣而有此瑞今佛世尊入於三昧是不可思議現希有事當以問誰誰能答者復作此念是文殊師利法王之子已曾親近供

養過去無量諸佛必應見此希有之相我今當問爾時比丘比丘尼優婆塞優婆夷及諸天龍鬼神等咸作此念是佛光明神通之相今當問誰爾時彌勒菩薩欲自決疑又觀四衆比丘比丘尼優婆塞優婆夷及諸天龍鬼神等衆會之心而問文殊師利言以何因緣而有此瑞神通之相放大光明照於東方萬八千土悉見彼佛國界莊嚴
彌勒爲補處之主欲作當來之利故於此示疑以問文殊爲世間之眼欲發群盲之智故於後援古以證是謂助發

於是彌勒菩薩欲重宣此義以偈問曰
曇三
文殊師利 導師何故 眉間白毫
大光普照 雨曼陀羅 曼殊沙華
栴檀香風 悅可衆心 以是因緣

地皆嚴淨 而此世界 六種震動
而四部衆 咸皆歡喜 身意快然
得未曾有

此問放光雨華動地衆喜四瑞也不問說
法入定二瑞者爲所常見故

眉間光明 照於東方 萬八千土

皆如金色 從阿鼻獄 上至有頂

諸世界中 六道衆生 生死所趣

善惡業緣 受報好醜 於此悉見

領上極諸天下窮地獄等相也

又覩諸佛

聖主師子

演說經典

微妙第一

其聲清淨

出柔軟音

教諸菩薩

無數億萬

梵音深妙

各於世界

講說正法

以無量喻

令人樂聞

照明佛法

種種因緣

開悟衆生 若人遭苦 厥老病死
爲說涅槃 盡諸苦際 若人有福
曾供養佛 志求勝法 爲說緣覺
若有佛子 修種種行 求無上慧
爲說淨道

頌見聞諸佛所說經法也

聖主師子言說法無畏演說經典微妙第
一至令人樂聞即以一乘教諸菩薩也講
說正法種種因緣至爲說淨道即以三乘
開悟衆生也若人遭苦至盡諸苦際即小
乘四諦法四句如次配見苦斷集修道證
滅也若人有福至爲說緣覺即中乘十二
緣法也聲聞三生種福爲厭苦支佛百劫
種福爲求道故有福供佛志求勝法可授
中乘若有佛子至爲說淨道即大乘六度

法也六度以種種行爲用以無上慧爲體
行得慧濟即無染著故名淨道於二乘言
人於大乘言佛子者止宿草菴自同使人
成就大志乃命爲子

文殊師利

我住於此

見聞若斯

及千億事

如是衆多

今當略說

結前開後也

我見彼土

恒沙菩薩

種種因緣

而求佛道

或有行施

金銀珊瑚

真珠摩尼

瑣瑣瑪瑙

金剛諸珍

奴婢車乘

寶飾輦輿

歡喜布施

回向佛道

願得是乘

三界第一

諸佛所歎

或有菩薩

駟馬寶車

欄楯華蓋

軒飾布施

復見菩薩

身肉手足

及妻子施

求無上道

又見菩薩

頭目身體

欣樂施與

求佛智慧

文殊師利

我見諸王

往詣佛所

問無上道

便捨樂土

宮殿臣妾

剃除鬚髮

獨處閑靜

或見菩薩

而作比丘

勇猛精進

樂誦經典

又見菩薩

思惟佛道

入於深山

又見離欲

常處空閑

深修禪定

又見五神通

安禪合掌

又見菩薩

復見菩薩

以千萬偈

讚諸法王

智深志固

復見菩薩

能問諸佛

聞悉受持

又見佛子

定慧具足

以無量喻

爲衆講法

欣樂說法

化諸菩薩

破魔兵衆

而擊法鼓

此頌修行之始後頌涅槃之終此即種種

因緣信解相貌而大要不出六度從或有行施至求佛智慧檀度也我見諸王至而被法服戒度也比丘處閑誦經忍度也菩薩勇猛爲道進度也離欲修禪至讚諸法王禪度也智深志固至而擊法鼓智度也

職三

十三

戒有三聚謂攝善法戒攝衆生戒攝律儀

戒諸王問道攝善法也捨臣妾攝衆生也

被法服攝律儀也忍有三種謂生忍苦忍

第一義忍比丘處閑誦經即閑林靜谷惡人惡獸爲生忍礪比丘節爲苦忍樂誦經

典即第一義忍也離欲有三謂五塵欲二乘欲法愛欲皆離也得五神通者非凡夫五通以初學對佛分有滿無漏耳

又見菩薩

寂然宴默

天龍恭敬

不以爲喜

又見菩薩

處林放光

濟地獄苦	令入佛道	又見佛子
未嘗睡眠	經行林中	勤行佛道
又見具戒	威儀無缺	淨如寶珠
<small>增上慢人</small>	又見佛子	住忍辱力
以求佛道	惡罵捶打	皆悉能忍
及癡眷屬	又見菩薩	離諸戲笑
攝念山林	親近智者	一心除亂
或見菩薩	億千萬歲	以求佛道
施佛及僧	肴餚飲食	百種湯藥
或無價衣	名衣上服	價直千萬
栴檀寶舍	千萬億種	
清淨園林	衆妙卧具	
施佛及僧	花菓茂盛	
如是等施	流泉浴池	
歡喜無厭	種種微妙	
求無上道		

或有菩薩 說寂滅法 種種教召
無數衆生 或見菩薩 觀諸法性
無有二相 猶如虛空 又見佛子
心無所著 以此妙慧 求無上道
此廣頌菩薩行道因緣相貌也第十三
十四天龍恭敬
不以爲喜菩薩自重也處林放光濟地獄
苦菩薩大悲也癡眷屬謂唯恣情欲不能
遷善者自未嘗睡眠至歡喜無厭乃六度
衆行不復次第但隨所見或有說寂滅法
等者或以教說求道也觀諸法性等者或
以覺觀求道也心無所著等者離教觀忘
心迹以求道也雖種種因緣相貌不同無
非實相妙行故於光中詳現

無數恒沙 嚴飾國界 寶塔高妙
五千由旬 縱廣正等 二千由旬
一一塔廟 各千幢幡 珠交露幔
寶鈴和鳴 諸天龍神 人及非人
香華伎樂 常以供養 文殊師利
諸佛子等 爲供舍利 嚴飾塔廟
國界自然 殊特妙好 如天樹王
其華開敷 此頌涅槃之終也直曰縱橫白廣四十里
爲一由旬天樹王者忉利天園生樹寶華第十三十五
開時天界自然嚴飾妙好乃佛滅後供養
舍利果報也故諸佛子爲供舍利嚴好如
之

文殊師利 又有菩薩 佛滅度後
供養舍利 又見佛子 造諸塔廟

放一淨光 照無量國 我等見此
得未曾有 佛子文殊 穎決衆疑

四衆欣仰 瞳仁及我 世尊何故
放斯光明 佛子時答 決疑令喜

何所饒益 演斯光明 佛坐道場
所得妙法 爲欲說此 爲當授記

示諸佛土 衆寶嚴淨 及見諸佛
此非小緣 文殊當知 四衆龍神

瞻察仁者 爲說何等 人師佛世尊
仁指文殊也

爾時文殊師利語彌勒菩薩摩訶薩及諸大士善男子等如我惟忖今佛世尊欲說大法雨大法雨吹大法螺擊大法鼓演大法義諸善男子我於過去諸佛曾見此瑞放斯光已即說大法是故當知今佛境光亦復如是欲

令衆生咸得聞知一切世間難信之法故現斯瑞

雨以一味霑洽螺以一音亘徹鼓以號令群衆義以開發隨宜

諸善男子如過去無量無邊不可思議阿僧祇劫爾時有佛號日月燈明如來應供正徧知明行足善逝世間解無上士調御丈夫天人師佛世尊

阿僧云無數劫云時分欲原光瑞本始而推之於無數不思之劫者此光此法固始

第3

十六

於無始超乎數量也佛號日月燈者日昱晝月昱夜燈則照於日月所不照而通乎晝夜之道相續無窮彼佛妙智真明兼三者之德故以爲號十號初言本終言迹中言德本謂真性一切如也故曰如來迹謂

道化人天尊仰故曰世尊德即萬德種智事也爲良福田故應供養圓具四智故能正遍知萬行真明曰明行足善入塵勞窮盡萬法曰善逝世間解證無等等曰無上士化物不暴挺然不屈曰調御丈夫三界

模範曰天人師自他覺滿曰佛總而言之從如實道來具萬德應物爲世所尊之號也

演說正法初善中善後善其義深遠其語巧妙純一無雜具足清白梵行之相爲求聲聞者說應四諦法度生老病死究竟涅槃爲求辟支佛者說應十二因緣法爲諸菩薩說應六波羅蜜令得阿鞞多羅三藐三菩提成一切種智

此敘燈明亦於一乘隨宜說三也初中後

續三

十七

一五·一六〇九

者指三乘之法皆應機契道無不善也藉權顯實故其義深遠方便隨機故其語巧妙本於一乘故純一無雜明菩薩行故具足清白梵行之相以一乘應三乘而說故云說應四諦等於二乘言求於菩薩不言

求者佛爲大事出興本說教菩薩法故不待求於餘乘非所願說特因樂小者求而後說也於聲聞言涅槃於辟支菩薩言種智者聲聞脣生死苦取滅諦小果故進之於究竟涅槃辟支利智菩薩大根故成之以一切種智一切種智唯佛能具

次復有佛亦名日月燈明次復有佛亦名日月燈明如是二萬佛皆同一字號日月燈明又同一姓姓頗羅墮彌勒當知初佛後佛皆同一字名日月燈明十號具足所可說法初

中後善其最後佛未出家時有八王子一名有意二名善意三名無量意四名寶意五名增意六名除疑意七名響意八名法意是八王子威德自在各領四天下是諸王子聞父出家得阿耨多羅三藐三菩提悉捨王位亦隨出家發大乘意常修梵行皆爲法師已於千萬佛所植諸善本

此又引然燈本始以明妙法傳續之由也自初燈明至最後燈明有二萬佛然燈即最後燈明之王子也名字姓皆同者明道同也有八王子者聖人示迹表法也依燈明有八意表從妙明真心出妙觀察意其用有八也妙心本空而能有用故名有意此妙有也出乎妙心用無不善故名善意此妙善也量不可測名無量意此妙量也

對境利用名寶意此妙寶也觸類而長名增意此妙增也善能覺了名除疑意比妙覺也應物如響名響意此妙響也建立萬法名法意此妙法也領四天下者未出家時未免物累也聞父得道捨位出家者離情去累乃趣正覺之表也智勝王子有珍玩之具聞父得道捨之而往其意同此心王出三界家則八識之子隨出而爲諸法師亦若是矣

是時日月燈明佛說大乘經名無量義教菩薩法佛所護念說是經已即於大衆中結跏趺坐入於無量義處三昧身心不動是時天雨曼陀羅華摩訶曼陀羅華曼殊沙華摩訶曼殊沙華而散佛上及諸大衆普佛世界六種震動爾時會中比丘比丘尼優婆塞優婆

夷天龍夜義乾闥婆阿修羅迦樓羅緊那羅
摩睺羅伽人非人及諸小王轉輪聖王等是
諸大眾得未曾有歡喜合掌一心觀佛爾時
如來放眉間白毫相光照東方萬八千佛土
靡不周遍如今所見是諸佛土

廣三

十九

彌勒當知爾時會中有二十億菩薩樂欲聽
法是諸菩薩見此光明普照佛土得未曾有
欲知此光所爲因緣

昔衆見瑞欲知其緣亦如今衆

時有菩薩名曰妙光有八百弟子是時日月

燈明佛從三昧起因妙光菩薩說大乘經名
妙法蓮華教菩薩法佛所護念

妙光即文殊前身昔因妙光而說者爲其

爲世間眼能證此法故今亦因其助發

六十小劫不起於座時會聽者亦坐一處六

十小劫身心不動聽佛所說謂如食頃是時
衆中無有一人若身若心而生懈倦

昔衆六十小劫謂如食頃今衆五十小劫
謂如半日皆由得法華三昧於道不倦如
此蓋法華三昧真知見力不爲頃久推移
不爲時劫加損故也

日月燈明佛於六十小劫說是經已即於梵
魔沙門婆羅門及天人阿修羅衆中而宣此
言如來於今日中夜當入無餘涅槃

經已唱滅欲付大事故今佛經已亦云不

久涅槃欲以妙法付囉有在也涅槃此云
減度謂減盡諸苦度生死海真常道果之
號非喪亡之號也真常者生靈性命之大
本也本真無妄疑常不變由一念之迷妄
沉幻苦而失其所謂真淪變生死而失其

所謂常聖人復還元覺不沉諸妄不受諸變故曰真常與儒所謂復則不妄老所謂復命曰常同意所謂有餘無餘者小乘厭生死苦欲速出三界滯於偏真證性未圓故名有餘大乘離生死見無退無出凝然

常寂證性已圓故名無餘今云入涅槃者示脫幻妄塵擾而反乎本真凝寂也

時有菩薩名曰德藏日月燈明佛即授其記告諸比丘是德藏菩薩次當作佛號曰淨身多陀阿伽度阿羅訶三藐三佛陀佛授記已

便於中夜入無餘涅槃

亦如今說經後記諸弟子也多陀阿伽度云如來阿羅訶云應供三藐三佛云正偏正覺略稱十號之三也

佛滅度後妙光菩薩持妙法蓮華經滿八十

小劫爲人演說日月燈明佛八子皆師妙光妙光教化令其堅固阿耨多羅三藐三菩提是諸王子供養無量百千萬億佛已皆成佛道其最後成佛者名曰然燈

妙光昔助燈明爲然燈之師今助釋迦續

燈明之道八子生於燈明師於妙光至其成佛又號然燈而然燈又爲釋迦之師蓋是道出於本覺明心而常資妙光智體傳續不窮如一燈明然百千燈其明不窮其光不二此妙法大本也故援引止此

八百弟子中有一人號曰求名貪著利養雖復讀誦衆經而不通利多所忘失故號求名是人亦以種諸善根因緣故得值無量百千萬億諸佛供養恭敬尊重讚歎

彌勒初心貪著小乘利養故於衆經唯求

名言無所通達忘失正見蒙燈明教故得
值多佛趨補處果如須菩提等貪著小果
一日之價於此大乘無有志求蒙釋迦教
故得近法王獲大寶位

彌勒當知爾時妙光菩薩豈異人乎我身是
也求名菩薩汝身是也今見此瑞與本無異
是故惟忖今日如來當說大乘經名妙法蓮
華教菩薩法佛所護念

今昔之事宛然相契則將說法華斷可忖
矣夫引瑞事同今所忖唯此且又廣引三

昧唱滅等者意在冥叙一經本末故廣引
之事皆契後文

爾時文殊師利於大眾中欲重宣此義而說
偈言

我念過去世 無量無數劫 有佛人中尊

號日月燈明 世尊演說法 度無量衆生
無數億菩薩 令入佛智慧 佛未出家時
所生八王子 見大聖出家 亦隨修梵行
此通頌初後燈明法化及八子之迹

時佛說大乘 經名無量義 於諸大眾中
而爲廣分別 佛說此經已 卽於法座上
跏趺坐三昧 名無量義處 天雨曼陀華
天鼓自然鳴 諸天龍鬼神 供養人中尊
一切諸佛土 即時大震動 天雨曼陀華
現諸希有事

此光照東方 萬八千佛土 示一切衆生
生死業報處 又見諸佛土 以衆寶莊嚴
琉璃頤梨色 斯由佛光照 及見諸天人
龍神夜叉衆 乾闥緊那羅 各供養其佛
又見諸如來 自然成佛道 身色如金山

端嚴甚微妙 如淨琉璃中 內現真金相
世尊在大衆 敷演深法義 一一諸佛土
聲聞衆無數 因佛光所照 悉見彼大衆
自然成佛道者成就慧身不由他悟
或有諸比丘 在於山林中 精進持淨戒
猶如護明珠 又見諸菩薩 行施忍辱等
其數如恒沙 斯由佛光照 又見諸菩薩
深入諸禪定 身心寂不動 以求無上道
又見諸菩薩 知法寂滅相 各於其國土
說法求佛道

不頌涅槃相略之也

爾時四部衆 見日月燈佛 現大神通力
其心皆歡喜 各各自相問 是事何因緣
天人所奉尊 適從三昧起 讀妙光菩薩
汝爲世間眼 一切所歸信 能奉持法藏

如我所說法 惟汝能證知 世尊既讚歎
令妙光歡喜 說是法華經 滿六十小劫
不起於此座 所說上妙法 是妙光法師
悉皆能受持 佛說是法華 令衆歡喜已
尋即於是日 告於天人衆 諸法實相義
已爲汝等說 我今於中夜 當入於涅槃
汝一心精進 當離於放逸 諸佛甚難值
億劫時一遇 世尊諸子等 聞佛入涅槃
各各懷悲惱 佛滅一何速

諸子悲惱非爲生滅起愛見之悲爲衆生

悲也諸法實相義即法華要旨下至億劫
時一遇皆燈明臨滅宣付勉勗之辭此經
凡長行略則偈詳長行詳則偈略聖言說
約文體皆然今此疑問等文即前詳偈略
唱滅之文即前略偈詳也

聖主法之王 安慰無量衆 我若滅度時
汝等勿憂怖 是德藏菩薩 於無漏實相
心已得通達 其次當作佛 號曰爲淨身
亦度無量衆 佛此夜滅度 如新盡火滅
分布諸舍利 而起無量塔 比丘比丘尼
其數如恒沙 倍復加精進 以求無上道
由衆悲惱故慰安之而授德藏記使依歸
也無漏實相即妙法真體也大覺滅度譬
薪火者以薪雖窮而火傳不知其盡所謂
示滅也自分布舍利起塔至精進求道言
弟子追慕景仰之事

最後天中天 號曰然燈佛 諸仙之導師
度脫無量衆

時妙光法師 時有一弟子 心常懷懈怠
貪著於名利 求名利無厭 多遊族姓家
棄捨所習誦 瘦忘不通利 以是因緣故
號之爲求名 亦行衆善業 得見無數佛
供養於諸佛 隨順行大道 具六波羅密
今見釋師子 其後當作佛 號名曰彌勒

廣度諸衆生 其數無有量

心常懈怠等者如懈退寶所貪著小乘也
多遊族姓即尚名相也棄捨所習不務本
堅固無上道 當見無數佛 供養諸佛已
也餘如前解

彼佛滅度後 懈怠者汝是 妙光法師者

今則我身是 我見燈明佛 本光瑞如此
以是知今佛 欲說法華經 今相如本瑞
是諸佛方便 今佛放光明 助發實相義
諸人今當知 合掌一心待 佛當兩法雨

充足求道者

釋三
諸求三乘人

釋五
若有疑悔者

佛當爲除斷

釋三
令盡無有餘

疑悔者以小疑大也 上序分竟

二正宗分十九品分二 一三周開示

十品分三 初說三周法授三根記即方

便至學記品是也 二授廣記圓該前記

即法師品 三會諸佛圓證前法 即寶塔

品也

所謂三周者法說一周被上根即方便品
也爲上根猛利則直說法體故曰法說喻
說一周被中根即譬喻品也爲中根稍鈍

以譬喻始解因緣說一周被下根即化城
品也爲下根甚鈍故假宿世因緣款然
根雖列三教實通被也

妙法蓮華經要解卷第二

音釋

粘女廉切 戀在良切 磬也 跛音細切 編丑鉤切
挺達背切 磔力勢切 打都挺切 显日明切
也 也 也 也

妙法蓮華經要解卷第三

曠四

溫陵開元蓮寺比丘

戒環解

妙法蓮華經方便品第二

前之一光東照妙體已全然默而識之不

言而信非垢重衆生所及須假語言方便

曉昌

開示故名方便品蓋諸法寂滅相不可以

言宣唯在方便開示使自悟入故下正說

之文但云如是妙法諸佛如來時乃說之

又云諸佛唯以一大事出現欲令衆生開
佛知見自此之外無復正說特以異方便

助顯第一義而已至於三周九喻百界千

如皆異方便也然則所謂妙法所謂一大

事者終何說示所謂佛知見所謂第一義

者若爲開顯而法華最後之唱又豈徒然

哉由是觀之信有非思量分別所解者存

乎其間而云不可言宣固不謬矣則凡涉
語言文字皆爲方便故於正宗首標方便
之名深有旨也

爾時世尊從三昧安詳而起

從無量義三昧起也

告舍利弗諸佛智慧甚深無量其智慧門難

解難入一切聲聞辟支佛所不能知

雙歎二智一乘之深也諸佛智慧指權實

二智也權智說法實智證法其智慧門指
一乘妙法也經初發緒獨因文殊而出定

輒告鷲子者此經以智立體會權歸實文
殊爲實智之首鷲子爲權智第一所以告
之意在引權入實也

所以者何佛曾親近百千萬億無數諸佛盡
行諸佛無量道法勇猛精進名稱普聞成就

甚深未曾有法隨宜所說意趣難解

釋上曾深法深之由也親無數佛則所學

之深行無量道則所造之深勇猛精進則建志之深名稱普聞則積德之深成就深法則所證之深隨宜所說則方便之深所

以難解難入也如此深歎者將以引權入

實會三歸一欲發起二乘願慕也

舍利弗吾從成佛已來種種因緣種種譬喻

廣演言教無數方便引導衆生令離諸著所以者何如來方便知見波羅蜜皆已具足

釋尊出興種種演說方便導生皆由權實

二智方便波羅蜜權智也知見波羅蜜實

智也非權不能導生非實不能離著故須

兩具也諸著者麤即六塵業細即二乘法

舍利弗如來知見廣大深遠無量無礙力無

所畏禪定解脫三昧深入無際成就一切未
曾有法

如來真知見力廣無不容深無不極故四
無量心四無礙辯十力四無畏深禪大定
諸解脫法諸三昧門一一深造實際凡一

切未曾有法無不由此成就蓋是智也攝

一切法如空包色融一切相如海納流故
稱廣大深遠

舍利弗如來能種種分別巧說諸法言詞柔
軟悅可衆心

續四

三

如來真方便力能分別萬法巧說三乘曲
徇機宜故言詞柔軟稱適物性故悅可衆

心

舍利弗取要言之無量無邊未曾有法佛悉

成就
結二智德用也

止舍利弗不須復說所以者何佛所成就第一希有難解之法唯佛與佛乃能究竟諸法實相

止之不說益顯深妙也第一難解之法即實相妙法非言所及故不須復說非意所到故希有難解非二乘所造故唯佛能究所謂諸法如是相如是性如是體如是力如是作如是因如是緣如是果如是報如是本末究竟等

上所謂實相者即世間諸法性相體力本末究竟等是也可見爲相相本爲性形具爲體利用爲力乍起爲作資始爲因助因爲緣緣熟爲果應果爲報始終爲本末窮盡爲究竟一切諸法不離此十亦各具此十也如是者隨事指法之辭謂諸法有如

是之相如是之性乃至如是而始終如是而窮盡無非實相也即此而推現前種種松直棘曲鵠白烏黑竹如是翠花如是黃凡即諸世諦之事無非實相也唯其即世諦而無非實相故證之者當不虧其天真不離其當體而默得於色心之外是謂第一希有難解之法也舊約四聖六凡十法界而說以一界各具十如合爲十界百如攝爲百界千如融之以至於無盡此乃即實相而明法性也又作三觀回互而釋空則是相如假則如是相中則相如是此乃體四即實相而明觀智也然此正明諸法實相乃一乘極談不應作如如理性釋之况十如三觀方是大乘圓融之法於一乘實相同途異轍達者審之

爾時世尊欲重宣此義而說偈言

世雄不可量 諸天及世人 一切衆生類
無能知佛者 佛力無所畏 解脫諸三昧
及佛諸餘法 無能測量者 本從無數佛
具足行諸道 甚深微妙法 難見難可了

於無量億劫 行此諸道已 道場得成果
我已悉知見

世雄不可量至無能測量者歎諸佛二智
之深也本從無數佛至難見難可了頌諸
佛智深之由也於億劫行道至我已悉知
見括顯自行也佛號世尊又號世雄者世
尊爲十號之總餘皆隨德之稱故或曰雄
猛曰慧日曰兩足等今言世雄者乃釋迦
稱諸佛智德雄猛絕世也餘如長行

如是大果報 種種性相義 我及十方佛

乃能知是事 是法不可示 言詞相寂滅
諸餘衆生類 無有能得解 除諸菩薩衆
信力堅固者 諸佛弟子衆 曾供養諸佛
一切漏已盡 住是最後身 如是諸人等
其力所不堪

頌十如及止身子不說之意也是法不可
不言詞相寂滅者如是實相觸事而真擬
之即差言之即乖也言諸餘生類無能解
者以即諸世諦性相而默得於色心之外
爲難也言除諸菩薩信堅固者許以信得
入也言諸弟子衆力所不堪者明非二乘
法也漏盡後身即二乘之果所謂住最後
身有餘涅槃者

假使滿世間 皆如舍利弗 盡思共度量
不能測佛智 正使滿十方 皆如舍利弗

及餘諸弟子 亦滿十方刹 盡思共度量
亦復不能知

此自寡智而之衆智以廣歎佛智之深也
舍利弗智慧第一而寡不如衆故雖滿世
間又滿十方第一之智皆不足測佛深智
也

辟支佛利智 無漏最後身 亦滿十方界
其數如竹林 斯等共一心 於億無量劫
欲思佛實智 莫能知少分 新發意菩薩
供養無數佛 了達諸義趣 又能善說法
如稻麻竹葦 充滿十方刹 一心以妙智
於恒河沙劫 咸皆共思量 不能知佛智
不退諸菩薩 其數如恒沙 一心共思求
亦復不能知

此又自利智而之上智以廣歎也聲聞之

嘵西

六

智不及辟支之利而辟支既證無漏後身
則其智爲極明新發意菩薩能供佛以增
長智慧能了義以決擇智慧能說法以發
明智慧則其智之妙又過辟支之利矣地
上不退菩薩之智又過於地前發意如是
竟不能知者明佛智非三乘人所知意在
激發權小也辟支此云獨覺竹林稻麻譬
最多也

又告舍利弗 無漏不思議 甚深微妙法
我今已具得 唯我知是相 十方佛亦然
無漏妙法即一乘實相也二乘不能測故
唯我知是相諸佛所同證故十方佛亦然
舍利弗當知 諸佛語無異 於佛所說法
當生大信力 世尊法久後 要當說真實
告諸聲聞衆 及求緣覺乘 我令脫苦縛

逮得涅槃者 佛以方便力 示以三乘教
衆生處處著 引之令得出

斥昔之權使悟今實也初四句召二乘人
後四句斥權而告之

爾時大衆中有諸聲聞漏盡阿羅漢阿若憍

嘵四

一

陳如等千二百人及發聲聞辟支佛心比丘
比丘尼優婆塞優婆夷各作是念今者世尊
何故殷勤稱歎方便而作是言佛所得法甚
深難解有所言說意趣難知一切聲聞辟支
佛所不能及

二乘聞佛深歎二智而不能解故疑之從

而作是言已下皆叙佛前言

佛說一解脫義我等亦得此法到於涅槃而
今不知是義所趣

因佛歎解脫諸三昧遂以二乘解脫等佛

解脫謂已已得不知二乘但離虛妄名爲
解脫其實未得一切解脫也

爾時舍利弗知四衆心疑自亦未了而白佛
言世尊何因何緣殷勤稱歎諸佛第一方便
甚深微妙難解之法我自昔來未曾從佛聞
如是說今者四衆咸皆有疑惟願世尊敷演
斯事世尊何故殷勤稱歎甚深微妙難解之
法爾時舍利弗欲重宣此義而說偈言

慧日大聖尊 久乃說是法

二智破暗故稱慧自此歎久默斯要下乃

申問

自說得如是 力無畏三昧 禪定解脫等
不可思議法 道場所得法 無能發問者
我意難可測 亦無能問者 無問而自說
稱歎所行道 智慧甚微妙 諸佛之所得

此皆頌佛前言爲問即佛力無所畏解脫
諸三昧等文道場所得法言所證實智也

我意難可測言說法權智也

無漏諸羅漢 及求涅槃者 今皆墮疑網
佛何故說是 其求緣覺者 比丘比丘尼

諸天龍鬼神 及乾闥婆等 相視懷猶豫

瞻仰兩足尊 是事爲云何 願佛爲解說

諸羅漢言已得果者求涅槃言未得果者
求緣覺即前所謂發聲聞辟支佛心之比

丘皆疑佛所歎

於諸聲聞衆 佛說我第一 我今自於智
疑惑不能了 爲是究竟法 爲是所行道
佛口所生子 合掌瞻仰待 願出微妙音

時爲如實說

究竟法即道之絕域所行道則循斯須而

已佛口所生者諸弟子從佛口生從法化
生

諸天龍神等 其數如恒沙 求佛諸菩薩
大數有八萬 又諸萬億國 轉輪聖王至
合掌以敬心 欲聞具足道

具足道即圓頓法

爾時佛告舍利弗止止不須復說若說是事
一切世間諸天及人皆當驚疑

道大機小故聞者驚疑

舍利弗重白佛言世尊唯願說之惟願說之

所以者何是會無數百千萬億阿僧祇衆生
曾見諸佛諸根猛利智慧明了聞佛所說則
能敬信

佛依小根而止故獨言天人驚疑身于依
大根而請故廣言諸根明了

爾時舍利弗欲重宣此義而說偈言
法王無上尊 惟說願勿慮 是會無量衆

有能敬信者

佛復止舍利弗若說是事一切世間天人阿
修羅皆當驚疑增上慢比丘將墜於大坑

爾時世尊重說偈言

止止不須說 我法妙難思 諸增上慢者

聞必不敬信

佛意非慮大根預知有退席之衆及惪人
天驚疑而已身子未諭故佛重舉天人增
慢之衆止之墜大坑者破法墮惡道之類

也

爾時舍利弗重白佛言世尊惟願說之惟願
說之今此會中如我等比百千萬億世世已
曾從佛受化如此人等必能敬信長夜安隱

多所饒益爾時舍利弗欲重宣此義而說偈
言
無上兩足尊 願說第一法 我爲佛長子
惟垂分別說 是會無量衆 能敬信此法
佛已曾世世 教化如是等 皆一心合掌
欲聽受佛語 我等千二百 及餘求佛者
願爲此衆故 惟垂分別說 是等聞此法
則生大歡喜

身子爲法之切固仗大根而請也長夜安
隱者衆生癡盲如處長夜若蒙發明則得

第四
大安隱兩足福足慧足也舍利弗於聲聞

衆智慧第一故稱長子

爾時世尊告舍利弗汝已殷勤三請豈得不
說汝今諦聽善思念之吾當爲汝分別解說
聖慈之心感之則應故雖欲無言不可得

也

說此語時會中有比丘比丘尼優婆塞優婆

夷五千人等即從座起禮佛而退所以者何

此輩罪根深重及增上慢未得謂得未證謂證有如此失是以不住世尊默然而不制止

佛止不說俯爲此輩故諸增上慢儻果然

退去然靈山勝集豈有凡材蓋亦大權示迹警進未學耳故宣師云是知五千退席爲進增慢之儻也於法未得而謂已得於道未證而謂已證已實下而自增上以慢

法慢人曰增上慢

爾時佛告舍利弗我今此衆無復枝葉純有貞實舍利弗如是增上慢人退亦佳矣汝今吾聽當爲汝說

枝葉譬瑣末之衆貞實譬成德之衆

四

土

舍利弗言唯然世尊願樂欲聞

敬對曰唯領善聽之誠也

佛告舍利弗如是妙法

直指妙法全體也下明一大事佛知見與所謂是法非思量分別所解者盡此矣直

可非思量分別而解之

諸佛如來時乃說之如優曇鉢華時一現耳
優曇此云靈瑞華三千年一現現則金輪王出譬妙法爲一大事時乃說之

舍利弗汝等當信佛之所說言不虛妄

既已全提復將款啓故飭之使以信得入

舍利弗諸佛隨宜說法意趣難解

所以者何我以無數方便種種因緣譬喻言詞演說諸法是法非思量分別之所能解唯

有諸佛乃能知之

云我以方便演說即明權也云是法非思量所解顯實也所以非思量分別者離識情也唯佛能知非二乘法也所以者何諸佛世尊唯以一大事因緣故出現於世

一大事者一乘妙法也即諸佛知見當人妙心萬法實相無二無三故曰一此非小緣故曰大事

舍利弗云何名諸佛世尊唯以一大事因緣故出現於世諸佛世尊欲令衆生開佛知見

使得清淨故出現於世欲示衆生佛之知見故出現於世欲令衆生入佛知見道故出現於世

微釋上義明諸佛出興本懷也佛知見者徹了實相真知真見也在法名一佛乘在

因名一大事在果名一切種智故曰諸佛因一大事故出興爲一佛乘故說法欲令衆生開佛知見而究竟皆得一切種智也此真知見生佛等有本來清淨唯人以妄塵所染無明所覆而自迷失故佛與開示使得其本來清淨者而自悟入不復迷失也開者破無明之封蔀示者指所迷之真體悟者豁然洞視入者深造自得而證一切種智是謂佛知見道也舍利弗是爲諸佛以大事因緣故出現於世

結釋也

佛告舍利弗諸佛如來但教化菩薩諸有所作常爲一事唯以佛之知見示悟衆生舍利弗如來但以一佛乘故爲衆生說法無有餘

乘若二若三

諸佛爲一大事出現故諸有所作常爲一事以此而教菩薩以此而示衆生以此而說諸法曾無他道也

舍利弗一切十方諸佛法亦如是

亦莫不由斯道也

舍利弗過去諸佛以無量無數方便種種因緣譬喻言詞而爲衆生演說諸法是法皆爲

一佛乘故是諸衆生從諸佛聞法究竟皆得一切種智舍利弗未來諸佛當出於世亦以無量無數方便種種因緣譬喻言詞而爲衆

生演說諸法是法皆爲一佛乘故是諸衆生從佛聞法究竟皆得一切種智舍利弗現在

十方無量百千萬億佛土中諸佛世尊多所饒益安樂衆生是諸佛亦以無量無數方便種種因緣譬喻言詞而爲衆生演說諸法是

法皆爲一佛乘故是諸衆生從佛聞法究竟

皆得一切種智

雖說百千億無數諸法門其實爲一乘一

切種智即佛果智也

舍利弗是諸佛但教化菩薩欲以佛之知見示衆生故欲以佛之知見悟衆生故欲令衆生入佛之知見故

結指歸同也不言開者云教化即開義

舍利弗我今亦復如是知諸衆生有種種欲深心所著隨其本性以種種因緣譬喻言詞方便力而爲說法舍利弗如此皆爲得一佛乘一切種智故

我今說法皆式諸佛也種種欲著者或依獨業欲五塵著愛染或依淨業欲小果著

二乘

舍利弗十方世界中尚無二乘何況有三

舍利弗諸佛出於五濁惡世所謂劫濁煩惱

濁衆生濁見濁命濁如是舍利弗劫濁亂時
衆生垢重慳貪嫉妬成就諸不善根故諸佛
以方便力於一佛乘分別說三

釋四

十四

此原聖人始以乘時濟慕不得已而說三

然要其終實爲一乘耳五濁皆依性說性
本淵澄五事交擾起諸塵滓名濁所謂劫
濁者劫言時也時多惡事混濁起業煩惱
濁者開即九十八使總即貪嗔癡等五鈍

混濁障事衆生獨者長養無明支離六道

衆惡相生混濁障性見濁者開即六十二
見總即身邊等五利混濁障理命濁者業
識爲種交遘發生隨劫短滅汨沒生死劫
濁無別體但依四者增劇立名釋迦出當

劫滅等百歲時四者正劇故云劫濁亂時
衆生垢重等

舍利弗若我弟子自謂阿羅漢辟支佛者不
聞不知諸佛如來但教化菩薩事此非佛弟
子非阿羅漢非辟支佛

法王法中雖有二乘之名曾無二乘之實
如來出興但說教菩薩法而已傳此乃爲
弟子得此乃堪應供覺此乃真辟支而不
聞不知者烏足爲弟子等故曰非也是以
迦葉領悟之後乃云我等今者真是聲聞

釋四

十五

真阿羅漢

又舍利弗是諸比丘比丘尼自謂已得阿羅
漢是最後身究竟涅槃便不復志求阿耨多
羅三藐三菩提當知此輩皆是增上慢人所
以者何若有比丘實得阿羅漢若不信此法

無有是處

以羅漢爲後身以小果爲究竟而不復回
心求正道者皆爲憎慢邪人名字羅漢而已

除佛滅度後現前無佛所以者何佛滅度後
如是等經受持讀誦解義者是人難得若遇
餘佛於此法中便得決了

除佛滅度後去聖逾遠容有不信然亦可作
得度因緣故若遇餘佛於此法中便得決

了

舍利弗汝等當一心信解受持佛語諸佛如
來言無虛妄無有餘乘唯一佛乘
爾時世尊欲重宣此義而說偈言
比丘比丘尼 有懷增上慢 優婆塞我慢
優婆夷不信 如是四衆等 其數有五千

不自見其過 於戒有缺漏 護惜其瑕疵
是小智已出 衆中之糟糠 佛威德故去
斯人勘福德 不堪受是法

前獨云罪深增慢此又云我慢不信等者
前則通舉此則別頌以比丘出家進取聖

果多增慢優婆塞在家豪貴矜高多我慢
優婆夷女懦邪僻多不信故也護惜瑕疵
謂覆罪文過衆中糟糠謂亂淳混粹也佛
威德故去者若窮子之怖父也

此衆無枝葉 唯有諸貞實 舍利弗善聽

諸佛所得法 直指妙法也

續四

大

無量方便力 而爲衆生說 衆生心所念
種種所行道 若干諸欲性 先世善惡業
佛悉知是已 以諸緣譬喻 言詞方便力
令一切歡喜 或說修多羅 伽陁及本事

本生未曾有 亦說於因緣 話喻并祇夜
優婆提舍經

明應小機開權也言衆生心所念等者謂
知其所念小法所行小道所欲小果所繫
濁業故以方便說九部法修多羅云契經
伽陀云孤起頌本事說佛本行本生說佛
前因未曾有即希有之瑞因緣即種種緣
法譬喻引事顯法祇夜云應頌優婆提舍
云論議此小乘九部也大乘加方廣自說
授記爲十二部

鈍根樂小法 貪著於生死 於諸無量佛
不行深妙道 衆苦所惱亂 爲是說涅槃
我設是方便 令得入佛慧 未曾說汝等
當得成佛道 所以未曾說 說時未至故
今正是其時 決定說大乘 我此九部法

隨順衆生說 入大乘爲本 以故說是經
是經指九部經也蓋爲樂小之人權設方
便引入佛慧爲大乘之本而已
有佛子心淨 柔軟亦利根 無量諸佛所
而行深妙道 爲此諸佛子 說是大乘經
我記如是人 來世成佛道 以深心念佛
修持淨戒故 此等聞得佛 大喜充遍身
佛知彼心行 故爲說大乘
明應大機顯實也心淨則異上欲性利根
異上鈍根行深妙道異上不行是故爲說
大乘而記其成佛也深心念佛即念自性
佛修持淨戒即持無相戒此所以爲得佛
之道也
聲聞若菩薩 聞我所說法 乃至於一偈

所謂究竟皆得一切種智也夫佛道懸曠
經劫積行然後乃成此則纔聞一偈而成
何耶蓋佛性之在纏若神珠之在衣小乘
向外求索故甚大艱難法華直指當體故
不求自得是以彼必經劫積行而此則不

幾乎一偈可以成佛也

十方佛土中 唯有一乘法 無二亦無三
除佛方便說 但以假名字 引導於衆生
說佛智慧故

結顯一乘也但以假名字等者雖假三乘
之名實說正智之法

諸佛出於世 唯此一事實 餘二則非真
終不以小乘 濟度於衆生 佛自住大乘
如其所得法 定慧力莊嚴 以此度衆生
自證無上道 大乘平等法 若以小乘化

乃至於一人 我則墮慳貪 此事爲不可
若人信歸佛 如來不欺誑 亦無貪嫉意
斷諸法中惡 故佛於十方 而獨無所畏
我以相嚴身 光明照世間 無量衆所尊
爲說實相印

聖人平等行慈至誠待物故自安住大乘
而一如所得之法加之定慧莊嚴以此度
生欲人同證若自證大道而以小乘化物
則爲慳法於道有妨是不可也故凡歸我
以信則我待之以誠不欺小機不誑未學
不貪法利不嫌彼勝蓋法中諸惡佛皆已
斷故能說法無畏也安樂行云若欲說是
經當捨憊恚慢謔詭邪僞心此斷諸法中
惡之義也我以相嚴身等者謂有能信歸
於我我斯爲現勝身說實相法其所說法

皆與實相不相違背名實相印又以一實
相印一切法如所謂山河大地一法所印
舍利弗當知 我本立誓願 欲令一切衆
如我等無異 如我昔所願 今者已滿足
化一切衆生 皆令入佛道

第廿九

昔願衆生同證實相今獲顯實是滿本願
十九

若我遇衆生 盡教以佛道 無智者錯亂
迷惑不受教

以一實化雖我本願奈何機小怖大若窮
子之驚愕迷悶則於物有妨是以用權也
我知此衆生 未曾修善本 堅著於五欲
癡愛故生惱 以諸欲因緣 墜墮三惡道
輪迴六趣中 備受諸苦毒 受胎之微形
世世常增長 薄德少福人 衆苦所逼迫

入邪見稠林 若有若無等 依止此諸見
具足六十二 深著虛妄法 堅受不可捨
我慢自矜高 詔曲心不實 於千萬億劫
不聞佛名字 亦不聞正法 如是人難度
是故舍利弗 我爲設方便 說諸盡苦道
示之以涅槃 我雖說涅槃 是亦非真滅
彼所以迷不受教者爲善本未植濁業強
盛故也堅著五欲癡愛生惱即煩惱濁也
以欲因緣墮三惡輪六趣即衆生濁也受
胎微形增長衆苦命濁也入邪見林著妄
詣曲見濁也若有者常見若無者斷見衆
生因此二見於五蘊計我故具足六十二
見由是執妄益堅去道益遠是以於萬億
劫不聞佛名不聞正法即劫濁也五者交
擾汨昏其性難以正道度之是故不得已

而說盡苦道示權果法即小乘滅諦非真

滅也下示真滅

諸法從本來 常自寂滅相 佛子行道已
來世得作佛

修道證滅是亦非真了法本來常自寂滅

不假修證乃爲真滅能行此道與覺相應

廣四
故得作佛也

我有方便力 開示三乘法 一切諸世尊
皆說一乘道 今此諸大衆 皆應除疑惑
諸佛語無異 唯一無二乘

雖說三乘皆歸一實

過去無數劫 無量滅度佛 百千萬億種
其數不可量 如是諸世尊 種種緣譬喻
無數方便力 演說諸法相 是諸世尊等
皆說一乘法 化無量衆生 令入於佛道

言皆依權演實也

又諸大聖主 知一切世間 天人羣生類
深心之所欲 更以異方便 助顯第一義
此又廣演諸佛隨機方便異之言多也 謂
以多方助顯妙法第一義諦即下文所
陳上至菩薩下至人天小善微因皆成佛
道是也下文旁出四科

若有衆生類 值諸過去佛 若聞法布施
或持戒忍辱 精進禪智等 種種修福慧
如是諸人等 皆已成佛道

廣四
施戒忍進禪智六度也前四爲福後二爲
慧故曰種種修福慧自下諸行纖悉備舉
即多方助顯也使即其所顯明第一義則
一行一相無非妙法舉手低頭無非妙行
所以皆成佛道縱雖未成其道已具矣

諸佛滅度已 若人善軟心 如是諸衆生皆已成佛道

以善軟爲聲聞行者大品歎羅漢心調柔軟淨名云住調伏心是賢聖行

諸佛滅度已 供養舍利者 起萬億種塔

金銀及頗梨 瑰渠與瑪瑙 玫瑰琉璃珠

清淨廣嚴飾 莊校於諸塔 或有起石廟

栴檀及沉水 木櫞并餘材 麋瓦泥土等

若於曠野中 積土成佛廟 乃至童子戲

聚沙爲佛塔 如是諸人等 皆已成佛道

萬億種者或七寶香木或瓦石沙土貴賤

華質之不同等妙刹也精誠戲笑之所寓等妙心也所以皆成佛道

若人爲佛故 建立諸形像 刻雕成衆相

皆已成佛道 或以七寶成 鍮石赤白銅

白鐵及鉛錫 鐵木及與泥 或以膠漆布

嚴飾作佛像 如是諸人等 皆已成佛道

彩畫作佛像 百福莊嚴相 自作若使人

皆已成佛道 乃至童子戲 若草木及筆

或以指爪甲 而畫作佛像 如是諸人等

漸漸積功德 具足大悲心 皆已成佛道

但化諸菩薩 度脫無量衆

諸形像者或木雕漆布或泥塑寶鑽或金

銀乃至錫鐵而鑄或衆彩乃至指爪而畫

若形若影之精朴等妙相也自作使人之

專畧等妙心也至若漸積功德具足大悲

如是種種無非實相皆第一義所以皆成佛道然此非二乘所及故曰但化諸菩薩也

若人於塔廟 寶像及畫像 以華香幡蓋

敬心而供養 若使人作樂 擊鼓吹角貝
簫笛琴箜篌 琵琶銕銅鉦 如是衆妙音
盡持以供養 或以歡喜心 歌唄頌佛德
乃至一小音 皆已成佛道 若人散亂心
乃至以一華 供養於畫像 漸見無數佛

或有人禮拜 或復但合掌 乃至一舉手
或復小低頭 以此供養像 漸見無量佛
自成無上道 廣度無數衆 入無餘涅槃
如薪盡火滅

粉命未有得道之期况一舉手低頭之頃
耶度衆入滅乃詳言成佛轉化之事貝螺
也大者繚曲似角故名角貝
若人散亂心 入於塔廟中 一稱南無佛
皆已成佛道

諸行首舉六度福慧爲最難末舉亂心稱
佛爲最易而皆成佛道者信乎道無難易
顛沛造次無非妙法無非第一義也
於諸過去佛 在世或滅後 若有聞是法
皆已成佛道○結過去道同也

喜心或以一色一香出於亂心乃至歌唱
之小音低頭之小善而皆成佛道者第一
義諦離敬怠絕喜惡靜亂小大皆通爲一
故也若以敬喜爲是以怠亂爲非則終身
處乎是非之場喜怒之境雖歷塵劫碎身

未來諸世尊 其數無有量 是諸如來等
亦方便說法 一切諸如來 以無量方便
度脫諸衆生 入佛無漏智 若有聞法者
無一不成佛 諸佛本誓願 我所行佛道
普欲令衆生 亦同得此道

此同釋迦本立誓願

未來世諸佛 雖說百千億 無數諸法門
其實爲一乘

此同過佛以異方便助顯等意而簡其文
也

諸佛兩足尊 知法常無性 佛種從緣起
是故說一乘 是法住法位 世間相常住
於道場知已 羯師方便說

重明佛說一乘之意也法常無性則言詞
相寂不容有說但爲發起佛種故說一乘

此同後文知第一寂滅以方便力說也是
法住法位者森羅萬象皆即實相也世間
相常住者山河大地當體真常也三乘違
相明真故法不住位釋動求靜故見有遷
流一乘觸事而真不生情解故法法住位

世相常住道場所證如此而已故爲衆生
方便演說也

天人所供養 現在十方佛 其數如恒沙
出現於世間 安隱衆生故 亦說如是法
知第一寂滅 以方便力故 雖示種種道

其實爲佛乘○次明隨機助顯

知衆生諸行 深心之所念 過去所習業
欲性精進力 及諸根利鈍 以種種因緣
譬喻亦言詞 隨應方便說

亦同前助顯簡文

今我亦如是 安隱衆生故 以種種法門
宣示於佛道○次明隨機助顯

我以智慧力 知衆生性欲 方便說諸法
皆令得歡喜

此亦助顯簡文也所以逐節舉助顯事者

明三世諸佛以至釋迦說法儀式並同

舍利弗當知 我以佛眼觀 見六道衆生

貧窮無福慧

入生死險道

相續苦不斷

深著於五欲

如舜牛愛尾

以貪愛自蔽

盲冥無所見

不求大勢佛

及與斷苦法

深入諸邪見

以苦欲捨苦

爲是衆生故

而起大悲心

頌佛出五濁等文窮無福慧衆生濁也生

死不斷命濁也著欲盲冥即煩惱濁不求

佛法即劫濁深入邪見即見濁也以苦捨

苦言不知出要聖人所以爲此起悲開權

也五眼中肉眼礙而不通天眼通而滯相

慧眼直以破相法眼直以觀俗佛眼無不

洞徹而善觀衆生緣業故云以佛眼觀也

犧牛南夷之獸蔽於愛尾因以害生衆生

蔽五欲之愛害猶是也大勢佛者衆生窮

無福慧墮險遭苦唯佛有大勢能救險道

法有大力能斷諸苦

我始坐道場 觀樹亦經行 於三七日中

思惟如是事 我所得智慧 微妙最第一

衆生諸根鈍 著樂癡所盲 如斯之等類

云何而可度

始坐道場者華嚴之後隱舍那身現大權
相示成正覺之始也觀樹經行思以道蔭
物也三七思惟思開三闡化也衆生耽湎

五欲失迷正道名樂癡所盲

爾時諸梵王 及諸天帝釋 護世四天王

及大自在天 幷餘諸天衆 眷屬百千萬

恭敬合掌禮 請我轉法輪

方思闡化而諸梵適請乃世道交興機緣

默感也

我即自思惟 若但讚佛乘 衆生沒在苦
不能信是法 破法不信故 墜於三惡道
我寧不說法 疾入於涅槃
爲機沈思進退未決

尋念過去佛 所行方便力 我今所得道
亦應說三乘

欲效三世佛說法之儀式也

作是思惟時 十方佛皆現 梵音慰喻我
善哉釋迦文 第一之導師 得是無上法

隨諸一切佛 而用方便力 我等亦皆得
最妙第一法 爲諸衆生類 分別說三乘
少智樂小法 不自信作佛 是故以方便
分別說諸果 雖復說三乘 但爲教菩薩
此皆十方佛語歎釋迦之善思合諸佛之

方便

舍利弗當知 我聞聖師子 深淨微妙音
稱南無諸佛 復作如是念 我出濁惡世
如諸佛所說 我亦隨順行

釋迦昔聞十方佛語慰喻乃稱名歸依而

隨順其語以徇物機也南無者歸依之辭
思惟是事已 即趣波羅奈 諸法寂滅相
不可以言宣 以方便力故 爲五比丘說
是名轉法輪 便有涅槃音 及以阿羅漢
法僧差別名

曉四

三七

思得其宜即趨鹿野苑依實開權也波羅
柰即鹿野苑之境號最初說四諦處也五
比丘即憍陳如等於迦葉佛學道未證菩
於釋迦法中最先開悟故先度之因是而
三寶之名出焉始坐道場故有佛名轉法

輪說涅槃故有法名度憍陳爲羅漢故有
僧名皆自一道而有差別也若知佛即是
法法即是衆入不二法門則何差別之有
從久遠劫來 讀示涅槃法 生死苦永盡
我常如是說

結始權意也讚示涅槃法而說生死苦求
盡所謂說諸盡苦道示之以涅槃蓋曲徇
機權耳

舍利弗當知 我見佛子等 志求佛道者
無量千萬億 咸以恭敬心 皆來至佛所
曾從諸佛聞 方便所說法 我即作是念
如來所以出 爲說佛慧故 今正是其時
終見機熟乃思顯實

舍利弗當知 鈍根小智人 著相憍慢者
不能信是法 今我喜無畏 於諸菩薩中

正直捨方便 但說無上道

鈍根小智指退席衆也今喜退矣故不假
方便

菩薩聞是法 疑網皆已除 千二百羅漢
悉亦當作佛

既遇如來正修行路根無大小皆成佛果
如三世諸佛 說法之儀式 我今亦如是
說無分別法 ○結終實意也

諸佛興出世 懸遠值遇難 正使出於世
說是法復難 無量無數劫 時四聞是法亦難
能聽是法者 二六斯人亦復難 譬如優曇華
一切皆愛樂 天人所希有 時時乃一出
聞法歡喜讚 乃至發一言 則爲已供養
一切三世佛 是人甚希有 過於優曇華
讚一乘難值難聞也如大通之前百八十

劫空過無佛佛難值也釋迦出五濁四十

年待時法難說也由是二者故曠劫難聞又有退席故聽受亦難四難相際所以希有如優曇華而聞法能讚者又過前四蓋是法甚深奧少有能信者故也能讚是法則爲供佛者三世諸佛皆從此出故

汝等勿有疑 我爲諸法王 普告諸大衆
但以一乘道 教化諸菩薩 無聲聞弟子
剎說一乘恐其驚怪故慰使勿疑而知法
土法中本無二乘也

汝等舍利弗 聲聞及菩薩 當知是妙法

諸佛之秘要 以五濁惡世 但樂著諸欲

如是等衆生 終不求佛道 當來世惡人

聞佛說一乘 迷惑不信受 破法墮惡道

有慚愧清淨 志求佛道者 當爲如是等

廣讚一乘道

言當知祕要使護持而流通也言五濁惡世及當來惡人使擇機而流通也言有慚愧清淨等使應機而流通也

舍利弗當知 諸佛法如是 以萬億方便隨宜而說法 真不習學者 不能曉了此汝等既已知 諸佛世之師 隨宜方便事無復諸疑惑 心生大歡喜 自知當作佛
知昔之權爲隨宜信今之實而無惑則諸佛實智汝已得之宜自忻慶知當作佛也
身子領悟偈云安住實智中我定當作佛
蓋領悟此語

妙法蓮華經要解卷第三

音釋

款苦管切謹 郭步口切光阻史切懦人
也耶也 攻莫杯切石踰他侯切石鉛發川切
切弱也 美也 舜似金也 黑錫也
羣莫交切獸如 牛而是長

妙法蓮華經要解卷第四

曠王

溫陵開元蓮寺比丘 戒環 解

譬喻品第三

譬者引淺況深喻者托言訓曉由前法說示多方便皆爲一乘上智已悟中根未解

曠五

故引三車一門之淺以況三乘一道之深

而訓曉焉故名譬喻品經有九喻謂火宅窮子藥草化城繫珠鑿井王譬父少醫師

舊唯言七喻遺却鑿井父少二喻謂是旁出實非旁也喻說文二初法說緒餘二喻

說正文然法說緒餘合聯前品之末喻說名題合標緒餘之後而分品似濫者身子既自領悟法說欲以悟人故陳悟喜之意

而爲機起疑發茲喻說然則悟喜等意乃爲喻說之由宜屬此品文不爲濫

爾時舍利弗踊躍歡喜即起合掌瞻仰尊顏而白佛言今從世尊聞此法音心懷踊躍得未曾有

身子既悟法說自知作佛故踊躍而作慶所未聞

所以者何我昔從佛聞如是法見諸菩薩授記作佛而我等不預斯事甚自感傷失於如來無量知見

釋上也謂昔者方等會上共聞是法然彼得授記我乃不預是失如來無量知見今既得之所以踊喜無量知見即一乘正智也

世尊我常獨處山林樹下若坐若行每作是念我等同入法性云何如來以小乘法而見濟度是我等咎非世尊也

居常推尅聞同記異非佛所私咎實在我
同入法性謂同證真理

所以者何若我等侍說所因成就阿耨多羅
三藐三菩提者必以大乘而得度脫然我等
不解方便隨宜所說初聞佛法遇便信受思
惟取證

釋自咎也所因即般若實智爲菩提正因
也佛固將說而我不欵待但初聞四諦即
便信受速取小果蓋自誤也

世尊我從昔來終日竟夜每自尅責而今從
佛聞所未聞未曾有法斷諸疑悔身意泰然
快得安隱今日乃知真是佛子從佛口生從
法化生得佛法分

自慶所悟也口生者因聞一音法生者悟
如是法法分者得如來知見寶藏之分也

爾時舍利弗欲重宣此義而說偈言
我聞是法音 得所未曾有 心懷大歡喜
疑網皆已除 昔來蒙佛教 不失於大乘
佛音甚希有 能除衆生惱 我已得漏盡
聞亦除憂惱

法音指法說也漏盡宜無憂惱而云亦除
者向雖漏盡餘習未盡今得極證則除失
大乘之憂及餘習未盡之惱

我處於山谷 或在林樹下 若坐若經行
常思惟是事 鳴呼深自責 云何而自欺
頌五 三
頌居常自咎也

我等亦佛子 同入無漏法 不能於未來
演說無上道 金色三十二 十力諸解脫
同共一法中 而不得此事 八十種妙好
十八不共法 如是等功德 而我皆已失

我獨經行時 見佛在大衆 名聞滿十方
廣饒益衆生 自惟失此利 我爲自欺誑
頌不預授記失佛功德也三十二相初自
足下安平終至頂相高圓猶如天蓋十力
初自處非處智力終至永斷習氣智力八

十種好初自指爪狹長終至眉萬字相十
八不共謂不與二乘共也初自無過失終
至知過現未事無著無礙
我常於日夜 每思惟是事 欲以問世尊
爲失爲不失 我常見世尊 稱讚諸菩薩
以是於日夜 箚量如此事

見讚菩薩知我之非故籌量其失

今聞佛音聲 隨宜而說法 無漏難思議
令衆至道場

而今乃知隨宜之說皆無漏法真可以證

我本著邪見 爲諸梵志師 世尊知我心
拔邪說涅槃 我悉除邪見 於空法得證
爾時心自謂 得至於滅度 而今乃自覺
非是實滅度 道也

感悟自慶也身于昔事珊瑚耶爲外道梵
志之師因佛爲之拔邪說法乃入佛道
若得作佛時 具三十二相 天人夜叉衆
龍神等恭敬 是時乃可謂 永盡滅無餘
於空偏證非是實滅即相圓證始謂無餘
牒五

永盡滅即無餘涅槃也

四

佛於大衆中 說我當作佛 聞如是法音
疑惑悉已除

牒偈首之詞通結也上頌長行已終

初聞佛所說 心中大驚疑 將非魔作佛

惱亂我心耶 佛以種種緣 詐喻巧言說

其心安如海 我聞疑網斷

初聞會三歸一聲聞得佛以非已智分故
疑之及詳觀佛說其心如海窮之益深測
之益遠乃信爲實道無復疑也

佛說過去世 無量滅度佛 安住方便中
亦皆說是法 現在未來佛 其數無有量
亦以諸方便 演說如是法 如今者世尊
從生及出家 得道轉法輪 亦以方便說
世尊說實道 波旬無此事

此引方便品三世道同及自行道同之文
以自釋也波旬魔名

以是我定知 非是魔作佛
謂是魔所爲 聞佛柔軟音 深遠甚微妙
演暢清淨法 我心大歡喜 疑悔永已盡

安住實智中 我定當作佛 爲天人所敬
轉無上法輪 教化諸菩薩

牒釋前疑以由領悟也實智即一乘正智
也夫身子大智於佛聞法宜不言而諭乃
網繆疑慮至於以佛爲魔者蓋道大機小
乍聞其言鮮不悖戰駭亂而非毀交謫譬
聞姑射之說以爲狂而不信望哀駘之風
以爲惡駭天下蓋後世末俗聞佛道者類
多如此則大智疑慮有所爲而設矣

爾時佛告舍利弗吾今於天人沙門婆羅門
等大衆中說我昔曾於二萬億佛所爲無上
道故常教化汝汝亦長夜隨我受學我以方
便引導汝故生我法中

述其本因以明領悟得記之由也言於天
人衆中說者將明遠因遠記示不妄也戒

經云舍利弗曾於六十劫修菩薩道今云
二萬億佛所指彼時也長夜隨學言正智
未明耳

舍利弗我昔教汝志願佛道汝今悉忘而便
自謂已得滅度我今還欲令汝憶念本願所
行道故爲諸聲聞說是大乘經名妙法蓮華
教菩薩法佛所護念

昔已繫珠今復示珠

舍利弗汝於未來世過無量無邊不可思議
劫供養若干千萬億佛奉持正法具足菩薩
所行之道當得作佛號曰華光如來應供正
遍知明行足善逝世間解無上士調御丈夫
天人師佛世尊

既悟妙法當成佛道故得記作佛也諸授
記文皆二初供佛行道因記也次十號劫

第五

六

國果記也此記大因大果以策進小乘也
號華光者華表因行光能發明由最初領
悟發明是道故也既受佛記猶過多劫然
後得果者成佛由智得果由行小乘雖悟
實智未修大行是謂素法身佛未有莊嚴
故須經劫供佛行菩薩道所以廓其大心
成就萬德萬德圓備乃成十號具足之佛
非自性天真之佛比矣若此頓教所謂過
無量不思議劫者直約正智頓斷無明頓
圓種智則無邊劫迷一時頓滅是謂過無
邊劫成佛

國名離垢其土平正清淨嚴飾安隱豐樂天
人熾盛琉璃爲地有八交道黃金爲繩以界
其側其傍各有七寶行樹常有華果華光如
來亦以三乘教化衆生舍利弗彼佛出時雖

非惡世以本願故說三乘法其劫名大寶莊

嚴何故名曰大寶莊嚴其國中以菩薩爲大寶故

劫國莊嚴皆因行依報也身子因行以大

智爲本故國名離垢因行發明教菩薩法

讚五

七

故劫名大寶莊嚴而以菩薩爲大寶清淨

嚴飾則無諸穢土安隱豐樂則無三災苦

天人熾盛則無三惡道有八交道等者入

正道之所會也七寶行樹等者七覺支之

所生也凡諸佛依報皆然蓋因行所同也

若衆生依報則國名堪忍劫名五濁其土

坑坎沙礫爲地亦因行所同也反而求之

離垢清淨之相皆即心地安隱豐樂之事

無非性德染淨轉變常存乎人使衆生不

爲堪忍苦不起五濁業不行邪誦行則真

離垢平正安隱豐樂之國矣

彼諸菩薩無量無邊不可思議筭數譬喻所不能及非佛智力無能知者若欲行時寶華

承足此諸菩薩非初發意皆久植德本於無量百千萬億佛所淨修梵行恒爲諸佛之所

稱歎常修佛慧具大神通善知一切諸法之

門質直無僞志念堅固如是菩薩充滿其國

舍利弗華光佛壽十二小劫除爲王子未作

佛時其國人民壽八小劫

除爲王子時獨記作佛後壽十二劫

華光如來過十二小劫授堅滿菩薩阿耨多

羅三藐三菩提記告諸比丘是堅滿菩薩次

當作佛號曰華足安行多陀阿伽度阿羅訶

三藐三佛陀其佛國土亦復如是

此身子轉記堅滿使傳續妙道也過十二

小劫即臨滅時也法華妙道本於燈明傳
於妙光繼於然燈佛佛授手光光相續故
身子得之而記號華光蓋發明是道使有

目者共覩也堅滿得之又號華足安行則

率循是道使有趾者共由也至於其國菩

曇五

^八

薩行則寶華承足則從其化者莫不由是

道也抑記號華足安行取其帶果行因也

菩薩寶華承足取其藉因趨果也因果互

爲始終展轉不離是道欲續而不泯故有

轉記

舍利弗是華光佛滅度之後正法住世三十
二小劫像法住世亦三十二小劫
法初盛行人能以現量體悟爲正去聖逾
遠人惟以比量倣解爲像正法教理行果
備具像法有教理行而無果故古多聖賢

爾時世尊欲重宣此義而說偈言
舍利弗來世 成佛普智尊 號名曰華光
當度無量衆 供養無數佛 具足菩薩行
十力等功德 證於無上道 過無量劫已
劫名大寶嚴 世界名離垢 清淨無瑕穢
以琉璃爲地 金繩界其道 七寶雜色樹
常有華果實 彼國諸菩薩 志念常堅固
曇五
神通波羅蜜 皆已悉具足 於無數佛所
善學菩薩道 如是等大士 華光佛所化
佛爲王子時 糜國捨世榮 於最末後身
出家成佛道

此偈全頌與記皆即前意普智即遍知也

佛爲王子時者諸佛皆示爲王子棄國捨榮警諸貪著如八意之於燈明十六之於智勝是也生分已盡梵行已立所作已辦不受後有名最後身

華光佛住世壽十二小劫其國人民衆

壽命八小劫佛滅度之後正法住於世三十二小劫廣度諸衆生正法滅盡已像法三十二舍利廣流布天人普供養華光佛所爲其事皆如是其兩足聖尊最勝無倫匹彼即是汝身宜應自欣慶

各各脫身所著上衣以供養佛釋提桓因梵天王等與無數天子亦以天妙衣天曼陀羅華摩訶曼陀羅華等供養於佛所散天衣住虛空中而自迴轉諸天伎樂百千萬種於虛空中一時俱作雨衆天華

衣服人之波泰也性障天之波泰也迴轉即迴向意也諸天因聞妙法得離性障遂回小向大是以脫衣供佛以藉其誠表解天波泰天泰也衣住空中而自迴轉乃迴向精誠所感也

而作是言佛昔於波羅柰初轉法輪今乃復轉無上最大法輪

昔轉四諦爲最小今轉一乘爲最大

曠五爾時諸天子欲重宣此義而說偈言

三藐三菩提記心大歡喜踊躍無量踊喜以謂我等亦如是必當得作佛

昔於波羅柰轉四諦法輪分別說諸法

爾時四部衆比丘比丘尼優婆塞優婆夷天龍夜叉乾闥婆阿修羅伽樓羅緊那羅摩睺羅伽等大衆見舍利弗於佛前受阿耨多羅

五衆之生滅 今復轉最妙 無上大法輪
是法甚深奧 少有能信者

鹿苑分別五趣衆生生滅龕相容有能信

今茲一乘旨妙義奧故少能信者

我等從昔來 數聞世尊說 未曾聞如是

深妙之上法 世尊說是法 我等皆隨喜

大智舍利弗 今得受尊記 我等亦如是

必當得作佛 於一切世間 最尊無有上

佛道叵思議 方便隨宜說 我所有福業

今世若過世 及見佛功德 盡迴向佛道

結讚自誓迴小向大也謂今世前世之福
業及值佛所作之功德皆誓捨小果迴向
佛道叵從反可謂不可也

爾時舍利弗白佛言世尊我今無復疑悔親
於佛前得受阿耨多羅三藐三菩提記

續五

十一

一五·一六〇九

是諸千二百心自在者昔住學地佛常教化
言我法能離生老病死究竟涅槃是學無學
人亦各自以離我見及有無見等謂得涅槃
而今於世尊前聞所未聞皆墮疑惑

心自在即無學羅漢學無學即小聲聞昔

蒙佛教自謂究竟而息見趣寂今聞雖說

涅槃亦非真滅是以疑惑也

善哉世尊願爲四衆說其因緣令離疑惑

爾時佛告舍利弗我先不言諸佛世尊以種
種因緣譬喻言詞方便說法皆爲阿耨多羅
三藐三菩提耶是諸所說皆爲化菩薩故然
舍利弗今當復以譬喻更明此義諸有智者
以譬喻得解

上皆發起喻說下文正演喻說

二引火宅喻明昔權教皆爲化迷也

六〇五

龍藏

舍利弗若國邑聚落有大長者其年衰邁財富無量多有田宅及諸僮僕

譬佛王化三界也國有邑邑有聚落譬大千有三界三界有六道四生大長者譬如來爲一切世間之父其年衰邁譬應緣已

又欲般涅槃也財富無量譬無量知見之

法財多有田宅譬方便智慧之福田僮僕

譬慈悲無倦以佑助正道從事羣機

其家廣大唯有一門多諸人衆一百二百乃

至五百人止住其中

譬五趣苦聚也家譬三界一門譬一乘出

離之道五百人譬五趣衆生言一百二百

者自人天次第而數也

堂閣朽故墻壁墮落柱根腐敗梁棟傾危周

市俱時欬然火起焚燒舍宅

贊五

十二

譬身老苦逼也家有堂閣舍宅有牆壁柱根梁棟皆朽腐將傾而不可居譬三界有五陰衆生衆生有四大命根支體皆變異速壞而不可保然且於中競造惡業爲五欲財利生死悲惱之所燒煮天上人間無能免者故曰周匝俱時欬然火起

長者諸子若十二十或至三十在此宅中

言五百人又言諸子者人則汎舉羣生子

則特舉從化者若十指菩薩子二十三十

枯二乘子前於五趣言百此於三乘言十

者以五趣衆生從三乘之化者十一而已

長者見是大火從四面起即大驚怖

譬觀六道苦起大悲心四面即生老病死

四相爲衆苦之本

而作是念我雖能於此所燒之門安隱得出

而諸子等於火宅內樂著嬉戲不覺不知不驚不怖火來逼身苦痛切已心不厭患無求出意

所燒之門安隱得出譬佛於生死苦永盡憂患不能襲也諸子樂著不覺不怖譬深著世樂無有慧心徒見得忘形見利忘真

火宅之人皆如是也

舍利弗是長者作是思惟我身手有力當以衣械若以几案從舍出之復更思惟是舍唯有一門而復狹小

沉思救焚之方也謂恃身手有力顧幼稚之微欲以衣械密扶而出之或以几案憑挈而出之又思其門狹小不可用此但以殷勤方便引而出之也此譬三七思惟設教之意身手全體譬如來知見力無所畏

衣械密用譬有大神力几案可憑譬智慧力其門狹小譬二乘心劣不堪此法故後文云若我但以神力及智慧力讚如來知見力無所畏者衆生不能以是得度故但以方便援濟之也三藏法師云衣械者西國盛華之具貢上貴人用之

諸子幼稚未有所識戀著戲處或當墮落爲火所燒我當爲說怖畏之事此舍已燒宜時疾出無令爲火之所燒害作是念已如所思惟具告諸子汝等速出

憂其無知明告其害使知趨利

父雖憐愍善言誘喻而諸子等樂著嬉戲不肯信受不驚不畏了無出心亦復不知何者是火何者爲舍云何爲失但東西走戲視父而已

譬衆生爲貪欲所迷雖遭大苦不以爲患耽湎既甚不知何者是苦何者是身云何爲貪但迷已逐物火馳不返雖值佛法不從其化特視之而已

爾時長者即作是念此舍已爲大火所燒我

續五

十四

及諸子若不時出必爲所焚我今當設方便

令諸子等得免斯害父知諸子先心各有所

好種種珍玩奇異之物情必樂著而告之言

汝等所可玩好希有難得汝若不取後必憂悔

如此種種羊車鹿車牛車今在門外可以

遊戲汝等於此火宅宜速出來隨汝所欲皆

當與汝

徒令速出則佛其所欲既不能化故順其

所欲而化之長者亦自恐被焚者譬佛示

身三界與民同患也知子所好等者譬知

諸衆生有種種欲隨其本性方便說三也車表果法不屬三界故云今在門外可以遊戲者喻法樂可以自娛也牛正服乘之大力者正譬大根以任大乘羊鹿非可服乘徒以像牛爲幼稚玩好之具權譬小根以任小乘知羊鹿非可服乘徒爲玩好之具則知二乘不足致道徒爲戲論之法而已

爾時諸子聞父所說珍玩之物適其願故心各勇銳互相推排競共馳走爭出火宅

續五

十五

言適其欲故化無不從進之爲推退之爲排此爭出之勢也譬隨根利鈍決擇三乘

以求出離

是時長者見諸子等安隱得出皆於四衢道中露地而坐無復障礙其心泰然歡喜踊躍

乍喜諸子脫苦也四衢露坐等譬言依四諦
造偏空而不知進也

時諸子等各白父言父先所許玩好之具羊
車鹿車牛車願時賜與

諸子出宅就父索車譬因獲三乘之利遂

執三乘之果
舍利弗爾時長者各賜諸子等一大車

譬說三之後等示一乘使知無二無三即
廢權立實也

其車高廣衆寶莊校周而欄楯四面懸鈴又
於其上張設幘蓋亦以珍奇雜寶而嚴飾之
寶繩交絡垂諸華瓔重敷婉筵安置丹枕駕
以白牛膚色充潔形體姝好有大筋力行步
平正其疾如風又多僕從而侍衛之

車譬一乘牛譬大根餘表一乘大根之德

用也其車高廣者高出三乘廣攝九部也
衆寶譬萬行欄楯譬總持懸鈴譬四辯之
下化幘蓋譬慈悲之普覆雜寶譬衆善所
以嚴慈悲也寶繩譬四誓所以固慈悲也
垂諸華瓔則外布妙因聯續如瓔重敷婉
筵則內弘忍力柔軟如筵安置丹枕者使
心冥覺觀而默處是道也駕以白牛者非
純一大根不堪此乘也膚色充潔得其所
養而無染也形體姝好全其所賦而無惡
也有大筋力譬堪任大事行步平正譬允
蹈大方其疾如風譬一念頓造又多僕從
十六譬方便利生助道之事總而譬之即後所
謂諸佛禪定解脫等娛樂之具一相一種
淨妙之樂也

所以者何是大長者財富無量種種諸藏悉

皆充溢而作是念我財物無極不應以下劣小車與諸子等

釋所以賜等一大車之意譬如來有無量知見力無所畏諸佛法藏能與衆生大乘之法

今此幼童皆是吾子愛無偏黨我有如是七寶大車其數無量應當等心各各與之不宜差別

譬諸衆生皆是我子等與大乘不令有人獨得滅度

所以者何以我此物周給一國猶尚不匱何

況諸子

萬物皆往資焉而不匱此之謂也

是時諸子各乘大車得未曾有非本所望

譬二乘得佛過其所望

舍利弗於汝意云何是長者等與諸子珍寶大車寧有虛妄不
問許三而賜一猶始權而終實始終相違涉虛妄不

舍利弗言不也世尊是長者但令諸子得免火難全其軀命非爲虛妄何以故若全身命便爲已得玩好之具況復方便於彼火宅而拔濟之

以全身命爲得玩好者身之可玩固甚於物蓋身爲道本全則道全所以至人常遺物抱道以全身養生而火宅之人唯物之玩不自貴愛故此警之耳

世尊若是長者乃至不與最小一車猶不虛妄何以故是長者先作是意我以方便令子得出以是因緣無虛妄也何況長者自知財

富無量欲饒益諸子等與大車佛告舍利弗

善哉善哉如汝所言

舍利弗如來亦復如是則爲一切世間之父
視四生如一子等三界以同仁

於諸怖畏衰惱憂患無明暗蔽永盡無餘

怖畏惱患即三界苦相無明暗蔽即四生
苦本於此永盡即如如佛

而悉成就無量知見力無所畏有大神力及
智慧力具足方便智慧波羅蜜大慈大悲常
無懈倦恒求善事利益一切

知見力無畏正智也方便智度權智也神
力智力所以資正智慈悲無倦所以運權
智

而生三界朽故火宅爲度衆生生老病死憂
悲苦惱愚癡暗蔽三毒之火教化令得阿耨

焰王

十八

多羅三藐三菩提

由慈悲故示生三界之家濟度五趣之衆
以自永盡無明暗蔽故欲度衆生愚癡暗
蔽以自成就無量知見故欲令衆生得大
菩提所謂欲令一切衆如我等無異也

見諸衆生爲生老病死憂患惱之所燒煮
亦以五欲財利故受種種苦又以貪著追求
故現受衆苦後受地獄畜生餓鬼之苦若生
天上及在人間貧窮困苦愛別離苦冤憎會
苦如是等種種諸苦衆生沒在其中歡喜遊
戲不覺不知不驚不怖亦不生厭不求解脫
於此三界火宅東西馳走雖遭大苦不以爲
患

此備舉三界火宅苦狀該三世六道因果

也生老病死憂患惱爲果業屬前因五

欲財利追求等苦爲因業屢後果畜生餓鬼天上人間即緣上因果成六道業化爲異類淪替不停實可驚怖彼且喜而不厭遭而不患實癡暗所蔽也

舍利弗佛見此已便作是念我爲衆生之父

第五

十九

應拔其苦難與無量無邊佛智慧樂令其遊

戲舍利弗如來復作是念若我但以神力及智慧力捨於方便爲諸衆生讚如來知見力無所畏者衆生不能以是得度

無邊佛慧樂即一乘法樂如來知見力無

所畏即一乘法體雖足以拔苦然非凡夫事故不能以是得度

所以者何是諸衆生未免生老病死憂悲苦惱而爲三界火宅所燒何由能解佛之智慧所以不能以是得度者爲衆苦所迷故

舍利弗如彼長者雖復身手有力而不用之但以殷勤方便勉濟諸子火宅之難然後各與珍寶大車如來亦復如是雖有力無所畏而不用之但以智慧方便於三界火宅拔濟衆生爲說三乘聲聞辟支佛佛乘

法喻雙明

而作是言汝等莫得樂住三界火宅勿貪龕弊色聲香味觸也若貪著生愛則爲所燒

此善言誘諭力拔其苦也色等五欲俗以爲軟美佛以爲龕弊爲皆幻惑濁惡能發

業苦實致火之具也故貪著生愛則爲所燒

汝速出三界當得三乘聲聞辟支佛佛乘我今爲汝保任此事終不虛也汝等但當勤修精進如來以是方便誘進衆生復作是言汝

等當知此三乘法皆是聖所稱歎自在無繫
無所依求乘是三乘以無漏根力覺道禪定
解脫三昧等而自娛樂便得無量安隱快樂
示以三乘而讚其法使向慕也此三乘法
聖所稱歎者諸佛共尊也能離生死故自

曠五

二十一

聞聲悟道名聲聞乘欲速機小故譬羊車
若有衆生從佛世尊聞法信受殷勤精進求
自然慧樂獨善寂深知諸法因緣是名辟支
佛乘如彼諸子爲求鹿車出於火宅

辟支此云獨覺亦通緣覺出無佛世觀物

在無繫異有爲法故無所依求得是乘者
斯得無漏五根五力七覺支八正道四禪
九次第定八解脫諸三昧法足以娛樂脫
三界苦

變易自覺無生故號獨覺觀十二緣覺真
諦理故號緣覺求自然慧樂獨善寂即獨
覺也深知諸法因緣即緣覺也此乘斷三
界見思與聲聞同更侵斷習氣根性猛利
故居聲聞上其機稍大故譬鹿車

曠五

二十二

舍利弗若有衆生內有智性從佛世尊聞法
信受殷勤精進欲速出三界自求涅槃是名
聲聞乘如彼諸子爲求羊車出於火宅
此辯三乘根性不等取果有異如彼諸子
玩好不同內有智性者謂正因信種揀非
闡提也內有是因故從佛爲緣觀四諦理

若有衆生從佛世尊聞法信受勤修精進求
一切智佛智自然智無師智如來知見力無
所畏愍念安樂無量衆生利益天人度脫一
切是名大乘菩薩求此乘故名爲摩訶薩如
彼諸子爲求牛車出於火宅

此兼三乘集衆智之大根也一切智即菩薩智也佛智即一切種智也自然即離諸

證取者無師即不由他悟者能求衆智及如來知見廣大德用而愍安利度所以爲大菩薩其機爲最故譬牛車

舍利弗如彼長者見諸子等安隱得出火宅

到無畏處自惟財富無量等以大車而賜諸

子此牒見子得出露地而坐自念財物無極

不與小車等文

如來亦復如是爲一切衆生之父若見無量

億千衆生以佛教門出三界苦怖畏險道得

涅槃樂如來爾時便作是念我有無量無邊

智慧力無畏等諸佛法藏是諸衆生皆是我子等與大乘不令有人獨得滅度皆以如來

滅度而滅度之

合上可明出三界苦得涅槃樂即權乘小果如來滅度而滅度之即大乘極果

是諸衆生脫三界者悉與諸佛禪定解脫等娛樂之具皆是一相一種聖所稱歎能生淨

妙第一之樂

疏上等與大乘之意也謂彼脫三界者雖得小乘禪定解脫然猶狀有著空非一相

也裂爲二乘非一種也執著未除非淨也空有未融非妙也故與之諸佛禪定解脫

五 娛樂之具一相一種淨妙之樂如彼大車

衆美具備

舍利弗如彼長者初以三車誘引諸子然後但與大車寶物莊嚴安隱第一然彼長者無

虛妄之咎

先牒次結

如來亦復如是無有虛妄初說三乘引導衆生然後但以大乘而度脫之何以故如來有無量智慧力無所畏諸法之藏能與一切衆生大乘之法但不盡能受舍利弗以是因緣當知諸佛方便力故於一佛乘分別說三總結前文也不盡能受者機不齊故

音釋

綱 直留切 繆 留鳩 脍 黃練
一切弓也 泰 直一切 駘 大來切 疏他
衣也 泰 曹衣也 踞 道

妙法蓮華經要解卷第四

妙法蓮華經要解卷第五

曠六

溫陵開元蓮寺比丘 戒環 解

佛欲重宣此義而說偈言

譬如長者

有一大宅

譬佛王三界

其宅久故

而復頽弊

堂舍高危

柱根摧朽

梁棟傾斜

基陛墮毀

牆壁圮坼

泥塗地落

覆苦亂墜

椽梠差脫

周障屈曲

雜穢充遍

有五百人

止住其中

大宅譬三界堂舍譬人身三界之相其來

鴟梟鵰鷲

鳥鵠鳩鵠

蛇蠍蝮蠍

無始故曰久故五濁同會故曰頽弊五陰

蜈蚣蚰蜒

守宮百足

馳驥鼯鼠

堂舍虛幻架構危而易傾命無牢強若柱

諸惡蟲輩

交橫馳走

根之摧朽質非貞固類梁棟之傾斜無明
爲基所以成是堂也餘緣爲陞所以入是

堂也是十二緣念念變異故曰基陛頽毀

身爲苦器主殺盜淫謂之三業意爲苦本
主貪嗔癡謂之三毒身三意三相資而互
具也今鴟等八鳥譬貪毒而具三業鴟噉

牆壁圮坼譬四大之衰謝泥塗阤落譬皮
膚之皴皺覆苦譬毛髮椽梠譬骸骨苦茅
覆也阤壞也亂墜差脫皆敗壞之狀此其
外相也其內則關膈府藏周障屈曲膿血
便利雜穢充遍其弊敗不淨若此而俗尤
癡愛貪著故詳喻之五百人者五道衆生
所共有也椽梠一類在簷曰椽在脊曰梠
椽從緣相緣屬也梠從呂如脊骨也

結文云其舍恐怖變狀如是是也

生類土梟相食具殺貪也鵝善搏兔鷺食

死屍具盜貪也烏鵲鳩鴿傳沫自運具姪

貪也餘皆可推蛇等六蟲譬嗔毒蛇元也

爲毒之首蛇同類其性多嗔復也晝不

能視觸之則復而蟄人人得復而殺之蠍

多處陰而不可知蜈蚣蚰蜒善伏而含毒

凡嗔之類如此或天性之嗔毒如蛇或

觸之而後嗔人如蝮或非色作愠現徒陰

險以嗔人潛伏以毒人如蠍蜈蚣之類是

也守宮等六蟲譬癡毒守宮類蜥蜴多在

陰室百足名蛇蠍之類多足而行不進馳

鼠之類能由穴噉鼠狸狐之類老爲精魅

羈甘口鼠物遇食而不知痛傷鼠多奸而

善藏癡者陰昧濡滯潛傷奸伏其狀如此

諸惡蟲輩交橫馳走譬三毒交擾鬪競不

休也
尿尿臭處
不淨流溢
蟻螻諸蟲

而集其上
齊齒死屍
骨肉狼藉

狐狼野干
咀嚼踐踏

於身受心法四念失正爲倒尿尿臭處不

淨流溢譬身倒也觀身不淨如此而俗以

爲香潔蟻螻諸蟲而集其上譬受倒也觀

受是苦如此而俗以爲欲樂遂於革囊衆

穢生羨麗想而或著不捨真若蟻螻之集

不淨也狐狼野干咀嚼踐踏譬心倒也狐

多疑狼害物野干變恠倒心似之觀心無

常則一切法皆不足戀然且咀踐纏著豈

非倒耶齊齒死屍骨肉狼藉譬法倒也觀

法無我猶如死屍由疑倒心妄計窮詰是

謂齊齒轉見倒妄是謂狼藉也野干類狐

巢危岩高木群行夜鳴恠獸也齒決曰嚙

斷骨曰嚙

由是群狗 競來搏撮

饑羸惱惶

處處求食

鬪諍擗掣

哇咤嘩吠

狗性苟且而善執守譬識情執著也群狗

譬六識搏撮即執取義一切幻法無可愛
樂而六識妄著無異群狗競搏死屍也言
由是者由四倒而發六識由六識而發三
毒展轉相資也惶惶求食譬識倒而發貪
也鬭諍擗掣譬識倒而發嗔也哇咤嘩吠
譬識倒而發癡也六識三毒倒妄相因於
諸幻境競執貪求其狀如此擗掣相掣奪
也哇咤拒物之惡聲也

其舍恐怖 變狀如是

結文云如是諸難是也

處處皆有

魑魅魍魎

言宅多物也譬者性覺本明離明而昧曰
魑魅心本一真物罔而二曰魍魎言處處
者人人性皆若是此爲起難之端故首言
之

由罔昧而起無明由無明而起三毒也

夜叉惡鬼

食啖人肉

毒蟲之屬

諸惡禽獸

孕乳產生

各自藏護

夜叉競來

爭取食之

食之既飽

惡心轉熾

鬭諍之聲

甚可怖畏

伎义此云苦

活譬無明識種攬衆苦以自

活而戕害法身故譬食啖人肉毒蟲禽獸
通言二毒孚乳產生言其類日滋各自藏
護譬畜積忿毒不可凌犯夜叉競來爭取

食之譬互起無明交相惱害食之既飽惡

心轉熾譬以三毒而資無明猶以膏而益火所以轉熾也鬪諍之聲甚可怖畏譬無明三毒彼此交攻如夜叉之鬭鬭真可畏也孚卵屬以爪保之也乳胎屬以乳哺之也又孚乳通保養義

鳩槃茶鬼

蹲踞土牆

或時離地

一尺二尺

往返遊行

縱逸嬉戲

捉狗兩足

撲令失聲

以腳加頸

怖狗自樂

鳩槃茶此云可畏譬無常殺鬼也土牆譬

地居欲界一尺譬色界二尺譬無色界三界皆未免無常故殺鬼往返遊行於其間

縱逐殺害視殺如戲焉言踞土牆又言或時離地者地居命促故殺鬼以踞地爲常天居命長故殺鬼或時而往返捉狗兩足等

曉六

五

者狗譬識兩足譬行想蓋五蘊自識生行想乃有所行而識由行想取無常苦如捉其兩足而撲之也識爲無常所苦則行想顛倒故譬以腳加頸也怖狗自樂者識爲無常所怖而殺鬼樂然無怖所謂彼爲衰殺非衰殺也

復有諸鬼

其身長大

裸形黑瘦

常住其中

發大惡聲

呴呼求食

復有諸鬼

其咽如針

復有諸鬼

首如牛頭

或食人肉

或復噉狗

身大裸形譬地獄難經云阿鼻地獄縱廣三十二萬里罪人業力身如鐵花遍滿其中可謂其身長大也墮此經歷八萬四千大劫故曰常住其中裸形呴呼即地獄苦狀也其咽如針譬餓鬼難首如牛頭譬畜

生難或食人肉或復噉狗譬三惡道不但傷害法身亦乃苦楚識神也

頭髮鬚亂

殘害兇險

饑渴所逼

爆聲震烈

摧折墮落

牆壁崩倒

諸鬼神等

揚聲大叫

鶻鷺諸鳥

叫喚馳走

舉諸鬼可畏之狀譬三惡道貌狀行業也

頭髮貌惡也兇險行惡也饑逼業惡也三

者因果相召迭起故譬叫喚馳走

夜義餓鬼

諸惡鳥獸

饑急四向

窺看慙牖

如是諸難

恐畏無量

惣明無明三毒惡習熾盛逐境無厭伺隙

而出故譬饑急四向窺看慙牖古有六慙

獮猴之喻其意類此

是朽故宅

屬於一人

其人近出

未久之間

於後宅舍

忽然火起

四面一時

其焰俱熾

棟梁椽柱

亦住其中

薄福德故

爲火所逼

共相殘害

飲血噉肉

野干之屬

並已前死

諸大惡獸

競來食噉

冕烟燄焯

四面充塞

火既逼極蟲獸竄伏鬼神潛避譬身壞之後三毒不滅唯藏於阿賴耶識生死窟穴也毘舍闍即惱害鬼所謂諸惱人者譬煩惱之本亦住其中者亦潛伏藏識而不亡

廣六

七

也薄福德故爲火所逼者所謂生不修福

死歸苦處復於穴中共相噉害譬於幽陰

業識相尋交爲讎對也野干之屬譬四倒

而曰已死者三毒根本實業不亡四倒支

末隨幻起滅故也以隨幻滅則亦爲四相

所吞故曰諸大惡獸競來食啖冕烟燄焯

者死業交煎逼極之相也

蜈蚣蚰蜒

毒蛇之類

爲火所燒

爭走出穴

鳩槃茶鬼

隨取而食

即前毒蟲藏竄爲穴內火逼又爭出穴還

被鬼食譬二毒隨識而逝受死報已復生
諸趣命未須臾又爲無常所殺故曰隨取
而食也既以苦逼而死復以苦逼而生未
須臾間又遭絞苦六趣生死凡皆若是也
悲哉然生死由識爲種而依三毒言者生
死苦逼皆由三毒而致故也

又諸餓鬼 頭上火然 餓渴熱饑
周障悶走

圓覺云衆生無始皆因姪慾而正性命當
知輪迴愛爲根本愛欲爲因愛命爲果由
於欲境起惑造業是故復生地獄餓鬼今
舉餓鬼示愛欲之果也頭上火然示愛欲
之因也姪慾熾盛爲五欲之首故譬頭上
火然餓渴熱惱周憚悶走譬爲欲業逼惱
又遂愛命輪轉諸趣無有窮已

其宅如是

甚可怖畏

毒害火灾

衆難非一

夫生死循環衆苦逼切真若火宅可畏之
嘵六
狀而俗以倒心自迷徒惑欲愛不知業因
苦果皆自此起沉湎其中冥若大夢故我

大覺依一身之苦器初明三毒六識之苦
相次明無常三惡之苦難終明業識輪迴
之苦本喻而示之使由樂而覺苦怖果而
絕因則生死迅輪庶幾停息出火宅難到
八
無畏處實導師慈父之至德也

是時宅主 在門外立 聞有人言
汝諸子等 先因遊戲 來入此宅
稚小無知 歡娛樂著 長者聞已
驚入火宅 方宜救濟 令無燒害
告喻諸子 說衆患難 惡鬼毒蟲

災火蔓延

衆苦次第

相續不絕

毒蛇蠍蝮

及諸夜叉

鳩槃茶鬼

野干狐狗

鶻鷺鴟梟

百足之屬

饑渴惱急

甚可怖畏

此苦難處

况復大火

在門外立譬如來已離三界火宅驚入火
宅譬大悲願力示現受生方宜猶方便也
嘵六
諸子無知 雖聞父誨 猶故樂著
嬉戲不已 是時長者 而作是念
諸子如此 益我愁惱 今此舍宅
九
無一可樂 而諸子等 躁滯嬉戲
不受我教 將爲火害 即便思惟
設諸方便 告諸子等 我有種種
珍玩之具 妙寶好車 羊車鹿車
大牛之車 今在門外 汝等出來

吾爲汝等

造作此車

隨意所樂

可以遊戲

爲救稚子巧說三車譬爲度小智權說三

乘權則非實故云造作酒沉迷也

諸子聞說

如此諸車

即時奔競

馳走而出

到於空地

離諸苦難

譬二乘樂小於空速證

長者見子

得出火宅

住於四衢

坐師子座

而自慶言

我今快樂

此諸子等

生育甚難

愚小無知

而入險宅

多諸毒蟲

魑魅可畏

大火猛焰

四面俱起

而此諸子

貪著嬉戲

我已救之

令得脫難

是故諸人

我今快樂

四衢道言子既離難師子座表父得無畏

所謂若子病愈父母亦愈也生育甚難譬人身難得恐癡迷復失故切救之

爾時諸子

知父安座

皆詣父所

而白父言

願賜我等

三種寶車

如前所許

諸子出來

當以三車

隨汝所欲

今正是時

惟垂給與

頌諸子索車也

長者大富

庫藏衆多

金銀琉璃

車磲瑪瑙

以衆寶物

造諸大車

裝校嚴飾

周市欄楯

四面懸鈴

金繩交絡

真珠羅網

張施其上

金花諸瓔

處處垂下

衆綵雜飾

周市圍繞

柔軟繒續

以爲茵褥

上妙細氍

價直千億

鮮白淨潔

有大白牛

肥壯多力

形體姝好

以駕寶車

多諸賓從

而侍衛之

以是妙車

等賜諸子

以富藏衆寶造諸大車譬於無量知見演出一乘然雖一乘亦未離造作蓋既已謂之一矣當知妙法一亦不守也裝校嚴飾

等譬一乘果法萬德圓備唯大根能乘以佑助正道方便利生並如前解

諸子是時

歡喜踊躍

乘是寶車

遊於四方

嬉戲快樂

自在無礙

得一乘妙用則不滯於一隅故曰遊於四

方不縛於諸法故云嬉戲快樂蓋戲者之於物毋意毋必調而應偶而會曾無縛著之心道人於一切法若嬉戲然乃能自在無礙

告舍利弗

我亦如是

衆聖中尊

世間之父

一切衆生

皆是吾子

深著世樂

無有慧心

三界無安

猶如火宅

衆苦充滿

甚可怖畏

常有生老

病死憂患

如是等火

熾然不息

如來已離

三界火宅

寂然閑居

安處林野

今此三界

皆是我有

其中衆生

悉是吾子

而今此處

多諸患難

唯我一人

能爲救護

雖復教誨

而不信受

於諸欲染

貪著深故

以是方便

爲說三乘

令諸衆生

知三界苦

開示演說

出世間道

是諸子等

出世間道且令脫三界苦未與開佛知見

是諸子等

若心決定

具足三明

及六神通

有得緣覺

不退菩薩

此因三乘得出世間者也不退指地前苦
薩皆權果也三明者過去宿命現在天眼
未來漏盡除三際愚故謂之明即六通之
三也六通加天耳他心神境

汝舍利弗

我爲衆生

以此譬喻

說一佛乘

汝等若能

信受是語

說一乘當

成得佛道

爲其以權果爲決定故說

乘而進之

是乘微妙

清淨第一

於諸世間

爲無有上

佛所悅可

讚一乘德也妙契佛心所以悅可

一切衆生

所應稱讚

供養禮拜

無量億千

諸力解脫

禪定智慧

及佛餘法

得如是乘

令諸子等

日夜劫數

常得遊戲

與諸菩薩

號六

十二

及聲聞衆 乘此寶乘 直至道場

一切衆生至供養禮拜令尊敬一乘也無

量億千至及佛餘法指一乘所具也諸力

解脫即十力諸解脫也得如是乘直至道

場示一乘之利也得是乘者得智慧日照

生死夜等頃久劫超情量數於一切法優

遊自在故云日夜劫數常得遊戲直至道

場謂直下坐道樹成正覺也

以是因緣 十方諦求 更無餘乘

除佛方便 ○結顯一乘也

告舍利弗 汝諸人等 皆是吾子

我則是父 汝等累劫 衆苦所燒

我皆濟拔 令出三界 我雖先說

汝等滅度 但盡生死 而實不滅

今所應作 唯佛智慧 菩有菩薩

於是衆中 能一心聽 諸佛實法
諸佛世尊 雖以方便 所化衆生
皆是菩薩

我雖先說至而實不滅牒昔權也今所應
作唯佛智慧明今實也不滅言非真證也

若有菩薩已下謂能以大心聽此實法則
曉六
知諸佛雖說三乘皆爲化菩薩故

若人小智 深著愛欲 為此等故

說於苦諦 衆生心喜 得未曾有

佛說苦諦

真實無異

若有衆生

不知苦本

深著苦因

不能暫捨

爲是等故

方便說道

諸苦所因

貪欲爲本

若滅貪欲

無所依止

滅盡諸苦

名第三諦

爲滅諦故

修行於道

離諸苦縛

名得解脫

牒明所以說四諦之意也四諦之初爲治
小智愛欲故說苦諦使知厭離苦即生老
病死由愛欲起也二爲衆生深著苦因故
說集諦使知伏斷集即煩惱惑業爲苦之
因爲其深著故方便說集諦以導之使知
捨離也道音導三爲滅苦本絕其依止故
說滅諦使滅盡貪欲生死諸苦即小乘涅
槃也四爲求證滅故說道諦使知進修道
者略即戒定慧廣即三十品覺觀之法
乃離苦脫縛之道也四法皆謂之諦者其
義諦實當理無差故遺教云日可令冷月
可令熟佛說四諦不可令異
是人於何 而得解脫 但離虛妄
名爲解脫 其實未得 一切解脫
佛說是人 未實滅度 斯人未得

無上道故

我意不欲

令至滅度

牒上解脫非真也離虛妄爲解脫即歟有

著空者也得一切解脫即無歟無著者也

爲其猶有歟著故說是人未實滅度以有

歟著非無上道故不欲令證也

我爲法王

於法自在

安隱衆生

故現於世

汝舍利弗

我此法印

爲欲利益

世間故說

結告大衆使知佛之出現說法之意而求

其安隱利益也法印即所謂實相印

在所遊方

勿妄宣傳

若有聞者

隨喜頂受

當知是人

阿鞞跋致

勿妄宣傳爲非小智所堪能隨喜受當知

是大菩薩阿鞞跋致此云不退指地上菩薩

也

若有信受此經法者是人已曾見過去佛恭敬供養亦聞是法

供佛言夙福之厚聞法言夙因之深故能

信此

若人有能信汝所說則爲見我

亦見於汝

及比丘僧

並諸菩薩

斯法華經

爲深智說

淺識聞之

迷惑不解

一切聲聞

及辟支佛

於此經中

力所不及

我汝比丘菩薩指靈山法衆也謂在所宣

廣六

十五

傳能信汝說即見靈山法會宛爾常存也

若深智以現量證之則觸事而真淺識以

情見分別故迷惑不解

汝舍利弗

尚於此經

以信得入

況餘聲聞

其餘聲聞

信佛語故

隨順此經 非已智分

聲聞力雖不及然許以信入故凡能隨順
非其智分所能皆信力爾故須擇信機宣
傳也前云是法不可示言辭相寂滅而獨
許信力堅固者能解此又許舍利弗等以
信得入以信隨順當云何信耶傳曰不言
而信者天也又曰有諸已之謂信今欲解
言辭相寂之法當依不言之信信乎已而
已即華嚴五位之初十信是也彼依自性
不動智以立信體令信自心與佛無異由
是覺了智佛不動萬法不遷因果不移聖
凡不二心境脗然印契實相一切相應是
謂不言之信也能發是信賴無明業識
見聞覺知成一切種智矣則於此經以信
得入以信隨順者如此

又舍利弗 憐慢懈怠 計我見者

莫說此經

凡夫淺識

深著五欲

聞不能解

言勿爲說

憍急計我即外道無信者凡淺著欲即凡
夫無信者皆在所擇

若人不信 謾謗此經 則斷一切

世間佛種

或復頻感

而懷疑惑

此經所詮即人人妙性是謂佛種不信而
毀則佛種斷滅業種增熾則說之不如其
已蓋信而後言未信則以爲厲已故顰蹙

第七

十六

也又未信則以爲謗已故疑惑也夫心者
萬形之模範業者一心之影響三世善惡
一唯心造如器出模無不相類如影隨形
在處莫逃故謗經罪報各從其類如下所

列

汝當聽說

此人罪報

若佛在世

若滅度後

其有誹謗

如斯經典

見有讀誦

書持經者

輕賤憎嫉

而懷結恨

此人罪報

汝今復聽

其人命終

入阿鼻獄

具足一劫

劫盡更生

如是展轉

至無數劫

此斷佛種之報也自斷佛種故永沉幽趣

劫盡更生謂一劫命盡復生地獄獄報劫

數如是之長者失性隨業如石投水易沉

難浮其勢然也

從地獄出

當墮畜生

若狗野十

其形頹瘦

薰黓疥癩

人所觸燒

又復爲人

之所惡賤

常困饑渴

骨肉枯竭

生受楚毒

死被瓦石

斷佛種故

受斯罪報

庚六

十七

非毀正乘故召駝驢乘負之報疑情偏見

狗由苟且害正野干由狐疑不信此毀謗

疑惑之報也又繁疥癩之病觸燒之害乃

至楚毒鞭朴瓦石打擲此輕賤憎嫉之報

也領音窟白禿也薰黓黑雜色燒擾弄也

若作駝驢或生驢中身常負重

加諸杖捶但念水草餘無所知

謗斯經故獲罪如是有作野干

來入聚落身體疥癩又無一目

爲諸童子之所打擲受諸苦痛

或時致死於此死已更受蟻身

其形長大五百由旬聾瞞無足

蜿轉腹行爲諸小蟲之所噏食

晝夜受苦無有休息謗斯經故

獲罪如是

故召野干一目之報來入聚落即業力所使自求打擲也蟒大蛇性多嗔乃憎嫉結恨之報聾無聞駛無識亦不信之類也

若得爲人

諸根暗鈍

矬陋攢雙

盲聾背傴

有所言說

人不信受

口氣常臭

鬼魅所著

貧窮下賤

爲人所使

多病消瘦

無所依怙

雖親附人

人不在意

若有所得

尋復忘失

若修醫道

順方治病

更增他疾

或復致死

如恒河沙

無人救療

設服良藥

生輒聾啞

若他反逆

抄劫竊盜

諸根不具

橫罹其殃

如是等罪

不見佛不聞法皆難報也

蔑智慧明故六根暗鈍毀正法身故矬短

醜陋手拘攀足跛躄也有所言說等即謗

續六

十八

若得爲人 蘭盲瘡痘 貧窮諸衰
以自莊嚴 水腫乾痟 疡癩癰疽

詐口業之報附而不親乃至橫遭殃罪者爲不順正理故報皆乖背也上明業報次明難報

如斯罪人 永不見佛 衆聖之王

說法教化 如斯罪人 常生難處

狂聾心亂 永不聞法 於無數劫

如遊園觀 在餘惡道

在餘惡道 是其行處

如遊園觀 是其行處

如遊園觀 是其行處

如遊園觀 是其行處

園觀舍宅譬遊處於是不暫離也是謂常

如是等病	以爲衣服	身常臭處
垢穢不淨	深著我見	增益嗔恚
姪慾熾盛	<small>曠六</small> 不擇禽獸	謗斯經故
獲罪如是		
	以病爲衣服言難脫諸衰也身常不淨姪	
	<small>十九</small> 熾不擇由棄捨淨業增長惡習	
告舍利弗	謗斯經者	
窮劫不盡	以是因緣	
無智人中	莫說此經	
智慧明了	我故語汝	
如是之人	若說其罪	
億百千佛	若有利根	
如是之人	求佛道者	
常修慈心	復有佛子	
若人恭敬	種種因緣	
	如是之人	
	於大衆中	
	譬喻言辭	
	說法無礙	
	若有比丘	
	合掌頂受	
	乃至不受	
	乃可爲說	
	如是求經	
	志求餘經	

獨處山澤	如是之人	乃可爲說
又舍利弗	若見有人	捨惡知識
親近善友	如是之人	乃可爲說
若見佛子	持戒清潔	如淨明珠
求大乘經	如是之人	乃可爲說
若人無嗔	質直柔軟	常愍一切
恭敬諸佛	如是之人	乃可爲說
復有佛子	於大衆中	以清淨心
種種因緣	譬喻言辭	說法無礙
如是之人	說法無礙	
乃可爲說	若有比丘	
四方求法	合掌頂受	
但樂受持	乃至不受	
餘經一偈	乃可爲說	
如人志心	如是之人	
求佛舍利	乃可爲說	
得已頂受	如是求經	
其人不復		
志求餘經		

亦未曾念

外道典籍

如是之人

乃可爲說

○精確鑽仰如求舍利

告舍利弗

我說是相

求佛道者

窮劫不盡

如是等人

則能信解

汝當爲說

妙法華經

如上正機正行不可勝舉聊示大略使以
類擇授之正法也

妙法蓮華經要解卷第五

音釋

圮 皮羨切 坍 耷格切 陀 除𠂇切 山
鈸也 鵠是支切 龜也 救切 鶯下雞切 七旬
也 鵠鵠也 龜鼠名也 鶯口鼠也 甘
五 結 撫俱切 說文 麟徒叶切 酢
切 孝云 卵事也 壴奄布也 切

妙法蓮華經要解卷第六

曠七

溫陵開元蓮寺比丘 戒環 解

信解品第四

信解者因聞喻說以信得入悟解法要也

前法說一周身子於喻品之初領悟佛於

喻品述成與記喻說一周四大弟子於此

品領悟佛於藥草品述成授記品與記然

大迦葉爲上首弟子而領悟後於身子者

此經融會二智身子當機故先領悟也諸

大弟子皆內祕外現根非中下悟無先後

爲助揚法化故次第敷陳也

爾時慧命須菩提摩訶迦旃延摩訶迦葉摩

訶目捷連從佛所聞未曾有法世尊授舍利

弗阿耨多羅三藐三菩提記發希有心歡喜

踊躍

須菩提年德高衆故稱長老或曰具壽或曰慧命戒經云是人佛法中能得智慧命是也合先列大迦葉而先須菩提者亦當機故也須菩提解空第一而聲聞但念偏空於菩薩法心不喜樂今乃捨空法證實道故以解空人表叙至下說偈即當迦葉及授記亦先迦葉乃正序也

即從座起整衣服偏袒右肩右膝著地一心合掌曲躬恭敬瞻仰尊顏而白佛言我等居僧之首年並朽邁自謂已得涅槃無所堪任

不復進求阿耨多羅三藐三菩提

偏右肉袒示降志尊法右膝虔跪示屈節致欽也袒跪不唯西竺之禮此方春秋鄭伯肉袒降楚示爲臣僕及禱則跪爐祭則跪奠皆致欽也白佛已下叙其早躬小乘

晚聞大道之意此總標下自釋

世尊往昔說法既久我時在座身體疲憊但念空無相無作於菩薩法遊戲神通淨佛國土成就衆生心不喜樂

說法既久指四十年說小教時也以疲憊

一故但念小乘空法不復求進也空無相無作即小乘三解脫門也智者謂依四諦以觀諸法無我所名空以空故萬法一異

等相實不可得名無相知一切法無相不可得即於三界無所願求不復造作三有

生死之業名無作亦名無願由是離諸苦

縛而得解脫然此特小法不足念也菩薩法即大乘法也遊戲神通等即大乘行也彼唯樂小沈空趣寂故於大法大行心不喜樂

所以者何世尊令我等出於三界得涅槃證又今我等年已朽邁於佛教化菩薩阿耨多羅三藐三菩提不生一念好樂之心

釋上之失爲滯小故

我等今於佛前聞授聲聞阿耨多羅三藐三菩提記心甚歡喜得未曾有不謂於今忽然得聞希有之法深自慶幸獲大善利無量珍寶不求自得

世尊我等今者樂說譬喻以明斯義譬若有
二人年既幼稚捨父逃逝久住他國或十一

至五十歲

三

三

幼稚譬纏蒙無知捨父譬棄背本覺他國譬淪滯五道故曰至五十歲或十二十譬次第而淪也

年既長大加復窮困馳騁四方以求衣食漸

漸遊行遇向本國

年長窮困四方求食譬因五道歷四生以
自活命漸向本國譬因遇佛教遂能反省
然方向之未能至也

其父先來求子不得中止一城其家大富財

寶無量金銀琉璃珊瑚琥珀頗梨珠等其諸

倉庫悉皆盈溢多有僮僕臣佐吏民象馬車
乘牛羊無數出入息利乃遍他國商估賈客
亦甚衆多

其父譬覺皇也先求不得譬昔曾教化後

還退墮也中止一城譬華嚴法菩提場其
家大富財寶諸珍譬道場所得法具無量
功德也倉盈法喜之食庫溢諸法之財僮
僕所以自奉臣佐所以治民譬自利利他
事也象馬牛羊以譬五乘教授滋息廣被

大一故曰出入息利乃遍他國由是群生
咸求法利故曰商賈衆多搃譬出興利澤
也商以遷有資無賈以覆藏待價商估猶
商人也

時貧窮子遊諸聚落經歷國邑遂到其父所
止之城

窮子譬困於五道乏功德財聚落荒淺譬
小乘權教國邑盛麗譬中乘漸教其父所
止譬大乘正教意謂在昔迷滯因教漸引

遂入正道也

父每念子與子離別五十餘年而未曾向人
說如此事但自思惟心懷悔恨自念老朽多
有財物金銀珍寶倉庫盈溢無有子息一旦
終歿財物散失無所委付是以殷勤每憶其
丁復作是念我若得子委付財物坦然快樂

無復憂慮

父每念子等者譬佛念二乘之子久淪五道性習昏淺未堪說大也思惟悔恨者悔昔之教未深恨今之機退大也自念老朽等者憂其無以續佛壽命也

世尊爾時窮子傭賃展轉遇到父舍住立門側

爲人之用曰傭任力取利曰賃城譬乍入舍譬深入謂資藉權乘積漸深造也然傭賃而作徒取小利功非已有譬資藉權敎終無實證也到舍而住立門側譬雖值佛道不能正入猶依偏空而止爲樂小故

遙見其父踞師子床寶几承足諸婆羅門刹利居士皆恭敬圍繞以珍珠瓔珞價直千萬莊嚴其身吏民僮僕手執白拂侍立左右覆

以寶帳垂諸華幡香水洒地散衆名華羅列寶物出內取與有如是等種種嚴飾威德特尊窮子見父有大力勢即懷恐怖悔來至此竊作是念此或是王或是王等非我傭力得物之處不如往至貧里肆力有地衣食易得若久住此或見逼迫強使我作是念已疾走而去

譬二乘初聞佛果萬德種智之事而迷小怖大也遙見其父譬未能親證踞師子床者表無畏之德也寶几承足者尊萬行之本也萬行本真而能涉俗故刹利居士皆悉圍繞二乘不能涉俗矣因萬行以成萬德故以珍珠瓔珞莊嚴其身二乘無此莊嚴矣吏所以治民所以役僮僕任重譬如一乘法中所治所役輕重纖悉之法無

不脩者所謂治世語言資生業等皆順正法但以不染不偏爲尚故執白拂侍左右蓋拂能去塵白言不染左右表拂去空假之塵而歸中道也寶帳譬慈悲廣被故言

覆華幡譬衆善下化故言垂水譬智華譬

因香水洒地者以妙智淨衆生心地也散

衆名華者以妙因嚴衆生心地也羅列寶

物所以示其玩好出內取與所以隨其欲

樂譬成就大根而誘進小乘也上皆萬德

種智之事自窮子見父已下即迷小怖大

之事王謂國王王等謂王之族譬法報二

身也貧居里巷譬二乘小道肆力有地譬

進修有方非得物處譬大法難證衣食易

得譬小果易求或見逼迫譬慮佛道長遠

久受勤苦內音納或出或納也

第七

六

時富長者於師子座見子便識心大歡喜即作是念我財物庫藏今有所付我常思念此子無由見之而忽自來甚適我願我雖年老猶故貪惜即遣傍人急追將還

見子便識譬昔緣已熟財物有付譬法有

所授我雖年朽猶故貪惜譬曠劫所修不妄與也遣人急追譬令菩薩爲說頓法即華嚴五位法門皆菩薩所說

爾時使者疾走往捉窮子驚愕稱怨大喚我不相犯何爲見捉使者執之逾急強牽將還於時窮子自念無罪而被囚執此必定死轉更惶怖悶絕躰地

父命追子實欲親之而子驚悶絕乃自棄也譬二乘初聞華嚴怯其頑說益頑教以煩惱即菩提而二乘以煩惱爲冤賊故稱

怨也頰以生死即涅槃而二乘以生死爲苦縛故大喚不犯而被捉譬不求而強化急執而強牽譬不從而強率也菩薩示生三界而二乘以三界爲牢獄故云無罪被囚菩薩出入塵勞而二乘恐喪定果故云

費七
此必定死由是如聾若啞悶然不解故曰

轉更惶怖悶絕躰地

父遙見之而語使言不須此人勿強將來以冷水灑面令得醒寤莫復與語

見其驚急悶絕令姑息之譬捨頰開權也

冷水能蘇悶絕譬權教能治煩惱

所以者何父知其子志意下劣自知豪貴爲子所難審知是子而以方便不語他人云是我子使者語之我今放汝隨意所趣窮子歡喜得未曾有從地而起往至貧里以求衣食

譬知其志劣難堪大乘故權息之也不云我子未即顯實也使者放之譬捨頰也隨意所趣譬開權也從地而起即從迷而覺也往至貧里以求衣食即依二乘貧所樂法爲入道資糧也

爾時長者將欲誘引其子而設方便密遣二人形色憔悴無威德者汝可詣彼徐語窮子此有作處倍與汝直窮子若許將來使作若言欲何所作便可語之雇汝除糞我等二人亦共汝作時二使人即求窮子既已得之具

陳上事

先叙設權也密遣二人者使祕菩薩行者示二乘法也形色憔悴即所謂隱其自在之力倍與汝直譬因樂小而示近果也雇汝除糞即所謂以貧所樂法度之除糞譬

斷煩惱煩惱惑業糞穢心地二乘作諸觀
以除之菩薩煩惱涅槃不相留礙而云亦

共汝作者以同事攝也具陳上事譬順佛

揚化

爾時窮子先取其價尋與除糞其父見子愍

贊七

八

而怪之又以他日於窓牖中遙見子身羸瘦

憔悴糞土塵坌污穢不淨即脫瓔珞細軟上
服嚴飾之具更著龐弊垢膩之衣塵土全身
右手執持除糞之器狀有所畏語諸作人汝
等勤作勿得懈息以方便故得近其子

先取其價譬樂小慕果然後修因所以四

諦法中先果後因也其父愍怪怪其樂小
棄大也又以他日於窓牖中等譬又多設
方便循其小見潛施密化使令慕大也瘦
輕塵坌譬二乘伏斷煩惱不得其要翻爲

煩惱所擾也左逆右順右手執器譬順方
便道而誘之

後復告言咄男子汝常此作勿復餘去當加
汝價諸有所須盆器米麵鹽醋之屬莫自疑
難亦有老弊使人須者相給好自安意我如
汝父勿復憂慮

方便叱省而親厚之使安而無怯也當加
汝價譬自預流而進四果盆器譬助道等
法米麵譬資糧等法鹽醋所以和味使於
諸法均調適中也老弊使人譬二乘已陳

贊七

九

之法如所謂已陳芻狗也

所以者何我年老大而汝火壯汝常作時無
有欺怠瞋恨怨言都不見汝有此諸惡如餘
作人自今已後汝所生子即時長者更與作
字名之爲兒

彌已衰老喪子心力譬斥大褒小權進其功言自今如子等者益親厚而進之也兒憐愛之稱更與作字譬改預流而進後果上皆譬設權

爾時窮子雖欣此遇猶故自謂客作賤人由是之故於二十年中常令除糞

正譬滯權也謂雖欣佛化而志尚卑劣故且令於二乘法中斷除十使煩惱之糞也過是已後心相體信入出無難然其所止猶在本處

窮子過二十年久漸親父而猶住門側譬依二乘教斷結之後聞方等教揚大而不謗斥小而不疑是謂心相體信也進可語大退不滯小是謂出入無難也猶在本處

譬未能頓入

世尊余時長者有疾自知將死不久語窮子言我今多有金銀珍寶倉庫盈溢其中多少所應取與汝悉知之我心如是當體此意譬爲說般若漸引入實也長者有疾譬方等之後名相未遣人多法執之病佛亦病之將死而語寶藏譬化緣將畢故說般若爲法華先導如方語之寶藏未即付也般若教中六度萬行具備故譬倉庫盈溢然未爲圓教故其中寶物又有多少或取以自利或與以利他聖人之用心如是宜當體法此令轉教菩薩之譬也大般若告須菩提云汝當爲菩薩說般若下文云我等又因如來智慧爲諸菩薩開演即轉教事所以者何今我與汝便爲不異宜加用心無令漏失

和同父子之情使無疑間而欣領寶藏也
我汝不異等譬般若之理一切皆如無二
無別是入圓頓之門故宜加用心

爾時窮子即受教勑領知衆物金銀珍寶及
諸庫藏而無希取一食之意然其所止故在
本處下劣之心亦未能捨

既領寶藏而畧不希取譬受勑以大乘轉
教而自於此無有志願也下劣之心亦未
能捨譬但念空無相無作而已上總喻昔
失

復經火時父知子意漸已通泰成就大志自
鄙先心臨欲終時而命其子并會親族國王
大臣刹利居士皆悉已集即自宣言諸君當
知此是我子我之所生於某城中捨我逃走
踰佛辛苦五十餘年其本字某我名某甲昔

在本城懷憂推覓忽於此間遇會得之此實
我子我實其父今我所有一切財物皆是子
有先所出內是子所知

子志既大父乃聚族始定父子全付家業
也復經少時等譬般若之後大機已熟可
一變而至道也自鄙先心譬捨小趣大臨
欲終時命子會族如化城云如來自知涅
槃時到便集菩薩聲聞爲說是經則聲聞
爲子菩薩爲族也聚族宣言此是我子即
於天人衆中說我昔曾化故生我法中之

譬也於某城中捨吾等者自昔之後汝今
悉忘之譬也蓋彼時根性未定後還退墮
流浪五道故曰踰佛辛苦五十餘年其本
字某等者指本名字以證父子之的也其
本字某即化城云爾時所化之衆汝等比

丘聲聞弟子是也我名某甲即第十六我釋迦是也本城推覓此間遇會譬昔依本性闡化至此頓門乃適然契會也此實我子等結上的證全付家業譬授記作佛紹法王位也我有財物皆是子有者此一大事人人本具不從外得也先所出納是子所知者即平常運用見聞之法非今別有

也自我求之本始之覺真父子德性之用真寶藏生而固有誰獨且無柰何自失於背馳自迷於外物故佛慈憂慮急使追復儻能心相體信斯可遇會得之曾無難者彼且驚愕而失已稱怨以疑佛設非真慈多方善誘終則跼侷窮困於四生五道可爲長嘆矣

有而作是念我本無心有所希求今此寶藏自然而然至結喻今得也

世尊大富長者則是如來我等皆似佛子如來常說我等爲子

須菩提真佛子爲合譬故言似

世尊我等以三苦故於生死中受諸熱惱迷惑無知樂著小法

三苦者一苦苦若根若境乖違逼迫生老病死諸現苦相二壞苦因樂變異生諸憂惱所謂樂未畢哀又繼之即愛別離求不得之類三行苦即念念遷謝之相五趣蘊苦皆行苦攝

今日世尊令我等思惟蠲除諸法戲論之糞我等於中勤加精進得至涅槃一日之價既得此已心大歡喜自以爲足便自謂言於佛世尊是時窮子聞父此言即大歡喜得未曾

法中勤精進故所得弘多然世尊先知我等心著弊欲樂於小法便見縱捨不爲分別汝等當有如來知見寶藏之分

叙滯權也云今日者對多生言謂多生樂小而今猶滯滯也於一切法妄起惑染顛

倒分別種種戲論糞汚心地名戲論糞一

日之價譬小果之利所獲不多

世尊以方便力說如來智慧我等從佛得涅槃一日之價以爲大得於此大乘無有志求說如來智慧即般若教

我等又因如來智慧爲諸菩薩開示演說而自於此無有志願所以者何佛知我等心樂小法以方便力隨我等說而我等不知真是佛子

此以般若轉教菩薩而自不希求也

今我等方知世尊於佛智慧無所憇惜所以者何我等昔來真是佛子而但樂小法若我等有樂大之心佛則爲我說大乘法

今得法華始知般若之時已欲全付但以樂小自迷若我樂大則全付久矣

於此經中唯說一乘而昔於菩薩前毀些聲聞樂小法者然佛實以大乘教化

觀今說一視昔彈偏足知佛心本以大化是故我等說本無心有所希求今法王大寶自然而然至如佛子所應得者皆已得之

結慶今得也佛子所應得者一乘修證之法也

爾時摩訶迦葉欲重宣此義而說偈言

我等今日聞佛音教歡喜踊躍得未曾有佛說聲聞當得作佛

無上寶聚 不求自得

譬如童子

幼稚無識 捨父逃逝

遠到他土

周流諸國 五十餘年

其父憂念

四方推求 譬因五道歷四生

求之既疲

頓止一城

造立舍宅

五欲自娛 其家巨富

多諸金銀

璉璪瑪瑙 真珠琉璃

象馬牛羊

輦輶車乘 田業僮僕

人民衆多

出入息利 乃遍他國

商估賈人

無處不有 千萬億衆

圍繞恭敬

常爲王者 之所愛念

群臣豪族

皆共宗重 以諸緣故

往來者衆

豪富如是 有大力勢

而年朽邁

益憂念子 凤夜惟念

死時將至

癡子捨我 五十餘年

庫藏諸物

當如之何

頌救迷事也 一城譬覺場舍宅譬慈悲五
欲譬法樂家富衆寶等譬道場所得法具
無量功德益憂念子等譬化緣將畢法藏
未傳憂其無續佛壽命也

爾時窮子

求索衣食

從邑至邑

從國至國

或有所得

或無所得

飢餓羸瘦

體生瘡癬

漸次經歷

到父住城

傭賃展轉

遂至父舍

從邑至國

譬緣循諸教漸入正道也法力

十五

未強故或得

不得法喜未充故飢餓羸瘦

無瘡之身也傭賃展轉遂至父舍譬資藉

權教積漸深入

爾時長者

於其門內

施大寶帳

處獅子座

眷屬圍繞

諸人侍衛

或有計策

金銀寶物

出內財產

注記券疏

於門內施設諸事欲引令入也券以出納
財物疏以疏明事件注而記之譬爲大根
度量功德疏明行位而與授記誘進小乘

也

窮子見父

豪貴尊嚴

謂是國王

若國王等

驚怖自恃

何故至此

怖法報事非已智分

覆自念言

我若久住

或見逼迫

強驅使作

思惟是已

馳走而去

借問貧里

欲往傭作

懼長遠道思取小果

長者是時

在師子座

遙見其子

譬樂小滯權也房譬六入舍譬五陰

淨諸房舍

默而識之

即勑使者

追捉將來

窮子驚喚

迷悶躰地

是人執我

必當見殺

何用衣食

使我至此

譬怯華嚴頓說也怖煩惱窪故驚畏生死

縛故喚悶然不解故云躰地恐喪道果故

疑見殺

長者知子

愚癡狡劣

不信我言

不信是父

即以方便

更遣餘人

恥目矬陋

無威德者

汝可語之

云當相雇

除諸糞穢

倍與汝價

譬捨頓開權也恥少一目譬二乘偏見也

矬短醜陋皆隱勝現劣事

窮子聞之

歡喜隨來

爲除糞穢

長者於牖

常見其子

念子愚劣

樂爲鄙事

於是長者

著弊垢衣

執除蠱器

往到子所

方便附近

語令勤作

循其小見隱勝現劣多方誘進

既益汝價

并塗足油

飲食充足

薦席厚暖

如是苦言

汝當勤作

又以軟語

若如我子

益親厚而誘之也既益汝價譬增進四果

塗足油傭人用之使足不龜譬護戒足助

道之法薦席譬小乘諸定姑息之法若一

乘大定之法則譬繒纊綱禪非薦席比矣

長者有智漸令入出

經二十年

執作家事

示其金銀

真珠頤梨

諸物出入

皆使令知

猶處門外

庚七

十七

止宿草菴

自念貧事

我無此物

心雖漸大猶滯權也漸令入出喻入大出

小經二十年喻歷二乘法示其金銀喻說

般若也父於門內施寶帳而引之子處門

外止草菴而不入喻大小乘人相戾如此

是以性相相忌禪律相非古今不息何當

一定父子全保家業而兩忘同異者耶上

總頌昔失

父知子心

漸以曠大

欲與財物

即聚親族

國王大臣

刹利居士

於此大衆

說是我子

捨我他行

經五十歲

自見子來

已二十年

昔於某城

而失是子

周行求索

遂來至此

凡我所有

舍宅人民

悉已付之

恣其所用

子念昔貧

志意下劣
並及舍宅
得未曾有
佛亦如是
汝等作佛
成就小乘
佛亦如是者
也而說我等
當得成佛
以諸因緣
說無上道
日夜思惟
即授其記
一切諸佛

今於父所
一切財物
○歷頌昔失
知我樂小
而說我等
聲聞弟子
如長者知子
也而說我等
說最上道
我承佛教
種種譬喻
若干言詞
從我聞法
是時諸佛
當得作佛
祕藏之法
但爲菩薩

大獲珍寶
甚大歡喜
以慶今得
未曾說言
得諸無漏
自無志願
佛勸我等至
教也諸佛子等
各獲大利也
聞般若自不
灌故迷實也
意

演其實事
如彼窮子
心不希取
我等雖說
自無志願
佛勸我等至
說無上道頌
爲說般若令轉
教也諸佛子等
各獲大利也
一切諸佛至
說斯真要慨
聞般若自不
灌故迷實也
此後翻牒前文
廣叙滯權之意

而不爲我
得近其父
雖知諸物
說斯真要
而我等雖說
佛法寶藏
亦復如是

我等內滅
更無餘事
教化衆生
一切諸法
無大無小
無漏無爲

自謂爲足
我等若聞
都無欣樂
皆悉空寂
所以者何
無生無滅
如是思惟

不生喜樂

此牒品初自謂已得涅槃不復求進菩提

於菩薩法心不喜樂等文謂滯權之故獨

以內滅煩惱取小果爲足而以淨佛土化

衆生之事爲外所以者何等牒但念空無

相無作之文以釋都無欣樂之意

我等長夜

於佛智慧

無貪無著

無復志願

而自於法

謂是究竟

此牒聞般若無有志求

我等長夜

修習空法

得脫三界

苦惱之患

住最後身

有餘涅槃

佛所教化

得道不虛

則爲已得

報佛之恩

此牒勤加精進得至涅槃一日之價自以

爲足之意凡以迷滯冥然莫曉故屢稱長

夜以出三界證小果爲已得道爲已報佛
皆迷滯也

我等雖爲

諸佛子等

說菩薩法

以求佛道

而於是法

永無願樂

導師見捨

觀我心故

初不勸進

說有實利

如富長者

知子志劣

以方便力

柔伏其心

然後乃付

一切財物

佛亦如是

現希有事

知樂小者

以方便力

調伏其心

乃教大智

此牒轉教菩薩自無志願而佛亦縱捨之
意明佛之縱捨蓋欲調伏俟其迴心乃教

大智如富長者云云乃雙牒法喻總結滯
權也所以重重翻牒者二乘曠劫爲樂小
之心誤甚今既造大乃知深悔故歷陳昔

失而反覆言之以據所懷如人憤劇必厲聲疾詰而後快然則文似繁重實有深意也

我等今日 得未曾有 非先所望
而今自得 如彼窮子 得無量寶

世尊我今 得道得果 於無漏法

得清淨眼 我等長夜 持佛淨戒

始於今日 得其果報 法王法中

久修梵行 今得無漏 無上大果

我等今者 真是聲聞 以佛道聲

令一切聞 我等今者 真阿羅漢

於諸世間 天人魔梵 普於其中

應受供養

慶今始得真實道果知昔所得皆非真也

所謂得道得果者於無漏法得清淨眼是

也無漏法者諸法實相上妙法也清淨眼者諸佛知見正法眼也昔持淨戒雖得果報非真道果特冥行爾故曰長夜持戒始

於今日得其果報昔修梵行雖得小果非真無漏特權息爾故曰久修梵行今得無漏無上大果夫然後乃可振揚道聲爲真聲聞乃可普受應供爲真羅漢斯皆調伏誘進之大恩也故下頌大恩而念報

世尊大恩 以希有事 憐憫教化利益我等 無量億劫 誰能報者

手足供給 頭頂禮敬 一切供養

皆不能報 若以頂戴

於恒沙劫 盡心恭敬 又以美饍

無量寶衣 及諸卧具

牛頭栴檀 及諸珍寶

以起塔廟

寶衣布地 如斯等事 以用供養
於恒沙劫 亦不能報

以希有事方便憐教是謂大恩前修空法

證小果自謂已得報佛之恩既不足報此

又欲窮手足肩頂之內財極美饍衣寶之

外財思以長劫供養亦不能報何以故內

外諸財皆有爲法不與大恩相應故

諸佛希有 無量無邊 不可思議

大神通力 無漏無爲 諸法之王

能爲下劣

忍於斯事

取相凡夫

隨宜而說

諸佛希有至諸法之王讚盛德之至也能

爲下劣至隨宜而說感慈悲之深也以盛

德之至而曲爲劣輩忍斯本事以猶取相

凡夫隨宜而說所謂隱無量自在之力乃

以貪所樂法度脫衆生是希有重德慈悲
大恩誠不可報也

諸佛於法 得最自在

知諸衆生

種種欲樂

及其志力

隨所堪任

以無量喻

而爲說法

隨諸衆生

宿世善根

又知成熟

未成熟者

種種籌量

分別知已

於一乘道

隨宜說三

諸佛於法得最自在讚方便之德也知諸

衆生至而爲說法讚方便之力也隨諸衆

生至隨宜說三感方便之恩也世尊大恩

凡本於慈悲方便二行故上陳諸事既不

能報終則深感之而已

音釋

願 頽 諸 綠 切
切 跛 正 綠 房 切
倒 房 益 也 切
也 切 專

瘦 所 又 切
損 也 切

癩 殘 功

竈 痘 也

券 巨 卷

妙法蓮華經要解卷第七

曠八

溫陵開元蓮寺比丘 戒環 解

藥草喻品第五

此品爲中根述成領悟之意也大迦葉等

前雖領隨宜之權會歸之實而未明一音

密闡真知冥化之功如彼大雲雨於一切

草木叢林隨分受潤故佛以此喻重與述

成以顯聖人平等之慈若天地之無私由萬物之自私也故名藥草喻品三乘根性

譬諸草木覺皇道化等如一兩雨雖一味

而種有差別故根莖大小之不同法雖一

相而機有利鈍故道果證趣之各異此慈

無不等而萬物自私也草能治病名藥草

以喻人天善種三乘智因能遠害滅惡者

若四趣惡種生死業因則徒爲蕪穢非藥

草矣此譬三乘文兼樹木獨以藥草名品者爲中根述成取當機立名耳偈云聲聞緣覺聞法得果是名藥草各得增長是也若諸菩薩是名大樹非當機矣

爾時世尊告摩訶迦葉及諸大弟子善哉善哉迦葉善說如來真實功德誠如所言

迦葉領悟喻說即設大富長者之喻歎佛隱勝現劣誘諸庸鄙使得大法利又於偈未感嘆慈悲方便之大恩是善說如來真

實功德

如來復有無量無邊阿僧祇功德汝等若於無量億劫說不能盡

此明一音密闡真知冥化平等之慈尤爲無量功德雖迦葉善說而言未及此故復示之也

迦葉當知如來是諸法之王若有所說皆不虛也於一切法以智方便而演說之其所說法皆悉到於一切智地

方便爲權智地爲實於一切法以方便說而皆到智地所謂密闡也到一切智地者

契實相智境也

如來觀知一切諸法之所歸趣亦知一切衆生深心所行通達無礙又於諸法究盡明了示諸衆生一切智慧

諸法歸趣即一乘實相衆心所行即三乘性欲佛說一切法爲度一切心不知法之歸趣難以度心不知心之所行難以說法今於二者通達無礙可謂真知冥化矣而又究明諸法以開示衆生一切智慧欲令悟入皆所謂無邊僧祇功德也

迦葉譬如三千大千世界山川谿谷土地所生卉木叢林及諸藥草種類若干名色各異

大千同爲一地而有山川谿谷之高下譬一大地而有種類名色之各異譬一法性而一真境而有三界諸趣之別也卉木同生

有三乘大小之辯也衆草爲卉草之總名

也卉有叢木有林

密雲瀉布遍覆三千大千世界一時等澍其澤普洽

雲喻慈意澤喻法雨言密雲者雲不密則

曠大不能等澍慈不密則不能廣利一雲所雨

三千普洽譬一音密闡大小均被也

卉木叢林及諸藥草小根小莖小枝小葉中根中莖中枝中葉大根大莖大枝大葉諸樹大小隨上中下各有所受一雲所雨稱其種

性而得生長華葉敷實

喻真知冥化物物自遂也根莖大小總辯草木以明根機有異諸樹大小總結草木

以明一雨是同夫以一雲一雨而滋衆物稱其大小種性曾無天闕使爲花者敷爲

果者實各各自遂則佛之真知冥化若此

而已木質曰幹草質曰莖皆依根而立根譬種性莖譬發心枝葉譬所熏教理花果譬所修行果謂三乘種性發心熏習之不
同同是一音教澤之被而各有所成也

雖一地所生一雨所潤而諸草木各有差別草木皆植類樹之一地同潤之一雨同而有大小之殊者根自異也群生亦類也所賦一性所化一道而有三乘之殊者亦機

自異耳

迦葉當知如來亦復如是出現於世如大雲起以大音聲普遍世界天人阿修羅如彼大雲遍覆三千大千國土

明佛出興廣覆群有雲起無心喻無緣慈也大音聲即廣長舌相之音也天人修羅

爲三善道不言三惡道爲障重非機也

於大衆中而唱是言我是如來應供正遍知明行足善逝世間解無上士調御丈夫天人師佛世尊未度者令度未解者令解未安者令安未涅槃者令得涅槃

贊八

四

此叙佛初坐道場唱顯化跡宣度生事使知聖人出興之意也超證菩提曰度了達萬法曰解離衆結縛曰安究竟永寂曰涅槃

今世後世如實知之我是一切知者一切見

者知道者開道者說道者汝等天人阿修羅衆皆應到此爲聽法故

此示正知見欲廣開悟也今世後世如實知者以實相智了三世事如華嚴一念普觀無去來住也一切知一切見者以佛知見徹了諸法也知道者言已先知先覺也開道者能以是道開覺後人也說道者能以是道方便演說也如是唱者爲警群機故召天人使令聽受

爾時無數千萬億種衆生來至佛所而聽法

因召而集也

如來于時觀是衆生諸根利鈍精進懈怠隨其所堪而爲說法種種無量皆令歡喜快得善利

所來之衆根性不司佛各隨其所堪而化

曉八

五

之以堪人天者爲說十善堪二乘者爲說諦緣堪大乘者爲說六度以至定不定性人非人類各隨所堪而爲說法雖根有無量而皆令利喜是謂冥化

是諸衆生聞是法已現世安隱後生善處以道受樂亦得聞法既聞法已離諸障礙於諸法中任力所能漸得入道如彼大雲雨於一切卉木叢林及諸藥草如其種性具足蒙潤各得生長

明作成之利也聞法安隱者衆生汨於塵

勞二乘縛於空寂聞是法者足以滌塵勞解縛著釋然物外優遊一生此現世安隱也後生善處即聞法之報以道受樂即修道之果言以道者各隨其道受樂不同也修十善則受人天樂修諦緣即受二乘樂

修六度則受菩薩樂各以其道也離諸障

礙者惡道離業障而之人天人天離事障而入二乘二乘離理障而入菩薩各遂其才也故曰於諸法中任力所能漸得入道如彼大雲雨於一切

如來說法一相一味所謂解脫相離相滅相究竟至於一切種智其有衆生聞如來法若持讀誦如說修行所得功德不自覺知

疏闡化之功也謂如來說法方便雖多實則一相一味如一雲一雨而已解脫離相者指一相一味之體也解脫相則不縛諸法離相則不合諸塵滅相則生死永盡而究竟皆至一切種智無上道也衆生聞持而所獲功利不自覺知者一音密闡真化冥運若天地之產百嘉雨露之滋衆卉自

生自遂孰足以知之

所以者何唯有如來知此衆生種相體性念何事思何事修何事云何念云何思云何修以何法念以何法思以何法修以何法得何法衆生住於種種之地唯有如來如實見之明了無礙如彼卉木叢林諸藥草等而不自知上中下性

此明觀根逗教不拂其性故物得自遂也三乘種類性欲不同故念思修得亦各不同唯如來能知能化而彼不自知也念何事等謂或念人天事乃至聲聞菩薩事也云何念等謂或正或邪有爲無爲也以何法念等謂或以大小頓漸或以定慧覺觀也以何法得謂或以四諦得聲聞法乃至或以六度得菩薩法也如是念思所住各

各不同是謂住於種種之地如來皆能如實見之如此委曲言者明如來知根之詳也

如來知是一相一味之法所謂解脫相離相滅相究竟涅槃常寂滅相終歸於空佛知是

釋七

已觀衆生心欲而將護之是故不即爲說一切種智汝等迦葉甚爲希有能知如來隨宜說法能信能受所以者何諸佛世尊隨宜說

法難解難知牒前一相一味等文以明隨宜說法難解難知

破有法王
出現世間
隨衆生欲

種種說法

樂常寂滅相者前依正智言此依實相言其揆一也終歸於空者自解脫離滅究竟至於常寂滅相則識心緣影一切蕩盡而歸乎實相妙空非斷空也

爾時世尊欲重宣此義而說偈言

破有法王
出現世間
隨衆生欲

種種說法

此述成迦葉前讚諸佛於法得最自在知諸衆生種種欲樂隨爲說法之意也衆生失真沉妄而滯於無明生死諸有封蔀大覺出興爲說真法以破妄有以除障滯故

號破有法王

如來尊重
智慧深遠
叉默斯要

不務速說
有智若聞
則能信解

而前言究竟至一切種智此言究竟涅槃
性欲不同且將之護之不即明說故甚難
知而迦葉能信能受是爲希有此牒前文

無智疑悔
則爲永失
是故迦葉

隨力爲說 以種種緣 令得正見

頌密闡冥化平等之慈也久默不說者所

以待機也蓋有智則信無智則疑而永失

大利故用以漸導之而隨力爲說令得正

見此爲密闡等慈而迦葉言所未及

曠八

迦葉當知 譬如大雲 起於世間

遍覆一切 譬佛出興也

慧雲含潤 電光晃耀 雷聲遠震

令衆悅豫 日光掩蔽 地上清涼

穀麁垂布 如可承攬 其雨普等

四方俱下 流澍無量 率土充洽

大雲將雨則電耀雷震譬如來出興放光

說法慧雲含潤日光掩蔽者所謂慈意妙

大雲滅除煩惱焰也雲陰颯然下鍼與地

親通可以承攬譬慈意逮下俯同萬物也

其雨普等譬法利均一四方俱下譬不擇

四生率土充洽譬教被大千也

山川險谷

幽邃所生

卉木藥草

大小諸樹

百穀苗稼

甘蕉蒲萄

雨之所潤

無不豐足

乾地普洽

藥木並茂

譬群機不同而不失其應也前止言草木

此加百穀等者草木譬三乘種性特爲入

道之機未顯在鄴故加百穀等以譬有生

纖悉皆蒙潤澤也乾地譬未霑法水者悉

九皆利潤故云普洽藥木者藥草樹木也

其雲所出

一味之水

草木叢林

隨分受潤

一切諸樹

上中下等

稱其大小

各得生長

根莖枝葉

華果光色

一雨所及

皆得鮮澤

如其體相性分大小
而各滋茂佛亦如是
譬如大雲普覆一切
爲諸衆生分別演說
雖方便多門而不離實相

大聖世尊於諸天人一切衆中
而宣是言我爲如來兩足之尊
出于世間猶如大雲充潤一切
枯槁衆生皆令離苦得安隱樂
世間之樂及涅槃樂

安隱衆生故現於世爲大衆說
甘露淨法頌召集人天聽法也
其法一味解脫涅槃以一妙音
演暢斯義常爲大乘而作因緣
頌一相一味等文常爲大乘作緣者所謂
究竟至於一切種智
我觀一切普皆平等無有彼此
愛憎之心我無貪着亦無限礙
恒爲一切平等說法如爲一人
衆多亦然常演說法曾無他事
廣八
去來坐立終不疲厭充足世間
如雨普潤貴賤上下持戒毀戒
威儀具足及不具足正見邪見
利根鈍根等雨法雨而無懈倦
此皆真知冥化平等之大慈也

諸天人衆一心善聽皆應到此
觀無上尊我爲世尊無能及者

一切衆生 聞我法者 隨力所受

住於諸地

諸地如下明始於人天終於十地

或處人天 轉輪聖王

釋梵諸王

是小藥草

人天乘也輪王王四天下帝釋王忉利天

梵王王初禪天

知無漏法

能得涅槃

起六神通

及得三明

獨處山林

常行禪定

得緣覺證

是中藥草

聲聞乘也得無漏小果起六通三明乃聲

聞緣覺之同行但於中利根則得緣覺證

求世尊處

我當作佛

行精進定

是上藥草

藏教菩薩也此依權乘修菩薩行雖求佛

廣

十一

果勤行精進而未離小乘故爲上草

又諸佛子

專心佛道

常行慈悲

自知作佛

決定無疑

是名小樹

通教菩薩也此依方等教修菩薩行爲大

乘初位以根雖大而蔭未廣故爲小樹

安住神通 轉不退輪 度無量億

百千衆生

如是菩薩

名爲大樹

圓教菩薩也此依一乘修菩薩行迥出三

乘安住神通轉不退輪度億千衆則其蔭

廣矣

佛平等說

如一味雨

隨衆生性

所受不同

如彼草木

所稟各異

結上作成不同明佛至化冥同造物

佛以此喻

方便開示

種種言詞

演說一法

於佛智慧

如海一滴

指上喻說雖廣然於佛真智海中方明一滴之相耳此結顯如來阿僧祇功德說不能盡之意

我雨法雨 充滿世間 一味之法
隨力修行 如彼叢林 藥草諸樹
隨其大小 漸增茂好

此明增進之利下明增進之機

諸佛之法 常以一味 令諸世間
普得具足 漸次修行 皆得道果

此總標下別明

聲聞緣覺 處於山林 住最後身
聞法得果 是名藥草 各得增長
此依二乘之法增進者最後身者將證辟
支佛果不復人間受生也

若諸菩薩

智慧堅固

了達三界

續八

十三

求最上乘 是名小樹 而得增長

此依方等之法增進者

復有住禪 得神通力

心大歡喜 放無數光

是名大樹 而得生長

此依大乘之法增進者

如是迦葉 佛所說法

以一味雨 潤於人華

總結增進隨機不同也人華謂善根秀發

者因佛冥化各得成實

迦葉當知 以諸因緣

種種譬喻

開示佛道 是我方便

諸佛亦然

密闡冥化佛佛道同

今爲汝等 說最實事

諸聲聞衆

皆非滅度 汝等所行

是菩薩道

漸漸修學 悉當成佛

總結前說立實廢權而開後與記之文說最實事即立實也皆非滅度即廢權也修行是道悉當成佛即開後與記文也

妙法蓮華經授記品第六

曉八

十三

大迦葉等領悟喻說得佛正道當踐佛位故與說來果名授記品法華一會乃群機貞實所作已辨之時故正宗說示了無多事直則會三乘於一致開四見使悟入而一一授記印其成佛以示出興功成本願滿足之意耳然昔淨名嘗恆彌勒授一生記以正位中本無授記及得菩提而法華已入正位何滯迹耶抑有已故有記入正位者尚有已乎蓋正位中雖無授記亦不廢於授記若華嚴性海豈非正位而十住

之初妙覺之終屢聞記勦如所謂清淨心所謂殊勝境界者曷嘗無哉淨名曰說法不有亦不無以因緣故諸法生無我無造無受者善惡之業亦不亡正證之人固無已也然善惡之業豈有已之可記豈無已之可忘哉若世之貧富貴賤修短苦樂昔作而今受前召而後應懸疎網而不漏淪浩劫而莫遺者其誰與記耶今所謂記者特以助明不亡之理而引發行人耳

爾時世尊說是偈已告諸大眾唱如是言我此弟子摩訶迦葉於未來世當得奉勸三萬億諸佛世尊供養恭敬尊重讚歎廣宣諸佛無量大法於最後身得成爲佛名曰光明如來應供正遍知明行足善逝世間鮮無上士調御丈夫天人師佛世尊國名光德劫名

大莊嚴

諸授記文皆二十號之前爲因記後爲果
記諸弟子觀佛多寡之不同各隨其願緣

也事佛功用之不同各隨其才力也成佛
果號之不同各隨其因行也大迦葉因地

廣人

十四

事日月燈佛至佛滅後然燈續明以紫金
塗佛形像又於法華妙性開明故號光明
至於國名光德劫名莊嚴皆類其因行也
佛壽十二小劫正法住世二十小劫像法亦

住二十小劫

淨法界身本無出沒然於未來世而出住

十二劫而沒者隨大悲願力而示現耳正
像之法各二十劫而後滅者隨衆生機感
而墮替耳佛身法性固無加損於其間

國界嚴飾無諸穢惡瓦礫荆棘便利不淨其

土平正無有高下坑坎堆阜琉璃爲地寶樹
行列黃金爲繩以界道側散諸寶華周遍清
淨

依報所感皆由心地瓦礫荆棘雜心感也
便利不淨染心感也坑坎堆阜詣心感也

諸佛無雜染諳心故國界嚴飾無諸穢惡
唯修清淨妙行故其土平正百寶周遍淨
名曰隨其心淨則佛土淨隨其心淨則一
切功德淨此其證矣

其國菩薩無量千億諸聲聞衆亦復無數無

廣人
有魔事雖有魔及魔民皆護佛法

十五

問釋尊成佛尚煩戲剪飲光何爲獨無魔
事曰釋尊示化五濁正與衆魔共作勞侶
若無魔事不名惡世飲光成佛當善國土
故雖有魔皆護佛法

爾時世尊欲重宣此義而說偈言

告諸比丘 我以佛眼 見是迦葉

於未來世 過無數劫 當得作佛

而於來世 供養奉覲 三百萬億

諸佛世尊 爲佛智慧 淨修梵行

供養最上 二足尊已 修習一切

無上之慧 於最後身 得成爲佛

其土清淨 琉璃爲地 多諸寶樹

行列道側 金繩界道 見者歡喜

常出好香 散衆名華 種種奇妙

以爲莊嚴 其地平正 無有丘坑

諸菩薩衆 不可稱計 其心調柔

逮大神通 奉持諸佛 大乘經典

諸聲聞衆 無漏後身 法王之子

亦不可計 乃以天眼 不能數知

其佛當壽

十二小劫

正法住世

二十九劫

像法亦住

二十九劫

光明世尊

其事如是

頌應長行可明其心調柔言慈悲之至也
速大神通言應化不測也速及也大神通

者不爲而應不慮而遍異於小聖也無漏

後身即聲聞果體法王之子即大心聲聞

也

爾時大目捷連須菩提摩訶迦旃延等皆悉
悚懼一心合掌瞻仰尊顏目不雙捨即共同

喚入

聲而說偈言

法說云千二百羅漢悉亦當作佛則與記

十六

已竟於此特授迦葉上首則三聖之記不
言可諭而目連等心不自安如逢王饍未
敢便食是以悚懼而請也

大雄猛世尊 諸釋之法王

哀愍我等故

而賜佛音聲 若知我深心 見爲授記者

如以甘露洒 除熱得清涼

初四句讚謝法喻之賜其次請記求益也
如從飢國來 忽遇大王饍 心猶懷疑懼
未敢即便食 若復得王教 然後乃敢食
此設譬下自釋

我等亦如是 每惟小乘過 不知當云何
得佛無上慧 雖聞佛音聲 言我等作佛
心尚懷憂懼 如未敢便食 若蒙佛授記

爾乃快安樂

每惟小乘過所謂如從飢國來也言我等

作佛所謂忽遇大王饍也

大雄猛世尊 常欲安世間 願賜我等記
如飢須教食○結請也

廣八

十七

爾時世尊知諸大弟子心之所念告諸比丘
是須菩提於當來世奉觀三百萬億那由他
佛供養恭敬尊重讚歎常修梵行具菩薩道
於最後身得成爲佛號曰名相如來應供正
遍知明行足善逝世間解無上士調御丈夫
天人師佛世尊劫名有寶國名寶生

色心初破萬法皆空理事還源一切真實
須菩提昔有解空無名無相色心初破也
今證實果反號名相理事還源也又其生
時家物忽空今劫名有寶國名寶生亦其

義也那由他即茲數

其土平正頗梨爲地寶樹莊嚴無諸邱坑沙
礫荆棘便利之穢寶華覆地周遍清淨其土
人民皆處寶臺珍妙樓閣聲聞弟子無量無
邊等數譬喻所不能知諸菩薩衆無數千萬

億那由他佛壽十二小劫正法住世二十小劫像亦住二十小劫其佛常處虛空爲衆說法度脫無量菩薩及聲聞衆

所舉十號明正報劫國莊嚴明依報華樹臺閣皆悉寶成應劫國之名也其佛常處虛空說法者示因空悟解使由空證實也爾時世尊欲重宣此義而說偈言

諸比丘衆

今告汝等

皆當一心

聽我所說

我大弟子

須菩提者

當得作佛

號曰名相

當供無數

萬億諸佛

隨佛所行

漸具大道

最後身得

三十二相

端正殊妙

猶如寶山

其佛國土

嚴淨第一

衆生見者

無不愛樂

佛於其中

度無量衆

其佛法中

多諸菩薩

皆悉利根 轉不退輪 彼國常以
菩薩莊嚴 諸聲聞衆 不可稱數
皆得三明 具六神通 住八解脫
有大威德 神通變化 不可思議 現於無量
數如恒沙 其佛當壽 皆供合掌 諸天人民
其佛當壽 十二小劫 聽受佛語
二十小劫 像法亦住 二十小劫 聽受佛語
須菩提於靈山勝集居僧之首於般若大
慧解空第一其道德功行疑若亞聖而記
果猶當供無數佛隨佛所行而漸具大道
者爲小乘但念無相不修大行雖經多劫
不成正覺故須發菩提心具菩薩大道
然後成佛也人民合掌聽受佛語言皆雋
信樂善無薄俗也

爾時世尊復告諸比丘衆我今語汝是大迦

旃延於當來世以諸供具供養奉事八千億

佛恭敬尊重諸佛滅後各起塔廟高千由旬

縱廣正等五百由旬以金銀琉璃碑磲瑪瑙

真珠玫瑰七寶合成衆華瓔珞塗香抹香燒

廣八

十九

香繒蓋幢幡供養塔廟過是已後當復供養

二萬億佛亦復如是供養是諸佛已具菩薩

道當得作佛號曰閻浮那提金光如來應供

正遍知明行足善逝世間解無上士調御丈

夫天人師佛世尊其土平正頗梨爲地寶樹

莊嚴黃金爲繩以界道側妙華覆地周遍清

淨見者歡喜無四惡道地獄餓鬼畜生阿修

羅道多有天人諸聲聞衆及諸菩薩無量萬

億莊嚴其國佛壽十二小劫正法住世二十

小劫像法亦住二十小劫爾時世尊欲重宣

此義而說偈言

諸比丘衆

皆一心聽

如我所說

真實無異

是迦旃延

當以種種

妙好供具

供養諸佛

諸佛滅後

起七寶塔

亦以華香

供養舍利

其最後身

得佛智慧

成等正覺

國土清淨

度脫無量

萬億衆生

皆爲十方

之所供養

佛之光明

無能勝者

其佛號曰

閻浮金光

菩薩聲聞

斷一切有

無量無數

莊嚴其國

閻浮那提金紫艷無比旃延果體金色如

之由旃延論義第一理性精瑩又緣過去

勤掃佛地資成嚴淨之果也斷一切有者

理極情忘纖塵不立言其證道精徹非謂

捨有之無也

爾時世尊復告大衆我今語汝是大目捷連
當以種種供具供養八千諸佛恭敬尊重諸
佛滅後各起塔廟高千由旬縱廣正等五百
由旬以金銀琉璃碑碣瑪瑙真珠玫瑰七寶
合成衆華瓔珞塗香抹香燒香繒蓋幢幡以
用供養過是已後當復供養二百萬億諸佛
亦復如是當得成佛號曰多摩羅跋栴檀香
如來應供正遍知明行足善逝世間鮮無上
士調御丈夫天人師佛世尊劫名喜滿國名
意樂其土平正頗梨爲地寶樹莊嚴散真珠
華周遍清淨見者歡喜多諸天人菩薩聲聞
其數無量佛壽二十四小劫正法住世四十
小劫像法亦住四十九劫

多摩羅跋栴檀香清遠潛通目連神通第

一果德如之西北方佛名多摩羅跋栴檀
香神通則香喻神通明矣一由旬四十里
目連供佛起塔高千由旬者神通所建故
也諸因記行皆所以策進聲聞開廓大心
令捨空寂廣修大行以成就佛道也

爾時世尊欲重宣此義而說偈言
我此弟子 大目捷連 捨是身已
得見八千 二百萬億 諸佛世尊
爲佛道故 供養恭敬 於諸佛所
常修梵行 於無量劫 奉持佛法
諸佛滅後 起七寶塔 長表金刹
栴檀香伎樂 而以供養 諸佛塔廟
漸漸具足 菩薩道已 於意樂國
而得作佛 號多摩羅 梵禮之香
其佛壽命 二十四劫 常爲天人

噴八

三

演說佛道

聲聞無量

如恒河沙

三明六通

有大威德

菩薩無數

志固精進

於佛智慧

皆不退轉

佛滅度後

正法當住

四十九劫

像法亦爾

我諸弟子

威德具足

其數五百

皆當授記

於未來世

咸得成佛

我及汝等

宿世因緣

吾今當說

汝等善聽

長表金刹者刹具云掣多羅謂塔上覆鉢
柱爲塔之表故名表刹以金爲之其塔高
千由旬則表之長可知也目連記頌至像
法亦爾之句已終從我諸弟子威德具足
已下即許五百記及開第三周說法之端

妙法蓮華經要解卷第七終

音釋

別 括列切種觀奇撞切掣音摩
概 移時也 觀奇撞切掣義同

妙法蓮華經要解卷第八

曠九

溫陵開元蓮寺比丘

戒環 解

妙法蓮華經化城喻品第七

化城本無而權設以濟阻脩願息之人而進之令至寶所喻小果非實而權設以濟

樂小求證之人而引之令入佛慧也謂之

因緣說者由前喻說乃至藥草皆以法一而機異恐下根以爲終不可及遂生懈退於是明曩因曾化示今緣已熟勝果在近使無退墮而遂捨化城超寶所也

佛告諸比丘乃往過去無量無邊不可思議

阿僧祇劫爾時有佛名大通智勝如來應供正遍知明行足善逝世間解無上士調御丈夫天人師佛世尊其國名好城劫名大相

大通智勝者一乘實智之果佛也其智之

體囊括十虛爲大徹照塵劫爲通物無與等爲勝以迹言之則釋迦因地之宗師以理推之則衆生本源之覺體也衆生覺體本來若此但爲自迷色心之內故小而不大封滯無明之殼故礙而不通潛伏妄識之陋故劣而不勝夫能了色心之迷滯破無明之封殼則勝智現前與佛無別矣言過無量不思議劫者明此智體其來無始非情塵數量所及也

諸比丘彼佛滅度已來甚大久遠譬如三千

大千世界所有地種

將明極多之地設此爲種以出生餘地

假使有人磨以爲墨過於東方千國土乃下一點大如微塵又過千國土復下一點如是展轉盡地種墨於汝等意云何是諸國土若

筭師若筭師弟子能得邊際知其數不不也
世尊○此舉極多之地

諸比丘是人所經國土若點不點盡抹爲塵

一塵一劫○此數極多之劫

彼佛滅度已來復過是數無量無邊百千萬

曠九
億阿僧祇劫

勝智無古無今未始滅度而彼佛滅度如
是父遠者對下根迷情言之耳若吾輩者
失滅勝智迷淪已來不知過若干劫耶誠
不可以塵墨數也法說明所化之因但舉
成佛已來而不言劫數喻說則舉二萬億
佛所教化之事至此則舉塵劫因緣其對
上中下根明矣

我以如來知見力故觀彼父遠猶若今日
以衆生知見則迷淪妄計故智勝之佛隔

塵墨劫以如來知見則古今一時故觀彼
父遠猶若今日此又釋迦之大通也
爾時世尊欲重宣此義而說偈言

我念過去世 無量無邊劫 有佛兩足尊
名大通智勝 如人以力磨 三千大千土
盡此諸地種 皆悉以爲墨 過於千國土
乃下一塵點 如是展轉點 盡此諸塵墨

如是諸國土 點與不點等 復盡抹爲塵
一塵爲一劫 此諸微塵數 其劫復過是
彼佛滅度來 如是無量劫 如來無礙智
知彼佛滅度 及聲聞菩薩 曠九 三 如見今滅度
諸比丘當知 佛智淨微妙 無漏無所礙
通達無量劫

頌大通本始及示釋迦宿智之明達也知
彼佛滅度者所謂猶若今日也及聲聞菩

薩如見今滅度者亦知彼衆滅度之事如今見也佛智淨微妙通達無量劫者須釋迦之大通也勑諸比丘使知者將說宿世因緣使信如來明見無錯謬也

佛告諸比丘大通智勝佛壽五百四十萬億那由他劫

法身慧命其來無始則五百萬億垓劫猶爲應緣之壽不足多也

其佛本坐道場破魔軍已垂得阿耨多羅三藐三菩提而諸佛法不現在前如是一小劫乃至十小劫結跏趺坐身心不動而諸佛法猶不在前

所謂佛法者一乘實智佛知見也上根頓悟即成佛道下根障重必假漸修今大通經十小劫猶不現前乃應下根示現而已

蓋下根因十使煩惱惑障失滅勝智甚大久遠勢須積行次第斷治故言自一小劫至十小劫斷盡惑障智乃現前所以大通應機若此故王子讚曰爲度衆生故於無量億歲爾乃得成佛此應機示現明矣爾時忉利諸天先爲彼佛於菩提樹下敷師子座高一由旬佛於此坐當得阿耨多羅三藐三菩提

叙大通將坐道場諸天設座請佛也或謂本坐道場佛法不現移坐於此即得菩提釋曰表遣迹忘緣然後契道然下云適坐此座滿十小劫殆非移坐即得

適坐此座時諸梵天王雨衆天華面百由旬香風時來吹去萎華更雨新者如是不絕滿十小劫供養於佛乃至滅度常雨此華四王

諸天爲供養佛常擊天鼓其餘諸天作天伎樂滿十小劫至於滅度亦復如是

適坐初坐也初坐而雨華作樂乃至滅度

亦復如是言諸天欽向之至也

諸比丘大通智勝佛過十小劫諸佛之法乃

現在前成阿耨多羅三藐三菩提

表十使惑盡勝智圓現成最正覺

其佛未出家時有十六子其第一者名曰智積

諸佛應迹本爲表法燈明未出家有八子

大通未出家有十六子皆表在經八識前

對上根正而不邪故唯八而已此對下根邪正兼混故有十六一名智積者由智有所積故爲在經之識若運而無積斯爲大通勝智矣燈明之子一名有意亦有積之

義

諸子各有種種珍異既好之具聞父得成阿耨多羅三藐三菩提皆捨所珍往詣佛所諸母涕泣而隨送之

燈明之子止言領四天下表上根唯四大

爲累而已智勝之子言各有種種玩好者表上根有種種欲深心所著之積捨珍詣佛者以其有積則未能大通能捨欲著乃證通智也王子所養之母不一故言諸母涕泣而隨以愛難遽捨也

其祖轉輪聖王與一百大臣及餘百千萬億人民皆共圍繞隨至道場咸欲親近大通智勝如來供養恭敬尊重讚歎到已頭面禮足繞佛畢已

輪王即大通之父於智積爲祖

一心合掌瞻仰世尊以偈頌曰

大威德世尊 爲度衆生故 於無量億歲
爾乃得成佛 諸願已具足 善哉吉無上
久乃成佛待度生之願滿也善吉無上讚
吉祥之道尊也

世尊甚希有 一坐十小劫 身體及手足
靜然安不動 其心常憺怕 未曾有散亂
究竟永寂滅 安住無漏法
安憺不亂定圓也究竟無漏慧圓也

今者見世尊 安隱成佛道 我等得善利
稱慶大歡喜 衆生常苦惱 盲瞑無導師
不識苦盡道 不知求解脫 長夜增惡趣
減損諸天衆 從暝入於暝 永不聞佛名
得善利者將除苦盲識苦盡道知求解脫
也盲言內無慧目暝言外無慧日也苦盡

道即所謂說諸盡苦道示之以涅槃乃初
心之利

今佛得最上 安隱無漏道 我等及大人
爲得最大利 是故咸稽首 歸命無上尊
○結慶也

爾時十六王子偈讚佛已勸請世尊轉於法
輪咸作是言世尊說法多所安隱憐愍饒益
諸天人民重說偈言

法輪取運濟無滯也

世雄無等倫 百福自莊嚴 得無上智慧
願爲世間說 度脫於我等 及諸衆生類
爲分別顯示 令得是智慧 若我等得佛
衆生亦復然 世尊知衆生 深心之所念
亦知所行道 又知智慧力 欲樂及修福
宿命所行業 世尊悉知已 當轉無上輪

初四句頌德請法從度說於我等至衆生亦復然即希慕法利也從世尊知衆生至當轉無上輪願應機而說也所念所行言向道之機智力福力言受道之質宿命行業言得道之因各有小大淺深佛悉知見

故當應機也

曠九

七

佛告諸比丘大通智勝佛得阿耨多羅三藐

三菩提時十方各五百萬億諸佛世界六種震動其國中間幽暝之處日月威光所不能照而皆大明其中衆生各得相見咸作是言

此中云何忽生衆生

衆生以無明固結感地大礙而不通障蔽妙明故諸佛得道皆動地放光示翻破無明顯發智光也其國中間幽暝之處即所謂鐵圍兩山黑暗之間也其中衆生昔處

幽暝各不相見因明乃見故疑忽生也夫人以五蘊衆相和合有生而封蔀無明誠非日月威光所能照燭及乎勝智開明乃知衆生之相從茫蕩間忽然幻有亦若是矣

又其國界諸天宮殿乃至梵宮六種震動大光普照遍滿世界勝諸天光

諸天雖有常光不及佛光佛光大明感動十方各尋光詣佛獻供請法復有四科

爾時東方五百萬億諸國工中梵天宮殿光

明照耀倍於常明諸梵天王各作是念今者宮殿光明昔所未有以何因緣而現此相是時諸梵天王即各相詣共議此事時彼衆中有一大梵天王名救一切爲諸梵衆而說偈言

我等諸宮殿 光明昔未有 此是何因緣

宣各共求之 爲大德天生 爲佛出世間

而此大光明 遍照於十方

諸天有大威德者將生則祥光先見名大

德天

九

爾時五百萬億國土諸梵天王與宮殿俱各以衣祇盛諸天華共詣西方推尋是相見大通智勝如來處於道場菩提樹下坐師子座諸天龍王乾闥婆緊那羅摩睺羅伽人非人等恭敬圍繞及見十六王子請佛轉法輪

諸天有隨身宮殿故云與宮殿俱

即時諸梵天王頭面禮佛繞百千匝即以天

華而散佛上其所散華如須彌山并以供養佛菩提樹其菩提樹高十由旬華供養已各以宮殿奉上彼佛而作是言唯見哀愍饒益

我等所獻宮殿願垂納處

以華散佛所以尊師并以供樹所以重道華如須彌山樹高十由旬皆佛報身之量感變也譬龍王降雨洪注十方豈彼水之

能多所變在龍而已

時諸梵天王即於佛前一心同聲以偈頌曰

世尊甚希有 難可得值遇 具無量功德能救護一切 天人之大師 哀愍於世間

十方諸衆生 普皆蒙饒益 我等所從來

五百萬億國 捨深禪定樂 爲供養佛故

我等先世福 宮殿甚嚴飾 今以奉世尊

唯願哀納受

九

九

具無量功德能救護一切讚所蘊也十方

諸衆生普皆蒙饒益讚所利也我等所從

來等陳遠慕也我等先世福等伸投獻也

爾時諸梵天王偈讚佛已各作是言唯願世尊轉於法輪度脫衆生開涅槃道時諸梵天王一心同聲而說偈言
世雄兩足尊 唯願演說法 以大慈悲力度苦惱衆生

涅槃道即脫生死輪迴之妙道也

爾時大通智勝如來嘿然許之
佛知時未至受請嘿然坐

又諸比丘東南方五百萬億國土諸大梵王各自見宮殿光明照耀昔所未有歡喜踊躍生希有心即各相詣共議此事時彼衆中有一大梵天王名曰大悲爲諸梵衆而說偈曰
是事何因緣 而現如此相 我等諸宮殿光明昔未有 爲大德天生 爲佛出世間未曾見此相 當共一心求 過千萬億土

尋光共推之 多是佛出世 度脫苦衆生
爾時五百萬億諸梵天王與宮殿俱各以衣械盛諸天華共詣西北方推尋是相見大通智勝如來處於道場菩提樹下坐師子座諸天龍王乾闥婆緊那羅摩睺羅伽人非人等恭敬圍繞及見十六王子請佛轉法輪

時諸梵天王頭面禮佛遶百千匝即以天華而散佛上所散之華如須彌山并以供養佛菩提樹華供養已各以宮殿奉上彼佛而作是言唯見哀愍饒益我等所獻宮殿願垂納受爾時諸梵天王即於佛前一心同聲以偈頌曰

聖主天中王 迦陵頻迦聲 哀愍衆生者我等今敬禮 世尊甚希有 久遠乃一現一百八十劫 空過無有佛 三惡道充滿

諸天衆減少 今佛出於世 爲衆生作眼

世間所歸趣 救護於一切 爲衆生之父

哀愍饒益者 我等宿福慶 今得值世尊

迦陵頻伽云好音鳥其聲清和感悅譬佛

法音此天云百八十劫空過無佛南天云

百三十劫乃得一見上天云昔無量劫空過無佛如此不同者信知佛身無所不在無時不現但隨緣所感故有延促生滅之見耳爲衆生眼者開惡道昏迷也爲衆生父者作世間歸趣也

爾時諸梵天王偈讚佛已各作是言唯願世尊哀愍一切轉於法輪度脫衆生時諸梵天王一心同聲而說偈言

大聖轉法輪 顯示諸法相 度苦惱衆生

令得大歡喜 衆生聞此法 得道若生天

諸惡道減少 忍善者增益

度苦惱衆生令得大歡喜者失真沉妄故苦脫粘解縛故喜得道若生天者上或深造得道下或獲福生天忍善者勉力爲善也

爾時大通智勝如來嘿然許之

又諸比丘南方五百萬億國土諸大梵王各自見宮殿光明照耀昔所未有歡喜踊躍生希有心即各相詣共議此事以何因緣我等宮殿有此光曜而彼衆中有一大梵天王名曰妙法爲諸梵衆而說偈言

我等諸宮殿 光明甚威曜 此非無因緣是相宜求之 過於百千劫 未曾見是相爲大德天生 爲佛出世間

爾時五百萬億諸梵天王與宮殿俱各以衣

械盛諸天華共詣北方推尋是相見大通智
勝如來處於道場菩提樹下坐師子座諸天
龍王乾闥婆緊那羅摩睺羅伽人非人等恭
敬圍繞及見十六王子請佛轉法輪

時諸梵天王頭面禮佛遶百千匝即以天華
而散佛上所散之華如須彌山并以供養佛
菩提樹華供養已各以宮殿奉上彼佛而作
是言唯見哀愍饒益我等所獻宮殿願垂納
受爾時諸梵天王即於佛前一心同聲以偈
頌曰

世尊甚難見 破諸煩惱者 過百三十劫
今乃得一見 諸飢渴衆生 以法雨充滿
普所未曾見 無量智慧者 如優曇鉢華
今日乃值遇 我等諸宮殿 蒙光故嚴飾
世尊大慈愍 唯願垂納受

爾時諸梵天王偈讚佛已各作是言唯願世
尊轉於法輪令一切世間諸天魔梵沙門婆
羅門皆獲安隱而得度脫時諸梵天王一心
同聲以偈頌曰

唯願天人尊 轉無上法輪 擊於大法鼓
而吹大法螺 普雨大法雨 度無量衆生
我等咸歸請 當演深遠音

鼓螺雨皆譬大法能號令警衆利澤群物
爾時大通智勝如來嘿然許之西南方乃至
下方亦復如是

爾時上方五百萬億國土諸大梵王皆悉自
觀所止宮殿光明威曜昔所未有歡喜踊躍
生希有心即各相詣共議此事以何因緣我
等宮殿有斯光明時彼衆中有一大梵天王
名曰尸棄爲諸梵衆而說偈言

今以何因緣 我等諸宮殿 威德光明曜
嚴飾未曾有 如是之妙相 音所未聞見
爲大德天生 爲佛出世間

爾時五百萬億諸梵天王與宮殿俱各以衣
械盛諸天華共詣下方推尋是相見大通智
觀音

勝如來處於道場菩提樹下坐師子座諸天
龍王乾闥婆緊那羅摩睺羅伽人非人等恭
敬圍繞及見十六主子請佛轉法輪
時諸梵天王頭面禮佛遶百千匝即以大華
而散佛上所散之華如須彌山并以供養佛
菩提樹華供養已各以宮殿奉上彼佛而作
是言唯見哀愍饒益我等所獻宮殿願垂納
處時諸梵天王即於佛前一心同聲以偈頌
曰

善哉見諸佛 救世之聖尊 能於三界獄

勉出諸衆生 普智天人尊 哀愍群萌類
能開甘露門 廣度於一切 於昔無量劫
空過無有佛 世尊未出時 十方常闍暝
三惡道增長 阿修羅亦盛 諸天衆轉滅
死多墮惡道 不從佛聞法 常行不善事
色力及智慧 斯等皆減少 罪業因緣故
失樂及樂想 住於邪見法 不識善儀則
不蒙佛所化 當墮於惡道 佛爲世間眼
久遠時乃出 哀愍諸衆生 故現於世間
超出成正覺 我等甚欣慶 及餘一切衆
喜嘆未曾有 我等諸宮殿 蒙光故嚴飾
今以奉世尊 唯垂哀納受 願以此功德
普及於一切 我等與衆生 皆共成佛道
菩薩哉見諸佛者此天過無量劫乃得一見
故稱善自慶也前謂三界爲火宅者以衆

苦逼切爲名此謂三界爲獄者以業累繫

滯爲名言救世勉懲讚悲願也言普智廣

度讚智力也十方暗暝者無大智光明故

由無智光則三惡增長天衆轉減不從佛

聞法等者佛法能善性澄神外資色力內

資智慧爲善業因緣能致樂事能生樂想

由其不聞故反之也樂想者厭苦想樂也

末後一偈爲廣大回向

爾時五百萬億諸梵天王偈讚佛已各白佛

言唯願世尊轉於法輪多所安隱多所度脫

時諸梵天王而說偈言

世尊轉法輪 擊甘露法鼓

度苦惱衆生

開示涅槃道 唯願受我請

以大微妙音

哀愍而敷演 無量劫習法

前言甘露門此言甘露鼓皆取其能除苦

惱惟門言悟入鼓言警發

爾時大通智勝如來受十方諸梵天王及十

六五子請即時三轉十二行法輪

三轉者示相轉勸修轉作證轉令人見修

無學三位也示相者示四諦之行相使知

向方即見道位也勸修者示四諦之功利

便知修行即修道位也作證者示我已證

汝亦應證即無學位也又三轉者泛應三

根若下根須三中根可二上根唯一若上

上根則目擊道存不容聲矣有所謂十二

轉

五

教法輪有所謂十二行法輪教爲能轉行

爲所轉依示勸證三轉四諦即十二教法

輪也依見修學三悟四諦即十二行法輪

也舊謂於一轉中令聞法者發生真聖慧

眼及智明覺三轉各四爲十二行亦不離

見修無學也

若沙門婆羅門若天魔梵及餘世間所不能轉

謂此等未能正證則雖轉唯滯言詮

謂是苦是苦集是苦滅是苦滅道

示所轉之相即四諦法也皆謂之苦者四諦因苦而設爲滅苦之道故也生老病死等八現前逼惱曰苦煩惱結業召致未來八苦曰集此通三世謂過去集致現在苦現在集致未來苦也結業盡則生死八苦永盡曰滅治結業則修三十七道品曰道三十七品見淨藏淨眼文

及廣說十二因緣法無明緣行行緣識識緣名色名色緣六入六入緣觸觸緣受受緣愛愛緣取取緣有有緣生生緣老死憂悲苦惱

無明滅則行滅行滅則識滅識滅則名色滅名色滅則六入滅六入滅則觸滅觸滅則受受滅則愛滅愛滅則取滅取滅則有滅有滅則生滅生滅則老死憂悲苦惱滅

廣四諦說十二緣也自無明緣行至生緣老死等示生起相即廣苦集二諦而說也

自無明滅至憂悲苦惱滅示修斷相即廣滅道二諦而說也四諦爲下根聊陳麓相所在跡十二緣爲中根細觀四諦所本在心謂性智本明妙湛精了由妄塵瞥起

契

六

俄然晦昧名無明於無明體一念初動名行晦昧搖動則失彼精了粘湛發知故轉智名識十二緣中此三爲根本餘九爲支末相因以成三世之緣耳智本無知由識故知形爲妄心謂之名乃六賊之主也性

本無生由識故生形爲幻質謂之色即四陰之依也則名色者識初托胎凝滑之相也由凝滑而具六根名六入根成出胎根與境交名觸領納前境名受有所受故愛心生而愛斯取之由愛取故惑業相結善惡有狀名有由諸有結爲三界之生因名生有生則老死苦惱隨之矣此生起之相也將欲滅之以何爲要耶當知彼無明者非實有體初一心源廓然妙湛由知見立知妄塵瞥起故有無明若知見無見則智性真淨復還妙湛洞徹精了名無明滅則自行已下莫不皆滅蓋本既不存末無所附此修斷之相也夫四諦十二緣名一而義多有所謂小乘生滅四諦則依分段生死名苦煩惱及業名集擇滅名滅生空智

曉元

品名道有所謂大乘無作四諦則依變易生死名苦所知障名集無住涅槃名滅法空智品名道或曰八諦即合上言之又有無量四諦則依一乘圓頓而說即諸苦集明第一義外求滅道了無所得是謂四聖諦也十二緣亦如之故諦緣之法雖屬二乘實通大乘其要皆爲斷生死本滅無明因使復還本明妙性而已凡爲道看教當深明乎此

佛於天人大衆之中說是法時六百萬億那由他人以不受一切法故而於諸漏心得解脫皆得深妙禪定三明六通具八解脫

此於初會聞法獲益之利根也不受一切法者悟諦緣空了無所着也蓋心本解脫有受故累性本明定有着故昏是以不受

一切法故遂於諸漏心得解脫又得禪定

三明六通然則聖凡一體迷悟同源人者

苟能悟患累之由達泊昏之始果亦於法

不受則禪定解脫六通三明皆可得矣

第二第三第四說法時千萬億恒河沙那由他等衆生亦以不受一切法故而於諸漏心得解脫從是已後諸聲聞衆無量無邊不可稱數

此於次第聞法獲益中下之根也利根一聞悟中下多聞少悟故至於第三第四時乃獲益也從是已後非一席說又有小根獲益其數不計○此正叙請說法華也然前所請皆願轉無上輪而大通止說諦緣之法又待此請者諸佛說法皆自漸之

頓藉權顯實蓋導之無漸則駭而不信非

惟教不陵節亦欲學不躐等故也

爾時十六王子皆以童子出家而作沙彌諸根通利智慧明了已曾供養百千萬億諸佛

淨修梵行求阿耨多羅三藐三菩提

十六王子聞法獲益於是出家復求大乘俱白佛言世尊是諸無量千萬億大德聲聞皆已成就世尊亦當爲我等說阿耨多羅三藐三菩提法我等聞已皆共修學世尊我等志願如來知見深心所念佛自證知

皆已成就謂已成就大志故請說大法我等志願下自陳大志望說大法也如來知見即所謂一大事也

爾時轉輪聖王所將衆中八萬億人見十六王子出家亦求出家王即聽許

爾時彼佛受沙彌請過二萬劫已乃於四衆

之中說是大乘經名妙法蓮華教菩薩法佛所護念

過二萬劫乃久嘿斯要以待機也則二萬

劫前且說方等般若之教偈云說六波羅密及諸神通事是也釋迦現壽八十而四十年說般若等教大通現壽五百萬億那由他劫則宜於二萬劫說也

說是經已十六沙彌爲阿耨多羅三藐三菩提故皆共受持諷誦通利

欣樂大法敬奉宣明

說是經時十六菩薩沙彌皆悉信受聲聞衆中亦有信解其餘衆生千萬億種皆生疑惑菩薩必信聲聞或信衆生不信所謂上士聞道勤而行之中士聞道若存若亡下士聞道大笑而已

佛說是經於八千劫未曾休廢說此經已即入靜室住於禪定八萬四千劫

未曾休廢者所謂熾然說無間說也

是時十六菩薩沙彌知佛入室寂然禪定各陞法座亦於八萬四千劫爲四部衆廣說分別妙法華經一一皆度六百萬億那由他恒河沙等衆生示教利喜令發阿耨多羅三藐

三菩提心

爲疑惑之衆曲講也十六王子表在經八識十六菩薩表出纏八智然有十六者示

以八正伏八邪也於八萬劫各度多衆者表既得大通之道則八萬法門無所不通故非唯八正爲妙智雖八邪亦妙智也非唯八正之能度雖八邪亦能度也所謂聖性無不通逆順皆方便唯其如此故各能

演妙至於窮劫各能度衆至於恒沙不如
是不足爲大通之道

大通智勝佛過八萬四千劫已從三昧起往
詣法座安詳而坐普告大衆是十六菩薩沙
彌甚爲希有諸根通利智慧明了已曾供養
瞻
無量千萬億數諸佛於諸佛所常修梵行受
持佛智開示衆生令入其中汝等皆當數數
于
親近而供養之

可其所說讚其德行使衆親附也

所以者何若聲聞辟支佛及諸菩薩能信是
十六菩薩所說經法受持不毀者是人皆當
得阿耨多羅三藐三菩提如來智慧

三乘得妙則同歸一乘

妙法蓮華經要解卷第八終

音釋

憺徒敢切安
也靜也
瞑莫因切芒
莫因良
蕩七弗切蕩
七弗也
土瓜也

妙法蓮華經要解卷第九

曠十

溫陵開元蓮寺比丘 戒環 解

佛告諸比丘是十六菩薩常樂說是妙法華經一一菩薩所化六百萬億那由他恒河沙等衆生世世所生與菩薩俱從其聞法悉皆信解以此因緣得值四萬億諸佛世尊于今不盡

徵昔所化會今之緣也所化之衆常與師俱者爲化緣深故以是得值億萬多佛其緣未盡今復相值

諸比丘我今語汝彼佛弟子十六沙彌今皆得阿耨多羅三藐三菩提於十方國土現在說法有無量百千萬億菩薩聲聞以爲眷屬其二沙彌東方作佛一名阿閦在歡喜國二名須彌頂

陳十六王子成佛名迹也天地設位道運乎其中聖人法之以開物成務冒天下之道故八方之佛各依一方而示一德所以開物所以成務原始要終則天下之道無不冒矣東方震爲動歡喜亦動也阿閦云無動須彌頂又無動之極也經云燄譽不動如須彌此佛出應群動而其體無動又在動國示即動而靜也二佛並化其德相資故雖二名可以合釋或曰八卦乃中夏之書引配竺教豈佛意耶李長者用釋華嚴呂觀文用釋此章或者非之子復蹈襲何也曰竺夏一天下耳壇畿所及方位所同而卦乃天地自然之理獨不同哉伏羲畫之以示人吾佛象之以設法各默得其同耳今經雖無八卦之文顯有八方之象

借事明理烏乎不可而必拘墟詆皆非達士也昔五百應真各解佛言而問誰當佛意佛言皆非我意衆曰不當佛意將無得非佛言雖非我意各順正理堪爲聖教有福無罪吾唯守此以當或者之非

廣十

東南方二佛一名師子音二名師子相

東南巽爲柔順師子音者所說無畏師子相者所示無畏此佛以慈柔應物以無畏

說法

南方二佛一名虛空住二名常滅

南方離爲虛明虛空住者體至虛以應群實也常滅者了一切法當體虛凝即寂滅相不復更滅是謂常滅

西南方二佛一名帝相二名梵相

西南坤爲資生帝相者神出而應物爲帝

西方兌爲毀折阿彌陀云無量壽世間苦惱西方二佛一名阿彌陀二名度一切世間苦惱

西方兌爲毀折阿彌陀云無量壽世間苦

惱即生死無常也此佛於毀折之際示無量壽則了無生死以救度世間生死苦惱西北方二佛一名多摩羅跋栴檀香神通二名須彌相

西北乾爲剛健多摩羅栴檀香清遠潛通

以比神通須彌相亦無動義此佛神通應物如乾道不息寂然不動感而遂通

北方二佛一名雲自在二名雲自在王

北方坎爲陰陷雲自在謂無心而利物雲自在王又自在之至也此佛以無緣慈覆

陰利澤險難衆生而無心無着如雲之自在

東北方佛名壞一切世間怖畏

東北艮爲萬物成始成終之所始終之理
在物爲成壞在人爲生死乃世間之所怖
畏也此佛於生死畏中以一真凝常之道
開覺群物使達其無始無終而入於不死
不生則世間怖畏壞滅矣

第十六我釋迦牟尼佛於娑婆國土成阿耨 多羅三藐三菩提

釋迦牟尼云能仁寂默謂其德仁濟群類
其道寂默無爲以示化堪忍故號能仁此
繼東北方而特標者大覺雖具成始成終
之德而其道圓應不滯方隅無始無終爲
衆德之總故也蓋自無動而出應群動能

柔能剛說示無畏虛已應物現壽運神乃至濟險滅怖無非釋迦隨宜之行故歷言八方佛德而以釋迦總之斯乃範圍天地曲成萬物無方無體之至德也非成無上正道何以與此故曰釋迦牟尼於娑婆國成阿耨菩提

諸比丘我等爲沙彌時各各教化無量百千萬億恒河沙等衆生從我聞法爲阿耨多羅三藐三菩提此諸衆生于今有住聲聞地者我常教化阿耨多羅三藐三菩提是諸人等

應以是法漸入佛道

佛子

四

明昔因今緣使知功行已深而成就之也
舉爲沙彌所化明昔因也于今所化明今
緣也應以是法漸入佛道即成就之也
所以者何如來智慧難信難解

釋上既曠劫蒙教今猶漸入者以如來智慧難信解故然衆生莫不有如來智慧而難解若此者塵習自障故也以今人觀之

幸聞正法不無宿因安知吾徒非智勝之遺塵非未來之弟子然緣障尚稠道果渺邈即曠劫蒙教今猶漸入者也若能勤進猶可庶幾設復退墮又安知未來之期比前塵劫不復過於是數耶然則所謂難解者非佛智之難機自難耳

爾時所化無量恒河沙等衆生者汝等諸比丘及我滅度後未來世中聲聞弟子是以上明蒙化之因此指所化之人
我滅度後復有弟子不聞是經不知不覺菩薩所行自於所得功德生滅度想當入涅槃我於餘國作佛更有異名是人雖生滅度之

想入於涅槃而於彼土求佛智慧得聞是經唯以佛乘而得滅度更無餘乘除諸如來方便說法

上云未來聲聞謂曾蒙化者此云復有弟子言未蒙化者其因緣展轉終當遇佛而依一乘得度也餘國作佛者示滅於此而應緣於彼也更有異名者華嚴云如來名迹應衆生心各各不同於一四天下乃至十方各各十千是也

諸比丘若如來自知涅槃時到衆又清淨信解堅固了達空法深入禪定便集諸菩薩及聲聞衆爲說是經世間無有二乘而得滅度唯一佛乘得滅度耳

前明始權此會終實也涅槃時到言化緣將畢衆又清淨言根機已熟衆清淨者已

於藏教斷惑除結也信堅固者已於通新
心相體信也了達空法謂已悟般若深入
禪定謂妙造玄源如此則諸病已除醫方
亦遣故廢二權特明一實得滅度者得真
常道果也

比丘當知如來方便深入衆生之性知其志
樂小法深着五欲爲是等故說於涅槃是人
若聞則便信受

爲樂小者權說小果彼便信受如滯化城
譬如五百由旬險難惡道曠絕無人怖畏之
處

譬諸生死煩惱惡道險難長遠也五百由
旬舊說尤多今取二乘斷三界結惑離分
段生死證有餘涅槃是過三百由旬而至
化城然尚滯變易生死若回心向大進至

七地斷盡習氣是過四百由旬近於寶所
又進八地已上斷盡無明離變易生死證
無餘涅槃是過五百由旬到寶所也曠絕
無人等譬生死長遠無真知見妄起怖畏
若有多衆欲過此道至珍寶處

譬三乘求佛

有一導師聰慧明達善知險道通塞之相將
道衆人欲過此難

導師指津之人譬釋尊也通斯進之塞斯
止之通譬斷惑塞譬起障又善則通惡則

塞乃可無難

所將人衆中路懈退白導師言我等疲極而
復怖畏不能復進前路猶遠今欲退還

譬二乘求道難進易退

導師多諸方便而作是念此等可愍云何捨

大珍寶而欲退還作是念已以方便力於險

道中過三百由旬化作一城告衆人言汝等勿怖莫得退還今此大城可於中止隨意所作若入是城快得安隱若能前至寶所亦可得去

譬因二乘斷三界結惑後息以小果而進之智地也隨意所作即任力所能漸得入道之義

是時疲極之衆心大歡喜嘆未曾有我等今者免斯惡道快得安隱

稱願息之心故也

於是衆人前入化城生已度想生安隱想

樂小忘大

爾時導師知此人衆既得止息無復疲倦即滅化城語衆人言汝等去來寶處在近向者

大城我所化作爲止息耳

化非真有故斯須即滅唯寶所爲真權非實有故終竟而廢唯一乘爲實

諸比丘如來亦復如是今爲汝等作大導師

知諸生死煩惱惡道險難長遠應去應度若衆生但聞一佛乘者則不欲見佛不欲親近便作是念佛道長遠久受勤苦乃可得成

若但聞一乘而無權濟則厭大而不欲見

佛憚煩而憂其道遠故須權濟也上言惡道長遠此言佛道長遠者上以正見觀衆

生此以倒見觀佛道故也佛道初不遠人本無修證特由生死背馳復之之難故見其長遠惑業積障治之之難故見其勤苦則長遠勤苦由倒妄起何關於道哉苟無生死無惑業則當體凝淨何復何治長遠

之見勤苦之功了無所施矣昧者不知出此而致咎佛道遂生懈退大覺所以叙其倒見而誘進之

佛知是心怯弱下劣以方便力而於中道爲止息故說二涅槃

中道即大小乘之中間也二涅槃即二乘涅槃下云二地是也

若衆生住於二地如來爾時即便爲說汝等所作未辦汝所住地近於佛慧當觀察籌量所得涅槃非真實也但是如來方便之力於一佛乘分別說三如彼導師爲止息故化作大城既知息已而告之言寶處在近此城非實我化作耳

住於二地謂滯二乘權果而不知進故語之佛慧令觀察籌量而進取實果也

爾時世尊欲重宣此義而說偈言

大通智勝佛 十劫坐道場 佛法不現前

不得成佛道 諸天神龍王 阿修羅衆等

常雨於天華 以供養彼佛 諸天擊天鼓
并作衆技樂 香風吹萎華 更雨新好者

過十小劫已 乃得成佛道 諸天及世人
心皆懷踊躍 彼佛十六子 皆與其眷屬
千萬億圍邊 俱行至佛所 頭面禮佛足
而請轉法輪 聖師子法雨 充我及一切
世尊甚難值 約遠時一現 爲覺悟群生
震動於一切

聖師子者讚聖力無畏也世尊難值已下

頌出世本懷而請法

東方諸世界 五百萬億國 梵宮殿光曜
昔所未曾有 諸梵見此相 尋來至佛所

散華以供養，并奉上宮殿。請佛轉法輪。
以偈而讚歎。佛知時未至。受請默然坐。
三方及四維。上下亦復爾。散華奉宮殿。
請佛轉法輪。世尊甚難值。願以本慈悲。
廣開甘露門。轉無上法輪。無量慧世尊。
受彼衆人請。爲宣種種法。四諦十二緣。
無明至老死。皆從生緣有。如是衆過患。
汝等應當知。無明至老死。舉十二因緣也。皆從生緣。
明無生即無衆過患也。

宣暢是法時。六百萬億垓。得盡諸苦際。
皆成阿羅漢。

頌初會聞法獲益之利根也。風俗通云十
萬曰億。十億曰兆。十兆曰京。十京曰秭。十
秭曰垓。垓爲總大之數。即所謂那由他也。
知童子心。即前云深心。所念佛自證知也。
說大波羅密等。即前云過二萬劫之事也。

第二說法時。于萬恒沙衆。於諸法不受
亦得阿羅漢。從是後得道。其數無有量。
萬億劫算數。不能得其邊。頌次第獲益中下之根。
時十六王子。出家作沙彌。皆共請彼佛。
演說大乘法。我等及營從。皆當成佛道。
願得如世尊。慧眼第一淨。

小乘慧眼未免線影。求其第一清淨無如
世尊故。願得之。

佛知童子心。宿世之所行。以無量因緣。
種種諸譬喻。^{第七}說六波羅密。及諸神通事。
分別真實法。菩薩所行道。說是法華經。
如恒河沙偈。

六波羅密即般若教諸神通事即方等教
且分別實法爲大乘之始而已過是已後
乃說法華然有如恒沙偈者妙法應機廣
略不同故釋迦則一期而說燈明八十劫
說大通八千劫說今經止於二十八品常
不輕於威音則聞二十千萬億偈喜見於
日月淨明德則聞八百萬億阿閦婆偈蓋
各隨其緣之賒促根之廣狹故說有豐約
其實稱性之法無所終窮是以華嚴有三
部之文而一字法門書海墨而不盡則恒
沙之偈不爲多也

彼佛說經已 靜室入禪定 一心一處坐
八萬四千劫 是諸沙彌等 知佛禪未出
爲無量億衆 說佛無上慧 各各坐法座
說是大乘經 於佛宴寂後 宣揚助法化

一一沙彌等 所度諸衆生 有六百萬億
恒河沙等衆 彼佛滅度後 是諸聞法者
在在諸佛土 常與師俱生
因法華緣世世相值
是十六沙彌 且足行佛道 今現在十方
各得成正覺 爾時聞法者 各在諸佛所
其有住聲聞 漸教以佛道 我在十六數
曾亦爲汝說 是故以方便 引汝趣佛慧
明遠緣深功而成就之也
以是本因緣 今說法華經 令汝入佛道
慎勿懷驚懼 譬如險惡道 迦絕多毒獸
又復無水草 人所怖畏處 無數千萬衆
欲過此險道 其路甚曠遠 經五百由旬
毒獸譬生死煩惱水草譬苦提資糧
時有一導師 強識有智慧 明了心決定

在險濟衆難 衆人皆疲倦 而白導師言
我等今頃乏 於此欲退還 導師作是念
此輩甚可憐 如何欲退還 而失大珍寶
尋時思方便 當設神通力 化作大城郭
莊嚴諸舍宅 周匝有園林 渠流及浴池

重門高樓閣 男女皆充滿 即作是化已
懸衆言勿懼 汝等入此城 各可隨所樂
前止云化作一城即通譬道果此又云郭
及舍宅男女等者詳譬果中德用也國邑
有城重城爲郭城以郭爲防果以德爲輔
舍宅譬依止之德以畢竟空寂爲莊嚴園
林譬庇賴之德以無漏法樹爲周匝浴池
譬潔淨之德以八解定水爲渠流樓閣譬
超達之德以空無相無作爲重門男女充
滿即所謂善心誠實男慈悲心爲女也然

此譬二乘果德而有似大乘之德者乃以
似量權進之耳故總依化城爲言及乎即
滅化城則此等皆滅譬二乘之德曾無實
證終歸壞滅也世之學者以比智知道以
似量見性緣無實證亦若是矣

諸人既入城 心皆大歡喜 皆生安隱想
自謂已得度 導師知息已 集衆而告言
汝等當前進 此是化城耳 我見汝疲極
中路欲退還 故以方便力 權化作此城
汝今勤精進 當共至寶所 我亦復如是
爲一切導師 見諸求道者 中路而懈廢
不能度生死 煩惱諸險道 故以方便力
爲息說涅槃 言汝等苦滅 所作皆已辦
此云已辦乃權進之及其住於二地即實
說未辦

既知到涅槃 皆得阿羅漢 爾乃集大眾
爲說真實法

如科

諸佛方便力 分別說三乘 唯有一佛乘
息處故說二 今爲汝說實 汝所得非滅

此令觀察籌量所得非真

爲佛一切智 當發大精進 汝證一切智

十力等佛法 具三十二相 乃是真實滅

勉之令趣實果也

諸佛之導師 為息說涅槃 既知是息已

引入於佛慧

總結化城一品意義也

妙法蓮華經要解卷第九終

音釋

渺亡小切 賦始遮切不
水長也 及賣也

妙法蓮華經要解卷第十

達一

溫陵開元蓮寺比丘

戒環解

五百弟子授記品第八

三周說法各隨機領悟而述成與記前化
城品因緣說一周以被下根滿慈與五百

羅漢等於此領悟佛爲述成與記故曰五

百授記品然此先記滿慈次記五百十二
之衆而特取五百名品者滿慈乃大弟子
內秘外現爲衆標領雖先與記非是當機
又千二居末不當名品故也十大弟子無
非上根領悟得記本無先後但各專一德
隨機總衆耳滿慈說法第一而五百羅漢
常說無上道故號爲普明是當說法之機
故以滿慈總之如阿難羅云亦大弟子而
總學衆各有以也

爾時富樓那彌多羅尼子從佛聞是智慧方
便隨宜說法又聞授諸大弟子阿耨多羅三
藐三菩提記復聞宿世因緣之事復聞諸佛
有自在神通之力得未曾有心淨踊躍即
從座起到於佛前頭面禮足却住一面瞻仰
尊顏目不暫捨

聞智慧方便隨宜說法通領三周之說也

又聞大記通領舍利弗等受記事也復聞
因緣即別領大通王子之事復聞神力別
領導師神化之事罕聞故得未曾有惑除
故心淨踊躍於是避座致恭而後申數發
誓

而作是念世尊甚奇特所爲希有隨順世間
若干種性以方便知見而爲說法拔出衆生
處處貪著我等於佛功德言不能宣唯佛世

尊能知我等深心本願

前乃經家敘置此正滿慈之辭言奇特希
有至處處貪著總嘆三周說法也我等於
佛功德言不能宣總歎授記乃至導師神
化之德不能備宣也唯佛世尊已下申本
遠一願而誓護持也深心本願謂精進護持助
宣佛法乃至過去未來助宣之事非謂願
二求記也

爾時佛告諸比丘汝等見是富樓那彌多羅
尼子不我常稱其於說法人中最爲第一亦
常歎其種種功德精進護持助宣我法能於
四衆示教利喜具足解釋佛之正法而大饒
益同梵行者自捨如來無能盡其言論之辯
述成其深心本願也問衆見不者以衆等
徒知滿慈之迹而不知其深行故開端以

示之說法第一述其正行也種種功德述
其衆行也精進護持述其本願也言論之
辯述其才辯也

汝等勿謂富樓那但能護持助宣我法亦於
過去九十億諸佛所護持助宣佛之正法於
彼說法人中亦最第一又於諸佛所說空法
明了通達得四無礙智常能審諦清淨說法
無有疑惑具足菩薩神通之力隨其壽命常
修梵行彼佛世人咸皆謂之實是聲聞而富
樓那以斯方便饒益無量百千衆生又化無
遠一量阿僧祇人令立阿彌多羅三藐三菩提爲
淨佛土故常作佛事教化衆生
三上總述此廣陳也舉九十億佛所即廣陳
護宣遠因也於佛空法明了通達者非若
二乘滯於斷空也得四無礙清淨說法者

如所如說不泥名相也菩薩神通非二乘

比也隨其壽命言盡形壽也令立菩提者

令於正道有立也爲淨佛土故化衆生者

藉利他行成已行也故淨名云菩薩隨所

化衆生而取佛土所謂淨佛土者自淨其

心以致佛土之淨也爲淨佛土而必須教

化衆生者要即塵勞而能淨非若二乘厭

塵勞以求淨也由是觀之其本乃大權聖

人示現弘法耳故偈以內祕外現頌之

諸比丘富樓那亦於七佛說法人中而得第

一今於我所說法人中亦爲第一於賢劫中

當來諸佛說法人中亦復第一而皆護持助

宣佛法亦於未來護持助宣無量無邊諸佛

之法教化饒益無量衆生令立阿耨多羅三

藐三菩提爲淨佛土故常勤精進教化衆生

漸漸具足菩薩之道

上陳遠因此舉三世皆明說法宣化之深

行也七佛即毗婆尸尸棄毗舍浮拘留孫

拘那含迦葉釋迦是也上三屬前劫下四

屬今劫三劫三千佛始於妙光佛末法出

家修道聞五十三佛名深心仰慕復化他

人滿三千衆深心敬禮即超多劫生死之

罪得證佛果其初千人於莊嚴劫成佛華

光爲首至毗舍浮是也其次千人於賢劫

成佛拘留孫爲首至樓至是也其後千人

於星宿劫成佛日光爲首至須彌相是也

遠一

過無量阿僧祇劫當於此土得阿耨多羅三

藐三菩提號曰法明如來應供正徧知明行

足善逝世間解無上士調御丈夫天人師佛

世尊

滿慈既於多佛植因之遠而猶過僧祇劫

乃得菩提號法明者謂於無數劫量法門

一時明達即成佛道非如情見久遠劫也

華嚴記發心菩薩過千不可說劫當得作

佛號清淨心論謂明達如是劫量法門總

清淨故正此意也餘記劫數深意並同

其佛以恒河沙等三千大千世界爲一佛土
七寶爲地地平如掌無有山陵谿澗溝壑七
寶臺觀充滿其中諸天宮殿近處虛空人天
交接兩得相見無諸惡道亦無女人一切衆
生皆以化生無有媱欲

此皆依報清淨之相由因中常修梵行廣

化衆生令立正道故果地無邪穢之事而

交接皆上善之人也

得大神通身出光明飛行自在志念堅固精

遠一

五

進智慧普皆金色三十二相而自莊嚴

既以化生離諸欲染故本來體相淨妙若

此如是妙體人固有之特爲麤濁欲惡染

蔽而已故阿難曰欲氣麤濁腥臊交遘不

能發生勝淨妙明紫金光聚苟斷欲愛不

受胎生則本來體相無復染蔽通光莊嚴

自能發現以世考之精華之氣或化列星

吐納之人猶能輕舉則淳済既盡妙體精

明飛行自在無足疑矣

其國衆生常以二食一者法喜食二者禪悅

食

不由胎藏故不假殷食唯食采法喜禪悅
而已

有無量阿僧祇千萬億那由他諸菩薩衆得
大神通四無礙智善能教化衆生之類其聲

聞衆等數校計所不能知皆得具足六通三明及八解脫

上明國土人民此明同德法侶滿慈具足菩薩神通之力得四無礙智審諦說法教化衆生明了通達故報緣法衆其德皆類其佛國上有如是等無量功德莊嚴成就

結前也

劫名寶明國名善淨其佛壽命無量阿僧祇劫法住甚久佛滅度後起七寶塔遍滿其國劫有法寶真明故名寶明國無女人惡道故名善淨由三世說法續佛壽命故佛壽無量法住甚久滅後起塔遍滿其國又以餘德散霑也

爾時世尊欲重宣此義而說偈言

諸比丘聽聽 佛子所行道 善學方便故

不可得思議 知衆樂小法 而畏於大智
是故諸菩薩 作聲聞緣覺 以無數方便
化諸衆生類 自說是聲聞 去佛道甚遠
度脫無量衆 皆悉得成就 雖小欲懈怠
漸當令作佛 內祕菩薩行 外現是聲聞
少欲厭生死 實自淨佛土 示衆有三毒
又現邪見相 我弟子如是 方便度衆生
若我具足說 種種現化事 衆生聞是者
心則懷疑惑

此通舉諸大弟子權應之德述成滿慈內
秘外現之行也自善學方便至度無量衆
悉得成就皆權應之德也小欲懈怠漸令
作佛言善化也少欲厭生死則外現之事
實自淨佛土則內祕之事示三毒現邪見
等者諸大弟子權迹皆由示化彼類如舍

利弗與羅度爭勝即示瞋也難陀愛婦示貪也調達害佛示癡也是謂三毒憍陳如

三迦葉等昔爲外道即現邪見也其大權

難測故聞者疑惑

今此富樓那

於昔千億佛

勤修所行道

宣護諸佛法

爲求無上慧

而於諸佛所

現居弟子上

多聞有智慧

所說無所畏

能令衆歡喜

未曾有疲倦

而以助佛事

已度大神通

具四無礙智

知諸根利鈍

常說清淨法

演暢如是義

教諸千億衆

令住大乘法

而自淨佛土

未來亦供養

無量無數佛

護助宣正法

亦自淨佛土

常以諸方便

說法無所畏

度不可計衆

成就一切智

供養諸如來

護持法寶藏

通頌三世宣護之行也現居弟子上者謂

爾持千二百阿羅漢心自在者作是念我等

於諸佛所皆示現爲衆標領也度大神通言已超越小聖也

其後得成佛 號名曰法明 其國名善淨

七寶所合成 劫名爲寶明 善薩衆甚多

其數無量億 皆度大神通 威德力具足

充滿其國土 聲聞亦無數 三明八解脫

得四無礙智 以是等爲僧 其國諸衆生

婬欲皆已斷 純一變化生 具相莊嚴身

法喜禪悅食 更無餘食想 無有諸女人

亦無諸惡道

通頌劫國衆德文義同前以是等爲僧者言其國僧衆皆三明四智無凡流也

富樓那比丘 功德悉成滿 當得斯淨土

賢聖衆甚多 如是無量事 我今但畧說

爾持千二百阿羅漢心自在者作是念我等

歡喜得未曾有若世尊各見授記如餘大弟子者不亦快乎

佛知此等心之所念告摩訶迦葉是千二百阿羅漢我今當現前次第與授阿耨多羅三藐三菩提記

達一

迦葉爲衆上首故告之

八

於此衆中我大弟子橋陳如比丘當供養六萬二千億佛然後得成爲佛號曰普明如來應供正遍知明行足善逝世間解無上士調御丈夫天人師佛世尊

橋陳最初得度爲衆首故特記之號普明者偈云常放大光明一切之所敬又云常說無上道故號曰普明謂以智慧明破諸癡暗普使衆生明了法性即今住世應真之首也

其五百阿羅漢優樓頻螺迦葉伽耶迦葉那提迦葉迦留陀夷優陀夷阿菟樓駁離婆多劫賓那薄拘羅周陀莎伽陀等皆當得阿耨多羅三藐三菩提盡同一號名曰普明

五百威德具足爲千二之傑故又別記目

連記末云我諸弟子威德具足其數五百即此也餘七百衆但於前通許於頌通記優樓頻螺等即序分所列羅漢上首詳略互舉也同號普明以德同故

爾時世尊欲重宣此義而說偈言

達一

九

橋陳如比丘 當見無量佛 過阿僧祇劫乃成等正覺 常放大光明 具足諸神通名聞遍十方 一切之所敬 常說無上道故號爲普明

頌正報也常放大法光明普照迷暗也

其國土清淨

菩薩皆勇猛

咸昇妙樓閣

遊諸十方國

以無上供具

奉獻於諸佛

作是供養已

心懷大歡喜

須臾還本國

有如是神力

○頌依報也

佛壽六萬劫

正法住倍壽

像法復倍是

○頌化緣也

法滅天人憂

其五百比丘

次第當作佛

同號曰普明

前法既滅天人失望則後佛繼出安隱天

人

轉次而授記

我滅度之後

某甲當作佛

其所化世間

亦如我今日

此詳記五百次第出興事也我滅度之後

等乃五百轉次相授之辭以轉次不一不

可定指故云某甲非謂釋迦指五百衆釋

迦次補自當彌勒也

國土之嚴淨

及諸神通力

菩薩聲聞衆

正法及像法

壽命劫多少

皆如上所說

五百依正之果皆如懥陳

迦葉汝已知

五百自在者

餘諸聲聞衆

亦當復如是

引五百之事而例記七百之衆通爲十二

之記

其不在此會

汝當爲宣說

令迦葉宣揚勝事以勉後進

爾時五百阿羅漢於佛前得授記已歡喜踊

遠一躍即從座起到於佛前頭面禮足悔過自責

世尊我等常作是念自謂已得究竟滅度今

乃知之如無智者所以者何我等應得如來

智慧而便自以小智爲足

悔責者悔昔之失慶今之得也如來智慧即一切種智我等應得而悔不早悟

世尊譬如有至親友家醉酒而卧是時親友官事當行以無價寶珠繫其衣裏與之而去其人醉卧都不覺知起已遊行到於他國爲衣食故勤力求索甚大艱難若少有所得便以爲足

親友繫珠譬佛預十六菩薩時爲說法華結大乘因也醉酒而卧譬我預千萬億衆時皆生疑惑昏昏如醉也官事當行即佛化將畢餘處利生公而不黨故譬官事起已遊行轉迷也到於他國棄本也爲衣食等樂小也

於後親友會遇見之而作是言咄哉丈夫何爲衣食乃至如是我昔欲令汝得安樂五欲

自恣於某年日月以無價寶珠繫汝衣裏今故現在而汝不知勤苦憂惱以求自活甚爲癡也汝今可以此寶貿易所須常可如意無所乏短

親友會遇譬今復值佛咄叱警戒譬呵小

進大言丈夫者指大乘種性而警進之也餘意如下合顯貿易所須譬即性發揮當得大利也以時物遷貨曰貿以有易無曰易

佛亦如是爲菩薩時教化我等令發一切智心而尋廢忘不知不覺既得阿羅漢道自謂滅度資生艱難得少爲足一切智願猶在不失

令發智心而廢忘不覺如繫珠醉卧也既得羅漢而未離法縛是資生艱難也智願

不失如衣珠現在

今者世尊覺悟我等作如是言諸比丘汝等
所得非究竟滅我久令汝等種佛善根以方
便故示涅槃相而汝謂爲實得滅度

咄叱警戒也

世尊我今乃知實是菩薩得受阿耨多羅三
藐三菩提記以是因緣甚大歡喜得未曾有
合貨寶如意也

爾時阿若憍陳如等欲重宣此義而說偈言
我等聞無上 安隱受記聲 歡喜未曾有
禮無量智佛 今於世尊前 自悔諸過咎
於無量佛寶 得少涅槃分 如無智愚人
便自以爲足

頌得記歡喜悔過自責也

譬如貧窮人 往至親友家 其家甚大富

遠一

十二

具設諸肴饍 以無價寶珠 繫著內衣裏
默與而捨去 時卧不覺知 是人既已起
遊行詣他國 求衣食自濟 資生甚艱難
得少便爲足 更不願好者 不覺內衣裏
有無價寶珠 與珠之親友 後見此貧人
苦切責之已 示以所繫珠 貧人見此珠
其心大歡喜 富有諸財物 五欲而自恣
我等亦如是 世尊於長夜 常愍見教化
令種無上願 我等無智故 不覺亦不知
得少涅槃分 自足不求餘

今佛覺悟我 言非實滅度 得佛無上慧
爾乃爲真滅 我今從佛聞 受記莊嚴事
及轉次受決 身心遍歡喜 以記爲決謂決定道果也

妙法蓮華經授學無學人記品第九

此記小聲聞衆也舊說裂此爲二謂學與無學然無學即羅漢已在千二之記不當重列此即學於無學小聲聞而已研真斷惑名學真窮惑盡名無學此未得無學而亦預佛記者若有聞法者無一不成佛故

達一

三

又我等爲一切世間天人阿修羅所見知識阿難常爲侍者護持法藏羅睺羅是佛之子若佛見授阿耨多羅三藐三菩提記者我願既滿衆望亦足

阿難羅云親邇於佛既爲衆所見知若不得記則無塞衆望也菩薩爲通達佛道無

爾時阿難羅睺羅而作是念我等每自思惟設得受記不亦快乎

阿難多聞護持法藏羅云密行皆大弟子而與學衆同授記者示彼亦內祕外現密行之傳也觀學衆記云當供微塵數佛護持法藏即與阿難羅云同德故以二師總

之

即從座起到於佛前頭面禮足俱白佛言世尊我等於此亦應有分唯有如來我等所歸

爾時佛告阿難汝於來世當得作佛號山海慧自在通王如來應供正遍知明行足善逝世間解無上士調御丈夫天人師佛世尊當

供養六十二億諸佛護持法藏然後得阿耨

多羅三藐三菩提

山海慧自在通王者高莫逾於山深莫浚

於海阿難宿持法藏多聞博達智慧等之

於諸法中得大通達自在如王故得果以

因爲號當供多佛護持法藏然後成佛蓋

達一
十四
其本願也

教化二十千萬億恒河沙諸菩薩等令成阿

耨多羅三藐三菩提

阿難當來作成如此其多者爲宿持法藏

化緣深故

國名常立勝幡其土清淨琉璃爲地劫名妙

音遍滿

幡表尊勝之德阿難多聞第一故國名常

立勝幡宣傳法藏故劫名妙音遍滿爲由

法音宣流也

其佛壽命無量千萬億阿僧祇劫若人於千萬億無量阿僧祇劫中算數校計不能得知

正法住世倍於壽命像法住世復倍正法

佛壽無量劫而正像之法又復倍倍者由

其宣傳法藏因力緣遠也問壽劫之說悠

然不窮何所據依視不覩昧况渺冥乎曰

萬物死生而不亡者存壽有終窮乎古今

代謝而曾無紀極劫有終窮乎聖人離死

生至道無代謝則雖倍倍之劫未足盡其

達二
十五

靈長矣

阿難是山海慧自在通王者爲十方無量千

萬億恒河沙等諸佛如來所共讚歎稱其功

德

爲其護持法藏報得殊勝名聞十方故

爾時世尊欲重宣此義而說偈言

我今僧中說 阿難持法者 當供養諸佛

然後成正覺 號曰山海慧 自在通王佛
其國土清淨 名常立勝幡 教化諸菩薩
其數如恒沙 佛有大威德 名聞滿十方

壽命無有量 以愍衆生故 正法倍壽命
像法復倍是 如恒河沙等 無數諸衆生
於此佛法中 種佛道因緣

頌文大意同前佛有大威德名聞滿十方

頌諸佛共歎也壽命無有量以愍衆生故

非徒羨久生也衆生於法中種佛道因緣
者能持法藏故群類資焉

爾時會中新發意菩薩八千人咸作是念我
等尚不聞諸大菩薩得如是記有何因緣而

諸聲聞得如是決

阿難果號劫國教化作成等事特異衆記
初心不知遠因故疑其何緣而得

爾時世尊知諸菩薩心之所念而告之曰諸
善男子我與阿難等於空王佛所同時發阿
耨多羅三藐三菩提心阿難常樂多聞我常
勤精進是故我已得成阿耨多羅三藐三菩提

提而阿難護持我法亦護將來諸佛法藏教
化成就諸菩薩衆其本願如是故獲斯記
此告其遠因以同發心功深願廣宜得是
記也校其遠因則功已齊佛但彼願護持

法藏故常樂多聞佛願成道利生故常勤
精進由是佛已成道而阿難尚須護法教
化然後成佛蓋其本願如是非由根智勝
劣而有先後也俱舍論說空王佛乃釋迦

三僧祇劫中間所逢之佛

阿難面於佛前自聞授記及國土莊嚴所願
具足心大歡喜得未曾有即時憶念過去無
量千萬億諸佛法藏通達無礙如今所聞亦
識本願

即時憶念等者因佛與記又叙往因於是

得法性覺自在三昧能憶過佛法藏又識

本昔願持之因也

爾時阿難而說偈言

世尊甚希有 令我念過去 無量諸佛法

如今日所聞 我今無復疑 安住於佛道

方便爲侍者 護持諸佛法

謝記自勵也既識本願所以無疑而益勤

方便

爾時佛告羅睺羅汝於來世當得作佛號蹈

七寶華如來應供正遍知明行足善逝世間

卷一

十一

解無上士調御丈夫天人師佛世尊

蹈七寶華乃妙淨密行之應也

當供養十世界微塵等數諸佛如來常爲諸

佛而作長子猶如今也

作長子者常以密行繼續佛道也如華嚴

以普賢爲長子亦表大行能建佛家法也

蓋弘道以德行爲尚故儒門四科亦先德

行

是蹈七寶華佛國土莊嚴壽命劫數所化第
子正法像法亦如山海慧自在通王如來無
異亦爲此佛而作長子過是已後當得阿耨
多羅三藐三菩提

多聞密行常相資故羅云國劫正像之果
並同阿難而當來亦爲阿難長子

爾時世尊欲重宣此義而說偈言

我爲太子時 羅睺爲長子 我今成佛道
受法爲法子 於未來世中 見無量億佛
皆爲其長子 一心求佛道

記羅云繼續佛道絲絲不絕也

羅睺羅密行 唯我能知之 現爲我長子
以示諸衆生 無量億千萬 功德不可數
安住於佛法 以求無上道

隱大權之跡而示現爲佛子功德不可數
唯佛能知之是謂密行也

爾時世尊見學無學二千人其意柔軟寂然
清淨一心觀佛佛告阿難汝見是學無學二
十人不唯然已見

此亦昔日所化故今與記其意柔軟謂根
機已熟問其見不默示昔因也而阿難多
聞博達固已默知

卷一

十八

阿難是諸人等當供養五十世界微塵數諸
佛如來恭敬尊重護持法藏末後同時於十
方國各得成佛皆同一號名曰寶相如來應
供正遍知明行足善逝世間解無上士調御
丈夫天人師佛世尊

二千果號皆同以因同也了學無學即證
寶相是謂寶相

壽命一劫國土莊嚴聲聞菩薩正法像法皆
悉同等

言二千同時成佛依報法化皆同

爾時世尊欲重宣此義而說偈言

是二千聲聞 今於我前住 悉皆與授記
未來當成佛 所供養諸佛 如上說塵數
護持其法藏 後當成正覺 各於十方國
悉同一名號 俱時坐道場 以證無上慧

皆名爲寶相 國土及弟子 正法與像法
悉等無有異 咸以諸神通 度十方衆生
名聞普周遍 漸入於涅槃

名聞周遍漸入涅槃者出興功成則反一
無迹佛佛然也

爾時學無學二千人聞佛授記歡喜踊躍而

十九
進一

說偈言

世尊慧燈明 我聞授記音 心歡喜充滿

如甘露見灌

慧燈明讚也聞記歡喜謝也

妙法蓮華經法師品第十

能持正法足以師人謂之法師此授廣記
以圓該前記而號法師品者所以廣記持
經之人而推尊之故也經舉現前八部四
衆等類及佛滅後聞經隨喜皆與授記是

謂廣記前雖對三周法授三根記而救機
未盡故此圓該乃圓教之統要也既爲統
要允屬正宗而舊科於此遂分流通亦隨
所見

爾時世尊因藥王菩薩告八萬大士藥王汝
見是大衆中無量諸天龍王夜叉乾闥婆阿
脩羅迦樓羅緊那羅摩睺羅伽人與非人及
比丘比丘尼優婆塞優婆夷求聲聞者求辟
支佛者求佛道者如是等類咸於佛前聞妙
法華經一偈一句乃至一念隨喜者我皆與
法華經一偈一句乃至一念隨喜者我皆與

授記當得阿耨多羅三藐三菩提

將授廣記而因藥王告大士者以廣記渺
漠法利勝妙非深知宿契及大菩薩無能
證知故也藥王即喜見菩薩久持此經燒
身然臂可謂深知宿契矣八萬大士即經

首八萬菩薩現前八部四衆皆與授記者
所謂若有聞法者無一不成佛也

佛告藥王又如來滅度之後若有人聞妙法
華經乃至一偈一句一念隨喜者我亦與授
阿難多羅三藐三菩提記

言滅後有人則其機未兆亦懸記之則此
品廣記無所不圓無所不該矣

若復有人受持讀誦解說書寫妙法華經乃
至一向於此經卷敬視如佛種種供養華香
瓔珞末香塗香燒香繒蓋幢幡衣服伎樂合
掌恭敬是人一切世間所應瞻奉應以如來
供養而供養之當知此人是大菩薩成就阿
難多羅三藐三菩提哀愍衆生願生此間廣
至合掌恭敬藥王當知是諸人等已曾供養
十萬億佛於諸佛所成就大願愍衆生故生
此人間

自受持讀誦至合掌恭敬爲六種法師一
受持二讀三誦四解說五書寫六供養能

備六種難故必由供佛宿福及大願也
藥王若有人問何等衆生於未來世當得作
佛應示是諸人等於未來世必得作佛
令藥王宣明勝因也

何以故若善男子善女人於法華經乃至一

句受持讀誦解說書寫種種供養經卷華香
瓔珞抹香塗香燒香繒蓋幢幡衣服伎樂合
掌恭敬是人一切世間所應瞻奉應以如來
供養而供養之當知此人是大菩薩成就阿
難多羅三藐三菩提哀愍衆生願生此間廣
演分別妙法華經何況盡能受持種種供養
迷一王者

者

釋上以顯緣勝人尊故當作佛但於一句
能具六種法師之功猶足推尊瞻奉而當
成菩提况於一經盡能受持則其緣愈勝

其人愈尊其作佛必矣

藥王當知是人自捨清淨業報於我滅度後
懸衆生故生於惡世廣演此經

自捨淨報者當是淨土果人示生惡世
若是善男子善女人我滅度後能竊爲一人
說法華經乃至一句當知是人則如來使如
來所遣行如來事何況於大衆中廣爲人說
使即將命之人遣有付托之義此令敬持
經人視同將如來命爲如來付託讚揚大
事宜在尊尚也

藥王若有惡人以不善心於一劫中現於佛
前常毀罵佛其罪尚輕若人以一惡言毀呐
在家出家讀誦法華經者其罪甚重

萬德慈尊不可毀也然毀之其罪尚輕者
以無能損故毀持經之人其罪尤重者以

斷佛種故

藥王其有讀誦法華經者當知是人以佛莊
嚴而自莊嚴則爲如來肩所荷擔其所至方
應隨向禮一心合掌恭敬供養尊重讚歎華
香瓔珞抹香塗香燒香繒蓋幢幡衣服肴饌
作諸伎樂人中上供而供養之應持天寶而
以散之天上寶聚應以奉獻

以佛莊嚴而自莊嚴者謂具佛衆德也則
爲如來肩所荷擔者謂佛所尊重也佛尚
尊之則人者固當隨方欽向尊重之也

所以者何是人歡喜說法須臾聞之即得究竟
王一阿耨多羅三藐三菩提故

徵釋所應尊重之意也

爾時世尊欲重宣此義而說偈言

若欲住佛道 成就自然智 常當勤供養

受持法華者

自然智即本覺真智也欲住佛道成就此智必藉法師發明故當勤供養持法華者其有欲疾得一切種智慧當受持是經并供養持者

一切種智即諸佛果智也欲求佛果疾得此智必依此經修證故當持是經并供持者

若有能受持妙法華經者當知佛所使愍念諸衆生

頌於諸佛所成就大願愍衆生故生此人間

諸有能受持妙法華經者捨於清淨土愍衆故生此當知如是人自在所欲生能於此惡世廣說無上法應以天華香

達一

五

及天寶衣服天上妙寶聚供養說法者

頃是人自捨清淨業報等自在所欲生者所欲生處隨願自在

吾滅後惡世能持是經者當合掌敬禮如供養世尊上饌衆甘美及種種衣服供養是佛子冀得須臾聞

此令推尊以求妙法

若能於後世受持是經者我遣在人中行於如來事

非如來遣則莫之能

若於一劫中常懷不善心作色而罵佛獲無量重罪其有讀誦持是法華經者須臾加惡言其罪復過彼○如科有人求佛道而於一劫中以無數偈讚由是讚佛故得無量功德

歎美持經者 其福復過彼

顯讚美之福也

於八十億劫 以最妙色聲 及與香味觸
供養持經者 如是供養已 若得須臾聞
則應自欣慶 我今獲大利

頌花香伎樂人中上供等文於八十億劫
言不倦持久之志以冀須臾之聞須臾聞
之即得菩提故爲大利

藥王今告汝 我所說諸經 而於此經中
法華最第一 ○故宜信向也

爾時佛復告藥王菩薩摩訶薩我所說經典
無量千萬億已說今說當說而於其中此法
華經最爲難信難解

已說即般若等今說即法華當說即涅槃
而獨法華所詮皆妙法所示皆實相非衆

生知見所以難信是諸佛秘要所以難解
也

藥王此經是諸佛秘要之藏不可分布妄授
與人諸佛世尊之所守護從昔已來未曾顯
說而此經者如來現在猶多怨嫉況滅度後
秘密法要妄授則上慢退席顯說則窮子
怖父而怨誹憎嫉生焉如來現在尚爾況
滅後惡世可不擇機

藥王當知如來滅後其能書持讀誦供養爲
他人說者如來即爲以衣覆之又爲他方現
在諸佛之所護念是人有大信力及志願力
諸善根力當知是人與如來共宿則爲如來
手摩其頭

是經難得聞信受者亦難故凡書持讀說
非假如來覆護及自有信願善根莫之能

矣爲如來衣覆謂得佛忍力也與如來共

宿謂極心同佛也爲如來摩頂謂蒙佛慰安也如此故能於後惡世持說是法

藥王在在處處若說若讀若誦若書若經卷所住之處皆應起七寶塔極令高廣嚴飾不

須復安舍利所以者何此中已有如來全身達一
二十五

三周開示及餘助顯無非如來全身也

此塔應以一切華香瓔珞繒蓋幢幡伎樂歌頌供養恭敬尊重讚歎若有人得見此塔禮拜供養當知是等皆近阿耨多羅三藐三菩提

提

爲其因正而緣勝故也

藥王多有人在家出家行菩薩道若不能得見聞讀誦書持供養是法華經者當知是人未善行菩薩道若有得聞是經典者乃能善

行菩薩之道

行菩薩道而不聞是經如欲濟渴而不知須水也

其有衆生求佛道者若見若聞是法華經聞已信解受持者當知是人得近阿耨多羅三藐三菩提

如人鑿井已近泉源

藥王譬如下人渴乏須水於彼高原穿鑿求之猶見乾土知水尚遠施功不已轉見濕土遂漸至泥其心決定知水必近

高原鑿水譬修菩薩道不得其要猶見乾土施功不已譬從乾慧地由漸而進轉見濕土喻歷聞般若遂漸至泥喻初聞法華然尚滯修習則於佛智水近之而已若夫脫然造其真源則妙湛圓發不勞功用況

前所爲皆淳濁矣經不言此者所謂引而不發使其自進蓋無功用處不容言諭也

菩薩亦如是若未聞未解未能修習是法華經當知是人去阿耨多羅三藐三菩提尚遠若得聞解思維修習必知得近阿耨多羅三

達一

二

藐三菩提所以者何一切菩薩阿耨多羅三藐三菩提皆屬此經

佛果菩提皆屬此經則未聞未解安可得道

此經開方便門示真實相是法華經藏深固幽遠無人能到今佛教化成就菩薩而爲開示

開方便門猶鑿井也示真實相猶見水也法華經藏即衆生如來藏也於衆生則蘊在塵勞於菩薩則蘊在萬行於寶所則過

乎五百由旬可謂深固幽遠也人無能到故惟菩薩可以開示

藥王若有菩薩聞是法華經驚疑怖畏當知是爲新發意菩薩若聲聞人聞是經驚疑怖畏當知是爲增上慢者

大根有新發意小根有增上慢皆非機也藥王若有善男子善女人如來滅後欲爲四衆說是法華經者云何應說

先標次釋

是善男子善女人入如來室著如來衣坐如來座爾乃應爲四衆廣說斯經如來室者一切衆生中大慈悲心是如來衣者柔和忍辱心是如來座者一切法空是安住是中然後以不解怠心爲諸菩薩及四衆廣說是法華經

夫說法教化之道必已有所處然後能安人已有所服然後能伏人已有所據然後

能達人如來以慈悲爲室柔忍爲衣法空爲座入慈悲室則已有所處也著柔忍衣則已有所服也坐法空座則已有所據也

如此則具佛之體乃可廣說斯經苟未體

此自無至正何以爲人哉故曰安住是中然後以不懈怠廣說是法今夫據寶花座

而聖讀庸行者宜深鑒乎此一切法空者非斷空也即一切法廓然了達之謂也

藥王我於餘國遣化人爲其集聽法衆亦遣化比丘比丘尼優婆塞優婆夷聽其說法是諸化人聞法信受隨順不逆若說法者在空閑處我時廣遣天鬼神乾闥婆阿修羅等聽

其說法

此佛力變化讚揚大事也餘國則他方世界

我雖在異國時時令說法者得見我身若於此經忘失句逗我還爲說令得具足

在異國而令見所謂隱顯化衆生

爾時世尊欲重宣此義而說偈言

欲捨諸懈怠 應當聽此經 是經難得聞信受者亦難

欲於正道易進而無懈者當依此爲津要如人渴須水 穿鑿於高原 猶見乾燥土知去水尚遠 遠一漸見濕土泥 沃決定知近水樂王汝當知 如是諸人等 不聞法華經去佛智甚遠 若聞是深經 決了聲聞法是諸經之王 聞已諦思惟 當知此人等近於佛智慧

決了聲聞直入佛慧

若人說此經 應入如來室 著於如來衣
而坐如來座 處衆無所畏 廣爲分別說
大慈悲爲室 柔和忍辱衣 諸法空爲座
處此爲說法 若說此經時 有人惡口罵
加刀杖瓦石 念佛故應忍

以佛爲念當忍諸惡所謂著如來衣

我千萬億土 現淨堅固身 於無量億劫
爲衆生說法 若我滅度後 能說此經者

我遣化四衆 比丘比丘尼 及清信士女

供養於法師 引導諸衆生 集之令聽法
若人欲加惡 刀杖及瓦石 則遣變化人

爲之作衛護 若說法之人 獨在空閑處
寂寘無人聲 讀誦此經典 我爾時爲現

清淨光明身 若忘失章句 爲說令通利

達一

三九

若人具是德 或爲四衆說 空處讀誦經

皆得見我身 若人在空閑 我遣天龍王
夜叉鬼神等 爲作聽法衆 是人樂說法

分別無罣礙 諸佛護念故 能令大衆喜

皆餘國遣化護助事也若人具是德謂具

慈悲柔忍德也空處讀經得見我身者令
於法空座行柔忍德使心空境寂則此中
全身昭然可見是謂清淨光明身也若未
具是德徒誦此經而欲以色相見我是行

邪道

若親近法師 速得菩薩道 隨順是師學
得見恒沙佛

恒沙諸佛全身在此

妙法蓮華經要解卷第十

音釋

研五堅切倚直並浚恩間切曉或步切
旁也傳切茶也貌也

妙法蓮華經要解卷十一

遠二

溫陵開元蓮寺比丘 戒環 解

見寶塔品第十一

自開會至此三周法備四衆記圓法身已全本願已足故感過云多寶踊願塔現全

遠二

一

身盡集十方說法分身諸佛圓會圓證所
以然者示十方三世過現諸佛說示修證

之道圓備於此

爾時佛前有七寶塔高五百由旬縱廣二百五十由旬從地踊出住在空中種種寶物而裝校之五千欄楯龕室千萬無數幢幡以爲嚴飾垂寶瓔珞寶鈴萬億而懸其上四面皆出多摩羅跋栴檀之香充遍世界其諸幡蓋以金銀琉璃瑣瑪瑙真珠玫瑰七寶合成高至四天王宮

表衆德尊勝也

三十三天雨天曼陀羅華供養寶塔餘諸天龍夜叉乾闥婆阿修羅迦樓羅緊那羅摩睺羅伽人非人等千萬億衆以一切華香瓔珞幡蓋伎樂供養寶塔恭敬尊重讚歎

知有如來全身故

爾時寶塔中出大音聲歎言善哉善哉釋迦牟尼世尊能以平等大慧教菩薩法佛所護念妙法華經爲大衆說如是如是釋迦牟尼

寶塔殊勝乃果行依報諸莊嚴具彰果行德用也種種莊校即萬德之像五千欄楯即總持之力龕室千萬應慈悲無量也幢幡無數應摧邪表正也垂寶瓔珞即衆善下化寶鈴萬億即法音廣振四面出香表神通四達如意周遍七寶幡蓋高至天宮

世尊如所說者皆是真實

平等大慧即一乘實智也

爾時四衆見大寶塔住在空中又聞塔中所
出音聲皆得法喜惟未曾有從座而起恭敬
合掌却住一面

聞歎大慧真實之說故得法喜

爾時有菩薩摩訶薩名大樂說知一切世間
天人阿修羅等心之所疑而白佛言世尊以
何因緣有此寶塔從地踊出又於其中發是
音聲

爾時佛告大樂說菩薩此寶塔中有如來全
身乃往過去東方無量千萬億阿僧祇世界
國名寶淨彼中有佛號曰多寶其佛行菩薩
道時作大誓願若我成佛滅度之後於十方
國土有說法華經處我之塔廟爲聽是經故

踊現其前爲作證明讚言善哉

多寶滅度全身不散如入禪定而能隨願
在處證經此示法身無滅無生自在之力
使聞妙法者了無滅生頓悟實相故示現

作證如此

彼佛成道已臨滅度時於天人大衆中告諸
比丘我滅度後欲供養我全身者應起一大
塔○敘塔緣起也

其佛以神通願力十方世界在在處處若有
說法華經者彼之寶塔皆踊出其前全身在

於塔中讚言善哉善哉○不獨此處

大樂說今多寶如來塔聞說法華經故從地
踊出讚言善哉善哉○結示今緣也

是時大樂說菩薩以如來神力故白佛言世
尊我等願欲見此佛身

欲表圓證當現全身此非小緣故假如來神力發起

佛告大樂說菩薩摩訶薩是多寶佛有深重願若我寶塔爲聽法華經故出於諸佛前時其有欲以我身示四衆者彼佛分身諸佛在於十方世界說法盡還集一處然後我身乃出現耳

必待十方說法諸佛畢集然後出現者表圓會圓證也分身諸佛即千百億化水月應物者

大樂說我分身諸佛在於十方世界說法者今應當集
當副多寶之願也
大樂說白佛言世尊我等亦願欲見世尊分身諸佛禮拜供養

爾時佛放白毫一光即見東方五百萬億那由他恒河沙等國土諸佛彼諸國土皆以頗梨爲地寶樹寶衣以爲莊嚴無數千萬億菩薩充滿其中遍張寶慢寶網羅上彼國諸佛以大妙音而說諸法及見無量千萬億菩薩遍滿諸國爲衆說法

此皆釋迦分身在十方說法者

南西北方四維上下白毫相光所照之處亦復如是

遍照十方咸召使集

爾時十方諸佛各告衆菩薩言善男子我今應往娑婆世界釋迦牟尼佛所并供養多寶如來寶塔

時娑婆世界即變清淨琉璃爲地寶樹莊嚴黃金爲繩以界八道無諸聚落村營城邑大

海江河山川林藪燒大寶香曼陀羅華遍布其地以寶網慢羅覆其上懸諸寶鈴唯留此

會衆移諸天人置於他土

變土將容分身之衆也琉璃爲地等者現佛國之淨相無諸聚落等者滅衆生之染緣移天人置他土如淨名說菩薩斷取大千擲沙界外其中衆生不覺不知

是時諸佛各將一大菩薩以爲侍者至娑婆世界各到寶樹下一一寶樹高五百由旬枝葉花菓次第莊嚴諸寶樹下皆有師子之座高五由旬亦以大寶而校飾之爾時諸佛各於此座結跏趺坐如是展轉遍滿三千大千世界而於釋迦牟尼佛一方所分之身猶故未盡

一方即東方也釋迦分身譬如一燈然百

遠二

五

千燈真應無盡而器界有窮故雖大千不能容受

時釋迦牟尼佛欲容受所分身諸佛故八方各更變二百萬億那由他國皆令清淨無有地獄餓鬼畜生及阿修羅又移諸天人置於他土所化之國亦以琉璃爲地寶樹莊嚴樹高五百由旬枝葉華果次第嚴飾樹下皆有寶師子座高五由旬種種諸寶以爲裝校亦無大渙江河及目真隣陀山摩訶目真隣陀山鐵圍山大鐵圍山須彌山等諸山王通爲一佛國土寶地平正寶文露慢遍覆其上懸諸幡蓋燒大寶香諸天寶華遍布其地

目真隣陀此云石

釋迦牟尼佛爲諸佛當來坐故復於八方各更變二百萬億那由他國皆令清淨無有地

獄餓鬼畜生及阿修羅又移諸天人置於他土所化之國亦以琉璃爲地寶樹莊嚴樹高五百由旬枝葉華果次第莊嚴樹下皆有寶師子座高五由旬亦以大寶而校飾之亦無大海江河及目真隣陀山摩訶目真隣陀山鐵圍山大鐵圍山須彌山等諸山王通爲一佛國土寶地平正寶交露幔遍覆其上懸諸幡蓋燒大寶香諸天寶華遍布其地

淨名丈室能廣容多座釋迦化土如自在天宮涌出之衆有無量河沙各詣靈山未聞迫窄而此必三變淨土乃能容受分身者特因事顯法耳蓋淨土妙境生佛本共法身化體物我無虧唯衆生識心自染自苟故聖人因分身之來特與開示初於娑婆一變者滅衆生染緣也次於八方再變

者遣識心限礙也後於八方復變者廓法界真境也三變之後分身畢集多寶全現者示染緣既滅礙心既遣真境既廓則法身化體當處現前一多圓融隨念自在妙法大旨明此而已故茲因事特與開示也淨名直示不思議境故即丈室而廣容法華意在引權入實故自穢土而三變宗趣有異故建立不同得旨歸根夫何異也爾時東方釋迦牟尼所分之身百千萬億那由他恒河沙等國土中諸佛各各說法來集於此如是次第十方諸佛皆悉來集坐於八方爾時一方四百萬億那由他國土諸佛如來遍滿其中

前初變土東方已集此復舉者言東方集後十方次第而集

是時諸佛各在寶樹下坐師子座皆遣侍者

問訊釋迦牟尼佛各賚寶華滿掬而告之言善男子汝往詣者闍崛山釋迦牟尼佛所如我辭曰少病少惱氣力安樂及菩薩聲聞衆

悉安隱不以此寶華散佛供養而作是言彼

遠二

七

某甲佛與欲開此寶塔諸佛遣使亦復如是分身之來不躬觀佛者體同故也皆遣侍者致問開塔者願同故也與音預同欲也

爾時釋迦牟尼佛見所分身佛悉已來集各坐於師子之座皆聞諸佛與欲同開寶塔即從座起住虛空中一切四衆起立合掌一心觀佛於是釋迦牟尼佛以右指開七寶塔戶出大音聲如却關鑰開大城門

右表順道開發也一指聊舉關鍵脫然如來全身於是可見

即時一切衆會皆見多寶如來於寶塔中坐師子座全身不散如入禪定又聞其言善哉善哉釋迦牟尼佛快說是法華經我爲聽是經故而來至此

信知諸佛雖不實滅而言滅度

爾時四衆等見過去無量千萬億劫滅度佛說如是言歎未曾有以天寶華聚散多寶佛及釋迦牟尼佛上

爾時多寶佛於寶塔中分半座與釋迦牟尼佛而作是言釋迦牟尼佛可就此座即時釋迦牟尼佛入其塔中坐其半座結跏趺坐

妙法實際一切圓融物我不分古今一致是以過去多寶與現在釋迦於寶塔中共坐一座以示三界之相無有生死若退若出亦無在世及滅度者非實非虛非如非

異斯妙法之極致也故作證如此

爾時大衆見二如來在七寶塔中師子座上

歷然可辨

結跏趺坐各作是念佛座高遠唯願如來以神通力令我等輩俱處虛空即時釋迦牟尼佛以神通力接諸大衆皆在虛空

塔在空中故升空乃可親近

遠二

此佛滅度

無央數劫 處處聽法

以難遇故

○因多寶勉衆也

彼佛本願

我滅度後

在在所往

常爲聽法

又我分身

無量諸佛

如恒沙等

來欲聽法

又見滅度

多寶如來

各捨妙土

九及弟子衆

天人龍神

諸供養事

令法久住

故來至此

化佛爲欲聽法及見多寶故捨妙土諸事

顯妙勸持別是一番故雖唱滅結經而復有後說至神力品涌出之衆方請流通則

爲坐諸佛

以神通力

移無量衆

令國清淨

諸佛各各

詣寶樹下

如清淨地

蓮華莊嚴

其寶樹下

諸師子座

佛坐其上

光明嚴飾

如夜暗中

然大炬火

身出妙香

遍十方國

衆生蒙薰

喜不自勝

譬如大風

吹小樹枝

以是方便

令法久住

此皆頌美化佛來儀也

如風吹枝言衆生

喜心靡然向佛也

告諸大衆

我滅度後

誰能護持

讀說斯經

今於佛前

自說誓言

其多寶佛

雖久滅度

以大誓願

而師子吼

多寶如來

及與我身

所集化佛

當知此意

初四句詢求其人次下令發願持經則多

寶釋迦及分身佛當爲作證

諸佛子等 誰能護法 當發大願

令得久住 ○再求其人也

其有能護 此經法者 則爲供養

我及多寶 此多寶佛 處於寶塔

常遊十方 爲是經故 亦復供養

諸來化佛 莊嚴光飾 諸世界者

若說此經 則爲見我 多寶如來

及諸化佛 此中已有如來全身故能護

能說則爲供我見我及多寶化佛也嚴飾

世界指化佛來儀也

諸善男子 各諦思惟 此爲難事

宜發大願 諸餘經典 數如恒沙

雖說此等 未足爲難

諸餘經典教理行果未圓未頓故也

若接須彌

擲置他方

無數佛土

亦未爲難

若以足指

動大千界

遠擲他國

亦未爲難

若立有頂

爲衆演說

無量餘經

亦未爲難

若佛滅後

於惡世中

能說此經

是則爲難

接須彌動大千則神通等於菩薩立有頂

說餘經則大辯壓於諸天未若惡世說此

之爲難何以故惡世心高不啻如須彌之

難接無明堅厚不啻如大千之難動慢心

增上不啻如有頂之難壓故有頂天即色

界頂也

假使有人

手把虛空

而以遊行

亦未爲難

於我滅後

若自書持

達二

十一

爲人演說

令諸聽者

得六神通

若持八萬

四千法藏

十二部經

若使人書 是則爲難

培把也有象可把虛空難培即言可書難

言莫寫蓋由此經言辭相寂故

若以大地

置足甲上

昇於梵天

亦未爲難

佛滅度後

於惡世中

整讀此經

是則爲難

以大地置足甲升梵天喻末世下根能舉

重任以極高明之道是誠不易也

假使劫燒

擔負乾草

入中不燒

亦未爲難

我滅度後

若持此經

爲一人說

是則爲難

末世暴惡過於劫燒於中持經易遭魔難

雖能如是 亦未爲難

於我滅後

聽受此經 問其義趣

是則爲難

持八萬藏 未如一乘之頓得六神通孰若

證性之圓

若人說法 令千萬億

無量無數

恒沙衆生 得阿羅漢

具六神通

雖有是益 亦未爲難

於我滅後

若能奉持 如斯經典

是則爲難

諸餘法化終滯權乘奉持斯經疾得佛道

我爲佛道 於無量土

從始至今

廣說諸經 而於其中

此經第一

若有能持 則持佛身

結顯勸持也則持佛身者所謂此中已有
如來全身

諸善男子 於我滅後

誰能受持

讀誦此經 今於佛前 自說誓言
前已詢求持人今自說擇此復諄諄者欲
以妙法付囑有在故也

此經難持

若覽持者

我則歡喜

諸佛亦然

如是之人

諸佛所歎

是則勇猛

是則精進

是名持戒

行頭陀者

則爲疾得

無上佛道

此及下文皆結顯勸持也古之所謂持經

非手執口誦而已要以是道內自攝持由

是得無畏力故是則勇猛超不退地故是

則精進內外自正故是名持戒塵勞自淨

故是爲頭陀如此乃可疾得佛道所以暫

持爲難而諸佛喜歡也若雖書持讀說而

不能造此其猶蠹蟲食木野禽鳴春風氣
宣使曾無意謂又何貴於書持而稱歎若

此學者當明深旨以盡持經之道

能於來世 讀持此經

是真佛子

記而卒於圓該圓證之事是爲三周開示之終也

住淳善地 佛滅度後 能解其義

是諸天人 世間之眼

顯法妙利勸進弘持令深證妙法也

妙法蓮華經提婆達多品第十二

化流漓世必藉淳風開人天眼實資解義

於恐畏世

能須臾說

一切天人

提婆達多亦曰調達此云天授爲斛飯王子禱天而生也昔爲仙人授佛妙法如來因之遂致成佛今欲明其所授而顯法妙

所謂若見此法師生心如佛想此尊師重道勉進弘持也三周開示文終於此總而言之初於法說歎二智明十如全提妙法

利故以名品

開佛知見次喻說斥羊鹿示白牛明迷此則墮火宅悟此則造佛地後因緣說顯所迷之通智示教導之遠因滅化城指寶所皆所以開而示之使見自己本來佛性以見是性則無不成佛故領悟之後各示佛

爾時佛告諸菩薩及天人四衆吾於過去無量劫中求法華經無有懈倦於多劫中常作國王發願求於無上菩提心不退轉

欲以正道優於天下

爲欲滿足六波羅密勤行布施心無惓惜象馬七珍國城妻子奴婢僕從頭目髓腦身肉手足不惜軀命

欲以正行率彼貪迷

時世人民壽命無量爲於法故捐捨國位委政太子

由道之優裕故君遂無爲

擊鼓宣令四方求法誰能爲我說大乘者吾

當終身供給走使

兼忘天下惟道是從

時有仙人來白王言我有大乘名妙法華經若不違我當爲宣說

王聞仙言歡喜踊躍即隨仙人供給所須採

菓汲水拾薪設食乃至以身而爲床座身心

無倦于時奉事經于千歲爲於法故精勤給

侍令無所乏

此終身供給也以身爲床座示忘身爲法

無疲厭也

爾時世尊欲重宣此義而說偈言

我念過去劫 爲求大法故 雖作世國王
不貪五欲樂 振鐘告四方 誰有大法者

若爲我解說 身當爲奴僕

屈已如此使天下知有至貴者不在國爵

也

時有阿私仙 來白於大王 我有微妙法

世間所希有 若能修行者 吾當爲汝說

時王聞仙言 心生大喜悅 即便隨仙人

供給於所須 採薪及菓蓏 隨時恭敬與

情存妙法故 身心無懈倦

阿私此云無比其形與法皆無比也樹生

曰菓蓏生曰蓏

普爲諸衆生 勤求於大法 亦不爲己身

及以五欲樂 故爲大國王 勤求獲此法

遂致得成佛 今故爲汝說

皆頌往昔求法也

佛告諸比丘爾時王者則我身是時仙人者
今提婆達多是由提婆達多善知識故令我
具足六波羅蜜慈悲喜捨三十二相八十種
好紫磨金色十力四無所畏四攝法十八不
共神通道力成等正覺廣度衆生皆因提婆
達多善知識故

告諸四衆提婆達多却後過無量劫當得成
佛號曰天王如來應供正遍知明行足善逝

世間解無上士調御丈夫天人師佛世尊世

界名天道

號天王者釋迦資之以成道是爲天中天
之法王也

時天王佛住世二十中劫廣爲衆生說於妙

法恒河沙衆生得阿羅漢果無量衆生發緣
覺心恒河沙衆生發無上道心得無生忍至
不退轉

記其當來住世利被三乘

時天王佛般涅槃後正法住世二十中劫全
身舍利起土寶塔高六十由旬縱廣四十由
旬諸天人民悉以雜華抹香燒香塗香衣服
瓔珞幢幡寶蓋伎樂歌舞頌禮拜供養七寶妙
塔無量衆生得阿羅漢果無量衆生悟辟支
佛不可思議衆生發菩提心至不退轉

滅後正法亦被三乘

遠三

十六

佛告諸比丘未來世中若有善男子善女人
聞妙法華經提婆達多品淨心信敬不生疑
惑者不墮地獄餓鬼畜生生十方佛前所生
之處常聞此經若生人天中受勝妙樂若存

佛前蓮華化生

此品明釋迦因行求法以致成佛故聞者淨信不疑斯可遠惡道生佛家也
前明釋尊資成佛因此明龍女資成佛果皆顯一乘妙利也

於時下方多寶世尊所從菩薩名曰智積白多寶佛當還本土作證事畢於是告還發起後緣
釋迦牟尼佛告智積曰善男子且待須臾此有菩薩名文殊師利可與相見論說妙法可還本土

爾時文殊師利坐千葉蓮華大如車輪俱來菩薩亦坐寶蓮華從於大海娑竭羅龍宮自然涌出住虛空中詣靈鷲山從蓮華下至於佛所頭面敬禮二世尊足修敬已畢往智積

所共相慰問却坐一面

序衆之初文殊預會今又從海涌出者智體周遍十方對現如響應聲無去來相但隨機顯法耳今顯龍宮所化之事故示從海出也

智積菩薩問文殊師利仁往龍宮所化衆生其數幾何文殊師利言其數無量不可稱計非口所宣非心所測且待須臾自當證知所言未竟無數菩薩坐寶蓮華從海涌出詣靈鷲山住在虛空此諸菩薩皆是文殊師利之所化度具菩薩行皆共論說六波羅密本聲聞人在虛空中說聲聞行今皆修行大乘空義

此文殊於龍宮所化之衆也龍宮非人所居則所化衆生皆龍類而一聞妙法遂成

菩薩足知一切衆生莫不具佛知見只欠開悟耳言本聲聞人等者明所化之機亦具三乘而由權入實也

文殊師利謂智積曰於海教化其事如是爾時智積菩薩以偈讚曰

大智德勇健 化度無量衆 今此諸大會
及我皆已見

謂已見智德健化之事此領自當證知之語

演暢實相義 開闡一乘法 廣導諸衆生
令速成菩薩

上讚所化此讚能化

文殊師利言我於海中唯常宣說妙法華經
此答前偈也前舍問意而譯文不顯正法華則顯矣彼前偈云至仁慧無量化海衆

寶數惟爲露聖旨分別說其意普首答曰
在海中唯演正法華經
智積問文殊師利言此經甚深微妙諸經中
寶世所希有頗有衆生勤加精進修行此經
速得佛不

文殊師利言有娑竭羅龍王女年始八歲智
慧利根善知衆生諸根行業得陀羅尼諸佛
所說甚深秘藏悉能受持深入禪定了達諸
法於剎那頃發菩提心得不退轉辯才無礙
慈念衆生猶如赤子功德具足心念口演微
妙廣大慈悲仁讓志意和雅能至菩提

即修行此經速得佛之證也龍宮無數菩
薩皆是文殊化度而獨舉八歲龍女成佛
者明佛性不間男女不在老成不擇異類
但根智之利所造之深剎那廻光則菩提

可至亦乃破三乘遠繫而進其濡滯也

智積菩薩言我見釋迦如來於無量劫難行

苦行積功累德求菩提道未曾止息觀三千

大千世界乃至無有如芥子許非是菩薩捨

身命處爲衆生故然後乃得成菩提道不信

此女於須臾頃便成正覺

此孰別教之迹疑圓頓之理

言論未訖時龍王女忽現於前頭面禮敬却
住一頃以偈讚曰

深達罪福相 遍照於十方 微妙淨法身

具相三十二 以八十種好 用莊嚴法身

天人所戴仰 龍神咸恭敬 一切衆生類

無不宗奉者

因智積滯相故讚文殊深達也唯其滯相
則以畜類佛身罪福有異故不信此女須

更成佛唯其深達則大智遍照十方廓然

生佛等同罪福不二則微妙淨體觸處端

嚴不擇龍女矣

又聞成菩提 唯佛當證知

言文殊許之成道其事超絕非小智所測

我闡大乘教 度脫苦衆生

因其許可擔度群生

時舍利弗語龍女言汝謂不久得無上道是
事難信所以者何女身垢穢非是法器云何
能得無上菩提佛道懸曠經無量劫勤苦積
行具修諸度然後乃成又女人身猶有五障
一者不得作梵天王二者帝釋三者魔王四
者轉輪聖王五者佛身云何女身速得成佛
鷲子依小乘教迹辯難示爲小智釋疑故
也言佛道懸曠女身多障皆小乘教迹也

梵王淨行帝釋少欲魔王堅固輪王大仁
佛具萬德而女人多染多欲懦弱妬害具
足煩惱皆反於上故致五障

爾時龍女有一寶珠價直三千大千世界持
以上佛佛即受之龍女謂智積菩薩尊者舍

達二

二十

利弗言我獻寶珠世尊納受是事疾不答言

甚疾女言以汝神力觀我成佛復速於此當

時衆會皆見龍女忽然之間變成男子具善
薩行即往南方無垢世界坐寶蓮華成等正

覺三十二相八十種好普爲十方一切衆生

演說妙法

珠表妙圓真心持以上佛表捨法愛也法

愛不存則妙心無垢成佛之要無速於此

故即往南方無垢世界成等正覺也經云

法性如大海不說有是非凡夫賢聖人乎

等無高下唯在心垢滅取證如反掌所以
龍女纔捨法愛遂速成佛也

爾時娑婆世界菩薩聲聞天龍八部人與非
人皆遙見彼龍女成佛普爲時會人天說法
心大歡喜悉遙敬禮

無量衆生聞法解悟得不退轉無量衆生得
受道記無垢世界六反震動

彼衆蒙益彼土瑞應也道記者印證其得
道也

娑婆世界三千衆生住不退地三千衆生發

達二

三一

菩提心而得受記

此衆蒙益亦得道記也

智積菩薩及舍利弗一切衆會默然信受

智積鷲子聞龍女事初皆驚疑而終皆嘿

信蓋妙法功利顯然神速孰當不信哉

妙法蓮華經持品第十三

因前宣付又因上顯勸故衆願持說以廣道化故名持品於文初藥王等願此方持次聲聞衆願他方持後大菩薩願十方持者此方堪忍難化非藥王洪願不能他方爲善國土故聲聞能之十方廣莫故須八十萬億大菩薩也

爾時藥王菩薩摩訶薩及大樂說菩薩摩訶薩與二萬菩薩眷屬俱皆於佛前作是擇言唯願世尊不以爲慮我等於佛滅後當奉持此由寶塔品末顯難勸持故藥王等發大願力不憚其難而願佛無慮後惡世衆生善根轉少多增上慢貪利供養增不善根遠離解脫雖難可教化我等當起

讀誦說此經典

大忍力讀誦此經持說書寫種種供養不惜身命

此領入劫燒接須彌喻難之意而發擇也雖末世惡暴有如劫燒上慢心高有如須彌難可教化而擇無所避故云當起大忍

不惜身命

爾時衆中五百阿羅漢得受記者白佛言世尊我等亦自擇願於異國土廣說此經復有學無學八千人得受記者從座而起合掌向佛作是擇言世尊我等亦當於他國土廣說

遠二

二十二

此經所以者何是娑婆國中人多弊惡懷增上慢功德淺薄瞋濁諂曲心不實故此領立有頂舉大地喻難之意而聲聞自量其力擇化他方善國土也

爾時佛姨母摩訶波闍波提比丘尼與學無

學比丘尼六千人俱從座而起一心合掌瞻仰尊顏目不暫捨

摩訶波提此云大愛道欲擔持經未奉親記故翹竚瞻仰

於時世尊告憍曇彌何故憂色而視如來汝心將無謂我不說汝名授阿耨多羅三藐三菩提記耶憍曇彌我先總說一切聲聞皆已授記今汝欲知記者將來之世當於六萬八千億諸佛法中爲大法師及六千學無學比丘尼俱爲法師

憍曇彌此云尼衆主女人出家自愛道始

故號尼主

汝如是漸漸具菩薩道當得作佛號一切衆生喜見如來應供正遍知明行足善逝世間解無上士調御丈夫天人師佛世尊佛壽

是一切衆生喜見佛及六千菩薩轉次授記得阿耨多羅三藐三菩提

果號喜見者因爲法師以法喜悅人故

爾時羅睺羅母耶輸陀羅比丘尼作是念世尊於授記中獨不說我名佛告耶輸陀羅汝於來世百千萬億諸佛法中修菩薩行爲大法師漸具佛道於善國中當得作佛號具足千萬光相如來應供正遍知明行足善逝世間解無上士調御丈夫天人師佛世尊佛壽無量阿僧祇劫

耶輸示迹蓋表大悲法喜稱適大智智悲雙運然後萬德具足千相光嚴故其果號具足千萬光相

爾時摩訶波闍波提比丘尼及耶輸陀羅比丘尼并其眷屬皆大歡喜得未曾有即於佛

前而說偈言

世尊導師 安隱天人 我等聞記

心安具足 ○謝記也下擔持

諸比丘尼說是偈已白佛言世尊我等亦能於他方國土廣宣此經

亦量力故怯於婆婆

爾時世尊視八十萬億那由他諸菩薩摩訶薩

此方他方不該不遍故青蓮迴眄意被十
方也八十萬億即十方來集之衆

是諸菩薩皆是阿鞞跋致轉不退法輪得諸
陀羅尼即從座起至於佛前一心合掌而作
是念若世尊告勑我等持說此經者當如佛
教廣宣斯法復作是念佛今默然不見告勑
我當云何時諸菩薩敬順佛意并欲自滿本

願便於佛前作師子吼而發誓言世尊我等
於如來滅後周旋往反十方世界能令衆生
書寫此經受持讀誦解說其義如法修行正
憶念皆是佛之威力唯願世尊在於他方遙
見守護

彼一婆婆尚怯弊惡則十方誠難故歸功
佛力復求加護

即時諸菩薩俱同發聲而說偈言

此亦挾前顯難勸持之意說偈故其辭皆
叙末世諸難

唯願不爲慮 於佛滅度後 恐怖惡世中
我等當廣說 有諸無智人 惡口罵詈等
及加刀杖者 我等皆當忍
無智昏惑故邪正相寇

惡世中比丘 邪智心詣曲 未得謂爲得

我慢心充滿
此大林之荆棘大田之稂莠也

或有阿練若 納衣在空閑 自謂行真道
輕賤人間者 貪著利養故 與白衣說法
爲世所恭敬 三 如六通羅漢

二十五

此寄法借勢矯言偽行以竊名苟利盪曆
恭敬者也阿練若此云寂靜處

是人懷惡心 常念世俗事 假名阿練若
好出我等過 而作如是言 此諸比丘等
爲貪利養故 說外道論義 自作此經典
誑惑世間人 爲求名聞故 分別於是經
以愚嫉賢以僞謗真正末世之情耳

常在大衆中 欲毆我等故 向國王大臣
婆羅門居士 及餘比丘衆 詐謗說我惡
謂是邪見人 說是道論義 我等敬佛故

悉忍是諸惡 爲斯所輕言 汝等皆是佛
如此輕慢言 皆當忍受之

此皆濫惡之言所謂好出我等過也謗謂
自作此經故刻言汝皆是佛皆輕慢之言
濁劫惡世中 多有諸恐怖 惡鬼入其身
罵詈毀辱我

惡鬼入身如楞嚴說惡魔能飛精附人許
露人事罵者操法禁之近於羈詈者肆言
罔之異於罰

我等敬信佛 當著忍辱鎧 爲說是經故
忍此諸難事 我不愛身命 但惜無上道
我等於來世 護持佛所囑 世尊自當知
濁世惡比丘 不知佛方便 隨宜所說法
惡口而噴罵 數數見擯出 遠離於塔寺
如是等衆惡 念佛告勑故 皆當忍是事

隨宜說法意趣難解故濁流昧之惡口而
謗顰蹙而嫌乃至擯逐而不容以念前勸
持之勑故皆當忍之

諸聚落城邑 其有求法者 我皆到其所
說佛所囑法 我是世尊使 處衆無所畏
我當善說法 願佛安隱住

世尊使者言假佛威力故能無畏而善說
願佛安隱不以爲慮也

我於世尊前 諸來十方佛 發如是誓言

佛自知我心

諸來十方即多寶及分身也

妙法蓮華經要解卷十一

音釋

培 蒲溝切 謂曉之淳切告
把也 切在蔓除呂切久
曰蹊 峴也又作佢
頓蒲民切笑貌

妙法蓮華經要解卷第十二

遠三

溫陵開元蓮寺比丘

戒環解

安樂行品第十四

爾時文殊師利法王子菩薩摩訶薩白佛言
世尊是諸菩薩甚爲難有敬順佛故發大誓
願於後惡世護持讀說是法華經

讀持品事也

世尊菩薩摩訶薩於後惡世云何能說是經

請問云何所行乃能說是經得無諸難此

發起安樂行法也以文殊請者示依正智

發起正行

佛告文殊師利若菩薩摩訶薩於後惡世欲

說是經當安住四法

萬行依於三業本於智悲智以處已悲以
應物皆欲不失其正正則安而樂不正則
危而愛故此特依文殊正智示正身正語
遠三
正意大悲四法名安樂行品由前持品善
薩敬順佛意願於惡世護持此經擔忍諸
難而大聖以謂能忍諸難未若必使之無
難故爲說四安樂行四行既正則一性安

恬靜與道合動與神會其完不爲物挫雖
臨危難不知其爲危難也其固不爲物傾
雖對欲惡不知其爲欲惡也夫躬行是行
則涉惡世而持經入紛華以應物無所往
而不安且樂矣是謂必使之無難也

一者安住菩薩行處親近處能爲衆生演說
是經

趣操之謂行狎習之謂近二者不違於道
是謂菩薩行處近處此身行之要也

二處各有事行理行非事無以涉俗非理
達三

無以契真理事兼通真俗不礙然後利生
二

弘法觸處安樂矣

文殊師利云何名菩薩摩訶薩行處若菩薩
摩訶薩住忍辱地柔和善順而不卒暴心亦
不驚

行處必住忍辱者六度適時爲用而涉難

莫尚於忍蓋趨事而動則悔吝生焉故須

忍以御之惟能忍故於剛能柔而物不能
挫於逆能順而物不能害於事能審而所
施不暴於微能察而所遇不驚由是克成

安樂行也

又復於法無所行

法指一切行法也雖行是法而不住相名
無所行蓋有所則有能能所角立物我成
敵則患難生而安樂喪矣

而觀諸法如實相亦不行不分別是名菩薩

摩訶薩行處

自所行之法而觀諸法也如實相即無所
觀亦不行言亦無所行也不分別即情識
都忘是非雙泯菩薩趣操如是而已

達三云何名菩薩摩訶薩近處

初事行以戒定爲體

菩薩摩訶薩不親近國王王子大臣官長
雖外護可尊恐挾勢妨道苟志於此則身
處山林心懸魏闕能暫安樂乎

不親近諸外道梵志尼犍子等及造世俗文筆讚詠外書及路伽耶陀逆路伽耶陀者

梵志即出家外道尼犍在家外道路伽耶此云惡論議逆路伽耶此云惡問難不親外道息異見也不造俗文絕異端也遠惡議

難離曲辯也

亦不親近諸有兜戲相捉相撲及那羅等種種變現之戲

遺教云若種種戲論其心則亂戲論尚亂

況親近乎相捉擒也相撲抵角也那羅

延神勇捍多力今指騰躍凶伎變現戲即

諸幻術也

又不親近旃陀羅及畜猪羊雞狗販獵漁捕

諸惡律儀

遠惡緣也旃陀羅此云嚴懾謂以嚴厲自

懶如文身惡服之類毗尼藏有善律儀惡

律儀

如是人等或時來者則爲說法無所希望

如是人等通指權勢已下雖不親狎或爲

法來即清淨爲說

又不親近求聲聞比丘比丘尼優婆塞優婆

夷亦不問訊若於房中若經行處若在講堂

中不共住止或時來者隨宜說法無所希求

小乘於法未融多起諍論妨安樂行故不

親近亦不問訊非慢之也慎媒狎耳遠三

四

文殊師利又菩薩摩訥薩不應於女人身取能生欲想相而爲說法亦不樂見若入他家

不與小女處女寡女等共語

說法當忘情想接語當避嫌疑小女處女

非賓主之敵乃譏毀之端

亦復不近五種不男之人以爲親厚

既非法器又近於染故不應親五種猥媠
不須辯析

不獨入他家若有因緣須獨入時但一心念佛

不獨入欲潔身也但念佛欲正心也

若爲女人說法不露齒笑不現宵臆乃至爲法猶不親厚況復餘事

容止不攝則致疑生染

不樂畜年少弟子沙彌小兒亦不樂與同師

易致擾惱妨安樂行

常好坐禪在於閑處修攝其心文殊師利是名初親近處

即第二近處也初親近處以戒定爲體第
二近處以觀智爲體所以融前戒定使圓

契實相乃成妙行也
復次菩薩摩訶薩觀一切法空如實相不顛倒不動不退不轉
一切諸法當體真淨不受一塵曰空無動無壞離諸幻妄曰實相菩薩觀一切法空如其實相無所加損故見不顛倒而心無動轉也見不顛倒即頌所謂亦不分別諸法有無是非等也心無動轉即頌所謂攝心不動如須彌山也蓋心法本寂相待成搖由見顛倒則以法爲有生有起故於心有動有轉若雲駛故月運也能如實觀則於心不動不退而了法不生不起若風止則波澄也然則心法一也以倒心觀之則妄境紛擎以實相觀之則真機自寂是故修安樂行貴如實觀

如虛空無所有性一切語言道斷不生不出
不起無名無相實無所有無量無邊無礙無

障但以因緣有從顛倒生故說

無所有性者生出起滅名相等性皆無也
名相皆無則詮示不及故語言道斷無量

無邊言如空之不可窮極也無礙無障言

如空之不可分辯也實相如是何言說之
能及耶則凡可說者但是從緣而有顛倒

之法當知不從緣有不從倒生者竟不可

說也

常樂觀如是法相是名菩薩摩訶薩第二親

近處

常如是觀乃能融前事行以成妙行

爾時世尊欲重宣此義而說偈言

若有菩薩 於後惡世 無怖畏心

欲說是經

應入行處 及親近處

○初標次釋

常離國王

及國王子

大臣官長

兒險戲者

及旃陀羅

外道梵志

亦不親近

增上慢人

貪著小乘

三藏學者

此戒離權勢外道兒戲等三藏學即愚法

小教

破戒比丘

名字羅漢

及比丘尼

好戲笑者

深著五欲

求現滅度

諸優婆夷

皆勿親近

破戒言無行名字言無實戲笑言多僻著

欲言多染求現滅度謂不修梵行妄希道

果皆非正人故勿親近

若是人等

以好心來

到菩薩所

爲聞佛道

菩薩則以

無所畏心

不懷希望

而爲說法

頌清淨說法也能無所著故無所畏

寡女處女

及諸不男

皆勿親近

以爲親厚

亦莫親近

屠兒魁膾

畋獵漁捕

爲利殺害

販肉自活

衒賣女色

如是之人

皆勿親近

戒離婦女不男惡律也

又復不行

菩薩行處

兇險相撲

種種嬉戲

諸姪女等

盡勿親近

牒結前文也

莫獨屏處

爲女說法

若說法時

無得戲笑

入里乞食

將一比丘

若無比丘

一心念佛

正身之至也屏僻處里巒中也乞食之法

自伏貢高發他仁善

是則名爲 行處近處 以此二處
能安樂說 雙結也
各連事行而舉偈又各離事行而頌文義

可辯

又復不行 上中下法 有爲無爲

實不實法

亦不分別

上中下法

有爲無爲

不得諸法

不知不見

是則名爲

不得諸法

是則名爲

是則名爲

頌觀一切法空如實相不顛倒不動轉等
也真空實相擬心即妄若復分別有無是
非皆顛倒也

觀一切法 皆無所有 猶如虛空
無有堅固 不生不出 不動不退

達三

常住一相 是名近處

頌如虛空無所有性至無礙無障等常住

一相謂無生出動退等異也

若有比丘 於我滅後 入是行處

及親近處 說斯經時 無有怯弱

深造於理故無怯弱謂無怖畏心能安樂

說也

菩薩有時 入於靜室 以正憶念

隨義觀法 從禪定起 爲諸國王

王子臣民 婆羅門等 開化演暢

說斯經典 其心安隱 無有怯弱

頌常樂觀如是法相而釋無怯弱之所以
文殊師利 是名菩薩 安住初法

能於後世 說法華經

初法即正身行也

又文殊師利如來滅後於末法中欲說是經
應住安樂行若口宣說

應住等者要心住口說也心口相應則語
行正矣

若讀經時不樂說人及經典過亦不輕慢諸
達三 九 餘法師不說他人好惡長短

經有大小乘人有大小機以乘對機隨宜
難解故讀經之時易求其過是以戒之不
慢餘師者不依大輕小不依圓慢偏也不
說長短者內以息業外以息諍此語行之

要也

於聲聞人亦不稱名說其過惡亦不稱名讚

歎其美又亦不生怨嫌之心善修如是安樂心故諸有聽者不逆其意有所難問不以小乘法答但以大乘而爲解說令得一切種智

說其過則令失小讚其美則令退大亦不

怨其妨道嫌其鄙劣非唯不出諸口又亦不生於心可謂善修安樂心也由其善修安樂之心無所讚毀怨嫌故能順其機而導達之

爾時世尊欲重宣此義而說偈言

菩薩常樂

安隱說法

常樂說法無復俗論則語行自正

於清淨地

而施床座

以油塗身

澡浴塵穢

著新淨衣

內外俱淨

安處法座

隨問爲說

淨身淨衣非好爲雅潔欲稱其心淨與說法淨耳故曰內外俱淨安處隨問者虛已應物如鐘待叩也西方以香油爲淨飾

若有比丘

及比丘尼

諸優婆塞

及優婆夷

國王王子

群臣士民

以微妙義

和顏爲說

若有難問

隨義而答

因緣譬喻

敷演分別

以是方便

遠三皆使發心

十漸漸增益

入於佛道

此依正語順機導達也

除懶惰意

及懈怠想

離諸憂惱

慈心說法

晝夜常說

無上道教

以諸因緣

無量譬喻

開示衆生

咸令歡喜

懶惰妨於勇猛懈怠妨於精進憂惱妨於安樂菩薩欲依語行說法利物故除懶惰意離諸憂惱晝夜常說者弘法之心無間斷也

衣服卧具

飲食醫藥

而於其中

無所希望

但一心念

說法因緣

願成佛道

令衆亦爾

是則大利

安樂供養

所志在法不在物故不希衣服四事供養但念說法安樂供養蓋四事供養特爲小利說法供養乃爲大利

我滅度後

若有比丘

能演說斯

妙法華經

心無嫉恚

諸惱障礙

亦無憂愁

及罵詈者

又無怖畏

加刀杖等 亦無擯出 安住忍故

明語行當宗於忍也說斯經者內之恚惱憂愁外之罵怖杖擯諸難自無爲能安住忍故則忍不可不宗也諸難自無所謂必使之無難

智者如是 善修其心 能住安樂

如我上說 其人功德 千萬億劫

籌數譬喻 說不能盡

如是善修者如上正語之行以修也善修其心所謂修已能住安樂所謂安安修已安安聖人之徒也爲聖人之徒行聖人之道則功與道洪德隨物廣何可勝窮哉又文殊師利菩薩摩訶薩於後末世法欲滅時受持讀誦斯經典者無懷嫉妬詬詬之心亦勿輕罵學佛道者求其長短

姨妬詭誑下至戲論諸法皆意地微細邪行故須正之也法欲滅時世道交喪邪暴交作人多嫉詭則學佛者易見輕罵而求其長短故戒持經者無懷嫉詭等事乃因時制行所以息業也

若比丘比丘尼優婆塞優婆夷求聲聞者求辟支佛者求菩薩道者無得惱之令其疑悔語其人言汝等去道甚遠終不能得一切種智所以者何汝是放逸之人於道懈怠故四衆有求三乘者當隨機與進轉勿惱之令失善利從語其人言下皆惱之之事又亦不應戲論諸法有所諍競顛倒分別諸法有無名戲論諍競皆爲意業故應息之

當於一切衆生起大悲想於諸如來起慈父

想於諸菩薩起大師想

悲想則愍其迷滯而思濟也父想則依其法化而求怙也師想則景其道行而思齊也

於十方諸大菩薩常應深心恭敬禮拜

爲其愍衆行道深心利物故應深心敬之於一切衆生平等說法以順法故不多不少乃至深愛法者亦不爲多說

平等言不黨順法言稱理雖彼深愛當量所堪貴不失人亦不失言

文殊師利是菩薩摩訶薩於後末世法欲滅時有成就是第三安樂行者說是法時無能惱亂

此必使無難之効也

得好同學共讀誦是經亦得大衆而來聽受

行是行故樂而得明寬而得衆

聽已能持持已能誦誦已能說說已能書若使人書供養經卷恭敬尊重讚歎

因使法利展轉漫廣則法雖欲滅而未滅故應成就是第三行

達三

十三

爾時世尊欲重宣此義而說偈言

若欲說是經 當捨嫉恚慢 誦詐邪偽心

常修貞直行

此意行之要也

不輕蔑於人 亦不戲論法 不令他疑悔

云汝不得佛

頌不惱四衆等蔑忽也

是佛子說法 常柔和能忍 慈悲於一切

不生懈怠心 十方大菩薩 懿衆故行道

應生恭敬心 是則我大師 於諸佛世尊

生無上父想 破於憍慢心 說法無障礙

忍爲四行之宗故每言之自慈悲於一切

已下頌當於一切起大悲想等

第三法如是 智者應守護 一心安樂行

無量衆所敬

質直柔忍慈下恭上安行是道孰不愛敬

又文殊師利菩薩摩訶薩於後末世法欲滅時有持是法華經者於在家出家人中生大慈心於非菩薩人中生大悲心

大乘修行初皆以智正行終皆以悲成智

故四安樂行先依正智正業而後起大悲

利生也然或生大慈或生大悲者慈能興樂悲能愍濟四衆信解佛法名在家菩薩出家菩薩闡提不信名非菩薩以能信解故生大慈而與之法樂以闡提故生大悲

而愍其迷失也

應作是念如是之人則爲大失如來方便隨宜說法不聞不知不覺不問不信不解其人雖不問不信不解是經我得阿耨多羅三藐三菩提時隨在何地以神通力智慧力引之令得住是法中

達三

十四

此皆愍其迷失也隨宜說法即開三顯一之法也不聞不知不覺言眷迷自障也不問不信不解言顛蒙自墮也然彼雖不問不解而菩薩大悲誓終濟度文殊師利是菩薩摩訶薩於如來滅後有成就此第四法者說是法時無有過失

第四行法回智運悲總備前行故無過失常爲比丘比丘尼優婆塞優婆夷國王王子大臣人民婆羅門居士等供養恭敬尊重讚

歎虛空諸天爲聽法故亦常隨侍

慈與悲大故七衆悅服行與法勝故諸天歸向

若在聚落城邑空閑林中有人來欲難問者諸天晝夜常爲法故而衛護之能令聽者皆

得歡喜所以者何此經是一切過去未來現

在諸佛神力所護故

難問必有折挫得其衛護則正念不失以諸佛所護故諸天不得不護

文殊師利是法華經於無量國中乃至名字

達三

十五

不可得聞何況得見受持讀誦

難遇如此所以愍其不信不解爲大失

文殊師利譬如強力轉輪聖王欲以威勢降伏諸國而諸小王不順其命時轉輪王起種種兵而往討伐

此喻意明是經所以難聞難見者爲陰魔熾盛多怨難信不妄說故輪王譬化身佛諸國譬五陰境小王譬五陰等魔不順其命譬無明煩惱未調伏也以威不行而起兵討伐譬但以如來知見力無畏法不能攝伏諸微細惑故設三乘斷治之法是謂起種種兵

輪王髻珠用鎮寶位妄與則王屬驚恠法華上乘佛佛授手妄說則衆心驚疑文殊師利如來亦復如是以禪定智慧力得法國土王於三界而諸魔王不肯順伏如來賢聖諸將與之共戰

如輪王振威小王不順遂起種種兵法國土即法界真境賢聖將指三乘衆也

其有功者心亦歡喜於四衆中爲說諸經令其心悅賜以禪定解脫無漏根力諸法之財又復賜與涅槃之城言得滅度引導其心令皆歡喜而不爲說是法華經

如隨功賞賜而不與髻珠也無漏根力即五根五力諸法之財通指道品利用之法涅槃城即中道止息之權果

文殊師利如轉輪王見諸兵衆有大功者心甚歡喜以此難信之珠久在髻中不妄與人而今與之

言難信珠者賜非其宜則大驚恠

進三十六

此譬三乘之衆能伏陰魔隨功淺深獲諸法利唯未與說一乘法也

馬車乘奴婢人民

此譬三乘之衆能伏陰魔隨功淺深獲諸法利唯未與說一乘法也

唯髻中明珠不以與之所以者何獨王頂上

有此一珠若以與之王諸眷屬必大驚恠

化一切衆生見賢聖軍與五陰魔煩惱魔死
魔共戰有大功勲滅三毒出三界破魔網爾
時如來亦大歡喜此法華經能令衆生至一
切智一切世間多怨難信先所未說而今說
之

魔羅此云殺者謂能興苦難殺人慧命也
煩惱魔爲生死因陰魔死魔爲生死果故
滅之破之即出三界也多怨爲衆魔未伏
難信爲群機未淳

文殊師利此法華經是諸如來第一之說於
諸說中最爲甚深末後賜與如彼強力之王

達三十七
久護明珠今乃與之

第一之說如頂上一珠末後賜與如久待

大功

文殊師利此法華經諸佛如來秘密之藏於
諸經中最在其上長夜守護不妄宣說始於
今日乃與汝等而敷演之

秘密如藏髻中最上如在王頂四十餘年
於生死長夜守此待機故云長夜守護
爾時世尊欲重宣此義而說偈言
常行忍辱 哀愍一切 乃能演說

惡世說經多怨難信當以忍辱哀愍爲本
後末世時持此經者於家出家
及非菩薩應生慈悲斯等不聞

不信是經以諸方便則爲大失我得佛道
譬如強力爲說此法令住其中

賞賜諸物轉輪之王兵戰有功

及諸田宅象馬車乘嚴身之具

種種珍寶奴婢財物歡喜賜與

如有勇健能爲難事王解髻中
明珠賜之

如來亦爾爲諸法王忍辱大力

智慧寶藏 以大慈悲

如法化世

若人惡罵

口則閉塞

遊行無畏

見一切人 受諸苦惱

欲求解脫

如師子王 智慧光明

如日之照

與諸魔戰 爲是衆生

說種種法

常無憂惱

顏色鮮白者轉報障滅順現衰

以大方便 說此諸經

既知衆生

惡業也衆生樂慕刀毒不加轉煩惱障滅

得其力已 末後乃爲

說是法華

順後應報也智慧光明如日之照轉無明

如王解髻 明珠與之

此經爲尊

障滅三際癡暗也樂慕給使言常享妙樂

應當親近 欲得安隱

不妄開示

口則閉塞言無由發惡如師子王言障怖

今正是時 爲汝等說

我滅度後

永離優遊自在

求佛道者 演說斯經

若於夢中

但見妙事

結答云何能說是經之間也

遠三

持經之人四行功成當克妙果已定於未

能行四行故讀持是經易克勝果

十九

形之分故先於夢中見之以行純障淨故

讀是經者 常無憂惱

無復雜想但見妙事下舉妙事

顏色鮮白 不生貧窮

見諸如來 坐師子座

諸比丘衆

衆生樂見 如慕賢聖

園繞說法 數如恒沙

又見龍神

以爲給使 刀杖不加

天諸童子 恭敬合掌

阿修羅等

毒不能害 又見諸佛

身相金色

放無量光

照於一切

以梵音聲

演說諸法

行純心淨無雜想故於自他境不離法行

故見佛說法見已亦然

佛爲四衆

說無上法

見身處中

合掌讚佛

聞法歡喜

而爲供養

得陀羅尼

證不退智

佛知其心

深入佛道

即爲授記

成最正覺

汝善男子

當於來世

得無量智

佛之大道

國土嚴淨

廣大無比

亦有四衆

合掌聽法

又見自身

深入禪定

修習善法

證諸實相

諸佛身金色

見十方佛

在山林中

百福相莊嚴

聞法爲人說

常有是好夢

重諷見十方佛之事以結前起後也

又夢作國王 捨宮殿眷屬 及上妙五欲
行詣於道場 在菩提樹下 而處師子座

求道過七日 得諸佛之智 成無上道已

起而轉法輪 爲四衆說法

經千萬億劫

說無漏妙法 度無量衆生

後當入涅槃

如煙盡燈滅

此歷見修進成佛始終之行也諸皆由行

得果之先見是相現前當克是果矣然皆

迷三

二十

依夢說者欲令行人觀一切法空無所有
但以因緣從顛倒生自雖見佛聞法乃至

圓成佛道皆爲夢事了不可得無有常住
亦無起滅常觀是相然後於一切處得真
安樂行也

若後惡世中 說是第一法 是人得大利
如上諸功德

妙法蓮華經要解卷第十二

音釋

販方万切賤買賣也賣切輒胡絹切折

妙法蓮華經要解卷第十三

遠四

溫陵開元蓮寺比丘

戒璵解

從地涌出品第十五

此顯妙法智力所化之迹也娑婆下界有

六萬恒沙菩薩從無數劫修佛智慧悉是

釋尊所化常樂靜處勤行精進故不依人

天而住下方空中以示常樂深智無有障

礙也今爲顯此妙迹示作遺模兼將發起

壽量秘說故從地涌出因以名品

爾時他方國土諸來菩薩摩訶薩過八恒河

沙數於大衆中起合掌作禮而白佛言世尊

若聽我等於佛滅後在此娑婆世界勤加精

進護持讀誦書寫供養是經典者當於此土

而廣說之

此法集之衆欲從他方來此持經

爾時佛告諸菩薩摩訶薩衆止善男子不須汝等護持此經所以者何我娑婆世界自有六萬恒河沙等菩薩摩訶薩一一菩薩各有六萬恒河沙眷屬是諸人等能於我滅後護持讀誦廣說此經

佛止之者非有違拒爲將顯迹顯法故也

顯迹者顯佛所化示彼來儀顯法者此固

圓足無待於外

佛說是時娑婆世界三千大千國土地皆震裂而於其中有無量千萬億菩薩摩訶薩同

時漏出

深智現前大千不礙

是諸菩薩身皆金色三十二相無量光明先

盡在此娑婆世界之下此界虛空中住

在此娑婆界下方空中住以示常樂深智

無有障礙也

是諸菩薩聞釋迦牟尼佛所說音聲從下發來

此以真說彼以心聞文殊所謂心闡洞十方

書

二

一一菩薩皆是大衆唱導之首各將六萬恒

河沙眷屬况將五萬四萬三萬二萬一萬恒

河沙等眷屬者况復乃至一恒河沙半恒河沙四分之一乃至千萬億那由他分之一

比指沙數自多反少

況復千萬億那由他眷屬况復億萬眷屬況復千萬百萬乃至一萬况復一千一百乃至

一十况復將五四三二一弟子者

此指該數自多反少

況復單已樂遠離行如是等比無量無邊笑

數譬喻所不能知

此指單數自少反多偈云單已無眷屬其數轉過上乍而觀之六萬河沙多於單已詳而觀之單已之數轉過河沙然則一已非寡沙衆非常多法法本體離諸數量多寡

之限特人情妄立耳此衆來儀所以遣情顯妙也

是諸菩薩從地出已各詣虛空七寶妙塔多寶如來釋迦牟尼佛所到已向二世尊頭面禮足及至諸寶樹下師子座上佛所亦皆作

進四

三

禮右遶三匝合掌恭敬以諸菩薩種種讚法而以讚歎住一面欣樂瞻仰於二世尊是諸菩薩摩訶薩從初漏出以諸菩薩種種讚法而讚於佛如是時間經五十小劫是時釋迦牟尼佛嘿然而坐及諸四衆亦皆嘿然五

十小劫佛神力故令諸大眾謂如半日

聖人神智方便法門能延一日以爲一劫能促一劫以爲一日蓋道無遷變情有頃久猶如夢人不移一時而夢歷多歲則頃久之情初無定也故聖人對機示現延促而本無延促所言菩薩讚佛經劫則於促示延耳又令大眾謂如半日則於延現促耳所以然者將欲顯發宣示諸佛智慧自在神通之力使忘延促之情而深證實相故也華嚴云一念普觀無量劫無去無來亦無住如是了知三世事超諸方便成十力夫能一念普觀無去來住則了斯延促皆方便耳

爾時四衆亦以佛神力故見諸菩薩遍滿無量百千萬億國土虛空

四衆肉眼礙而非通而能見無量國土者假佛通力故也夫於衆一多互陳於時延促互現於見通礙互用者以明物量無窮時無止分無常而警發常情使去其倒心限意依無礙智圓融妙達繇是進契壽量秘說而得入佛慧成就佛身故也是故此品事法雖爲顯迹勸持又爲壽量引發也是菩薩衆中有四導師一名上行二名無邊行三名淨行四名安立行是四菩薩於其衆中最爲上首唱導之師在大衆前各共合掌觀釋迦牟尼佛而問訊言世尊少病少惱安樂行不所應度者受教易不令世尊生疲勞耶爾時四大菩薩而說偈言

世尊安樂少病少惱教化衆生得無疲倦又諸衆生受化易不

不令世尊 生疲勞耶

問居堪忍與民同患之事也

爾時世尊於菩薩大衆中而作是言如是如是諸善男子如來安樂少病少惱諸衆生等易可化度無有疲勞所以者何是諸衆生世世已來常受我化亦於過去諸佛供養尊重種諸善根此諸衆生始見我身聞我所說即皆信受入如來慧除先修習學小乘者如是之人我今亦令得聞是經入於佛慧

言世世受化正顯壽量本門所化言亦於

過去種善則兼明智勝會中所化以化緣深故始見始聞即皆信受

爾時諸大菩薩而說偈言

善哉善哉

大雄世尊

諸衆生等

易可化度

能問諸佛

甚深智慧

書四

聞已信行 我等隨喜

於時世尊讚歎上首諸大菩薩善哉善哉善

男子汝等能於如來發隨喜心

爾時彌勒菩薩及八千恒河沙諸菩薩衆皆作是念我等從昔已來不見不聞如是大善

薩摩訶薩衆從地涌出住世尊前合掌供養

問訊如來

彌勒道同大覺智無不照以補處示疑惑利當來之機耳故後偈云願佛爲未來演說令開解

時彌勒菩薩摩訶薩知八千恒河沙諸菩薩等心之所念并欲自決所疑合掌向佛以偈

問曰

無量千萬億 大衆諸菩薩 昔所未曾見願兩足尊說 是從何所來 以何因緣集

總問何來何集

巨身大神通 智慧叵思議 其志念堅固
有大忍辱力 衆生所樂見 爲從何所來
容儀挺特智力異常故聳動衆問

一一諸菩薩 所將諸眷屬 其數無有量
如恒河沙等 或有大菩薩 將六萬恒沙
如是諸大衆 一心求佛道 是諸大師等
六萬恒河沙 俱來供養佛 及護持是經
將五萬恒河 其數過於是 四萬及三萬
二萬至一萬 一千一百等 乃至一恒沙
半及三四分 億萬分之一

此頌沙數自多反少

千萬那由他 萬億諸弟子 乃至於半億
其數復過上 百萬至一萬 一千及一百
五十與一十 乃至三二一

此頌該數自多反少
單已無眷屬 樂於獨處者 俱來至佛所
其數轉過上
此頌單數自少反多
如是諸大衆 若人行籌數 過於恒沙劫
猶不能盡知 是諸大威德 精進菩薩衆
誰爲其說法 教化而成就 從誰初發心
稱揚何佛法 受持行誰經 修習何佛道
見其頗多疑非一世一佛所化故詳問之
如是諸菩薩 神通大智力 四方地震裂
皆從中踊出 世尊我昔來 未曾見是事
願說其所從 國土之名號
結問何來也
我常遊諸國 未曾見是衆 我於此衆中
乃不識一人 忽然從地出 願說其因緣

今此之大會 無量百千億 是諸菩薩等
皆欲知此事 是諸菩薩衆 本末之因緣
無量德世尊 唯願決衆疑

爾時釋迦牟尼分身諸佛從無量千萬億他
方國土來者在於八方諸寶樹下師子座上

達四

結跏趺坐其佛侍者各各見是菩薩大眾於

三千大千世界四方從地踊出住於虛空各

白其佛言世尊此諸無量無邊阿僧祇菩薩

大眾從何所來爾時諸佛各告侍者諸善男

子且待須臾有菩薩摩訶薩名曰彌勒釋迦

牟尼佛之所授記次後作佛已問斯事佛今

答之汝等自當因是得聞

各自白其佛白分身也

爾時釋迦牟尼佛告彌勒菩薩善哉善哉阿

逸多乃能問佛如是大事汝等當共一心被

精進鎧發堅固意如來今欲顯發宣示諸佛
智慧諸佛自在神通之力諸佛師子奮迅之
力諸佛威猛大勢之力

彌勒姓也號阿逸多此云無能勝大事者

智慧神通奮迅威猛所化多衆之事也將

欲宣示先令被精進鎧等者戒使勇銳諦

聽無以趣深而生疑退也下云我於娑婆

得菩提已教化成就如是多衆即總宣示

廣在後文也宣示諸佛智慧即壽量偈云

我智力如是慧光照無量是也諸佛自在

神通即方便現涅槃而實不滅度是也師

子奮迅之力即常說法教化無數億衆生

是也威猛大勢之力即令顛倒衆生雖近

而不見是也此宣釋迦化迹而言諸佛者

佛佛道同故

爾時世尊欲重宣此義而說偈言

當精進一心 我欲說此事 勿得有疑悔

佛智叵思議 汝今出信力 住於忍善中

昔所未聞法 今皆當得聞 我今安慰汝

勿得懷疑懼 佛無不實語 智慧不可量

所得第一法 甚深叵分別 如是今當說

汝等一心聽

出信力者勉令發信住 忍善者戒令勿退

即令被進鎧發堅固意也

爾時世尊說此偈已告彌勒菩薩我今於此

大眾宣告汝等阿逸多是諸大菩薩摩訶薩

無量無數阿僧祇從地踊出汝等昔所未見

者我於是娑婆世界得阿耨多羅三藐三菩提

提已教化示導是諸菩薩調伏其心令發道

意

答誰說法教化從誰初發心

此諸菩薩皆於是娑婆世界之下此界虛空

中住

答願說所從國土名號

於諸經典讀誦通利思惟分別正憶念

稱其德也於諸經典能讀以取其理誦以通其義思惟以精之正念以持之則其德

足稱矣

阿逸多是諸善男子等不樂在衆多有所說常樂靜處勤行精進未曾休息亦不依止人

天而住常樂深智無有障礙亦常樂於諸佛

之法一心精進求無上慧

釋所以住下方空中之意

爾時世尊欲重宣此義而說偈言

阿逸汝當知 是諸大菩薩 從無數劫來

修習佛智慧 悉是我所化 令發大道心

頌答誰爲教化從誰發心

此等是我子 依止是世界

常行頭陀事

志樂於靜處 捨大衆憒鬧

不樂多所說

如是諸子等 學習我道法

頌答受持誰經修習何道

晝夜常精進 爲求佛道故

在娑婆世界

下方空中住

頌答願說所從國土名號

志念力堅固 常勤求智慧

說種種妙法

其心無所畏

頌德也

我於伽耶城 菩提樹下坐 得成最正覺

轉無上法輪 爾乃教化之 令初發道心

今皆住不退 悉當得成佛

答本末因緣也 意若近跡 實指遠因 摩竭

陁國西南度尼連河至伽耶城又數里至

菩提山有畢鉢羅樹佛坐其下成道

我今說實語 汝等一心信 我從久遠來

教化是等衆 結答也

爾時彌勒菩薩摩訶薩及無數諸菩薩等心

生疑惑怪未曾有而作是念云何世尊於少

時間教化如是無量無邊阿僧祇諸大菩薩

令住阿耨多羅三藐三菩提

迷壽量遠因故有此疑

即白佛言世尊如來爲太子時出於釋宮去

伽耶城不遠坐於道場得成阿耨多羅三藐
達四

三菩提從是已來始過四十餘年世尊云何

於此少時大作佛事以佛勢力以佛功德教

化如是無量大菩薩衆當成阿耨多羅三藐

三菩提世尊此大菩薩衆假使有人於千萬

億劫數不能盡不得其邊斯等久遠已來於無量無邊諸佛所植諸善根成就菩薩道常修梵行世尊如此之事世所難信

勢伽耶近跡故有此難

譬如有人色羨髮黑年二十五指百歲人言是我子其百歲人亦指年少言是我父生育我等是事難信

父少譬釋尊闡化之近子老譬涌出成德之久化近跡久理不相當必言二十五及百歲者取其少猶未壯老已過耄益見相違也

得佛未久合父少也而此大眾至甚爲希有合子老也今日世尊至能作大事合相違也善入出住者於無量三昧或入或出或住妙用自在

我等雖復信佛隨宜所說佛所出言未曾虛妄佛所知者皆悉通達然諸新發意菩薩於佛滅後若聞是語或不信受而起破法罪業因緣唯然世尊願爲解說除我等疑及未來世諸善男子聞此事已亦不生疑爾時彌勒菩薩欲重宣此而說偈言

佛昔從釋種 出家近伽耶 坐於菩提樹通久修梵行善能次第習諸善法巧於問答

爾來尚未久 此諸佛子等 其數不可量
久已行佛道 住於神通力 善學菩薩道
不染世間法 如蓮華在水 從地而踊出
皆起恭敬心 住於世尊前 是事難思議
云何而可信 佛得道甚近 所成就甚多
願爲除衆疑 如實分別說
執近迹疑遠緣而致問也
譬如火壯人 年始二十五 示人百歲子
髮白而面皺 是等我所生 子亦說是父
父少而子老 舉世所不信
所謂寂場八父寂光老兒
世尊亦如是 得道來甚近 是諸菩薩等
志固無怯弱 從無量劫來 而行菩薩道
巧於難問答 其心無所畏 忍辱心決定
端正有威德 十方佛所讚 善能分別說

達四

十二

不樂在人衆 常好在禪定 爲求佛道故
於下空中住

從志固無怯已下皆頌老成之德

我等從佛聞 於此事無疑 願佛爲未來
演說令開解 若有於此經 生疑不信者
即當墮惡道 願今爲解說 是無量菩薩
云何於火時 教化令發心 而住不退地
妙法蓮華經如來壽量品第十六

前品顯迹而滯者迷本故情疑久近見起
生滅欲契如實本際難矣故此顯本釋其
疑滯使知如來本無生滅伽耶之化特爲
機所受之命稱性無量故曰如來壽量品
文云如來如實知見三界之相無有生死
退出亦無在世滅度後云其有菩薩聞說
壽量即能信受願於未來長壽度生至坐

道場說壽亦爾意明本迹一如世相常住

稱性之壽人皆有之苟能正信順受不以生滅心行而自天闕則三界之相可如實

知遂能現壽量以存示生滅而化化智

力神用與如來等矣故曰顯本勸持

爾時佛告諸菩薩及一切大衆諸善男子汝

等當信解如來誠諦之語復告大衆汝等當

信解如來誠諦之語又復告諸大衆汝等當

信解如來誠諦之語

以壽量之本趣深難信故再三發之心實

曰誠言當曰諦

是時菩薩大衆彌勒爲首合掌白佛言世尊

唯願說之我等當信受佛語如是三白已復

言唯願說之我等當信受佛語

爾時世尊知諸菩薩三請不止而告之言汝

等諦聽如來秘密神通之力

應量非量現滅不滅天人莫測是謂秘密

神力

一切世間天人及阿脩羅皆謂今釋迦牟尼佛出釋氏宮去伽耶城不遠坐於道場得阿

耨多羅三藐三菩提

但見其迹

然善男子我實成佛已來無量無邊百千萬

億那由他劫

本實無量

譬如五百千萬億那由他阿僧祇三千大千

世界假使有人抹爲微塵過於東方五百千

萬億那由他阿僧祇國乃下一塵如是東行

盡是微塵諸善男子於意云何是諸世界可得思惟校計知其數不

並如智勝塵墨之喻

彌勒菩薩等俱白佛言世尊是諸世界無量

無邊非笑數所知亦非心力所及一切聲聞
辟支佛以無漏智不能思惟知其限數我等
住阿鞞跋致地於是事中亦所不達世尊如
是諸世界無量無邊

爾時佛告大菩薩衆諸善男子今當分明宣

語汝等是諸世界若著微塵及不著者盡以

爲塵一塵一劫我成佛已來復過於此百千
萬億那由他阿僧祇劫

正明佛壽無量也諸佛壽量悉皆無量衆
生壽量亦復如是但迷真智故妄逐生死

如一墮地獄至無數劫豈非無量壽耶苟
不迷墮則與佛無別矣

自從是來我常在此娑婆世界設法教化亦
於餘處百千萬億那由他阿僧祇國道利衆

生

自從是來謂從塵劫成佛已來言常在此
又在餘處則不唯身相常住亦顯國土常
住也是知娑婆及萬億國無非淨土同一
法界未嘗壞滅其有壞滅皆別業妄見也
諸善男子於是中間我說然燈佛等又復言
諸善男子於是中間我說然燈佛等又復言

其入於涅槃如是皆以方便分別

既曰成佛之久常在利生而中間自說於
然燈佛所得法受記等事疑若近跡又復
現言當入涅槃疑非常在此皆隨機方便

之說耳

遠四

十五

諸善男子若有衆生來至我所我以佛眼觀
其信等諸根利鈍隨所應度處處自說名字
不同年紀大小亦復現言當入涅槃又以種
種方便說微妙法能令衆生發歡喜心
信等諸根謂信根智根等也觀利根即現

長年說大法觀鈍根即現劣應示涅槃所以名字有不同年紀有大小說法有種種皆爲隨機利導發其善心耳

諸善男子如來見諸衆生樂於小法德薄垢重者爲是人說我少出家得阿耨多羅三藐

三菩提然我實成佛已來久遠若斯但以方便教化衆生令入佛道作如是說迹少出家本久成佛

諸善男子如來所演經典皆爲度脫衆生或說已身或說他身或示已身或示他身或示

已事或示他事諸所言說皆實不虛

所演經典說雖異同理無不實也已謂釋迦他謂諸佛說見於言示見於行

所以者何如來如實知見三界之相無有生死若退若出亦無在世及滅度者非實非虛

非如非異不如三界見於三界如斯之事如來明見無有錯謬以諸衆生有種種性種種欲種種行種種憶想分別故欲令生諸善根以若干因緣譬喻言詞種種說法所作佛事未曾暫廢

釋上理無不實而說有異同也三界萬法不容擬心以衆生妄見則種種紛紜以如來實見則一切真寂無有生死乃至滅度者不以生滅相見也不如三界見於三界者不以往來相見也既明見無滯則宜無異說特以衆生性欲行想之心種種不同故說示教化之迹亦種種不同也所作佛事指說示不同之事

如是我成佛已來甚大久遠壽命無量阿僧祇劫常住不滅

諸善男子我本行菩薩道所成壽命今猶未盡復倍上數然今非實滅度而便唱言當取

滅度如來以是方便教化衆生

叙唱滅意也

所以者何若佛久住於世薄德之人不種善

根貧窮下賤貪著五欲入於憶想妄見網中若見如來常在不滅便起憍恣而懷厭怠不能生難遭之想恭敬之心是故如來以方便說

釋唱滅意也貧窮下賤言乏功德財憶想

妄見爲生死網即見惑思惑也

比丘當知諸佛出世難可值遇所以者何諸

薄德人過無量百千萬億劫或有見佛或不見者以此事故我作是言諸比丘如來難可得見斯衆生等聞如是語必當生於難遭之

想心懷戀慕渴仰於佛便種善根是故如來雖不實滅而言滅度

言難值遇乃警之令渴仰種善也

又善男子諸佛如來法皆如是爲度衆生皆實不虛

明諸佛利生善權皆如是也

譬如良醫智慧聰達明鍊方藥善治衆病

佛如醫師教如醫方理如妙藥種種性欲行想分別是謂衆病佛能以若干緣喻隨其所宜發藥而蠲除之是謂良醫善治也

其人多諸子息若十二十乃至百數

大宅之子對三乘言故數止三十良醫之

子對衆生言故兼至百數

以有事緣遠至餘國諸子於後飲他毒藥藥發悶亂死轉於地

醫師遠適而諸子飲毒猶宅主近出而其家失火也飲他毒藥喻隨順邪法宛轉於地喻輪墮諸趣

是時其父還來歸家諸子飲毒或失本心或不失者遙見其父皆大歡喜拜跪問訊善安隱歸我等愚癡誤服毒藥願見救療更賜壽命父見子等苦惱如是依諸經方求好藥草色香美味皆悉具足擣篩和合與子令服而作是言此大良藥色香美味皆悉具足汝等可服速除苦惱無服衆患

三界之家佛所舊化故云來歸彼中邪毒深者失其良心淺者雖或未失亦爲惡習所障未能親造覺體故云遙見願賜壽命即冀不天閼於橫邪也發藥除苦即令其斷惑而證真也依諸佛經濟之方求聖賢

斷治之藥顯性空之真色示戒定之五香品乳酪之五味無不具足也擣者折剛爲柔篩者化龐入細和合令服則無矯拂之失色味香美則無瞋眩之毒聖人病人之病憂人之憂調御之德蓋見於此

其諸子中不失心者見此良藥色香俱好即便服之病盡除愈餘失心者見其父來雖亦歡喜問訊求索治病然與其藥而不肯服所以者何毒氣深入失本心故於此好色香藥而謂不美

父作是念此子可愍爲毒所中心皆顛倒雖見我喜求索救療如是好藥而不肯服我今當設方便令服此藥即作是言汝等當知我今衰老死時已至是好良藥今留在此汝可取服勿憂不差作是教已復至他國遣使還

告汝父已死

留藥喻遺教去國喻示滅

是時諸子聞父背喪心大憂惱而作是念若
父在者慈愍我等能見救護今者捨我遠喪
他國自惟孤露無復恃怙常懷悲感心遂醒

遠四

十九

悟乃知此藥色味香美即取服之毒病皆愈

人情常忽於所賴常感於去思

其父聞子悉已得差尋復來歸咸使見之

水澄月現亦何去來

諸善男子於意云何頗有人能說此良醫虛

妄罪不不也世尊

佛言我亦如是成佛已來無量無邊百千萬
億那由他阿僧祇劫爲衆生故以方便力言
當滅度亦無有能如法說我虛妄過者

導迷貴權於法無過

爾時世尊欲重宣此義而說偈言

自我得佛來 所經諸劫數 無量百千萬
億載阿僧祇 常說法教化 無數億衆生
令入於佛道 爾來無量劫 爲度衆生故
方便現涅槃 而實不滅度 常住此說法

此總舉善權下詳述權意

我常住於此 以諸神通力 令顛倒衆生
雖近而不見 衆見我滅度 廣供養舍利
咸皆懷戀慕 而生渴仰心 衆生旣信伏
質直意柔軟 一心欲見佛 不自惜身命

時我及衆僧 俱出靈鷲山 我時語衆先
常在此不滅 以方便力故 現有滅不滅
雖近不見所以伏驕恣也令生渴仰所以
發厭怠也

餘國有衆生 恭敬信樂者 我復於彼中

爲說無上法 汝等不聞此 但謂我滅度
敬信之心如聲說法之慈如響聲有彼此
響無生滅但應於彼如此不聞故謂之滅
耳蓋聖人雖有權應之迹實無權應之心
如響而已

達四

二下

我見諸衆生 没在於苦惱 故不爲現身
令其生渴仰 因其心戀慕 乃出爲說法
飢然後甘食渴然後甘飲
神通力如是 於阿僧祇劫 常在靈鷲山
及餘諸住處 衆生見劫盡 大火所燒時

達四

二上

我淨土不毀 而衆見燒盡 憂怖諸苦惱
如是悉充滿 所謂別業妄見
是諸罪衆生 以惡業因緣 過阿僧祇劫
不聞三寶名 諸有修功德 柔和質直者

則皆見我身 在此而說法 或時爲此衆
散佛及大眾
大火所燒此土安隱其何土耶即寶報淨
我此土安隱 天人常充滿 園林諸堂閣
種種寶莊嚴 寶樹多花果 衆生所遊樂
諸天擊天鼓 常作衆伎樂 雨曼陀羅華

土亦曰性土也言常在靈山則不離娑婆
化土而能不壞者報化一土爾依妄業所
現故有成與壞依實報所現故無成與壞
成壞之相楞嚴所謂別業妄見譬如自眚
妄見燈影彼非眚人雖同不見所以衆生
見燒而我常安隱也自我求之所謂性土
不離自性所謂靈山不離已靈非形非器
故劫火莫燒亘古亘今故常在不滅達斯
妙旨則壽量淨土等事皆備於我而不疑
於佛矣

七七六

說佛壽無量 久乃見佛者 爲說佛難值
以罪業背佛即惡緣同感者以修德見我
則善業同感者由其或背或見故佛或說
壽量或說難值但應彼緣曾無定迹

我智力如是 慧光耀無量 壽命無數劫
久修業所得 汝等有智者 勿於此生疑
當斷令永盡 佛語實不虛

智照無量壽命無數乃久修淨業之實報
非虛說示也

如醫善方便 爲治狂子故 實在而言死
無能說虛妄 我亦爲世父 救諸苦患者
爲凡夫顛倒 實在而言滅 以常見我故
而生憍恣心 放逸著五欲 墮於惡道中
苦患即妄纏惡業顛倒即妄見生死
我常知衆生 行道不行道 隨所應可度

爲說種種法 頌是故如來以方便說
每自作是意 以何令衆生 得入無上慧
速成就佛身

每思方便利導群機故或說壽量以發其
慧或現涅槃以感其情皆欲速成故也
妙法蓮華經要解卷第十三

音釋

繇音由 畏音懼 公對切 謬靡切 幼切 脱黃鍊

妙法蓮華經要解卷第十四

遠五

溫陵開元蓮寺比丘 戒環 解 分別功德品第十七

時會欽聞壽量秘說而造道證性淺深不

同佛爲隨根稱揚之故曰分別功德

達五爾時大會聞佛說壽命劫數長遠如是無量無邊阿僧祇衆生得大饒益

得大饒益如下所說

於時世尊告彌勒菩薩摩訶薩阿逸多我說是如來壽命長遠時六百八十萬億那由他

恒河沙衆生得無生法忍

因聞壽量了無生滅以無生法忍可成行

而無了無忍名爲法忍忍者行之成名

復有千倍菩薩摩訶薩得聞持陀羅尼門

一聞悟得大總持諸餘總持自此而出

故謂之門如圓覺陀羅尼門流出一切復有一世界微塵數菩薩摩訶薩得樂說無礙辯才

造道自得左右逢原故能樂說無礙即四無礙辯之總也四辯一法二義三詞四樂說

復有一世界微塵數菩薩摩訶薩得百十萬億無量旋陀羅尼

於一切法反本還源方便利生逆順自在名百千萬億無量旋陀羅尼

復有三千大千世界微塵數菩薩摩訶薩能轉不退法輪

入正位說正法迴超二乘無復退轉

復有二千中國土微塵數菩薩摩訶薩能轉

清淨法輪

即言辭相寂一乘妙法也從聞持陀羅尼
至此皆地上菩薩之德十地論云得陀羅
尼菩薩在五地

復有小千國土微塵數菩薩摩訶薩八生當
得阿耨多羅三藐三菩提復有四四天下微

塵數菩薩摩訶薩四生當得阿耨多羅三藐
三菩提復有三四天下微塵數菩薩摩訶薩

三生當得阿耨多羅三藐三菩提復有二四
天下微塵數菩薩摩訶薩二生當得阿耨多
羅三藐三菩提復有一四天下微塵數菩薩

摩訶薩一生當得阿耨多羅三藐三菩提

此約隨根得果遠近也八生等者以超入

聖位如初生佛家之生非出沒生死之生

也初言八生謂超入四地取妙覺之位有
八故曰餘各八生在當得成佛道次言四

生謂超入八地取妙覺之位有四三生二
生謂九地十地一生即超入等覺取妙覺
一間耳故曰餘有一生在當成一切智也
如來壽量即本覺不壞之實相悟是實相
則無不了達故會衆聞說隨根各證

復有八世界微塵數衆生皆發阿耨多羅三
藐三菩提心

聞實報理發正因心也先舉入道得果之
菩薩後舉隨喜發心之衆生乃事之序而
舊以此文合達五在初列又廣配十信十住等
位文理乖違今不必配問壽量之法一也

古今之性同也昔者衆生一聞遂得法忍
菩薩深達遂成佛道而數比沙塵今幾何
也曰今之聞者以大千計之真若沙塵果
亦深達則得忍成佛不讓在昔唯其不能

深信深達耳

佛說是諸菩薩摩訶薩得大法利時於虛空中雨曼陀羅華摩訶曼陀羅華以散無量百萬億寶樹下師子座上諸佛并散七寶塔中師子座上釋迦牟尼佛及久滅度多寶如來亦散一切諸大菩薩及四部衆又雨細抹栴檀沉水香等於虛空中天鼓自鳴妙聲深遠又雨千種天衣垂諸瓔珞真珠瓔珞摩尼珠瓔珞如意珠瓔珞遍於九方衆寶香爐燒無價香自然周至供養大會一一佛上有諸

菩薩執持幡蓋次第而上至於梵天是諸菩薩以妙音聲歌無量頌讚歎諸佛

諸瑞皆從空雨遍於九方乃助顯壽量法利如空無邊不可得而思議也故彌勒讚曰世尊說無量不可思議法多有所饒益

如虛空無邊言九方者除下方非法會所菩薩執幡上至梵天言其滿空供養讚歎也爾時彌勒菩薩從座而起偏袒右肩合掌向佛而說偈言

佛說希有法昔所未曾聞世尊有大力壽命不可量無數諸佛子聞世尊分別說得法利者歡喜充遍身或住不退地或得陀羅尼或無礙樂說萬億旋總持或有大千界微塵數菩薩不退之法輪復有中千界微塵數菩薩各各皆能轉清淨之法輪復有小千界微塵數菩薩餘各八生在當得成佛道復有四三二如此四天下微塵諸菩薩隨數生成佛或一四天下微塵數菩薩

餘有一生在 當成一切智

隨數謂隨四三二數也

如是等衆生 聞佛壽長遠 得無量無漏
清淨之果報

稱實報法故無漏清淨

復有八世界 微塵數衆生 聞佛說壽命

皆發無上心 世尊說無量 不可思議法
多有所饒益 如虛空無邊 雨天曼陀羅

摩訶曼陀羅 釋梵如恒沙 無數佛土來
雨栴檀沉水 繽紛而亂墜 如鳥飛空下

供散於諸佛 天鼓虛空中 自然出妙聲
天衣千萬種 旋轉而來下 衆寶妙香爐

燒無價之香 自然悉周遍 供養諸世尊
其大菩薩衆 執七寶幡蓋 高妙萬億種

次第至梵天 一一諸佛前 寶幢懸勝幡
達五

亦以千萬偈 歌詠諸如來

由其法利如空無邊故感瑞亦爾

如是種種事 昔所未曾有 聞佛壽無量
一切皆歡喜 佛名聞十方 廣饒益衆生
一切具善根 以助無上心

結讚妙瑞所顯之意由十方諸天聞佛壽
量廣獲饒益故各具善根雨諸妙瑞以自
表助無上道心也

爾時佛告彌勒菩薩摩訶薩阿逸多其有衆
生聞佛壽命長遠如是乃至能生一念信解

所得功德無有限量

解壽量說即得不壞體證真常用故功無
限量

若有善男子善女人爲阿耨多羅三藐三菩提
故於八十萬億那由他劫行五波羅密檀

波羅蜜戶 羅波羅蜜羼提波羅蜜毘梨耶波
羅蜜禪波羅蜜除般若波羅蜜以是功德比
前功德百分千分百千萬億分不及其一乃
至筭數譬喻所不能知

如來壽量乃智力慧光久修所得能一念
信則爲已具般若智因故五度深功莫比
若善男子善女人有如是功德於呵禪多羅
三藐三菩提退者無有是處
已具正因故有進無退

爾時世尊欲重宣此義而說偈言

若人求佛慧 於八十萬億 那由他劫數
行五波羅蜜 於是諸劫中 布施供養佛
及緣覺弟子 幷諸菩薩衆 珍異之飲食
上服與卧具 梅檀立精舍 以園林莊嚴
如是等布施 種種皆微妙 盡此諸劫數

以回向佛道 若復持禁戒 清淨無缺漏
求於無上道 諸佛之所歎 若復行忍辱
住於調柔地 設衆惡來加 其心不傾動
諸有得法者 懷於增上慢 爲此所輕惱
如是悉能忍 若復勤精進 志念常堅固
於無量億劫 一心不懈息 又於無數劫
住於空閑處 若坐若經行 除睡常攝心
以是因緣故 能生諸禪定 八十億萬劫
安住心不亂 持此一心福 願求無上道
我得一切智 盡諸禪定際

一心福即禪波羅蜜也 一切智即心之極
造禪定際即道之極造

是人於百千 萬億劫數中 行此諸功德
如上之所說 有善男女等 聞我說壽命
乃至一念信 其福過於彼 若人悉無有

一切諸疑惑 深心須臾信 其福為如此
一念之信福過五度然當悉無疑惑福乃
如此正法華云當棄捐猶豫諸著思想事
信樂大法義其福為若斯

其有諸菩薩 無量劫行道 聞我說壽命
是則能信受 七 如是諸人等 頂受此經典
願我於未來 長壽度衆生 如今日世尊
諸釋中之王 道場師子吼 說法無所畏
我等未來世 一切所尊敬 坐於道場時
說壽亦如是

菩薩行道經無量劫則智力慧光已幾實
報故聞斯信之而於未來願得是報至坐
道場願說是道蓋深悟稱性壽量人皆有
之故願不天闕而臻及如來也
若有深心者 清淨而質直 多聞能總持

隨義解佛語 如是之人等 於此無有疑
深心則志固清淨則智明質直則無偽多
聞則博識總持則貫通隨義則不滯有是
全才盡智可於壽量無疑也

又阿逸多若有聞佛壽命長遠解其言趣是
人所得功德無有限量能起如來無上之慧
壽量之說趣在斷生滅見顯真常體苟能
明解則起無上慧等同如來故功無限量
何況廣聞是經若教人聞若自持若教人持
若自書若教人書若以華香瓊珞幢幡繒蓋
香油蘇燈供養經卷是人功德無量無邊能

生一切種智

聞佛壽命則斷生滅見顯真常體能起上
慧而已廣聞是經則具四知見盡一乘道
故能生種智也然世之聞持不計而果能

起上慧生種智者誰耶是亦遇王饑而不
食得衣珠而醉卧耳惜哉

阿逸多若善男子善女人聞我說壽命長遠
深心信解則爲見佛常在者闍崛山共大菩
薩諸聲聞衆圍遶說法

生滅見盡則真常之相觸目宛然

又見此娑婆世界其地琉璃坦然平正闊浮
檀金以界八道寶樹行列諸臺樓觀皆悉寶
成其菩薩衆咸處其中

穢淨情忘則勝妙之境舉步皆是

若有能如是觀者當知是爲深信解相

身土實相本自一如生滅穢淨皆出情見
故見盡情忘則真常之相勝妙之境觸處
現前非深信解壽量秘說莫預於此

又復如來滅後若聞是經而不毀訾起隨喜

心當知已爲深信解相何況讀誦受持之者
斯人則爲頂戴如來

上明一品之利此明一經之利故但能隨
喜而功已侔上故曰已爲深信解相若正
心讀持功又過上故曰則爲頂戴如來云

頂戴者謂得此中全身而無以上之也

阿逸多是善男子善女人不須爲我復起塔
寺及作僧坊以四事供養衆僧所以者何是
善男子善女人受持讀誦是經典者爲已起
塔造立僧坊供養衆僧則爲以佛舍利起七

寶塔高廣漸小至于梵天懸諸幡蓋及衆寶
鈴花香瓔珞抹香塗香燒香衆鼓伎樂簫笛
箜篌種種舞戲以妙音聲歌舞讚頌則爲於
無量千萬億劫作是供養已

諸供養中法供養勝故也上顯隨喜功次

顯書持功

阿逸多若我滅後聞是經典有能受持若自書若教人書則爲起立僧坊以赤栴檀作諸

殿堂三十有二高八多羅樹高廣嚴好百千比丘於其中止園林浴池經行禪窟衣服飲

食床褥湯藥一切樂具充滿其中如是僧坊堂間若干百千萬億其數無量以此現前供養於我及比丘僧

殿堂三十有二以安四方僧稱八正道也西天寶多羅樹其高七仞諸皆縱舉過量

之事以顯法供養勝

是故我說如來滅後若有受持讀誦爲他人說若自書若教人書供養經卷不須復起塔寺及造僧坊供養衆僧況復有人能持是經兼行布施持戒忍辱精

進一心智慧其德最勝無量無邊譬如虛空東西南北四維上下無量無邊是人功德亦復如是無量無邊疾至一切種智

若人讀誦受持是經爲他人說若自書若教人書復能起塔及造僧坊供養讚歎聲聞衆僧亦以百千萬億讚歎之法讚歎菩薩功德又爲他人種種因緣隨義解說此法華經復能清淨持戒與柔和者而共同止忍辱無瞋志念堅固常貴坐禪得諸深定精進勇猛攝諸善法利根智慧善答問難

前言行五波羅蜜不及一念信解又云不

須復起塔寺非廢於行也姑離事顯理使人深造不滯於迹而已若理既深造非行不修如舟無楫終何以濟故須理行相濟然後其德爲最勝也世之空談名理便廢

行實諸度不修一善無取安爲癡兀化爲
闡底者宜三復于斯

阿逸多若我滅後諸善男子善女人受持讀
誦是經典者復有如是諸善功德當知是人
已趣道場近阿耨多羅三藐三菩提坐道樹

下阿逸多是善男子善女人若坐若立若行
處此中便應起塔一切天人皆應供養如佛
之塔

已趣道場言已得真趣登證有期近坐道
樹言已幾於道成佛不遠故所在之處當
尊重之

爾時世尊欲重宣此義而說偈言

若我滅度後能奉持此經斯人福無量
如上之所說是則爲具足一切諸供養
以舍利起塔七寶而莊嚴表刹甚高廣

達

土

漸小至梵天寶鈴千萬億風動出妙音
又於無量劫而供養此塔華香諸瓔珞
天衣衆伎樂然香油酥燈周布常照明
惡世法末時能持是經者則爲已如上
具足諸供養○上頌供佛次頌供僧
若能持此經則如佛現在以牛頭栴檀
起僧坊供養堂有三十二高八多羅樹
上饌妙衣服床卧皆具足園林諸浴池
若有信解心受持讀誦書經行及禪窟
種種皆嚴好及供養經卷散花香抹香
阿提目多伽薰油常然之如是供養者
得無量功德如虛空無邊其福亦如是
須曼薺葛多伽三花最香以此薰油
況復持此經兼布施持戒忍辱樂禪定

不嗔不惡口 恭敬於塔廟 謙下諸比丘

遠離自高心

常思惟智慧

有問難不嗔

隨順爲解說

若能行是行

功德不可量

若見此法師

成就如是德

應以天花散

天衣覆其身

頭面接足禮

生心如佛想

又應作是念

不久詣道樹

得無漏無爲

廣利諸人天

其所住止處

經行若坐臥

乃至說一偈

是中應起塔

莊嚴令妙好

種種以供養

佛子住此地

則是佛受用

常在於其中

經行及坐臥

佛子住此即佛受用等者所在之處則爲
有佛之意也夫敬持經之人如佛者所謂
若有能持則持佛身又決有成佛之期故
也此爲分別功德品故偏明持經勝德或
以此地其中之語爲指妙法奧域文勢不

達五

十二

然

妙法蓮華經要解卷第十四

音釋

闕 馬割切止也

跋 步未切

侔 莫侯切齊等也

妙法蓮華經要解卷第十五

遠六

溫陵開元蓮寺比丘 戒環 解

隨喜功德品第十八

前品分別聞說壽量功德自此至法師不輕三品廣顯聞持正宗功德隨功淺深有

遠六

暫持圓持精持之序次第廣顯自暫持始也言隨喜者謂未能一心聽讀如說修行但隨其所聞喜爲人說隨其所教喜須臾聞亦獲勝福故爲暫持功德

爾時彌勒菩薩摩訶薩白佛言世尊若有善

男子善女人聞是法華經隨喜者得幾所福而說偈言

世尊滅度後 其有聞是經 若能隨喜者

爲得幾所福

爾時佛告彌勒菩薩摩訶薩阿逸多如來滅

後若比丘比丘尼優婆塞優婆夷及餘智者若長若幼聞是經隨喜已從法會出至於餘處若在僧坊若空閑地若城邑巷陌聚落田里如其所聞爲父母宗親善友知識隨力演說

是諸人等聞已隨喜復行轉教餘人聞已亦隨喜轉教如是展轉至第五十

法會初聞從師親授其福最勝隨喜轉教則去師漸遠至第五十言又甚遠而福亦

無量如下所校

阿逸多其第五十善男子善女人隨喜功德我今說之汝當善聽

若四百萬億阿僧祇世界六趣四生衆生卵生胎生濕生化生若有形無形有想無想非有想非無想無足二足四足多足如是等在

眾生數者有人求福隨其所欲娛樂之具皆

給與之一一衆生與滿闍浮提金銀琉璃碑

磲碼磯珊瑚琥珀諸妙珍寶及象馬車乘七寶所成宮殿樓閣等

僧祇世界生類不窮而能以寶物等施其

福多矣天人鬼畜分爲六趣胎卵濕化總

爲四生而形想等類頑焉自胎卵至非無想通該三界十種異生

是大施王如是布施滿八十年已而作是念

我已施衆生娛樂之具隨意所欲然此衆生

皆已衰老年過八十髮白面皺將死不久我

當以佛法而訓導之即集此衆生宣布法化

示教利喜一時皆得須陀洹道斯陀含道阿

那含道阿羅漢道盡諸有漏於深禪定皆得

自在具八解脫

既以財施復以法施令得聖果則其福倍多

於汝意云何是大施主所得功德寧爲多不彌勒白佛言世尊是人功德甚多無量無邊若是施主但施衆生一切樂具功德無量何況令得阿羅漢果

佛告彌勒我今分明語汝是人以一切樂具施於四百萬億阿僧祇世界六趣衆生又令得阿羅漢果所得功德不如是第五十人聞法華經一偈隨喜功德百分千分百千萬億

分不及其一乃至算數譬喻所不能知

財施外物道果小乘故迥不可及

阿逸多如是第五十人展轉聞法華經隨喜功德尚無量無邊阿僧祇何況最初於會中

聞而隨喜者其福復勝無量無邊阿僧祇不

可得比

又阿逸多若人爲是經故往詣僧坊若坐若立須臾聽受緣是功德轉身所生得好上妙象馬車乘珍寶輦輶及乘天宮

轉身謂後身也上妙車輶即人中勝報及

乘天宮即天中勝報故偈云後生天人中若復有人於講法處坐更有人來勸令坐聽若分座令坐是人功德轉身得帝釋坐處若梵王坐處若轉輪聖王所坐之處

分座勸人則爲法心廣故報又勝前

阿逸多若復有人語餘人言有經名法華可共往聽即受其教乃至須臾間聞是人功德轉身得與陁羅尼菩薩共生一處

語人轉教利倍廣故報倍勝也十地論說

得陁羅尼菩薩居五地

利根智慧百千萬世終不瘖瘞口氣不臭舌常無病口亦無病齒不垢黑不黃不疎亦不缺落不差不曲脣不下垂亦不褰縮不龐蓋不瘡脉亦不缺壞亦不高斜不厚不大亦不黧黑無諸可惡鼻不匾匱亦不曲戾面色不黑亦不狹長亦不窊曲無有一切不可喜相瘡言不成音痳則塞矣下垂上褰皆脣之惡相脣瘡曰胗口戾曰高黧亦黑也黎水之黑墨火之黑匾匱謂平薄曲戾謂不端遠六穴即陷而曲也一切者通言六根無惡

唇舌牙齒悉皆嚴好鼻修高直面貌圓滿眉高而長額廣平正人相具足世世所生見佛

聞法信受教誨

由轉教善生生不窮

阿逸多汝且觀是勸於一人令往聽法功德

如此何況一心聽說讀誦而於大眾爲人分
別如說修行

勸人往聽即隨喜之事一心修行即圓持
之事隨喜之功既亦圓持之功可知
爾時世尊欲重宣此義而說偈言

若人於法會得聞是經典乃至於一偈
隨喜爲他說如是展轉教至于第五十
最後人獲福今當分別之

如有大施主供給無量衆具滿八十歲
隨意之所欲見彼衰老相髮白而面皺
齒踈形枯竭念其死不久我今應當教
令得於道果即爲方便說涅槃真實法
世皆不牢固如水沫泡焰汝等咸應當
疾生歡離心諸人聞是法皆得阿羅漢
具足六神通三明八解脫最後第五十

蓮六

五

故詣專於引聽

聞一偈隨喜是人福勝彼不可爲辭喻
如是展轉聞其福尚無量何況於法會
初聞隨喜者若有勸一人將引聽法華
言此經深妙千萬劫難遇即受教往聽
乃至須臾聞斯人之福報今當分別說
世世無口患齒不踈黃黑唇不厚褰缺
無有可惡相舌不乾黑短鼻高修且直
額廣而平正面目悉端嚴爲人所喜見
口氣無臭穢優鉢華之香常從其口出
即六根善報也多說口報者以展轉教誘

由口業起

若故詣僧坊欲聽法華經須臾聞歡喜
今當說其福後生天人中得妙象馬車
珍寶之輦輿及乘天宮殿

若於講法處 勸人坐聽經 是福因緣得
釋梵轉輪座 何況一心聽 解說其義趣
如說而修行 其福不可限
一心修行福見次品

妙法蓮華經法師功德品第十九

前品隨喜暫持在五種法師方得其一未能
一心聽讀如說修行則功未圓也雖獲
根智具足而未及六千之報則德未圓也
此品行人五種功備六十德圓堪爲模範
故命品謂之法師而爲圓持功德前法師
品依持經人以彰圓記此法師品依持經
人以彰圓德名同義別故加功德字別焉
爾時佛告常精進菩薩摩訶薩若善男子善
女人受持是法華經若讀若誦若解說若書
寫是人當得八百眼功德千二百耳功德八

百鼻功德十二百舌功德八百身功德千二
百意功德以是功德莊嚴六根皆令清淨
持法華者開佛知見則見聞覺知無非真
覺證諸實相則色香味觸無非真法以真
覺對真法則萬象徹照大千一視故圓持
功成即得六根清淨功德自非精心不雜
進道不倦未易能致故告常精進菩薩也
數有十二八百者衆生世界依器世界而
立以織妾爲界故有四方身相遷流故有
三世惟世與界二者相涉三世四方宛轉
十二依十二數流變三疊成千二百圓持
功成每根各全其用故有千二功德然復
於中尅定優劣以眼見前傍而不及後鼻
息出入關於中交身合能覺離不知觸皆
三分閼一故唯八百功德此乃權依世論

數量以顯妙用大略而已使由常眼對色而開佛知見常耳聞聲而得其實相則衆塵不隔十方廓然萬象莫逃大千圓照則千二八百之功無足論矣如經云父母所生眼悉見三千界何復三分之闕八百之劣耶故知此體本絕數量也

達六
是善男子善女人父母所生清淨肉眼見於三千大千世界內外所有山林河海下至阿彌地獄上至有頂亦見其中一切衆生及業因緣果報生處悉見悉知

父母所生即人人本具者清淨肉眼即衆塵不隔者衆塵不隔則正智現前故大千內外一切色像悉見悉知所謂應眼時如千日萬象不能逃影質者此也問理則然矣事若之何曰六湛圓明本所功德現量

如是但隨所證耳夫小羅漢見小千大羅漢見大千辟支見百佛世界菩薩見百千佛界如來見微塵國土非獨果體也阿那律陀不離父母生身而能觀大千猶如掌內則其中一切烏乎不見蓋塵消覺淨冥極則一夫何理然而事不然哉楞嚴曰逆彼業流得循圓通與不圓根日劫相倍即不可徇於業流以不圓根而疑經之說也誠知眼力如是則下之五根不假詳論爾時世尊欲重宣此義而說偈言

若於大衆中 以無所畏心 說是法華經汝聽其功德 是人得八百 功德殊勝眼以是莊嚴故 其目甚清淨

父母所生眼 悉見三千界 內外彌樓山須彌及鐵圍 幷諸餘山林 大海江河水

下至阿鼻獄 上至有頂處 其中諸衆生

切皆悉見

彌樓此云光明即七金山之一也清淨肉眼有生皆具凡能開佛知見證諸實相則

大千一切莫不歷然此其現量也以^{達六}迹明

之人人知見若離前塵本無限礙且日月

之高太虛之遠不知其幾千萬里苟無所蔽目能見之而意之所緣其疾俛仰之間再撫四海之外非假賢智凡人能之則六根之用廣大靈通固如是也

雖未得天眼 肉眼力如是

復次常精進若善男子善女人受持此經若讀若誦若解說若書寫得千二百耳功德以是清淨耳聞三千大千世界下至阿鼻地獄上至有頂其中內外種種語言音聲

六湛實相在眼圓照在耳圓通
象聲馬聲牛聲車聲啼哭聲愁歎聲螺聲鼓聲鐘聲鈴聲笑聲語聲

男聲女聲童子聲童女聲法聲非法聲苦聲樂聲凡夫聲聖人聲喜聲不喜聲

循道合理名法無道無義名非法

天聲龍聲夜叉聲乾闥婆聲阿修羅聲迦樓羅聲緊那羅聲摩睺羅伽聲火聲水聲風聲地獄聲畜生聲餓鬼聲比丘聲比丘尼聲聲聞聲辟支佛聲菩薩聲佛聲以要言之三千

大千世界中一切內外所有諸聲雖未得天耳以父母所生清淨常耳皆悉聞知如是分別種種音聲而不壞耳根

信謂應耳時如幽谷大小音聲無不足也不壞耳根者雖分別種種而耳根於中本

相如故無壞無雜此耳之實相也

爾時世尊欲重宣此義而說偈言

父母所生耳 清淨無濁穢

言父母所生明人人本具不假他求清淨

無穢即衆塵不隔無壞無雜者

以此常耳聞 三千世界聲 象馬車牛聲

鐘鈴螺鼓聲 琴瑟箜篌聲 簫笛之音聲

清淨好歌聲 聽之而不著 無數種人聲

聞悉能解了 又聞諸天聲 微妙之歌音

及聞男女聲 童子童女聲 山川嶮谷中

迦陵頻伽聲 命命等諸鳥 悉聞其音聲

地獄衆苦痛 種種楚毒聲 餓鬼飢渴逼

求索飲食聲 諸阿修羅等 居在大海邊

自共言語時 出于大音聲 如是說法者

安住於此間 遙聞是衆聲 而不壞耳根

十方世界中 禽獸鳴相呼 其說法之人
於此悉聞之 其諸梵天上 光音及遍淨

乃至有頂天 言語之音聲 法師住於此
悉皆得聞之 一切比丘衆 及諸比丘尼

若讀誦經典 若爲他人說 法師住於此
悉皆得聞之 復有諸菩薩 讀誦於經法

若爲他人說 撰集解其義 如是諸音聲
悉皆得聞之 諸佛大聖尊 教化衆生者

於諸大衆中 演說微妙法 持此法華者
悉皆得聞之

頌雜類六對至二衆四聖七科也聽而不
第六 著爲與響等故能清淨也命命即共命
三千大千界 內外諸音聲 下至阿鼻獄
上至有頂天 皆聞其音聲 而不壞耳根
其耳聰利故 悉能分別知 持是法華者

雖未得天耳 但用所生耳 功德已如是
復次常精進若善男子善女人受持是經若
讀若誦若解說若書寫成就八百鼻功德以
是清淨鼻根聞於三千大千世界上下內外
種種諸香

清淨言衆塵不隔湛圓故大千俱聞

須曼那華香閻提華香末利華香薺葛華香
波羅羅華香赤蓮華香青蓮華香白蓮華香
華樹香菓樹香栴檀香沉水香多摩羅跋香
多伽羅香及千萬種和香若抹若丸若塗香
持是經者於此間住悉能分別

須曼那此云善稱意薺葛此云黃花小而
香波羅羅云薰花多摩羅跋云賢無垢香
多伽羅木香也

又復別知衆生之香象香馬香牛羊等香男

香女香童子香童女香及草木叢林香若近
若遠所有諸香悉皆得聞分別不錯

持是經者雖住於此亦聞天上諸天之香波
利質多羅拘鞞陀羅樹香及曼陀羅華香摩
訶曼陀羅華香曼殊沙華香摩訶曼殊沙華

杏梅檀沉水種種抹香諸雜華香如是等天
香和合所出之香無不聞知

波利質多羅即帝釋園生樹拘鞞陀羅云
大遊戲地樹

樂嬉戲時香若在妙法堂上爲忉利諸天說
法時香若於諸園遊戲時香及餘天等男女
身香皆悉遙聞如是展轉乃至梵世上至有
頂諸天身香亦皆聞之并聞諸天所燒之香
及聲聞香辟支佛香菩薩香諸佛身香亦皆

遙聞知其所在

雖聞此香然於鼻根不壞不錯若欲分別爲他人說憶念不謬

不壞不錯言無壞無雜也華嚴鬻香長者善能別知天人龍鬼所有諸香治諸病香

斷諸惡香乃至一切菩薩差別地位香悉

皆了達得調和香法門表於善惡熏習之法一切通達而調治和融以成萬德法身香也今鼻根功德能知天上人間諸香乃至菩薩諸佛身香亦表持法華者能通達異習和融衆妙而證萬德法身之香歟爾時世尊欲重宣此義而說偈言

是人鼻清淨 於此世界中 若香若臭物種種悉聞知 須曼那闍提 多摩羅栴檀沉水及桂香 種種華菓香 及知衆生香

男子女人香

說法者遠住

聞香知所在

大勢轉輪王

小轉輪及子

群臣諸宮人

聞香知所在

身所著珍寶

及地中寶藏

轉輪王寶女

聞香知所在

諸人嚴身具

衣服及瓔珞

種種所塗香

聞香知其身

輪王七寶女寶居一

諸天若行坐 遊戲及神變 持是法華者聞香悉能知 諸樹華菓實 及蘕油香氣持經者住此 悉知其所在 諸山深嶮處栴檀樹華敷 衆生在中者 聞香皆能知鐵圍山大海 地中諸衆生 持經者聞香悉知其所在 阿修羅男女 及其諸眷屬開譯遊戲時 聞香皆能知 曠野嶮隘處師子象虎狼 野牛水牛等 聞香知所在若有懷妊者 未辦其男女 無根及非人

聞香悉能知 以聞香力故 知其初懷妊
成就不成就 安樂產福子 以聞香力故

知男女所念 染欲癡恚心 亦知修善者
地中衆伏藏 金銀諸珍寶 銅器之所盛
聞香悉能知 種種諸瓔珞 達六十三 無能識其價

聞香知貴賤 出處及所在

天上諸華等 曼陀曼殊沙 波利質多樹
聞香悉能知 天上諸宮殿 上中下差別
衆寶華莊嚴 聞香悉能知 天園林勝殿
諸觀妙法堂 在中而娛樂 聞香悉能知

所觀遠達曰觀如所謂諸臺樓觀也

諸天若聽法 或受五欲時 來往行坐卧

聞香悉能知 天女所著衣 好華香莊嚴
周旋遊戲時 聞香悉能知 如是展轉上
乃至於梵世 入禪出禪者 聞香悉能知

光音遍淨天 乃至于有頂 初生及退沒
聞香悉能知

如是展轉上者自六欲天而上也梵世即
初禪光音二禪遍淨三禪有頂即色界頂

也

諸比丘衆等 於法常精進 若坐若經行
及讀誦經典 或在林樹下 專精而坐禪
持經者聞香悉知其所在 菩薩志堅固
坐禪若讀誦 或爲人說法 聞香悉能知
在在方世尊 一切所恭敬 懇衆而說法

聞香悉能知 衆生在佛前 聞經皆歡喜
如法而修行 聞香悉能知

比丘兼聲聞辟支也在在方謂十方所在
雖未得菩薩 無漏法生鼻 而是持經者
先得此鼻相

菩薩離分段身則六根皆依無漏法生故

鼻身意皆言無漏

復次常精進若善男子善女人受持是經若
讀若誦若解說若書寫得千二百舌功德若
好若醜若美不美及諸苦澁物在其舌根皆
變成上味如天甘露無不美者

好醜苦澁皆屬妄塵於此無染得清淨舌

則苦澁羨惡皆成法味

若以舌根於大衆中有所演說出深妙聲能
入其心皆令歡喜快樂

又諸天子天女釋梵諸天聞是深妙音聲有

所演說言論次第皆悉來聽

及諸龍龍女夜叉女乾闥婆乾闥婆女

阿修羅阿修羅女迦樓羅迦樓羅女緊那羅

緊那羅女摩睺羅伽摩睺羅伽女爲聽法故

皆來親近恭敬供養

及比丘比丘尼優婆塞優婆夷國王王子群

臣眷屬小轉輪王大轉輪王七寶千子內外
眷屬乘其宮殿俱來聽法以是菩薩善說法
故婆羅門居士國內人民盡其形壽隨侍供

養

四輪王生時各有金銀銅鐵之輪現於空
中自有七寶曰輪寶象寶馬寶珠寶女寶

藏寶兵寶又有千子端正勇健

又諸聲聞辟支佛菩薩諸佛常樂見之是人

所在方面諸佛皆向其處說法悉能受持一

切佛法又能於深妙法音

爾時世尊欲重宣此義而說偈言

是人舌根淨終不受惡味其有所食歟

悉皆成甘露

好醜苦澁皆爲法味

以深淨妙聲 於大衆說法 以諸因緣喻
引導衆生心 聞者皆歡喜 設諸上供養
諸天龍夜叉 及阿修羅等 皆以恭敬心
而共來聽法 是說法之人 若欲以妙音

遍滿三千界 隨意即能至 大小轉輪王

及千子眷屬 合掌恭敬心 常來聽受法

諸天龍夜叉 羅刹毗舍闍 亦以歡喜心

常樂來供養 梵天王魔王 自在大自在
如是諸天衆 常來至其所 諸佛及弟子

聞其說法音 常念而守護 或時爲現身

復次常精進若善男子善女人受持是經若
讀若誦若解說若書寫得八百身功德得清
淨身如淨琉璃衆生喜見

於是體中能如琉璃不容纖翳則孰不喜

見

其身淨故三千大千世界衆生生時死時上
下好醜生善處惡處悉於中現

淨言不爲情塵染蔽也不以情塵自蔽則
當體無所不現

及鐵圍山大鐵圍山彌樓山摩訶彌樓山等
諸山及其中衆生悉於中現下至阿鼻地獄
上至有頂所有及衆生悉於中現

若聲聞辟支佛菩薩諸佛說法皆於身中現
其色像

達大

十六

楞嚴云浮塵幻化虛妄稱相妙覺明體常
自瑩然含吐十方循業發現故得是體者
無所不現雖然理則明矣孰能證耶昔者
阿難大衆蒙佛開示身心蕩然得無罣礙
各各自知心徧十方含容萬有反觀父母

所生之身如太虛一塵巨海一漚起滅無從了然不礙此其證也

爾時世尊欲重宣此義而說偈言

若持法華者 其身甚清淨 如彼淨琉璃
衆生皆喜見 又如淨明鏡 悉見諸色像
菩薩於淨身 皆見世所有 唯獨自明了
餘人所不見

常自瑩然含吐十方餘人不見爲非已智

分

三千世界中 一切諸群萌 天人阿修羅
地獄鬼畜生 如是諸色像 皆於身中現
諸天等宮殿 乃至於有頂 鐵圍及彌樓
摩訶彌樓山 諸大海水等 皆於身中現
諸佛及聲聞 佛子菩薩等 若獨若在衆
說法悉皆現 雖未得無漏 法性之妙身

達六

十七

以清淨常體 一切於中現

無漏性身離於分段而常體不離分段唯
清淨故能現一切嘗觀毗盧十法界圖見
其相而不明其義誦法華身根功德聞其
義而不達其相今以二法合明則妙相深
義觸處昭然矣

復次常精進若善男子善女人如來滅後受
持是經若讀若誦若解說若書寫得千二百
意功德

以是清淨意根乃至聞一偈一句通達無量
無邊之義

聞一句而達無量義蓋無量之義不出一

解是義已能演說一句一偈至於一月四月
乃至一歲諸所說法隨其義趣皆與實相不

相違背若說俗間經書治世語言資生業等皆順正法

或一月一際一歲而演一句偈由意根精了達無量義也九旬談妙蓋得諸此西天歲分三際謂兩際熱際寒際四月即一際也證意實相則諸所說法無非實相故不相違背雖說俗事亦順正法

三千大千世界六趣衆生心之所行心所動作心所戲論皆悉知之由意清淨故他心通也所行即循常心也動作即感變心也戲論即分別心也雖未得無漏智慧而其意根清淨如此是人有所思惟籌量言說皆是佛法無不真實亦是先佛經中所說爲得意根清淨實相與佛同體故

爾時世尊欲重宣此義而說偈言是人意清淨 明利無濁穢 以此妙意根知上中下法 上中下即三乘法

乃至聞一偈 通達無量義 次第如法說月四月至歲 即一月四月乃至一歲

是世界內外 一切諸衆生 若天龍及人夜叉鬼神等 其在六趣中 所念若干種持法華之報 一切皆悉知 十方無數佛百福莊嚴相 爲衆生說法 悉聞能受持思惟無量義 說法亦無量 終始不忘錯以持法華故 悉知諸法相 隨義識次第達名字語言 如所知演說 此人有所說皆是先佛法 以演此法故 於衆無所畏

頌淨意運用真契實相也

持法華經者 意根淨若此 雖未得無漏

先有如是相

結顯根勝也

是人持此經 安住希有地 爲一切衆生

歡喜而愛敬 能以千萬種 善巧之語言

分別而說法 持法華經故

結顯經勝也此經純談諸法實相開佛知

見故於六根功德一一發明儻能脫去情

塵以清淨根照清淨境遂見山林周匝禽

獸嗚呼嘆鼻沾唇殊形異意無非實相無

非妙法即一身而圓證徧六處而常彰本

不欠虧曾無窒礙經文方便駢旁開示行

人應須充擴悟入也

妙法蓮華經要解卷第十五

音釋

高

口淮切

饌

口卜切

黧

力芳切

𠙴

黑也

𠂔

他芳切

𠂔

𠂔

尊也

𠂔

𠂔

無病切

𠂔

𠂔

低頭也

𠂔

妙法蓮華經要解卷第十六

遠七

溫陵開元蓮寺比丘 戒環 解

常不輕菩薩品第二十

常不輕者釋迦前身威音王時精持妙法

廣施利導之迹也以佛性義遍記四衆於

善則拜逢恚不怒一切見敬故號不輕不

專讀誦以持無相經確忍罵辱以持無我

行無相無我所謂精持也於萬億歲廣說

是經化萬億衆令住正道使上慢者信伏

隨從使畢罪者還得道果所謂廣利也蓋

前之持經其五種功雖圓而未精前之蒙

利獲六千德雖勝而未廣以有人法之緣

影存焉必斲造於無相無我之妙其於讀

誦不知所專不知所忘其於四衆不知所

敬不知所慢使妙行遍彰億衆自化敬慢

之心罪福之迹凡所謂人法緣影者皆濬然於正遍正等之域然後爲精廣茲實持經之盡道也故勸持之文終於此品

爾時佛告得大勢菩薩摩訶薩汝今當知若比丘比丘尼優婆塞優婆夷持法華經者若有惡口罵詈誹謗獲大罪報如前所說其所得功德如向所說眼耳鼻舌身意清淨

誹謗之罪如喻品末與法師品說聞持之福如法師功德品說將顯精持先舉此者

所以警衆使知持謗之報不謬而深信精

持廣利也得大勢即大勢至也

得大勢乃往古昔過無量無邊不可思議阿僧祇劫有佛名威音王如來應供正遍知明行足善逝世間解無上士調御丈夫天人師佛世尊劫名離衰國名大成

絲歷往古事千億佛無相無我精持廣利
非具法力大勢難勝其任故告得大勢菩
薩也威音王者以大音聲普遍世界爲諸
法王說法無畏也故不輕既得其道即能
於衆說法心無所畏劫名離衰謂世道交
進
興國名大成言正化無缺

其威音王佛於彼世中爲天人阿修羅說法
爲求聲聞者說應四諦法度生老病死究竟
涅槃爲求辟支佛者說應十二因緣法爲諸
菩薩因阿耨多羅三藐三菩提說應六波羅
蜜法究竟佛慧

此叙威音亦說三乘也因阿耨菩提者因
無上道爲說六度使由是而趣證菩提究竟
佛慧
得大勢是威音王佛壽四十萬億那由他恒

河沙劫正法住世劫數如一闍浮提微塵像
法住世劫數如四天下微塵其佛饒益衆生
已然後滅度正法像法滅盡之後於此國土
復有佛出亦號威音王如來應供正徧知明
行足善逝世間解無上士調御丈夫天人師
佛世尊如是次第有二萬億佛皆同一號
亦如初後燈明二萬皆同一號爲道同故
所叙多佛明釋迦往因之曠遠也

最初威音王如來既已滅度正法滅後於像
法中增上慢比丘有大勢力爾時有一菩薩
進
比丘名常不輕

得大勢以何因緣名常不輕是比丘凡有所
見若比丘比丘尼優婆塞優婆夷皆悉禮拜
讚歎而作是言我深敬汝等不敢輕慢所以
者何汝等皆行菩薩道當得作佛

此以佛性義遍記四衆也四衆容行不等而不輕以佛性等之故皆悉禮拜深敬以

謂皆行菩薩道皆當作佛蓋衆生佛性本自圓成世間業行皆順正法凡能觀一切行皆菩薩道知一切人皆當作佛夫何輕

慢之有

而是比丘不專讀誦經典但行禮拜乃至遠見四衆亦復故往禮拜讚歎而作是言我不敢輕於汝等汝等皆當作佛

此持無相經行無相行也

四衆之中有生瞋恚心不淨者惡口罵詈言是無智比丘從何所來自言我不輕汝而與

我等授記當得作佛我等不用如是虛妄授記如此經歷多年常被罵詈不生瞋恚常作是言汝當作佛說是語時衆人或以杖木瓦

石而打擲之避走遠住猶高聲唱言我不敢輕於汝等汝等皆當作佛

歷年罵詈不生瞋恚是真無我也衆生癡迷不能自信故以記爲妄授菩薩大悲不捨救度故避走之際猶切示之

以其常作是語故增上慢比丘比丘尼優婆塞優婆夷號之爲常不輕

是比丘臨欲終時於虛空中具聞威音王佛先所說法華經二十千萬億偈悉能受持即得如上眼根清淨耳鼻舌身意根清淨得是六根清淨已更增壽命二百萬億那由他歲廣爲人說是法華經

始則不專讀誦而終能聞持多偈增億萬壽廣爲人說者由其無相無我緣影俱亡故神智真明慧命不夭而冥契若此也威

音雖滅法音不滅故先所說經可以具聞
然於空中聞者示使忘能所絕影像然後
能具此法故得二十千萬億偈也以能所
忘影像絕故即得六根清淨功德也前舉
六根功德方明所證之法今舉不輕乃示
能證之人

於時增上慢四衆比丘比丘尼優婆塞優婆
夷輕賤是人爲作不輕名者見其得大神通
力樂說辯力大善寂力聞其所說皆信伏隨
從是菩薩復化千萬億衆令住阿耨多羅三
藐三菩提

四衆見聞信伏隨從所謂妙行遍彰億衆
自化也大神通力即具聞益壽是也樂說
辯力即億歲廣說是也大善寂力即六根
清淨真常功德是也

命終之後得值二千億佛皆號日月燈明於
其法中說是法華經以是因緣復值二千億
佛同號雲自在燈王於此諸佛法中受持讀
誦爲諸四衆說此經典故得是常眼清淨耳
鼻舌身意諸根清淨於四衆中說法心無所
畏得大勢是常不輕菩薩摩訶薩供養如是
若干諸佛恭敬尊重讚歎種諸善根於後復
值千萬億佛亦於諸佛法中說是經典功德
成就當得作佛

引威音王日月燈雲自在意明不輕積德

致道宣布法華源流之遠也要使說是經
則如威音王得大無畏明是道則如日月
燈相繼無窮布是利則如雲自在潤覆無
極凡精持廣利期造乎此

得大勢於意云何爾時常不輕菩薩豈異人

乎則我身是若我於宿世不受持讀誦此經爲他人說者不能疾得阿耨多羅三藐三菩提我於先佛所受持讀誦此經爲人說故疾得阿耨多羅三藐三菩提

此明精持成己之道以致今日其道愈光得大勢彼時四衆比丘比丘尼優婆塞優婆夷以瞋恚意輕賤我故二百億劫常不值佛不聞法不見僧干劫於阿鼻地獄受大苦惱畢是罪已復遇常不輕菩薩教化阿耨多羅三藐三菩提

此文漏闕句義不分合依正法華云師子月等五百比丘比丘尼又加優婆夷乃成四衆正法華云五百清淨士五百清淨女得大勢當知是法華經大饒益諸菩薩摩訶薩能令至於阿耨多羅三藐三菩提是故諸菩薩摩訶薩於如來滅後常應受持讀誦解說書寫是經

結顯廣利勤令精持也

爾時世尊欲重宣此義而說偈言

過去有佛 號威音王 神智無量

將導一切 天人龍神 所共供養
是佛滅後 法欲盡時 有一菩薩
名常不輕 時諸四衆 計著於法
不輕菩薩 往到其所 而欲之言
我不輕汝 汝等行道 皆當作佛

此明廣利成人之德雖歷惡緣其利不失得大勢於汝意云何爾時四衆常輕是菩薩者豈異人乎今此會中跋陀婆羅等五百菩薩師子月等五百比丘尼思佛等五百優婆塞皆於阿耨多羅三藐三菩提不退轉者是

諸人聞已 輕毀罵詈 不輕菩薩
能忍受之 其罪畢已 臨命終時
得聞此經 六根清淨 神通力故
增益壽命 復爲諸人 廣說是經
諸著法衆 皆蒙菩薩 教化成就
令住佛道 不輕命終 值無數佛
說是經故 得無量福 漸具功德
疾成佛道 結顯廣利也 令住涅槃
將導者後曰 將前曰導言威音以神智妙
力前後導達群生使趨於道也許著於法
謂拘墟束教迷佛性義也其罪畢已等者
謂慢衆畢是罪已復遇不輕臨終聞經而
教化成就也不輕命終值無數佛即日月
燈雲自在等

著法之者 以是因緣 以是因緣
聞不輕言 值無數佛 此會菩薩
第一之法 幷及四部 清信士女
世世受持 聽法者是 聽法者是
開示教人 聽受斯經
令住涅槃 如是經典
結顯廣利也 令住涅槃謂令得真常道果
億億萬劫 上不可議 時乃得聞
是法華經 億億萬劫 至不可議
諸佛世尊 時說是經 是故行者
於佛滅後 聞如是經 勿生疑惑
應當一心 廣說此經 世世值佛

彼時不輕

則我身是

時四部衆

勸令精持也以億劫乃聞億劫乃說故當生難值想而深信精持以成就佛道也顯妙勸持文終於此

自神力品發起囑累品付授其餘六品全體前法示現行境流通此道名以行契智達^十^八常然大用之門蓋藥王妙音觀音妙嚴化迹皆現實相行境以契前智境而終於普賢常行故名常然大用

妙法蓮華經要解卷第十六

音釋

蘄 渠衣切 潤 音吻水
草也 絲綢

妙法蓮華經要解卷第十七

遠八

溫陵開元蓮寺比丘

戒環 解

如來神力品第二十一

正宗既終意將傳付利澤萬世是以菩薩
伸請如來即現神力嘉讚經德以發起群
遠八

心使廣流布故名如來神力品而爲發起
流通也

爾時千世界微塵等菩薩摩訶薩從地涌出
者皆於佛前一心合掌瞻仰尊顏而白佛言
世尊我等於佛滅後世尊分身所在國土滅

度之處當廣說此經所以者何我等亦自欲
得是真淨大法受持讀誦解說書寫而供養
之

即涌出品佛所化衆於前顯迹勸持於此
伸請流通也廣說即利他受持即自利

爾時世尊於文殊師利等無量百千萬億舊
住娑婆世界菩薩摩訶薩及諸比丘比丘尼
優婆塞優婆夷天龍夜叉乾闥婆阿脩羅迦
樓羅緊那羅摩睺羅伽人非人等一切衆前
現大神力出廣長舌上至梵世一切毛孔放
於無量無數色光皆悉遍照十方世界

出廣長舌上至梵世者現辯說之神力也
放無量光遍照十方者現智照之神力也
將讚經德先現神力始自出舌放光以至
震動諸天通達佛土終乃結云若以如是

神力於億萬劫說此經德猶不能盡者極
顯斯經勝妙也如來神力乃法界體中無
作妙用華嚴云幻師之幻法能現種種事
脩羅變作身齊等須彌山龍王瞬息雨悅
澤遍天下彼具貪瞋癡神力尚如是何況

法界慧具足自在力然則舌至梵世光遍十方特法界慧中一微用耳舊住菩薩即在此娑婆下方住者梵世即初禪天衆寶樹下師子座上諸佛亦復如是出廣長舌放無量光

三此釋迦分身諸佛亦以同道助發

釋迦牟尼佛及寶樹下諸佛現神力時滿百年歲然後還攝舌相

一時聲歎俱共彈指是二音聲遍至十方諸佛世界地皆六種震動

於數寸之舌現至梵世一會之頃現百千歲又一聲歎彈指而其聲能遍十方震大地皆顯神力勝妙也

其中衆生天龍夜叉乾闥婆阿脩羅迦樓羅緊那羅摩曇羅伽人非人等以佛神力故皆乘經名妙法蓮華教菩薩法佛所護念汝等當深心隨喜亦當禮拜供養釋迦牟尼佛彼諸衆生聞虛空中聲已合掌向娑婆世界作如是言南無釋迦牟尼佛南無釋迦牟尼佛以種種華香瓔珞幡蓋及諸嚴身之具珍寶

見此娑婆世界無量無邊百千萬億衆寶樹下師子座上諸佛及見釋迦牟尼佛共多寶如來在寶塔中坐師子座又見無量無邊百千萬億菩薩摩訶薩及諸四衆恭敬圍繞釋迦牟尼佛既見是已皆大歡喜得未曾有

妙物皆共遙散娑婆世界

此皆神力或使

所散諸物從十方來譬如雲集變成寶帳遍
覆此間諸佛之上于時十方世界通達無礙
如一佛土

此又神力變現

爾時佛告上行等菩薩大眾諸佛神力如是
無量無邊不可思議若我以是神力於無量
無邊百千萬億阿僧祇劫爲羈累故說此經
功德猶不能盡

上行即涌出衆首也舌相之廣身光之遠
一聲歎一彈指而能動六震感諸天以至
合異達礙則神力可謂至大而不能說盡
經德者如來一切深妙功德盡萃比經不
可勝窮故也

以要言之如來一切所有之法如來一切自
在神力如來一切祕要之藏如來一切甚深
之事皆於此經宣示顯說

所有之法即道場所得者自在神力即稱
性示現者祕要之藏即法之不可示者甚
深之事即心之不可傳者皆於此經盡之
所以功莫盡說也

是故汝等於如來滅後應一心受持讀誦解
說書寫如說修行所在國土若有受持讀誦
解說書寫如說脩行若經卷所住之處若於
遠八

園中若於林中若於樹下若於僧坊若白衣
舍若在殿堂若山谷曠野是中皆應起塔供
養所以者何當知是處即是道場諸佛於此
得阿耨多羅三藐三菩提諸佛於此轉於法
輪諸佛於此而般涅槃

當知是處已下明諸佛脩證始終不離此法故所在之處皆應欽奉

爾時世尊欲重宣此義而說偈言

諸佛救世者 住於大神通 爲悅衆生故
現無量神力 舌相至梵天 身放無數光

爲求佛道者 現此希有事 諸佛聲歎聲
及彈指之聲 周聞十方國 地皆六種動
頌現舌放光現聲震動

以佛滅度後 能持是經故 諸佛皆歡喜
現無量神力 曖累是經故 讚美受持者
於無量劫中 猶故不能盡 是人之功德

無邊無有窮 如十方虛空 不可得邊際

頌結顯經德

能持是經者 則爲已見我 亦見多寶佛
及諸分身者 又見我今日 教化諸菩薩

五

成佛之道分身之理教化之法皆不離此
能持是經者 令我及分身 滅度多寶佛
一切皆歡喜 十方現在佛 幷過去未來
亦見亦供養 亦令得歡喜
道得其傳稱佛心故

諸佛坐道場 所得祕要法 能持是經者
不久亦當得 能持是經者 於諸法之義
名字及言詞 樂說無窮盡 如風於空中
一切無障礙

能持是經則一切徹了左右逢原復何障

礙

於如來滅後 知佛所說經 因緣及次第
隨義如實說 如日月光明 能除諸幽暝
斯人行世間 能滅衆生暗 教無量菩薩
畢竟住一乘

上皆讚發流通之德也下結勸

是故有智者聞此功德利於我滅度後應受持斯經是人於佛道決定無有疑妙法蓮華經囑累品第二十二

以言托之曰囑以法系之曰累欲使傳續妙法利達無窮故曰囑累而爲付授流通也然法會未終遽說囑累者此經以智立體以行成德前之開佛知見明一大事立體之法既備故說囑累以明佛佛授手之要止此而已後之以行成德者唯體前法推而行之更無別法既無別法則於此囑累宜矣華嚴有三十九品敷列脩進至等覺位終如來出現品纔三十七遂即囑累流通而後說普賢常行及善財南遊二品亦以前法既備後唯躡前以成行德更無

別法故也又前彰智境所以簡情顯解後示行境欲其解終趨行故於此辯焉所謂行境者無復簡顯無復情解唯全體運用之而已觀曰若不洞明前解無以躡成後行又須忘絕前解然後能入行境是故行由解成行起解絕則後之行境非言所及非解所到亦非囑累所能相授矣學者當進乎此闍那笈多後翻此經移囑累置卷末失華嚴之旨矣

爾時釋迦牟尼佛從法座起現大神力以右手摩無量菩薩摩訶薩頂而作是言我於無量百千萬億阿僧祇劫脩習是難得阿耨多羅三藐三菩提法今以付囑汝等汝等應當一心流布此法廣令增益如是三摩諸菩薩摩訶薩頂而作是言我於無量百千萬億阿

僧祇劫脩習是難得阿耨多羅三藐三菩提法今以付囑汝等汝等當受持讀誦廣宣此法令一切衆生普得聞知

再三摩頂示諄勸也首楞嚴等諸祕密教謂之佛頂表無上法諸佛授記付囑皆摩其頂表授無上法也無量菩薩即從地漏出者

所以者何如來有大慈悲無諸憚惱亦無所畏能與衆生佛之智慧如來智慧自然智慧如來是一切衆生之大施主汝等亦應隨學如來之法勿生憚惱

所以令其廣宣此法者使學如來三行與諸衆生施大法利也一大慈悲行平等滋濟二無慳惜行竭內外財三無所畏行不憚煩難如是乃能與諸衆生三種智慧佛

智離二乘見如來智離菩薩見自然智離諸證取不由他悟通唯一乘實智也但隨德用異稱耳

於未來世若有善男子善女人信如來智慧者當爲演說此法華經使得聞知爲令其人得佛慧故若有衆生不信受者當於如來餘深妙法中示教利喜

信如來智慧謂能信種智趣向一乘者當爲說是經令得佛慧而不滯二乘也餘深妙法指權漸教也亦曰深妙者是法皆爲

一佛乘故

汝等若能如是則爲已報諸佛之恩

乃所謂將此深心奉塵刹也

時諸菩薩摩訶薩聞佛作是說已皆大歡喜遍滿其身益加恭敬曲躬低頭合掌向佛俱

發聲言如世尊勅當具奉行唯然世尊願不

有慮諸菩薩摩訶薩衆如是三反俱發聲言
如世尊勅當具奉行唯然世尊願不有慮

佛三囑以示勤衆三反以示敬

爾時釋迦牟尼佛令十方來諸分身佛各還

本土而作是言諸佛各隨所安多寶佛塔還
達六

可如故

令分身各還者示法得其傳化身遂隱留

寶塔如故者以後說未周尚須圓證

說是語時十方無量分身諸佛坐寶樹下師

子座上者及多寶佛并上行等無邊阿僧祇
菩薩大眾舍利弗等聲聞四衆及一切世間

天人阿脩羅等聞佛所說皆大歡喜

一喜遣化達隱顯之道二喜留塔得復聞

之法

妙法蓮華經藥王菩薩本事品第二十三

藥王昔爲喜見菩薩精苦爲法燒身然譬
其於釋迦法中受持是經一切天人無如
之者今示其本因使人跋慕共尊此道故
名藥王本事而爲苦行流通即宿王請問

難行苦行是也竊觀此經以智立體以行

成德前之智境所以遺情顯解後之行境

欲其解終趨行如藥王之燒身妙音之隨

應觀音之普門妙嚴之轉邪普賢之勸發

皆示實相行境使人忘情絕解隨悟入

達八

故說是藥王品時八萬菩薩得解一切語

九

言則以苦行成圓通之德也說妙音品時
華德菩薩得法華三昧則以妙行成實相

之德也說普門品時八萬之衆發無等等
心則以圓行成最上之德也及說陀羅尼

此品因宿王華發起者爲明宿世弘經自在之因

品則六萬八千人得無生法忍說莊嚴王品則八萬四千人得法眼淨此又以神力正力助成德行乃至說勸發品時沙數菩薩得旋陀羅尼塵數菩薩具普賢道則以常行成不德之德也夫能底此則法華妙行至矣盡矣故終會焉然始於苦行終於常行者將欲以行成德非精心苦志無以深造故必精苦而後造妙造妙而後能圓能圓而後真契普賢常行亦教之序也

爾時宿王華菩薩白佛言世尊藥王菩薩云

何遊於娑婆世界世尊是藥王菩薩有若干百千萬億那由他難行苦行善哉世尊願少解說諸天龍神夜叉乾闔婆阿脩羅迦樓羅緊那羅摩睺羅伽人非人等又他國土諸來菩薩及此聲聞衆聞皆歡喜

師佛世尊

智慧真光幽明並燭不爲物累故號日月淨明德

其佛有八十億大菩薩摩訶薩七十二恒河沙大聲聞衆

眷屬法侶三乘體具

連入

十

佛壽四萬二千劫善薩壽命亦等彼國無有女人地獄餓鬼畜生阿脩羅等及以諸難女有五障及四趣皆難報

地平如掌琉璃所成寶樹莊嚴寶帳覆上垂

寶華幡寶瓶香爐周遍國界七寶爲臺一樹
一臺其樹去臺盡一箭道此諸寶樹皆有菩
薩聲聞而坐其下諸寶臺上各有百億諸天
作天伎樂歌舞嘆於佛以爲供養

樹去臺一箭道言具蔭廣也

爾時彼佛爲一切衆生喜見菩薩及衆菩薩
諸聲聞衆說法華經

藥王尊經自此始

是一切衆生喜見菩薩樂習苦行於日月淨
明德佛法中精進經行一心求佛滿萬二千
歲已得現一切色身三昧

精進一心滿萬二千歲而後得現一切色
身者一切色身不離根塵中現所言滿萬
二千歲即依根塵十二處圓融乎照至於
功行滿足之時也圓融乎照得其實相則

真

十一

知根根塵塵一切色法咸一實相所現由
是以二實相融一切根塵於一根塵現一
切色法交徹顯攝重重無盡是名滿萬二
千歲得現一切色身三昧此即深證實相
行境也華嚴多舉過量劫數直明以無限
智悲脩如是行曾無限量之心此經過量
之數凡皆如之

得此三昧已心大歡喜即作念言我得現一
切色身三昧皆是得聞法華經力我今當供
養日月淨明德佛及法華經即時入是三昧
於虛空中雨曼陀羅華摩訶曼陀羅華細末
堅黑栴檀滿虛空中如雲而下又雨海此岸
栴檀之香此香六銖價直娑婆世界以供養
佛

此三昧香非人間比所以六銖價直娑婆

也二十四銖爲一兩六銖言少分耳

作是供養已從三昧起而自念言我雖以神力供養於佛不如以身供養即服諸香栴檀薰陸兜樓婆畢力迦沉水膠香又飲瞻蓄諸華香油滿千二百歲已香油塗身於日月淨明德佛前以天寶衣而自纏身灌諸香油以神通力願而自然身光明遍照八十億恒河沙世界其中諸佛同時讚言善哉善哉善男子是真精進是名真法供養如來若以華香瓔珞燒香抹香塗香天繒幡蓋及海此岸栴檀之香如是等種種諸物供養所不能及假使國城妻子布施亦所不及善男子是名第一之施於諸施中最尊最上以法供養諸如來故作是語已而各默然

神力所化不過外財財不及法故復然身

作法供養薰陸乳香也兜樓婆草香畢力迦丁香膠香松香也即服諸香又飲花油滿千二百歲表以妙德妙行淨治根塵也香油外塗表內外俱淨也寶衣纏身灌諸香油以神力然身光明遍照等表被忍辱衣資妙行力以智慧火燐滅幻緣顯發真光照明法界此皆顯示法力行境所以諸佛讚言是真精進真法供養也彼華香繒幡之勝特外物耳國城妻子之重特愛緣耳非法供養故皆不及夫爲法不顧其身非特佛氏也至人得道皆能外形體忘死生或喪之若遺土或喜之如決疣若楊雄不羨久生孔聖甘於夕死凡以達本知常時有不亡者存而斬脫乎塵垢患累故也而大聖又能固之以悲願濟之以神力故

燒身然臂曾無憂吝世俗或駭其所爲在至人觀之與遺土決疣一而已亦以妙覺圓照離於身見得蘊空故乃能如是若識見未亡諸蘊違礙不違法行空慕其迹是徒增業苦爲妄作之_一矣十住斷結經云過去有女名提謂孤寡多難或告之曰今身之厄由前世之罪欲滅前罪莫若捨身有道人辯才曰先身罪業隨逐精神不與身合徒自燒身何於苦惱欲求善報故律制燒身然指悉皆得罪而大乘或聽許者以大乘之人法行備故非妄作故其身火然千二百歲過是以後其身乃盡直使六根六塵一切洞徹故千二百歲其身乃盡

一切衆生喜見菩薩作如是法供養已命終

之後復生日月淨明德佛國中於淨德王家結跏趺坐忽然化生

三昧功成不爲身累生死去來猶如夜旦即爲其父而說偈言

大王今當知 我經行彼處 即時得一切現諸身三昧 勤行大精進 捨所愛之身供養於世尊 爲求無上慧

叙前緣也

說是偈已而白父言日月淨明德佛今故現在我先供養佛已得解一切衆生語言陁羅尼復聞是法華經八百千萬億那由他甄迦羅頻婆羅阿闍婆等偈大王我今當還供養此佛

先供佛已謂然身之後也於然身之後得施羅尼及聞萬億偈乃依法性身而得依

法性土而聞也由依性土而聞故有八百

萬億等偈蓋亦稱性而說也初聞經之後

得現身三昧者由證得法身故應物現形

無非妙體也然身之後得語言總持者由
遠八

離

正

離

諸

相

見

故圓通衆音無非真說也體無

非妙則森羅萬像皆一切色身說無非真

則雀噪鴉鳴皆語言三昧非深證行境超

情離見者何以與此覩迦羅等即俱舍論

六十大數中第十六十八二十之數

白已即坐七寶之臺上昇虛空高七多羅樹

往到佛所頭面禮足合十指爪以偈讚佛

容顏甚奇妙光明照十方我適曾供養

今復還親近

叙往昔然身之緣也

爾時一切衆生喜見菩薩說是偈已而白佛

言世尊世尊猶故在世

師資道合知其將化故發此問

爾時日月淨明德佛告一切衆生喜見菩薩善男子我涅槃時到滅盡時至汝可安施床座我於今夜當般涅槃又勑一切衆生喜見

菩薩善男子我以佛法囑累於汝及諸菩薩大弟子并阿耨多羅三藐三菩提法亦以三千大千七寶世界諸寶樹寶臺及給侍諸天悉付於汝

佛法通指三乘菩提法別指大乘菩薩弟

遠八十五子言法衆三千寶界言化境寶樹給侍言

所御

我滅度後所有舍利亦付囑汝當令流布廣設供養應起若干千塔如是日月淨明德佛勑一切衆生喜見菩薩已於夜後分入於涅

樂

勑以舍利起塔者戒定餘勲欲霑無際故
也若干者不定之數意任其緣力耳

爾時一切衆生喜見菩薩見佛滅度悲感懊
惱戀慕於佛即以海此岸栴檀爲積供養佛
身而以燒之火滅已後收取舍利作八萬四
千寶瓶以起八萬四千塔高三世界表刹莊
嚴垂諸幡蓋懸衆寶鈴

現滅不滅聖意所知而悲感戀慕者示與
衆生同一悲仰耳須彌四海刹部居南言
海此岸即南岸出美栴檀積之爲積以奉
闍維示誠敬也佛說火化之法在已則顯
三昧之力攝熏練之功故化火自焚舍利
透透在人則掩臭腐之穢免蠻蟻之食使
其魄不滯其神清升而此方以卧淤臘於

荒郊埋腐骸於朽壤爲是且以火化爲不
忍方其穴地負土全體而坑爲可忍耶二
皆出於不得已耳達者觀之一等歸盡則
卧淤埋腐不若火化之愈矣自道觀之沉
之可也露之可也衣新而棄諸溝中袞文
而納諸石櫛無不可者奚足爲焚瘞之競
爾時一切衆生喜見菩薩復自念言我雖作
是供養心猶未足我今當更供養舍利便語
諸菩薩大弟子及天龍夜叉等一切大衆汝
等當一心念我今供養日月淨明德佛舍利
作是語已即於八萬四千塔前燃百福莊嚴
遠六作是語已即於八萬四千塔前燃百福莊嚴
臂七萬二千歲而以供養令無數求聲聞衆
無量阿僧祇人發阿耨多羅三藐三菩提心
皆使得住現一切色身三昧

昔之然身爲離相見今復然臂爲除法執

故令小乘離諸見執發正道心根境圓融
故皆得住現身三昧也昔之求佛滿萬二
千歲今之然臂復七倍其久者言益以無
限智悲行菩薩大行如其智悲有限何足
以化無數無量之人

爾時諸菩薩天人阿脩羅等見其無臂憂惱
悲哀而作是言此一切衆生喜見菩薩是我
等師教化我者而今燒臂身不具足
愛見未忘故哀其不足此初心菩薩而已
於時一切衆生喜見菩薩於大衆中立此誓
言我捨兩臂必當得佛金色之身若實不虛
令我兩臂還復如故作是誓已自然還復由
斯菩薩福德智慧淳厚所致

臂之於手爲辟能役衆指而我無所役則
兩臂表我執法執根本也我執能生煩惱

續諸生死法執能生所知礙正知見捨一
存一則爲二乘故捨兩臂必當得佛還復
如故者若果得佛即無所捨矣此非淺薄
所能故稱淳厚

當爾之時三千大千世界六種震動天雨寶
華一切人天得未曾有

以非常之事感非常之瑞人天因是得大
法利也上皆叙往因

佛告宿王華菩薩於汝意云何一切衆生喜
見菩薩豈異人乎今藥王菩薩是也其所捨
身布施如是無量百千萬億那他數
此結答若干難行苦行之間

宿王華若有發心欲得阿耨多羅三藐三菩
提者能然手指乃至足一指供養佛塔勝以
國城妻子及三千大千國土山林河池諸珍

寶物而供養者

手足之指臂微細執着能障菩提故欲得菩提者雖未能頓捨且欲微而損之亦勝有爲之福故曰能然一指勝諸供養天聖人言行動必有法非徒教末代然手足以求福也苟不明此殘形焚穢竟何益耶故藥王將欲然身且以法行淨治根塵使功行滿足然後以神通力化火自焚其光能照河沙佛界後人欲睇其迹如斯可矣若復有人以七寶滿三千大千世界供養於佛及大菩薩辟支佛阿羅漢是人所得功德不如受持此法華經乃至一四句偈其福最多

七寶供養其福有限一偈超悟非限量福宿王華譬如一切川流江河諸水之中海爲

達八

八八

第一此法華經亦復如是於諸如來所說經中最爲深大

川流江河已異於溝港而海爲深大如來所說已異於小乘而此爲第一

又如土山黑山小鐵圍山大鐵圍山及十寶山衆山之中須彌山爲第一此法華經亦復如是於諸經中最爲其上

環須彌之外有土山黑山而堅大不及鐵圍大海之內有十寶山而貴高不及須彌土山黑山譬人乘天乘之經鐵山寶山譬二乘菩薩乘之經須彌則譬一乘之經故曰最上

又如衆星之中月天子最爲第一此法華經亦復如是於千萬億種諸經法中最爲照明諸經設法爲破昏冥然微茫漸顯如星之

照此經頓悟陰翳俱盡圓融廓徹如月之明

又如日天子能除諸暗此經亦復如是能破一切不善之暗

日光出時不與冥合人得正智諸闇自除

又如諸小王中轉輪聖王最爲第一此經亦復如是於諸經中最爲其尊

前言最上明部分此言最尊明威德

又如帝釋於三十三天中王此經亦復如是

諸經中王

三乘之教隨機稱尊不能相攝此經會三

歸一爲諸經之正統

又如大梵天王一切衆生之父此經亦復如是一切賢聖學無學及發菩提心者之父

大梵即娑婆界主父言爲之依怙

又如一切凡夫人中須隨洹斯隨舍阿那含阿羅漢辟支佛爲第一此經亦復如是一切如來所說若菩薩所說若聲聞所說諸經法中最爲第一有能受持是經典者亦復如是於一切衆生中亦爲第一

四果未離凡位而支佛爲第一以根利故衆生未離凡夫而因經爲第一以乘勝故一切聲聞辟支佛中菩薩爲第一此經亦復如是於一切諸經法中最爲第一

前於凡夫推第一此於三乘推第一後於

佛位推第一乃增進顯勝也

如佛爲諸法王此經亦復如是諸經中王總而舉之

此可盡而

皆勝故也

宿王華此經能救一切衆生者此經能令一切衆生離諸苦惱此經能大饒益一切衆生充滿其願

如清涼池能滿一切諸渴乏者如寒者得火

如裸者得衣如商人得主如子得母如渡得

船如病得醫如暗得燈如貧得寶如民得王

如賈客得海如炬除暗

燈能發明未能除暗

此法華經亦復如是能令衆生離一切苦一

切病痛能解一切生死之縛

衆生衆苦病痛縛着皆因迷妄能開佛知

見則一切皆離

若人得聞此法華經若自書若使人書所得

功德以佛智慧籌量多少不得其邊

若書是經卷華香瓔珞燒香抹香塗香幡蓋

衣服種種之燈酥燈油燈諸香油燈瞻萄油燈須曼那油燈波羅羅油燈婆利師迦油燈那婆摩利油燈供養所得功德亦復無量

瞻萄已下皆花名以此熏作香油

宿王華若有人聞是藥王菩薩本事品者亦

得無量無邊功德若有女人聞是藥王菩薩

本事品能受持者盡是女身後不復受

爲正因故功德無邊女人能持可盡障漏

若如來滅後後五百歲中若有女人聞是經典如說脩行於此命終即往安樂世界阿彌陀佛大菩薩衆圍遶住處生蓮華中寶座之

大集

二

上

大集經云佛滅後初五百歲解脫堅固第

二五百歲禪定堅固第三多聞堅固第四

福德堅固第五聞諦堅固即後五百歲也

鬱諍堅固則善根難得故雖女人可致勝福此就劣顯勝意義男也

不復爲貪欲所惱亦復不爲瞋恚愚癡所惱亦復不爲憍慢嫉妬諸垢所惱

貪瞋癡爲根本煩惱憍嫉等垢爲隨煩惱

既生安養所依者淨業所會者善人故無垢惱也

得菩薩神通無生法忍得是忍已眼根清淨以是清淨眼根見七百萬二千億那由他恒河沙等諸佛如來

心法俱寂而能照用名菩薩神通無生法

忍心寂根淨故能見多佛華嚴十地菩薩功圓智滿心鏡交徹能見多百佛至多百十億那由他佛其意同此

是時諸佛遙共讚言善哉善哉善男子汝能

於釋迦牟尼佛法中受持讀誦惟是經爲他人說所得福德無量無邊火不能焚水不能漂汝之功德于佛共說不能令盡

非有爲福故不能焚漂稱實相德故說不能盡

汝今已能破諸魔賊壞生死軍諸餘怨敵皆悉摧滅

讚其所得法忍妙力也諸魔賊即五陰煩惱等生死軍即無明六識等賊言侵害軍言攻擊餘怨即隨情對境之惑業以得是達八

忍故皆悉摧滅

三善男子百千諸佛以神通力共守護汝於一切世間天人之中無如汝者唯除如來其諸聲聞辟支佛乃至菩薩智慧禪定無有與汝

等者

上皆諸佛遙讚之言

宿王華此菩薩成就如是功德智慧之力
結勤脩益也

若有人聞是藥王菩薩本事品能隨喜讚善者是人現世口中常出青蓮華香身毛孔中常出牛頭栴檀之香所得功德如上所說一稱經名則蓮華出口一能隨喜則法香在身善種不亡功成自著如上者指隨喜品

是故宿王華以此藥王菩薩本事品囑累於汝我滅度後後五百歲中廣宣流布於闡浮提無令斷絕惡魔魔民諸天龍夜叉鳩槃茶等得其便也宿王華汝當以神通之力守護是經所以者何此經則爲闡浮提人病之良藥若人有病得聞是經病即消滅不老不死

進八

三

真知見力卻癡愛病是爲良藥也癡愛病除則生死緣斷頓證真常何復老死如般若智照能空五蘊度苦厄無老死是也

宿王華汝若見有受持是經者應以青蓮華咸滿末香供散其上散已作是念言此人不久必當取草坐於道場破諸魔軍當吹法螺擊大法鼓度脫一切衆生老病死海是故求佛道者見有受持是經典人應當如是生恭敬心

散花作念等令生心如佛想也取草者佛成道時取吉祥草爲座

說是藥王菩薩本事品時八萬四千菩薩得解一切衆生語言陀羅尼

喜見聞經即得現身三昧及然身之後即得語言總持爲證得法身離諸相見而洞

契妙圓故也及其然臂則聲聞得住現身

三昧今說本事則菩薩得解語言總持者

蓋由悟其然身然臂之事亦能離諸見執

洞契妙圓此所謂以苦行成圓通之德也

然皆得三昧又得總持者現身三昧隨類

分形語言總持隨類說法二者蓋常相需而皆由妙法所證故說妙音品時諸菩薩

衆亦得是三昧及陀羅尼

多寶如來於寶塔中讚宿王華菩薩言善哉

善哉宿王華汝成就不可思議功德乃能問

釋迦牟尼佛如此之事利益無量一切衆生

非宿曾成就聞持自在之德不能發起是

利

妙法蓮華經要解卷第十七

達人

三

音釋

跋奇逆 鳴於加切 港別名古項

妙法蓮華經要解卷第十八

遠九

溫陵開元蓮寺比丘

戒環解

妙音菩薩品第二十四

眉間白毫相光遍照東方百八萬億那由他
恒河沙等諸佛世界

妙音者深體妙法能以妙音隨應演說而
流通是道者也名雖妙音實彰妙行觀其速九

徃昔植因於雲雷音王佛所獻樂奉鉢蘄

在妙音說法妙行隨應故報生宿智佛國

果能有是神力今使學者體其妙行而隨

應說法闡揚斯道故說妙音品爲妙行流
通夫體妙音則不滯言詮能隨應則不局

心迹不滯不局所以爲妙行也繼此復有

圓行常行而次前苦行說者將欲以行成
德必精心苦志然後造妙造妙然後能圓

能圓然後真契普賢常行已如前解

爾時釋迦牟尼佛放大人相肉髻光明及放

故以極果之光召現也佛有九十七種大
人相肉髻頂其一

過是數已有世界名淨光莊嚴其國有佛號
淨華宿王智如來應供正遍知明行足善逝
世間解無上士調御丈夫天人師佛世尊爲
無量無邊菩薩大眾恭敬圍繞而爲說法釋
迦牟尼佛白毫光明遍照其國

華嚴舉菩薩所從來國表所行之行本所
事佛表所證之果淨光莊嚴即依智之行
也淨華宿智即依行之智也智行互嚴因

果含體妙音妙行依此示現

爾時一切淨光莊嚴國中有一菩薩名曰妙音久已植衆德本供養親近無量百千萬億諸佛而悉成就甚深智慧

植德供佛成就深智言福慧兩足

達九

得妙幢相三昧法華三昧淨德三昧宿王戲三昧無緣三昧智印三昧解一切衆生語言三昧集一切功德三昧清淨三昧神通遊戲三昧慧炬三昧莊嚴王三昧淨光明三昧淨藏三昧不共三昧日旋三昧得如是等百千

萬億恒河沙等諸大三昧

三昧此云正定圓覺云三昧正受者謂正

定中受用之法簡異邪受非謂梵語三昧此云正受也故寶積云三昧及正受妙幢相者摧邪表正而不住相也法華三昧深

入一乘證諸實相淨德三昧衆德真淨物莫能染宿王戲者本智自在無所滯著無緣則照而常寂智印參合萬法解一切語言謂了皆真說集一切功德謂萬德圓備清淨三昧纖塵不立神通遊戲變現自在

慧炬以能破癡暗莊嚴王以總攝妙行淨光明者得妙智明淨藏者得法眼藏不共謂二乘不及日旋則大千圓照得如是等河沙三昧謂交徹融攝重重無盡皆妙音所具也由具此故能成妙行流通妙法

達九

三

釋迦牟尼佛光煥其身即白淨華宿王智佛言世尊我當往詣娑婆世界禮拜親近供養釋迦牟尼佛及見文殊師利法王子菩薩藥王菩薩勇施菩薩宿王華菩薩上行意菩薩

莊嚴王菩薩藥上菩薩

此皆靈山法衆

爾時淨華宿王智佛告妙音菩薩汝莫輕彼國生下劣想善男子彼娑婆世界高下不平土石諸山穢惡充滿佛身卑小諸菩薩衆其形亦小而汝身四萬二千由旬我身六百八十萬由旬汝身第一端正百千萬福光明殊妙是故汝往莫輕彼國若佛菩薩及國土生下劣想妙音菩薩白其佛言世尊我今詣娑婆世界皆是如來之力如來神通游戲如來功德智慧莊嚴

之德皆出如實之道則於一切法無不如矣何復勝劣之異哉是以現種種形說種種法而於神通智慧無所損減爲如故也於是妙音菩薩不起於座身不動搖而入三昧以三昧力於耆闍崛山去法座不遠化作八萬四千衆寶蓮華闔浮檀金爲莖白銀爲葉金剛爲鬚甄叔迦寶以爲其臺
將與八萬菩薩俱共發來故先現此瑞甄叔迦此云鸚鵡寶赤如其齧故

爾時文殊師利法王子見是蓮華而白佛言世尊是何因緣先現此瑞有若干千萬蓮華速九
四間浮檀金爲莖白銀爲葉金剛爲鬚甄叔迦寶以爲其臺

此皆行境依智示現故假文殊智體而問我所往其力用其神變其莊嚴皆假如來娑婆佛身乃隱勝現劣比光嚴勝身在分別心遂生劣想如來正見本絕異同故宿王以彼此異迹爲告而妙音以如來三德而答示無劣想也三德皆稱如來者謂今我所往其力用其神變其莊嚴皆假如來

摩訶薩欲從淨華宿王智佛國與八萬四千菩薩圍繞而來至此娑婆世界供養親近禮拜於我亦欲供養聽法華經

文殊師利白佛言世尊是菩薩種何善本修何功德而能有是大神通力行何三昧願爲

我等說是三昧名字我等亦欲勤修行之行此三昧乃能見是菩薩色相大小威儀進止

唯願世尊以神通力彼菩薩來令我得見

請問之辭皆爲機發

爾時釋迦牟尼佛告文殊師利此久滅度多

寶如來當爲汝等而現其相時多寶佛告彼菩薩善男子來文殊師利法王子欲見汝身文殊願世尊以神通力爲現妙音而世尊反命多寶者多寶以神通願力在處證經

欲假其神通願力故也

五

於時妙音菩薩於彼國沒與八萬四千菩薩俱共發來與八萬四千菩薩俱來者示妙行隨應廣化塵勞也

所經諸國六種震動皆悉雨於七寶蓮華百千天樂不鼓自鳴

蓮華遍雨天樂自鳴表妙行隨處示現妙音離於作意

是菩薩目如廣大青蓮華葉正使和合百千萬月其面貌端正復過於此身真金色無量百千功德莊嚴威德熾盛光明照曜諸相具足如那羅延堅固之身

此言其四萬二千由旬之相好也和合猶聚集也肇法師云那羅延天力士名端正殊妙志力雄猛

入七寶臺上昇虛空去地七多羅樹諸菩薩

眾恭敬圍繞而來詣此娑婆世界耆闍崛山
到已下七寶臺以價直百千瓔珞持至釋迦

牟尼佛所頭面禮足奉上瓔珞

示以法寶莊嚴法身

而白佛言世尊淨華宿王智佛問訊世尊少
病少惱起居輕利安樂行不四大調和不世
事可忍不衆生易度不無多貪欲嗔恚愚癡
嫉妬慳慢不無不孝父母不敬沙門邪見不
善心不攝五情不世尊衆生能降伏諸魔怨
不

世尊我今欲見多寶佛身唯願世尊示我令
見
寶塔高遠伏佛求見表尊敬耳佛於囑累
品從法座起時已出塔故云多寶佛塔還
可如故舊謂二佛至此尚同座而妙音能
見釋迦不見多寶徒構疑難
爾時釋迦牟尼佛語多寶佛是妙音菩薩欲
得相見時多寶佛告妙音言善哉善哉汝能
爲供養釋迦牟尼佛及聽法華經并見文殊
師利等故來至此

問示居堪忍事也貪恚癡慢等皆堪忍難
度之事五情言五欲諸魔言五陰
火滅度多寶如來在七寶塔中來聽法不又
問訊多寶如來安隱少惱堪忍久住不
上皆宿王傳問之辭

達九

六

佛告華德菩薩過去有佛名雲雷音王多陀

阿伽度阿羅訶三藐三佛號國名現一切世間劫名喜見

佛名雲雷音者一音利潤開覺群動也國名現一切世間若根身器界皆能隨應也劫名依上而立由利潤隨應故時衆喜見

遠九
妙音菩薩於萬二千歲以十萬種伎樂供養

雲雷音王佛并奉上八萬四千七寶鉢以是因緣果報今生淨華宿王智佛國有是神力樂宣法音鉢爲應器樂獻十萬種伎者示欲廣宣妙法也鉢奉八萬四千者示欲應

化塵勞也故今果有妙音隨應之神

華德於汝意云何爾時雲雷音王佛所妙音菩薩伎樂供養奉上寶器者豈異人乎今此妙音菩薩摩訶薩是

華德是妙音菩薩已曾供養親近無量諸佛

久植德本又值恒河沙等百千萬億那由他佛

華德汝但見妙音菩薩其身在此而是菩薩現種種身處處爲諸衆生說是經典

妙音觀音應化皆能現十界身自天人獄

鬼畜脩羅名六凡聲聞辟支菩薩佛名四聖是爲十界

或現梵王身或現帝釋身或現自在天身或現大自在天身或現天大將軍身或現毗沙門天王身

或現轉輪聖王身或現諸小王身或現長者身或現居士身或現宰官身或現婆羅門身或現比丘比丘尼優婆塞優婆夷身

或現長者居士婦女身或現宰官婦女身或現婆羅門婦女身或現童男童女身

或現天龍夜叉乾闥婆阿脩羅迦樓羅緊那
羅摩曇羅伽人非人等身而說是經

諸有地獄餓鬼畜生及衆難處皆能救濟

諸應皆言現身說經獨於惡趣不言者惡

趣方沉幽昏無由聞經但以神力救濟而

已

三九

八

乃至於王後宮變爲女身而說是經

華德是妙音菩薩能救護娑婆世界諸衆生
者是妙音菩薩如是種種變化現身在此娑

婆國土爲諸衆生說是經典於神通變化智

慧無所損減是菩薩以若干智慧明照娑婆

世界令一切衆生各得所知於十方恒河沙

世界中亦復如是

此有三節初牒在此娑婆救濟二牒神變

智照之功三牒此方如是十方亦然是謂

廣顯也言種種變化而神智無損者前所
謂得如來三德能一切如故也言智慧明

照者方便開導也各得所知者隨類各解
也

若應以聲聞形得度者現聲聞形而爲說法
應以辟支佛形得度者現辟支佛形而爲說

法應以菩薩形得度者現菩薩形而爲說法
應以佛形得度者即現佛形而爲說法如是
種種隨所應度而爲現形乃至應以滅度而
得度者示現滅度

三九

九

華德妙音菩薩摩訶薩成就大神通智慧之
力其事如是

爾時華德菩薩白佛言世尊是妙音菩薩深
種善根世尊是菩薩住何三昧而能如是在
所變現度脫衆生

佛告華德菩薩善男子其三昧名現一切色身妙音菩薩住是三昧中能如是饒益無量衆生

如淨摩尼隨方現色妙行流通期至於此說是妙音菩薩品時與妙音菩薩俱來者八

萬四千人皆得現一切色身三昧此娑婆世

界無量菩薩亦得是三昧及陀羅尼

及解一切語言陀羅尼也諸菩薩皆具體

而微者故因說是品皆得發明

爾時妙音菩薩摩訶薩供養釋迦牟尼佛及多寶佛塔已還歸本土所經諸國六種震動雨寶蓮華作百千萬億種種伎樂

於彼發來所經亦爾示來往經行不離是

道

既到本國與八萬四千菩薩圍繞至淨華宿

王智佛所白佛言世尊我到娑婆世界饒益衆生見釋迦牟尼佛及見多寶佛塔禮拜供養又見文殊師利法王子菩薩及見藥王菩薩得勤精進力菩薩勇施菩薩等亦令是八萬四千菩薩得現一切色身三昧

菩薩舉措自他無利

說是妙音菩薩來往品時四萬二千天子得無生法忍華德菩薩得法華三昧

無生法忍者證妙法之體法華三昧者得實相之用此所謂以妙行成實相之德

妙法蓮華經達光世音菩薩普門品第二十五

單發爲聲雜比爲音於世間衆苦雜聲齊觀並救號觀世音妙圓之行自一心出應無不遍號曰普門此繼前品說者妙音現

形說法救濟衆難與觀音無異但略而未

普妙而未圓觀音不離是行而能觀其音
聲隨響而答大千圓應無去來之相所謂

自在之業普門示現則進於妙音其實二

聖一道相爲始終耳故後頌觀音之德而

兼云妙音是知二聖一道也即妙音之行

而演爲普門是知相爲始終也夫欲體前

之法須兼二行從妙而普有始有終然後

圓備故繼妙音說普門品爲圓行流通文

殊於華嚴會終現法化已南歷人間說普
照法界修多羅門所以圓彰前法體用善

財歷百城已到普門國成就阿僧祇法門
遂能於諸有中普現其身斯皆以行成德
使圓而普也觀彼設法次序名義與此宛

同

爾時無盡意菩薩即從座起偏袒右肩合掌

卷九

十一

向佛而作是言世尊觀世音菩薩以何因緣
名觀世音

將顯普門而因無盡意發起者表普門圓
行應現無盡也若愚讚云世界無邊塵擾
擾衆生無數業茫茫愛河無底浪滔滔是
故我名無盡意觀音之行亦若是矣

從此至受持名字名十四無畏功德

佛告無盡意菩薩善男子若有無量百千萬
億衆生受諸苦惱聞是觀世音菩薩一心稱
名觀世音菩薩即時觀其音聲皆得解脫

此於衆苦雜聲齊觀並救也於音言觀者
以觀智應物之謂觀即真觀淨觀智慧慈
悲是也觀觀之體聞聞之性本無苦樂衆
生不能返聞循聲流轉故受諸苦惱觀音
不隨聲塵妄起知見故一切解脫而令苦

衆生持其名蒙其觀者亦得解脫實真淨慈悲觀力加被故也昔琳法師稱名七日而免難於唐孫敬德誦經千遍而全生於魏即脫諸苦惱之驗也

若有持是觀世音菩薩名者設入大火火不能燒由是菩薩威神力故若爲大水所漂稱其名號即得淺處若有百千萬億衆生爲求金銀琉璃碑磲瑪瑙珊瑚琥珀真珠等寶入於大海假使黑風吹其船舫漂墮羅刹鬼國其中若有乃至一人稱觀世音菩薩名者是諸人等皆得解脫羅刹之難以是因緣名觀世音

楞嚴明十四無畏功德一者由我不自觀音以觀觀者令苦衆生觀其音聲即得解脫夫不自觀音以觀觀者即離塵復性之

真觀也離塵復性則諸妄自脫故能令苦衆生蒙我真觀即得解脫二者知見旋復則火不能燒三者觀聽旋復則水不能溺蓋見覺屬火聞聽屬水知見旋則離火塵聞聽旋則離水塵幻塵既離真性斯復所以無能燒溺也能旋見聽則煩惱之火貪愛之水皆無能燒溺矣四者滅妄斷殺則鬼不能害皆由離塵復性之觀力加被也昔于相國問黑風漂墮之義於紫玉玉呼名諷之公慄然變色玉曰便是黑風漂墮則凡不能離塵循聲流轉一念漂墮皆如是也

若復有人臨當被害稱觀世音菩薩名者彼所執刀杖尋段段壞而得解脫此由菩薩以六根消復同於聲聽之力加

之以同聲聽無復形礙故使刀兵猶割水
吹光性無損動

若三千大千國土滿中夜叉羅刹欲來惱人

聞其稱觀世音菩薩名者是諸惡鬼尚不能
以惡眼視之况復加害

此假聞熏精明之力燦諸癡暗故鬼不能
視斷滅妄想心無殺害故害不能加

卷九
十三

設復有人若有罪若無罪杻械枷鎖檢繫其

身稱觀世音菩薩名者皆悉斷壞即得解脫
此由音性圓消離諸塵妄之力加之塵妄

既離則身相不有故枷鎖自脫

若三千大千國土滿中怨賊有一商主將諸
商人賚持重寶經過嶮路其中一人作是唱
言諸善男子勿得恐怖汝等應當一心稱觀

世音菩薩名號是菩薩能以無畏施於衆生

汝等若稱名者於此怨賊當得解脫衆商人
聞俱發聲言南無觀世音菩薩稱其名故即
得解脫

此由滅音圓聞遍生慈力加之蓋音聞兩
立則物我成敵滅音圓聞則內外無待故

能遍慈而却敵也

無盡意觀世音菩薩摩訶薩威神之力巍巍
如是結外業也

若有衆生多於媱慾常念恭敬觀世音菩薩
便得離慾

此由熏聞離塵色所不劫之力加之蓋衆
生以欲習合塵故爲色劫一蒙妙力則欲
愛乾枯根境不偶雖有妖色不能劫動故
便得離慾

若多嗔恚常念恭敬觀世音菩薩便得離嗔

此由根境圓融無能所對之力加之蓋嗔

由違情而起對境而生圓融則無違無對則不嗔矣

若多愚癡常念恭敬觀世音菩薩便得離癡

此由消塵旋明朗徹無礙之力加之以癡

達九

古

由妄塵所蔽無明所覆消塵則無蔽朗徹則無覆故能旋復真明永離癡暗也內薰有十而壞滅法身唯嫌怒癡爲甚故舉三以兼餘上皆依楞嚴漸說自願言之三毒水泡元無自性知觀觀者豈不便離

無盡意觀世音菩薩有如是等大威神力多所饒益是故衆生常應心念結內業也

若有女人設欲求男禮拜供養觀世音菩薩便生福德智慧之男設欲求女便生端正有相之女宿植德本衆人愛敬無盡意觀世音

菩薩有如是力

融形涉世遍事諸佛爲法王子之力加之即生男圓通合界承順如來受領法問之力加之即生女

若有衆生恭敬禮拜觀世音菩薩福不唐捐

是故衆生皆應受持觀世音菩薩名號無盡意若有人受持六十二億恒河沙菩薩名字復盡形供養飲食衣服卧具醫藥於汝意云何是善男子善女人功德多不無盡意言甚多世尊佛言若復有人受持觀世音菩薩名號乃至一時禮拜供養是二人福正等無異於百千萬億劫不可窮盡

此第十四無畏功德也楞嚴云此大千界現住世間有六十二億河沙菩薩修法垂範方便利生持名供養得無量福而持觀

音名其福齊等蓋由觀音得真圓通一多平等彼我無二故也

無盡意受持觀世音菩薩名號得如是無量

無邊福德之利

總結十四無畏之福

無盡意菩薩白佛言世尊觀世音菩薩云何遊此娑婆世界云何而爲衆生說法方便之力其事云何

即三十二應也觀音於楞嚴會上自說我昔供養觀音如來授我如幻聞熏聞修金剛三昧與佛如來同慈力故令我身成三十二應入諸國土始自佛身終至人非人等爲三十二皆以無作妙力自在成就佛告無盡意菩薩善男子若有國土衆生應以佛身得度者觀世音菩薩即現佛身而爲

說法應以辟支佛身得度者即現辟支佛身而爲說法應以聲聞身得度者即現聲聞身而爲說法

但舉三聖者妙音品開菩薩位此則含在佛位應讀爲膺當其根而應之也

應以梵王身得度者即現梵王身而爲說法應以帝釋身得度者即現帝釋身而爲說法應以自在天身得度者即現自在天身而爲說法應以大自在天身得度者即現大自在天身而爲說法應以天大將軍身得度者即現天大將軍身而爲說法應以毘沙門身得度者即現毘沙門身而爲說法

梵王爲初禪天主帝釋爲忉利天主自在天居欲界頂大自在天居色界頂天大將軍統領鬼神四天王統領世界毘沙門居

北方爲最尊初二從顯舉以梵釋常隨佛
故次四從總舉謂欲界之總色界之總鬼
神之總世界之總也

應以小王身得度者即現小王身而爲說法
應以長者身得度者即現長者身而爲說法
應以居士身得度者即現居士身而爲說法
應以宰官身得度者即現宰官身而爲說法
應以婆羅門身得度者即現婆羅門身而爲
說法

妙音品先言輪王次言小王乃總別兼舉

此從總舉合依正法華言輪王輪王統四
天下小王治一邦國長者族姓推尊居士
清節養素宰官判斷邦邑婆羅門術數攝
衛

應以比丘比丘尼優婆塞優婆夷身得度者

達九

十七

即現比丘比丘尼優婆塞優婆夷身而爲說
法

前二出家持大戒後二在家持五戒

應以長者居士宰官婆羅門婦女身得度者
即現婦女身而爲說法應以童男童女身得
度者即現童男童女身而爲說法

應以天龍夜叉乾闥婆阿脩羅迦樓羅緊那
羅摩猴羅伽人非人等身得度者即皆現之
而爲說法應以執金剛神得度者即現執金
剛神而爲說法

手執金剛護佛法者六凡止舉天人神三
類者舉得度者而已若地獄鬼畜方沉幽
昏未應得度則漸滅其苦於頌見之

無盡意是觀世音菩薩成就如是功德以種
種形遊諸國土度脫衆生

是故汝等應當一心供養觀世音菩薩是觀

世音菩薩摩訶薩於怖畏急難之中能施無畏是故此娑婆世界皆號之爲施無畏者無盡意菩薩白佛言世尊我今當供養觀世音菩薩即解頸衆寶珠瓔珞價直百千兩金

而以與之作是言仁者受此法施珍寶瓔珞

妙音供養釋迦特奉瓔珞無盡供養觀音亦奉瓔珞皆表法寶莊嚴故曰法施

時觀世音菩薩不肯受之無盡意復白觀世音菩薩言仁者愍我等故受此瓔珞爾時佛

告觀世音菩薩當愍此無盡意菩薩及四衆

天龍夜叉乾闥婆阿修羅迦樓羅緊那羅摩

曇羅伽人非人等故受是瓔珞即時觀世音

菩薩愍諸四衆及於天龍人非人等受其瓔

珞分作二分一分奉釋迦牟尼佛一分奉多

真

六

寶佛塔

普門性中本無施受但爲物故施愍物故受也分奉二尊者示爲四衆莊嚴福聚也無盡意觀世音菩薩有如是自在神力遊於

娑婆世界

結答云何遊此之間

爾時無盡意菩薩以偈問曰

世尊妙相具 我今重問彼

佛子何因緣

名爲觀世音 具足妙相尊

偈答無盡意

汝聽觀音行 善應諸方所

弘誓深如海

歷劫不思議 侍多千億佛

發大清淨願

我爲汝畧說 聞名及見身

心念不空過

能滅諸有苦 假使興害意

惟落大火坑

念彼觀音力 火坑變成池

或漂流巨海

龍魚諸鬼難 念彼觀音力

波浪不能沒

於水言漂浪則兼風災自此至電電消散皆頌外業在長行爲十四無畏而頌文事相不同又加傍頌者十四無畏特舉大洛實具一切功德故也 次傍頌險難

或在須彌峯 爲人所推墮

第七

十九

念彼觀音力

如日虛空住

或被惡人逐

墮落金剛山

念彼觀音力

不能損一毛

言峻利之極尚不能損况其小難

或值怨賊達

各執刀加害

念彼觀音力

咸即起慈心

或遭王難苦

臨刑欲壽終

念彼觀音力

刀尋段段壞

或囚禁枷鎖

手足被杻械

念彼觀音力

釋然得解脫

次傍頌詛毒

咒詛諸毒藥

所欲害身者

念彼觀音力

還著於本人

具正念者橫逆莫加出爾反爾自貽伊戚或遇惡羅刹 毒龍諸鬼等 念彼觀音力時悉不敢害

次傍頌蛇獸

若惡獸圍繞

利牙爪可怖

念彼觀音力

疾走無邊方

蛇及蝮蝎

氣毒烟火然

念彼觀音力

尋聲自回去

信謂兒無所投角兵無所投刃也

次傍頌災變

雲雷鼓掣電

降雹澍大雨

念彼觀音力

應時得消散

雷電調適爲常鼓掣爲變陰包陽則爲凝電陰過陽則爲大雨是皆災變故欲其消散

衆生被困厄

無量苦逼身

觀音妙智力

能救世間苦

衆生由無妙智力故爲欲恚癡之所困逼

具足神通力 廣修智方便 十方諸國土

無刹不現身 種種諸惡趣 地獄鬼畜生

生老病死苦 以漸悉令滅

智方便即遠光所謂有慧方便也雖三惡趣方

沉幽昏未應得度亦與漸滅其苦

真觀清淨觀 廣大智慧觀 悲觀及慈觀

常願常瞻仰

其所以觀音脫苦能施無畏現形度生皆

五觀之力故此結顯也真以自妄淨以治

染智以破惑悲以拔苦慈以與樂以是五

觀加被群迷故妄染惑苦應念息滅所以

常願仰而依之然性本圓澄因迷起妄惑

染既生故觀智繁設苟無妄染則真淨不

立矣蓋以真息妄等事皆聖人不得已也

故楞嚴曰言妄顯諸真妄真同二妄

無垢清淨光 慧日破諸暗 能伏災風火

普明照世間

無垢慧日歎觀智之體伏災普照歎觀智

之用伏災言脫苦普照言現形

悲體戒雷震 慈意妙大雲 漱甘露法雨

滅除煩惱焰

戒教戒也法身無體以悲爲體故教戒所

行如雷作動聖人無意以慈爲意故利澤

遠光之興如雲潤覆

諱訟經官處 怖畏軍陣中 念彼觀音力

衆悉退散

此亦傍頌施無畏德

妙音觀世音 梵音海潮音 勝彼世間音

是故常須念 念念勿生疑

觀音之行不異妙音由能從妙而普故兼二號以說法不滯爲妙音尋聲救苦爲觀音性無著爲梵音應不失時爲潮音此所以勝世間音也具是衆德故須常念不間不疑則觀行智力無不相應矣

觀世音淨聖 於苦惱死厄 能爲作依怙具一切功德 慈眼視衆生 福聚海無量是故應頂禮

觀聽反入離諸塵妄是謂淨聖乘彼正念假之福力是謂依怙具一切德則隨所求而應之不止十四無畏也慈視衆生則擇可度而度之不止三十二應也其福聚如海利澤不窮故應歸命

爾時持地菩薩即從座起前白佛言世尊若

有衆生聞是觀世音菩薩品自在之業普門示現神通力者當知是人功德不少

持地菩薩昔遇毘舍浮佛教之平持心地則一切皆平是能以妙法內平自心使外患自平不能爲害者也故聞此品深讚其

功意顯自在之業普門之行實爲心地法

門聞持之人苟能以是平持心地則外患自平不能爲害可以於諸怖畏能施無畏由是自在之業普門之行遂爲已有故曰

若有聞者當知是人功德不少觀音之號

連九

王

或曰觀世音或曰觀自在其行或曰普門或曰圓通者依悲觀慈觀應物之德言之故號觀世音依真觀淨觀照心之功言之故號觀自在自一心而出應無不遍則謂之普門自萬物而反照無不融則謂之圓

通其實一而已故或以自在爲號或以自

在名業以自在爲號言心得自在如心經

稱觀自在菩薩是也以自在名業言行得

自在如楞嚴稱無作妙力是也然諸法行

無非示使平持心地故此終以持地讚顯

佛說是普門品時衆中八萬四千衆生皆發

無等等阿耨多羅三藐三菩提心

無等等者無等即物無與等等者俱物爲

等既物無與等而能與物爲等此如來最

上德也觀音體此以成普門行隨類應化

與物爲等故聞其風者皆能發如是心此

所謂以圓行成最上之德

音釋

峻
切
思俊
詛
側
勵
兜
徐
姊

妙法蓮華經要解卷第十八

遠九

三

妙法蓮華經要解卷第十九

遠十

溫陵開元蓮寺比丘 戒環 解

妙法蓮華經陀羅尼品第二十六

前品從妙而圓既備成德然無以守衛恐魔事或作妄沮成功故二聖二天十神說

陀羅尼咒誓以駐辟魔障消除衰患故名

陀羅尼品而爲弘護流通也然成德之行既妙而圓烏有魔事耶楞嚴曰本覺妙明昧爲頑空一切魔鬼皆依空昧明能破暗故一人發真彼皆消殞况彼群邪戀此塵勞恐其聚裂於三昧時僉來惱亂是爲奢摩他中微細魔事故須防衛茲實流通之助也陀羅尼此云總持即念慧妙力諸佛密語有一字多字無字之異能以一字總無量法持無量義摧邪立正殄惡生善皆

真言

爾時藥王菩薩即從座起偏袒右肩合掌向佛而白佛言世尊若善男子善女人有能受持法華經者若讀誦通利若書寫經卷得幾所福佛告藥王若有善男子善女人供養八百萬億那由他恒河沙等諸佛於汝意云何其所得福寧爲多不甚多世尊佛言若善男子善女人能於是經乃至受持一四句偈讀誦解義如說修行功德甚多

藥王即喜見後身苦行持經志存弘護故

發起此品然持經功德前品屢明如法師
品比功不過供十萬億佛隨喜品比功不
過施諸外物及得小果而已至此比功則
勝供八百萬億河沙佛者明持行益深獲
功益勝也將伸弘護先問得福者使後世
知其持行益深獲功益勝而遞爲弘護耳

達十
爾時藥王菩薩白佛言世尊我今當與說法
者陁羅尼咒以守護之即說咒曰

安爾一曼爾二摩禰三摩摩禰四吉隸五遮
梨帝六賒咩音七賒履由雜反多瑋八羶輪千反

帝九目帝十目多履十娑履十一阿瑋娑履十二

桑履十四娑履十五义衰十六阿义衰十七阿耆膩十八

羶十九賒履二十陁羅尼二十一阿盧伽婆婆奈若

反皺蕉毘义膩二十二禰毘剝二十三阿便哆都

反遷禰履剝二十四阿亶哆波隸輸地遲貞反二十五

溫究隸二十年究隸二十一阿羅隸二十二波羅
隸九首迦差初九反阿三磨三履三十佛
默毘吉利秦帝三十達磨波利差猜誰反帝三
三僧伽涅瞿沙禰三十婆舍婆舍輸地三十
曼哆邏三十曼哆邏义夜多三十郵樓哆三十

八郵樓多惱舍略來加反惡義邏四十惡義治

多治四十阿婆盧四十阿摩若那多夜四十

二

世尊是陁羅尼神咒六十二億恒河沙等諸
佛所說若有侵毀此法師者則爲侵毀是諸
佛已

達十
由彼諸佛所授故也次釋尊印讚

時釋迦牟尼佛讚藥王菩薩言善哉善哉藥

王汝愍念擁護此法師故說是陁羅尼於諸

衆生多所饒益

爾時勇施菩薩白佛言世尊我亦爲擁護讀

誦受持法華經者說陁羅尼若此法師得是
陁羅尼若夜叉若羅刹若富單那若吉蕪若
鳩槃茶若餓鬼等伺求其短無能得便即於
佛前而說咒曰

痲 誓 隸一 摩訶痲隸二 郁枳三 目枳 四 阿

隸五 阿羅婆第 六 涅隸第七 涅隸多婆第 八

伊綈 狗履 反 挝九 章綈 十 挝 旨綈 十一 挝 涅隸墀

泥 十二 涅梨墀婆底 十三

世尊是陁羅尼神咒恒河沙等諸佛所說亦
皆隨喜若有侵毀此法師者則爲侵毀是諸

佛已

妙音欲詣娑婆禮觀釋迦及見藥王勇施

當知勇施乃此會上首故特說咒諸佛亦
皆隨喜者亦隨喜擁護也富單那熱病鬼
吉蕪起屍鬼鳩槃茶可畏鬼伺窺察也

爾時毘沙門天王護世者白佛言世尊我亦
爲愍念衆生擁護此法師故說是陁羅尼即
說咒曰 阿梨一 那梨二 魏那梨三 阿那盧
四 那履五 拘那履六

世尊以是神咒擁護法師我亦自當擁護持
是經者令百由旬內無諸衰患

爾時持國天王在此會中與千萬億那由他
乾闥婆衆恭敬圍繞前詣佛所合掌白佛言
世尊我亦以陁羅尼神咒擁護持法華經者
即說咒曰 阿伽蘭一 伽蘭二 罪利三 乾陀
四 利 梅陁利 五 摩蹬者 六 常求利 七 浮樓莎
泥 八 頸底 九

世尊是陁羅尼神咒四十二億諸佛所說若
有侵毀此法師者則爲侵毀是諸佛已

毘沙門天王力護佛法持國東方天王

爲四方首

爾時有羅刹女等一名藍婆二名毘藍婆三名曲齒四名華齒五名黑齒六名多髮七名無厭足八名持瓔珞九名臯帝十名奪一切衆生精氣是十羅刹女與鬼子母并其子及眷屬俱詣佛所同聲白佛言世尊我等亦欲擁護讀誦受持法華經者除其衰患若有伺求法師短者令不得便即於佛前而說咒曰

害人之鬼無甚於羅刹女鬼子母亦誓護持則餘神可知

伊提履一伊提泯二伊提履三阿提履四伊提履五泥履六泥履七泥履八泥履九泥履十樓醯十一樓醯十二樓醯十三樓醯十四多醯十五多醯十六多醯十七兜醯十八堯醯十九寧上我頭上莫惱於法師若夜叉若羅刹若

餓鬼若富單那若吉蔗若毘陁羅若犍馱若烏摩勒伽若阿跋摩羅若夜叉吉蔗若人吉蔗若熱病若一日若二日若三日若四日若至七日若常熱病若男形若女形若童男形若童女形乃至夢中亦復莫惱

此咒皆鬼神之名毘陁羅等即食精氣爲殃害鬼若一日等皆熱病鬼若男形等皆魑魅類

即於佛前而說偈言

若不順我咒 懨亂說法者 頭破作七分

如阿梨樹枝 如弑父母罪 亦如壓油殃
斗科欺誑人 調達破僧罪 犯此法師者
當護如是殃

諸羅刹女說此偈已白佛言世尊我等亦當身自擁護受持讀誦修行是經者令得安隱

離諸衰患消衆毒藥

此偈所以勅咒使嚴警也阿梨樹枝墮地自成七片弑父母破僧爲三逆壓油多殺蟲命弄斗蹕秤或爲雷霆震殺皆重罪也調達曾於佛會將五百比丘散去爲破和合僧○次釋尊印讚

佛告諸羅刹女善哉善哉汝等但能擁護受持法華名者福不可量何況擁護具足受持供養經卷華香瓔珞末香塗香燒香幡蓋伎樂燃種種燈酥燈油燈諸香油燈蘇摩那華油燈瞻萄華油燈婆師迦華油燈優鉢羅華油燈如是等百千種供養者皇帝汝等及眷屬應當擁護如是法師說是陀羅尼品時六萬八千人得無生法忍因總持妙力得忍成行也

妙法蓮華經妙莊嚴王本事品第二十七
妙圓之行既獲弘護又說轉邪者弘護所以衛外轉邪所以正內外衛內正乃可安於妙圓而進於普賢常行故也天台云昔四比丘結契山林精持妙法以餓乏故一人分衛見王威仗忽生愛著壽終因是俗念感生爲王號妙莊嚴其三友得道欲救其失以其邪著非愛緣無能感動於是一爲端麗婦二作聰明兒托生設化轉其邪心令歸正覺以致法華會上爲華德菩薩今叙其本事欲使行人以道自衛外防見魔內絕惡覺消息邪緣入佛知見故爲轉邪流通此實諸佛究竟進修最後垂範也楞嚴法會將終說過去佛覺明分析微細魔事使行人諳識心垢洗除諸魔褫鬼直

至菩提無諸乏少於大涅槃不生迷悶其

意同此

爾時佛告諸大衆乃徃古世過無量無邊不可思議阿僧祇劫有佛名雲雷音宿王華智多陀阿伽度阿羅訶三藐三佛陀國名光明

達下

七

莊嚴劫名喜見

彼佛法中有王名妙莊嚴其王夫人名曰淨

德有二子一名淨藏二名淨眼

淨德者雖示染身其德本淨淨藏者妙理之所蘊淨眼者妙智之所顯皆其德所具

也以具妙淨理智故能轉邪而爲華德

是二子有大神力福德智慧久修菩薩所行之道所謂檀波羅密乃羅波羅密羼提波羅密毘梨耶波羅密禪波羅密般若波羅密方便波羅密慈悲喜捨乃至三十七品助道法

皆悉明了通達

方便非六度之數而通濟六度慈悲喜捨

名四無量心大乘行法以四心爲體六度爲用道品爲助乃成佛果而二子皆悉明了通達三十七品者身受心法爲四念處

斷惡生善爲四正勤欲勤心觀爲四神足信進念定慧爲五根五根伏魔外爲五力念擇覺喜輕安定捨爲七覺支見思語業命進念定爲八正道也念以觀法勤以進修足以趣證根能不拔力能不屈覺能決了正能總攝皆相因而設也心性如大地念處如種子正勤如種植神足如抽芽五根如根五力如莖七覺如花八正如果二子悉具所謂具體者也

又須菩薩淨三昧日星宿三昧淨光三昧淨

色三昧淨照明三昧長莊嚴三昧大威德藏

三昧於此三昧亦悉通達

淨三昧者淨藏淨眼之所本也日星宿衆本智別智之照用也淨光能現衆像淨色不爲形礙淨照照了萬法長莊嚴非素法

連十

身大威德藏具大神用

八

爾時彼佛欲引導妙莊嚴王及愍念衆生故說是法華經

時淨藏淨眼二子到其母所合十指爪掌白

言願母往詣雲雷音宿王華智佛所我等亦

當侍從親近供養禮拜所以者何此佛於一切天人衆中說法華經宜應聽受

毋告子言汝父信受外道深著婆羅門法汝等應往白父與共俱去

淨藏淨眼合十指爪掌白母我等是法王子

而生此邪見家

母告子言汝等當憂念汝父爲現身變若得見者心必清淨或聽我等往至佛所

於是二子念其父故踊在虛空高七多羅樹現種種神變於虛空中行住坐卧身上出水

身下出火身下出水身上出火或現大身滿虛空中而復現小小復現大於空中滅忽然

在地入地如水履水如地現如是等種種神變令其父土心淨信解

得果人能現十八變即此類也

連十一

九

時父見子神力如是心大歡喜得未曾有合掌向子言汝等師爲是誰誰之弟子二子白言大王彼雲雷音宿王華智佛今在七寶菩提樹下法座上坐於一切世間天人衆中廣說法華經是我等師我是弟子父語子言我

今亦欲見汝等師可共俱往

於是二子從空中下到其母所合掌白母父
王今已信解堪任發阿耨多羅三藐三菩提
心

我等爲父已作佛事願母見聽於彼佛所出
家修道爾時二子欲重宣其意以偈白母
願母放我等 出家作沙門 諸佛甚難值
我等隨佛學 如優曇鉢華 值佛復難是
脫諸難亦難 願聽我出家

母即告言聽汝出家所以者何佛難值故

於是二子白父母言善哉父母願時往詣雲
雷音宿王華智佛所親近供養所以者何佛
難得值如優曇鉢羅華又如一眼之龜值浮
木孔而我等宿福深厚生值佛法是故父母
當聽我等令得出家所以者何諸佛難值時

亦難遇

阿含云妙高山下海中有一眼之龜一孔
之木龜得木孔可濟沉溺然其木流遠須
彌三十年乃一相值且以一眼趁一孔爲
至難喻佛法難值如此蓋衆生偏見自溺
而聖人且不世出故也

彼時妙莊嚴王後宮八萬四千人皆悉堪任
受持是法華經淨眼菩薩於法華三昧义已
通達淨藏菩薩已於無量百千萬億劫通達
離諸惡趣三昧欲令一切衆生離諸惡趣故
其王夫人得諸佛集三昧能知諸佛祕密之
藏

此叙合宮有德易爲勸化也後宮之德根
機純利淨眼之德妙達實相淨藏之德善
能接濟夫人之德深知法要王及後宮爲

當機淨藏淨眼爲能教機教相契所以易化也集三昧者諸佛會要三乘指歸也集得是二昧則能知祕藏

二子如是以方便力善化其父令心信解好樂佛法於是妙莊嚴王與羣臣眷屬俱淨德夫人與後宮采女眷屬俱其王二子與四萬二千人俱一時共詣佛所到已頭面禮足遶佛三匝却住一面

爾時彼佛爲王說法示教利喜王大歡悅爾時妙莊嚴王及其夫人解頸珍珠瓔珞價直百千以散佛上

於虛空中化成四柱寶臺臺中有大寶牀敷百千萬天衣其上有佛結跏趺坐放大光明所施珠瓔化成法空之座柔忍之衣寶覺之體乃佛力示現以發其正念也

卷十

十一

爾時妙莊嚴王作是念佛身希有端嚴殊特成就第一微妙之色

時王一覩勝相頓覺世間幻惑之色無可愛樂故深讚佛身微妙之色此則邪心拚絕正念現前故得受記

時雲雷音宿王華智佛告四衆言汝等見是妙莊嚴王於我前合掌立不此王於我法中作比丘精勤修習助佛道法當得作佛號娑羅樹王國名大光劫名大高王其婆羅樹王佛有無量菩薩衆及無量聲聞其國平正功德如是

佛號取廣蔭群生國名取破諸邪暗劫名取超諸貴高皆符其因行以一念淨信風化臣妾使皆得法利即廣蔭行破邪行也由是捨王位得佛位即超諸貴高也

其王即時以國付弟與夫人二子并諸眷屬
於佛法中出家修道王出家已於八萬四千
歲常勤精進修行妙法華經過是已後得一
切淨功德莊嚴三昧

於八萬四千歲修法華行所以淨治塵勞

也過是已後謂塵勞既淨則三昧現前遂

轉邪見染莊嚴爲功德淨莊嚴也

即昇虛空高七多羅樹而白佛言世尊此我
二子已作佛事以神通變化轉我邪心令得
安住於佛法中得見世尊此二子者是我善

知識爲欲發起宿世善根饒益我故來生我

家

二子神變即現十八變事宿世善根即四

人結契事

爾時雲雷音宿王華智佛告妙莊嚴王言如

是如是如汝所言若善男子善女人種善根
故世世得善知識其善知識能作佛事示教
利喜令入阿耨多羅三藐三菩提大王當知
善知識者是大因緣所謂化導令得見佛發
阿耨多羅三藐三菩提心

即證前言之當也

大王汝見此二子不此二子已曾供養六
五百千萬億那由他恒河沙諸佛親近恭敬
於諸佛所受持法華經愍念邪見衆生令住
正見

爲陳二子轉邪遠因也言歷事恒沙多佛
愍念邪見衆生則不獨今日轉妙嚴之邪
耳

妙莊嚴王即從虛空中下而白佛言世尊如
來甚希有以功德智慧故頂上肉髻光明顯

照其眼長廣而紺青色眉間毫相白如珂月

不隨心不生邪皆法化教戒之力故讚而

齒白齊密常有光明唇色赤好如頻婆果

謝之

歷讚相好妙德者深悟昔所愛着皆幻惑
也功德智慧讚福智二嚴

爾時妙莊嚴王讚歎佛如是等無量百千萬

遠十

十三

億功德已於如來前一心合掌復白佛言世
尊未曾有也如來之法具足成就不可思議
微妙功德教戒所行安隱快善

前讚福報此讚法化也言具足成就等者
以已一聞正法遂能轉邪一得三昧遂能

一切世間諸天人民亦應禮拜

佛說是妙莊嚴王本事品時八萬四千人遠
塵離垢於諸法中得法眼淨

塵謂邪見垢謂邪染外遠見塵內離垢染

則法眼圓明絕諸瑕翳矣此以正力助成

我從今日不復自隨心行不生邪見憍慢嗔
恚諸惡之心說是語已禮佛而去

妙法蓮華經普賢菩薩勸發品第二十八

窮妙法之始終然後盡出興大事合諸佛之智行然後見如來全身是經之作始於文殊問答終於普賢勸發二十八品條理一貫乃所以窮始終合智行大事因緣於

達十

十四

是乎畢如來法身於是乎全也蓋智能發覺所以作始行能成德所以成終而中間事法無非智行互相資發也華嚴最初因門以文殊發信以開進修之序最後果門以普賢結法以示果後之行今經意義潤

然同矣普賢者德無不遍曰普佑上利下曰賢即遍具妙德上佑佛化下利羣物之號也勸發者勉進義也前雖開佛知見明因地心顯佛本跡成果地覺泊明妙圓之行猶是等覺行相若坐於此而不進則有

與萬法相應不二真實法門即此意也所謂常行者泯覺觀無作任冥物我同染淨一切平常恬然自在此妙覺向上之事遮那平道之教乃所謂平實者也然須詳斯經依佛知見海順流而入滿足一切佛功

如逐塊之流呵教執俗棄智絕行直謂無修則妙法始終復何所明大事因緣亦幾乎息矣然則始於佛之知見終於普賢常行極而示之存乎教備而證之存乎人達者宜盡心焉

爾時普賢菩薩以自在神通力威德名聞與大菩薩無量無邊不可稱數從東方來

普賢統事法界圓具萬行即事而真其應身無乎不在且於法會之終示從東方來者東方震帝之所出也以法會至此因地智圓果地覺滿十一地妙圓之行備則進修之功已盡妙覺之體已成於是依無功用行出震利物故示從東來華嚴過十一地說佛海功德既終即說如來出現利世間行即此意也以不離常行無爲應物故

曰自在神通以德無不遍名無不聞故曰威德名聞與無邊菩薩俱來者示萬行圓攝無盡也

所經諸國普皆震動雨寶蓮華作無量百千萬億種種伎樂

妙音來儀亦雨蓮華作伎樂皆所以彰顯妙行宣流法音也

又與無數諸天龍夜叉乾闥婆阿修羅迦樓羅緊那羅摩睺羅伽人非人等大衆圍繞各現威德神通之力到娑婆世界者閻崛山中

頭面禮釋迦牟尼佛右達七匝

白佛言世尊我於寶威德上王佛國遙聞此娑婆世界說法華經與無量無邊百千萬億諸菩薩衆共來聽受唯願世尊當爲說之

寶威德上王者利行自在之號也普賢既

具自在威德又言從寶威德上王佛國來者明其示現蓋體諸佛自在利行普賢心

聞能洞十方故曰遙聞

若善男子善女人於如來滅後云何能得是

法華經

得者得之以成德行也前之所問唯修持讀說而已獨此問云何能得是經欲人人自得也

佛告普賢菩薩若善男子善女人成就四法於如來滅後當得是法華經一者爲諸佛護念二者植衆德本三者入正定聚四者發救一切衆生之心善男子善女人如是成就四法於如來滅後必得是經

爲錦護念謂道契佛心植衆德本謂福慧兩辦入正定聚即體佛妙體也發救生心

達十

七

即行佛妙行也四法成就乃能真得是經

以成普賢常行

爾時普賢菩薩白佛言世尊於後五百歲濁惡世中其有受持是經典者我當守護除其衰患令得安隱使無伺求得其便者若魔若

魔子若魔女若魔民若爲魔所著者若夜叉若羅刹若鳩槃茶若毘舍闍若吉蕪若富單那若韋陀羅等諸惱人者皆不得便

普賢常行無復已利純是利他故自此皆則流通法化護持經人無別行相毘舍闍

惱害鬼韋陀羅厭禍鬼

是人若行若立讀誦此經我爾時乘六牙白象王與大菩薩衆俱詣其所而自現身供養守護安慰其心亦爲供養法華經故是人若坐思惟此經爾時我復乘白象王現其人前

其人若於法華經有所忘失一句一偈我當教之與共讀誦還令通利

普賢乘象表行儀庠序也言若行若立若坐者示於四威儀中念念常見普賢妙行爾時受持讀誦法華經者得見我身甚大歡喜轉復精進以見我故即得三昧及陀羅尼名爲旋陀羅尼百千萬億旋陀羅尼法音方便陀羅尼得如是等陀羅尼

由此經故真見普賢常行之體於一切法返本還源名旋陀羅尼既能旋未返本即復旋體入用於一塵一法一切時處方便利生逆順自在名百千萬億旋陀羅尼此即普賢遍一切處之行也前旋爲轉物所謂旋假入空後旋爲應物所謂旋空入假轉物爲體應物爲用若未能轉物而遽然

應物則爲物所轉矣然則二旋異用而相需也法音方便即隨應說法之行

世尊若後世後五百歲濁惡世中比丘比丘尼優婆塞優婆夷求索者受持者讀誦者書寫者欲修習是法華經於三七日中應一心

精進滿三七日已我當乘六牙白象與無量菩薩而自圓達以一切衆生所喜見身現其人前而爲說法示教利喜亦復與其陀羅尼咒得是陀羅尼故無有非人能破壞者亦不爲女人之所惑亂我身亦自常護是人唯願世尊聽我說此陀羅尼咒即於佛前而說咒曰

利智修觀凡以三七日爲期以求感應故滿三七日普賢即現楞嚴云縱彼障深末得見我我與其人暗中摩頂擁護安慰古

今修觀屢有瑞應亦屢有不應者或不精誠或非利智故也楞嚴云欲作道場先持淨戒淨衣清心若本戒師及同會中一不清淨如是道場終不成就圓覺云鈍根未成者常當勤心識諸障若消滅佛境便現

前

達十

十九

阿檀地宅買及一檀陁婆地二檀陁婆帝三檀陁鳩舍隸四檀陁修陁隸五修陁隸六修陁羅婆底七佛駄波羶禰八薩婆陁羅尼九薩婆婆沙阿婆多尼十修阿婆多尼十一僧伽婆履又尼十二僧伽涅伽陁尼十三阿僧祇十四僧伽波伽地十五帝隸阿墮僧伽梵略十六薩婆僧伽地十七薩婆達磨修波利刹帝十八薩婆薩埵樓駄僑舍略阿堯伽地十九辛阿毘吉利地帝二十世尊若有菩薩得聞是陁羅尼者當知普賢神通之力若法華經行闇浮提有受持者應作此念皆是普賢威神之力

後世聞咒持經皆藉普賢流通願力也

若有受持讀誦正憶念解其義趣如說修行當知是人行普賢行於無量無邊諸佛所深種善根爲諸如來手摩其頭

持經要行在正憶念蓋憶不正則雜想變亂念不正則邪習汨擾欲成深行難矣故

普賢於此特明正憶念行而下文再三言之憶念既正則所行無非普賢妙行故爲

如來摩頂印證

若但書寫是人命終當生忉利天上是時八萬四千天女作衆伎樂而來迎之其人即著七寶冠於采女中娛樂快樂何況受持讀誦正憶念解其義趣如說修行

持經五功書寫爲下若但書寫即生忉利况具五功又正憶念其福倍勝如下所明若有人受持讀誦解其義趣是人命終爲千佛授手令不恐怖不墮惡趣即往兜率天上

達十

二十

彌勒菩薩所彌勒菩薩有三十二相大菩薩衆所共圍遶有百千萬億天女眷屬而於中生

此文明倍勝之福也忉利乃第二天

所生天人兜率即第四天所共乃菩薩

倍勝可知矣授手提接義也內宮天女皆

以化生無有疑惑

有如是等功德利益是故智者應當一心自書若使人書受持讀誦正憶念如說修行世尊我今以神通力故守護是經於如來滅後闍浮提內廣令流布使不斷絕

爾時釋迦牟尼佛讚言善哉善哉普賢汝能護助是經今多所衆生安樂利益汝已成就不可思議功德深大慈悲從久遠來發阿耨多羅三藐三菩提意而能作是神通之願守護是經我當以神通力守護能受持普賢菩薩名者

普賢若有受持讀誦正憶念修習書寫是法

華經者當知是人則見釋迦牟尼佛如從佛口聞此經典當知是人供養釋迦牟尼佛當知是人佛讚善哉當知是人爲釋迦牟尼佛手摩其頭當知是人爲釋迦牟尼佛衣之所覆

此助宣正憶念佛以成普賢前說也則見釋迦如從口聞等者謂能正憶念佛則即是經而見佛不滯於名相即是法而造妙不異於親聞也是爲供佛謂能作佛事爲佛所讚謂深契佛心摩頂言得果有期衣覆言成柔忍行皆由憶念佛正故冥證若此如是之人不復貪著世樂不好外道經書手筆亦復不喜親近其人及諸惡者若屠兒若畜猪羊雞狗若獵師若街賣女色是人心意質直有正憶念佛福德力是人不爲三毒所惱亦不爲嫉妬我慢邪慢增上慢所惱是人少欲知足能修普賢之行

此皆正憶念力也有正憶念自然具足安樂行法而三毒妬慢所不能惱真能修普賢行當知正憶念力實妙行真要所以普賢再三言之釋尊又復助揚意使後世知普賢所以勸發成行不在多術唯正憶念足矣行人識之

普賢若如來滅後後五百歲若有人見受持讀誦法華經者應作是念此人不久當諸道場破諸魔衆得阿耨多羅三藐三菩提轉法輪擊法鼓吹法螺雨法雨當坐天人大衆中師子法座上○已得正因故

普賢若於後世受持讀誦是經典者是人不復貪著衣服卧具飲食資生之物所願不虛亦於現世得其福報

憶念既正趣操自高所願自遂

卷一

三

若有人輕毀之言汝狂人耳空作是行終無所護如是罪報當世世無眼若有供養讚歎

之者當於今世得現果報若復見受持是經者出其過惡若實若不實此人現世得白癩病若輕笑之者當世世牙齒疎缺齶唇平鼻手腳癱戾眼目角瞖身體臭穢惡瘡膿血水腹短氣諸惡重病

報應之理出乎性命之微益由性生心由命制業心以內感業以外召各從其類毫末不忒意報應之於心業猶萬形之於模範焉吉凶美惡類自爲範莫不相肖是以毀持經之正見則世世無眼供養讚歎則得現果報出其過惡則得惡疾輕笑之者則獲醜狀若手脚之繚曲乖戾眼目之角摶倒視皆醜狀也又加之臭惡瘡膿鼓喘重病凡皆心之模範以類自召故也世之艱窮醜陋殘白疾者不無宿因昧者雖覩其然莫知其所以然故或不覺愆失而行將自及爲可悲者此佛所以助揚普賢利行而因言報應之端使人以類推之知

達十

自防閑庶無愆失之患蓋亦利行之緒餘也易道彰往察來明得失之報因貳以濟民行其意同此

是故普賢若見受持是經典者當起遠迎當
如敬佛

說是普賢勸發品時恒河沙等無量無邊菩薩得百千萬億旋陀羅尼三千大千世界微

星等諸菩薩具普賢道

萬億旋陀羅尼即遍一切處之行也。普賢

道即遍一切處之體也說普賢品無量菩薩皆得是行刹塵菩薩皆具是體者妙法

此其至即所謂以常行成不德之德是乃法華實相之極證也自藥王品進至於此

爲以行契智常然大用之門華嚴法終善財復見文殊普賢爲以行契智果法大用常然之門其意同此彼經云善財遊百城

妙法蓮華經要解卷第十九

羅尼及具普賢道也

與諸佛等此皆最後勸發使得萬億旋陀羅尼及具普賢道也

媛於堯切 又清活切 女嬪先餕奴罪切
爾無髮所居之處 天不雨餕 犬也
擘補革切 裂也
喘充冤切 息也
覩乃侯切